



Early European Books, Copyright © 2011 ProQuest LLC.  
Images reproduced by courtesy of The Wellcome Trust, London.  
763/D





Early European Books, Copyright © 2011 ProQuest LLC.  
Images reproduced by courtesy of The Wellcome Trust, London.  
763/D



Early European Books. Copyright © 2011 ProQuest LLC.  
Images reproduced by courtesy of The Wellcome Trust, London.  
762/D




97

763


X




[Bembo (Pietro)]














62474

PETRI BEMBI  
CARDINALIS HISTO-  
RIAE VENETAE  
LIBRI XII.



Cum priuilegiis.  
VENETIIS M. D. LI.

*fac. Antverantij*



*Iulij III. Pont. Max. Caroli V. Imp. Henrici Gallos  
rum Regis II. Illustrissimi Senatus Veneti, Cosmi Medicis  
Florent. Ducis II. et aliorum principum, sub quorum ditione  
libri imprimuntur, priuilegijs cautum est, ne quis intra annos quin-  
decim, præter eum, cui Carolus Gualterutius mandarit, hosce li-  
bros impressioni subicere, aut ab alijs impressos uenales habere aus-  
deat. Qui horum principum auctoritatem hac in re neglexerit, is  
non solum è christianorum se communitate exterminatum, ac exes-  
erationibus appetitum, sed ea etiam pecunia, quæ in singulis illorum  
diplomatibus continetur, mulctatum cognoscet.*



AD ILLVSTRISSIMVM AC

sapientissimum Venetiarum Principem,

Franciscum Donatum,

in historias Petri

Bembi præfatio.



VLTAE sunt artes, Illustrissime Princeps, quod tu minime ignoras, cum ad uitam sustentandam inuentæ, tum ad cultum, aut etiã ad iucunditatem, uoluptatemq; ab hominibus excogitatæ: quarũ in singulis qui excellenti quadam scientia aliquando præter cæteros præstiterunt, magno apud omnes gentes in honore habiti sunt. nec uero iniuria id quidem: nihil est enim præstantius, nihil omnino homini laudabilius, quàm de hominum genere bene, quoquo modo possis, mereri; eamq; cognationem, quam à natura habeamus, nostra quoq; opera, hoc est dandis beneficiis, arctius etiam astringere. Quod si harum commoditatum, utilitatumq; effectibus tantus honos habendus est singulis: quibusnam tandem aut literarum, aut operum monumentis eius gloriam digne illustrabimus, si cuius ars, ac disciplina tanta sit, ut uniuersa illa contineat, ac complectatur? aut si quis harum omnium artium moderator, & tanquam architectus, quatenus quaque, quoq; modo progredi debeat, indicet, atq; præscribat? est enim difficilis illa quidem, & ardua in præclaris nonnullorum hominum ingeniis, cæterarum omnium princeps, ac magistra, minime tibi quidem incognita, facultas quædam; quæ ciuitatum procurationem sibi uindictet, & reip. regendæ muneris præposita sit. atq; eam artem ciuilem rationem, eandeq; prudentiam licet appellare. cuius quidem discipline qui compotes sunt, non una modo, aut altera re separatim hominibus commodare, ac prodesse, sed uniuersam eorum gubernationem suscipere uolunt: nec illud efficere solum conantur, illi priuatim ut libere, ut tuto, ut iucunde, sed ut bene etiam beateq; publice uiuant. Quamobrem tanti, ac tam præ-



clari operis artifices, non ut reliquarum artium magistri laudibus solum extollēdi sunt, sed etiā, si modo dictu fas est, in deorum immortalium numero, quibus cum humanarum rerum procuracionem propemodum communem habeant, uenerandi atq; colendi, atq; horum artificum uestro in senatu maxima omnino facultas est, semperq; fuit: id quod res ipsa declarat: nec enim tanta, tamq; opulenta, ac beata ciuitas uel constitui initio potuit, uel deinceps tantopere augeri, & crescere; nec uero uno, eodemq; statu, & tanquam habitu tot secula, id quod nullis gentibus, ut totius uetustatis memoriam quam longissime repetamus, usu euenit, manere, sine eximia quadam prudentia, sineq; admirabili, ac diuino cum patrum uestrorum, tum uestro, qui nunc eam talem tantamq; tuemini, ac regitis, consilio. Ac uideo equidem pluribus, quam uos, gentibus aliquot annos dominatam olim esse ciuitatem unam, aut alteram. ueruntamen (libere enim dicam, quod sentio) imperium bello partum sæpe feritatem, sæpe uiolentiam, atque iniustitiam, fortunæ quidē certe temeritatem semper habet. at bene domi constituta res, sineq; ullo ciuitatis motu tot seculorum diuturnitate firmata, una, eadēq; reip. ratio moderata & concors, ea uero tota uirtutis est, ac prudentiæ. itaque in bello illæ, atque inter arma cum stetissent, in pace, atq; in ocio conciderunt; quippe, quæ non ratione, sed uiribus nixæ erant: nec enim quietis, hoc est parendi uicissim atque imperandi, artes didicerant. uos pacis, id est iuris, atque æquitatis studia, quæ uincula sunt ciuitatis, cum domi coleretis, nihilominus foris belli gloria floruistis. etenim cum ciuili illa, quæ modo à me appellata ratio est, duabus contineatur partibus, bellicarum, atque urbanarum rerum scientia, & tractatione: illi, cum bellicam laudem nimio adamassent opere, alteram reip. partem incultam propemodum reliquerunt: uos utranque quidem, sed præcipuam, ut par fuit, maxime adepti, complexiq; estis. ergo ex omni Italia, tanquam è turbulento ac formidoloso mari aliquo, tanta hominum uis ad uos confluit, uestramq; in urbem se se, quasi in portum, refert, uix ut iam capere tantam multitudinem suis illa testis possit: qui cum è suis ciuitatibus in uestram migrant, protectiores

ab



ab iniuriis fore domi se se uestre aduenas, quam suæ ciues, certe confidunt. Maxima igitur laus uestre reip. uobisq; magnis, clarisq; in ea ciuibus debetur; quæ in eo munere, quod de humanis omnino muneribus longe præstantissimum sit, una excelat plurimum. præstant enim alii aliis uirtutibus populi. uobis autem id unum proprium perenneq; est, rem tueri publicam; hoc est humanum genus animi ratione, non felicitate aliqua, quæ casum habeat necesse est, & uarietatem fortunæ propriam, conseruare. hæc enim & stabilis ipsa est, & diuturnitatem atq; adeo, quoad res humanæ ferre possunt, perpetuitatem, quod uestra est resp. consecuta, parere consuevit. Fortunati igitur ciues tui. Te uero equidem semper beatum, semper gloriatione dignum existimaui: cum propter multas, magnasq; uirtutes tuas, animi magnitudinem, continentiam, suauissimos, eosdēq; castitatis, religionis, pietatis plenissimos mores, dulcem illam tuam, uberemq; dicendi copiam; tum uero propter diuinam istam animi tranquillitatem, atq; æquitatem. cum enim tot annos in hac post hominum memoriam clarissima repub. summa cum gloria uersatus sis; cumq; dignitatis præstantia quam plurimis semper anteieris: communis iuris æquabilitatem trāfisti nunquam, ac ne cogitasti quidem. quin etiā (memini enim me de hoc ipso Bembo sæpe audire) cum tua te uirtus multos iam ab hinc annos ad summam amplitudinem perduceret; tuaq; præclarissima patria ad istum honoris gradum, quem unū altissimum habet, ipsa te tollere cuperet, atque adniteretur, deq; tua gloria sollicita esset: liberaasti tu eam omni cura, atque aliis quibusdam, in istum locum magna quadam properatione festinantibus, cum anteuertere posses, ultro cessisti. magnifica uero laus, honorem, tantum præsertim, cuius cupiditate cæteri inflāmentur, tam modice concupiscere. sed eadem tamen ipsa resp. simul ac data facultas est, iandudum tibi debitam, tibiq; reseruata dignitatem istā ad te scilicet eundē cupidissime detulit. neque tamen, ne sic quidem, æquabilitatem animi tui tu illam ueterem amisisti. atque hoc ipso in honore maximo gerendo, cum grauitatem ac dignitatem sic adhibeas quasi reip. humanitatem, facilitatemq; ut tuam retines. ita nec ciuitatis maximæ



clarissimæq; maiestas desideranda est; nec optimi, præstantissi-  
miq; ciuis humanitas requirenda. Quid, quod duarum maxi-  
me insignium uirtutum, integritatis, ac prudentiæ tuæ, duos es-  
se certissimos testes uidemus, paupertatem alterius, summam al-  
terius tuam apud omnes gratiam, atque authoritatem? quo qui-  
dem ex testimonio intelligere omnes necesse est, ita te in rep. ad-  
ministranda ad octuagesimum usq; annum ætatem contriuisse,  
ut publicas res sic procurares, ut tuas; sic autem ab ijs manus  
abstineres, ut ab alienis: ita factum esse, ut, cum tu sic animû in-  
duxisses tuum, ut bono ciui gratis reip. seruiendum esse statue-  
res; illa contra egregiæ tuæ erga se uoluntatis tibi præmium,  
quod habuerit præclarissimum, laudis & gloriæ tribuere cupie-  
rit. Ac mihi quidem in te intuenti uerum omnino uideri illud  
solet, quod à sapientibus traditum est. aiunt enim, homines fer-  
reis alios, alios æreis, quosdam argenteis animis gigni: esse etiã  
paucos illos quidem, sed tamē nonnullos, quibus aurea animo-  
rum natura data est, iisq; seorsum regendarum ciuitatum mu-  
nus à Deo assignatum: illos alios, quò sua quenque aut duri-  
tia, aut uilitas impellat, ferri: at uos ex illo aureo genere natu-  
ra ipsos per uos locupletes atq; honoratos, ad salutem ciuium,  
populorumq; incolumitatem, uitamq; omnium quietam, & bea-  
tam ortos, nec honores concupiscere, & diuitias contemnere, &  
generosarum uolucrum ritu cœlum modo spectare, ubi uobis  
ciuitatum rectoribus, ac conseruatoribus certum locum, ac dif-  
finitum esse teneatis. Quæ cum ita se se habeant; tam præclar-  
hominum maximorum cœtus atque concilii instituta, tam diui-  
turnæ reip. moderationem, tam eximiæ ciuitatis magistratuum  
descriptionem, opes, & copias, tum res uestras domi belliq; ge-  
stas, à populis gentibusq; aliis audiri, manereq; ad posteros, non  
iam ad uestram modo gloriam pertinet, sed etiam ad eandem  
ipsam, in qua uersamini, atque exercemini, hominum salutis  
curam. habebunt enim exteræ nationes non modo, quod ma-  
gnopere laudent, quodq; admirentur plurimum, sed etiam  
quod imitari cupiant, undeq; exemplum petere possint, qualem  
esse optimam, firmissimamq; rempub. ac statum ciuitatis maxi-  
me diuturnum maximeq; expetendum, oporteat. Quare re-  
rum

rum uestrarum historia hæc, quam P. Bembus Card. uir idem clarissimus, idem scriptor unus omnium politicissimus, scripsit, merito & flagitata iam pridem à multis est, & expectata semper ab omnibus. quid enim aut ad delectationem iucundius, aut ad disciplinam ( est enim historia uitæ magistra ) grauius, constantius ue esse possit, quàm ciuitatis omnium prudentissimæ leges, mores, instituta, consilia, magnarum, uariarumq; rerum casus, atque euenta, de omnium dulcissimo elegantissimoq; auctore audire; eoq; ipso nec in mendacio gratiam quærente, nec in ueritate similitatem extimescete? fuit enim Bembi non stylus modo purus & elegans, sed animus etiam synce- rus in primis ac simplex. qui cum summa iam senectute patriæ uestræ rogatu, uel iussu potius res uestras gestas scribere aggrederetur, neque ad hanc ætatem, memoriãq; nostram peruenire se se scribendo posse confideret; sæpe mecū locutus est, & quidem crebro te appellans, cum permolestè ferret excludi se se tempore à tuarum laudum, tuiq; similium commemoratione. qua nos re commoti faciendum nobis esse duximus, ut eius historiam ad te potissimum mitteremus, optimi scilicet senis uiriq; clarissimi, atque hominis disertissimi plenas grauitatis, plenas auctoritatis, plenas dignitatis lucubrationes; ad sanctissimum itidem, è germanoq; illo Platonis auro senem, in clarissima post homines natos rep. principem, ciuemq; unū omnium facundissimum. Accipies igitur tu illam, non à nobis quidē, sed à Bembo per nos tibi missam: patriæq; tuæ utrunq; gratulabere: eadem enim res maxime scriptione, ac memoria dignas ad historiam suppeditauit; eadem grauiissimum luculentissimumq; suarum rerum gestarum scriptorem, ac testem peperit.



...the first of the month of the year ...  
...the second of the month of the year ...  
...the third of the month of the year ...  
...the fourth of the month of the year ...  
...the fifth of the month of the year ...  
...the sixth of the month of the year ...  
...the seventh of the month of the year ...  
...the eighth of the month of the year ...  
...the ninth of the month of the year ...  
...the tenth of the month of the year ...  
...the eleventh of the month of the year ...  
...the twelfth of the month of the year ...  
...the thirteenth of the month of the year ...  
...the fourteenth of the month of the year ...  
...the fifteenth of the month of the year ...  
...the sixteenth of the month of the year ...  
...the seventeenth of the month of the year ...  
...the eighteenth of the month of the year ...  
...the nineteenth of the month of the year ...  
...the twentieth of the month of the year ...  
...the twenty-first of the month of the year ...  
...the twenty-second of the month of the year ...  
...the twenty-third of the month of the year ...  
...the twenty-fourth of the month of the year ...  
...the twenty-fifth of the month of the year ...  
...the twenty-sixth of the month of the year ...  
...the twenty-seventh of the month of the year ...  
...the twenty-eighth of the month of the year ...  
...the twenty-ninth of the month of the year ...  
...the thirtieth of the month of the year ...  
...the first of the month of the year ...  
...the second of the month of the year ...  
...the third of the month of the year ...  
...the fourth of the month of the year ...  
...the fifth of the month of the year ...  
...the sixth of the month of the year ...  
...the seventh of the month of the year ...  
...the eighth of the month of the year ...  
...the ninth of the month of the year ...  
...the tenth of the month of the year ...  
...the eleventh of the month of the year ...  
...the twelfth of the month of the year ...  
...the thirteenth of the month of the year ...  
...the fourteenth of the month of the year ...  
...the fifteenth of the month of the year ...  
...the sixteenth of the month of the year ...  
...the seventeenth of the month of the year ...  
...the eighteenth of the month of the year ...  
...the nineteenth of the month of the year ...  
...the twentieth of the month of the year ...  
...the twenty-first of the month of the year ...  
...the twenty-second of the month of the year ...  
...the twenty-third of the month of the year ...  
...the twenty-fourth of the month of the year ...  
...the twenty-fifth of the month of the year ...  
...the twenty-sixth of the month of the year ...  
...the twenty-seventh of the month of the year ...  
...the twenty-eighth of the month of the year ...  
...the twenty-ninth of the month of the year ...  
...the thirtieth of the month of the year ...



P E T R I B E M B I R E R V M V E  
N E T A R V M H I S T O R I A E  
L I B E R P R I M V S.



R B I S Venetæ res annorum quatuor & quadraginta scribere aggredior, non iudicio, aut quod ita mihi libuerit, sed quodam quasi fato, uel certe casu. nam cum, Andrea Nauge-  
rio, cui hæc publice cura tradita fuerat, in lega-  
tione Gallica uita functo, Decemui-ri à me col-  
legii decreto petiissent, ut, quando is moriens  
sua scripta comburi iussit, ipse ea in re atque munere patriæ meâ  
opem requirenti ne deessem: pudore uerecundiaq; recusandi ad  
uariam atque multiplicem, quodq; uere possum dicere, multo  
maxime operosam scriptionem me contuli annos natus sexagin-  
ta: ut, nisi reip. extaret postulatio, merito me homines repre-  
hendant id ætatis ausum tantum onus sustinere. bella enim plu-  
rima propeq; continentia atque maxima cum ab Italiæ, Germa-  
niæ, Galliæ, Hispaniæ populis & regibus, tum à Turcarum im-  
peratoribus excitata, uel terra uel mari gesta, sunt scribenda:  
quorum quodque iustum potius historiæ uolumen atque sepa-  
ratum posse conficere, quàm uno omnia comprehendere atque  
contineri, nemo non dixerit. Multa præterea domi uel senatus  
consulta, uel leges, uel iudicia illustria, uel noui magistratus,  
multi hospitio reges liberaliter accepti, multi honores dijs im-  
mortalibus habiti, multæ prodigiorum domi forisq; prædictio-  
nes, tempestatum ac syderum miræ uicissitudines, huius tem-  
poris memoriam exemplis innumerabilibus referferunt: quæ  
colligere & mandare litteris, nec amantis otium animi est, nec  
minimæ industriæ. Sed nihil est profecto tam arduum, quin id  
patriæ charitas exuperet, apud eos uiros præsertim, qui præcla-  
ra in urbe geniti, atque optima in rep. educati, suæ ciuitatis tem-  
perationem institutaq; adamauerunt. Ita qui rebus tot atque tan-  
tis complectendis nunquam sponte curam & cogitationem ad-  
hibuissim: mihi enim post Romanos labores bonæ tandem ua-

A



letudini, quam penitus amiseram, restituto, paterna in uilla fundi  
Patauini maiorem anni partem requiescenti, satis erat pascere le-  
uioribus tractandis artibus animum; uoluntate meorum ciuium  
perspecta facile adducor, ut nihil mihi refugiendum putem, dū  
eorum studiis satisfaciam. Ab illorum igitur commentariorum  
fine, quos Marcus Antonius cōscripsit, exorsus; quo ab fine X ui-  
ris placuit, ut initium scribendi facerem, continuato rerum filo  
historiam ad hoc diei, si uita suppetet, perducam. tot enim,  
quot supra dixi, anni inter illius scripta atque hoc tempus inter-  
cesserunt. Ac eo sane tempore quo in statu esset, quam haberet  
faciem resp. satis est ab illo demonstratum: quæ bello Ferrariensi  
confecto, fœderibusq; initis, plus biennium soluta oneribus ci-  
uitate, & pacato imperio est usa. Idem autem post hæc & publi-  
cæ quietis, & Sabellici librorum finis fuit: pacemq; illam, &  
tranquillitatem reip. bellum statim Rheticum excepit: neque ei  
profuit, quod suo se in otii capto iam portu magna perseveran-  
tia continuisset. eius belli leuissima de causa initium hoc fuit.  
Erat nonnullarum cum Rhetorum, & Noricorum, tum earum  
terræ Germaniæ gentium, quæ sunt his finitimæ, Dux atque  
princeps Sigismundus Federici Romanorum imperatoris fra-  
ter, homo non malus, sed qui facile malis hominibus crederet.  
ei cum senatu Veneto iam inde à maioribus orta necessitudo in-  
tercedebat. itaque uetusta consuetudine homines mercaturæ  
dediti omnibus ex reip. municipiorum uicinitatibus eius ad op-  
pida libere cōmeabant: mercatumq; imprimis celebrem apud  
Beurense quotannis fieri solitum stato tempore petebant. id  
cum anno post urbem conditam millesimo sexagesimo sexto  
fecissent: Sigismundi iussu ipso in mercatu, ad quem fide pu-  
blica uenerant, comprehensi suis cum rebus, custodiæq; sunt  
traditi. Et iam antea Sigismundi operæ nostros homines, qui  
argenti fodinas in alpiibus exercebant, fugatos conductis iure  
gentium secturis, & cuniculis deturbauerant: eosq; cuniculos,  
quod essent ipsorum uicis, & municipiis uicini, ui, atque ar-  
mis paruo negotio possidebant. Eius rei causam quærentibus  
dictitabant Sigismundi clientelas, quæ in imperio Veneto essent  
in Benaci lacus ripa, suis è finibus expelli: de qua tamen con-  
trouersia



trouersia iactari pridem cœpta per interpretes ab utrisque amice disceptabatur. itaque cum eos, qui ex reip. municipiis ad ipsorum mercatum uere inito uenerant, in uincula coniecissent; omnibus ex eorum oppidis, atque agris, tum ex Lepontiis & Heluetiis coacto iam milite apud Tridentum Germani hominum numero ad x. millia; id enim agere constituerant; Gaudenzio Amasiano duce in Veronensium fines impetum faciunt. Germanos autem illos diximus, quando nunc quidem omnes eæ ab alpibus nationes, compluresq; aliæ uno nomine Germani appellantur. Flumen est Athesis, ex Arbona monte profluens: quod duobus auctum fluminibus Tridentum fertur: alpesq; reliquas dirimens uallem plerunque angustam efficit Veronam usque, quam etiam intersecat. eius fluminis leuam ingressi ripam Germani, ac xv. millibus passuum confectis, oppidi Rouereti in alpium angustis laxiore paulo, atque apertiore loco positi suburbanis ædificiis direptis, pugna etiam cum præfidiariis militibus commissa, defenso municipio ad prædam, & populationem se se conuertunt: eaq; facta, in uicinos oppido pagos tumultuose militem recipiunt. Hac re nuntiata senatus decreuit; ut & ueterani milites, qui in Carnis, & Taurifanis, quiq; in Gallia hyemauerant, omnes ilico Veronam conuenerent; & delectu statim habito noui milites conscriberentur: creatisq; ad id confestim legatis Petro Diedo Veronæ præfecto, Hieronymo Marcello dat negotium, ut ex usu reip. bellum administrent. Iulium etiam Cæsarem, qui regnum in Camertibus obtinebat, copiarum reip. imperatorem, accersitum ex Umbria eodem contendere magnis itineribus iubet. Interea Germani ad oppugnationem Rouereti iis, quæ bello essent usui, celerissime comparatis, & castris ad oppidum positis, tormentorum ui, quibus maxime abundat ea natio, muros quatere atque deicere instituunt. id cum plures dies labore non intermisso fecissent, ac magnam murorum partem aperuissent; neque Venetus imperator, qui iam eò uenerat, propter Germanorum magnum numerum repellere hostem posset: sæpe oppugnare omni missilium telorum genere scalisq; ad murum positis adorti, sæpe cum clade repulsi, postremo oppidum capiunt.

A ii



eis in oppugnationibus unum eorum teli genus maxime oppidanos terruit: de quo propter nouitatem prætereundum non uidetur. Pilas ferreas non magnopere coherentes, picis atque bituminis plenas, igne incluso tormentis muralibus impellebant. eæ pilæ muro impactæ infrangebantur, ac plures in partes dispergebantur: quibus ex singulis ignis proficiebat acri cum flamma sic, ut quæque earum pars quantumuis parua hominem corripere: pice autem illisa retinebantur, ne excuti, ne uere reuinci possent. ita fiebat, ut neque in muro consistendi, neque quæ opus essent administrandi, neque se defendendi militibus facultas daretur. quod ubi semel, atque iterum est animaduersum, culcitræ, centonesq; quos habere poterant, aquis immergebant: eosq; pinnis, & fenestris, ex quibus propugnarent, interponebant. iis neque pix adhærescere, neque ignis nocere propter humorem poterat. ita se tandem, compluribus suorum ante absumptis, præmunire ac tueri didicerunt. Sed capto oppido, ut diximus, Nicolaus Priolus prætor, & milites, qui ad defendendum municipium per alpium crepidines missi hostem circumfusum, & sedentem fefellerant, suaq; uirtute, ac fortitudine eorum impetum ad eam diem sustinuerant; in arcem se recipiunt. Veneti, qui omnino in se longe maius, quam initio crediderant, excitatum bellum uiderent; neque in Camerte, quantum oportebat, industriæ, uirtutisq; agnoscerent; à Roberto Seuerinate petunt, ut imperium totius belli unâ cum Camerte administrandi magna opinione ciuitatis sibi delatum læto animo accipiat: & quo celerius fieri potest, suis cum militibus, & liberis, claris bello adolescentibus, uiæ se det, atque in Rheticum, alpesq; contendat. Robertus, qui, posteaquam Innocentius Pontifex maximus eum missum fecit, in agrum Patauinum se contulerat, atque ibi apud oppidum Citadellam, quod ei unâ cum urbanis ædibus, cumq; amœnissimo ac peramplo apud Veronam fundo, & uilla in Ferrariensis belli exitu senatus dono dedit, sine imperio, sine stipendio complures menses commoratus ægre se suosq; milites aluerat; illam ipsam sibi occasionem suæ uel amplificandæ, uel omnino retinendæ dignitatis dari uotis omnibus cupiebat. itaque accepto per oportune imperio ad bellum



3

bellum proficiscitur, eò cum uenit, modo in spe, modo in metu Veneti sæpe fuerunt: sæpe Marte ambiguo leuibus præliis est certatum. ponte etiam nauibus imposito, ut & copiae transmitti, & commeatus ex altera fluminis regione supportari facile possent, utranque ripam coniunxit. Eodem quoque tempore Germanorum militum centuriæ aliquot in Vicetinos, & Feltrinos saltus, atque in Carnorum fines repente immissæ plus terroris, quam periculi intulerunt: propterea quòd Hieronymus Sarnianus, summo in Foroiuliensibus natus loco; cuius proauus Federicus ob singulare, atque præclarum in temp. studium & ciuitate ab ea, & iure comitorum donatus fuerat; cum suis clientibus, & agrestium manu, quam celeriter coegerat, atque armauerat, superatis alpium, quæ adiri non consueuerant, iugis, illos omnia uastantes, ac depopulantes à tergo aggressus ita fregit, atque concidit, ut non nulli timore incitati è montium, in quibus erant, cacuminibus, rupibusq; fugientes se præcipitauerint. qua de re gratiæ illi à senatu actæ, militesq; tercentum attributi: quos Hieronymus Iacobo fratri habendos permisit; cum ipse pacatæ, ac ciuili sese uitæ, quam militari, mallet tradere. Sed dum reliqua sic, ut dixi, agerentur: Rouereti arce muralibus tormentis propè diruta, Prætor, quiq; cum eo erant milites, deditionem faciunt. Et iam summa æstas præterierat: cum ueteris exempli res utrunque exercitum spectaculo haud magnopere cruento tenuit. Erat Germanorum numero iuuenis acer, & fortis Georgius Sonnenbergius, claro loco natus, qui turmae equitum præerat, ad hunc cum esset allatum, Antonium Mariam Seuerinatem, imperatoris filium, inter suos iactauisse, si ex hostium copia egregius uir quispiam equestri pugna congredi uelit, se cum illo decertaturum, proq; sua parte ostensurum, quantum belli gloria Itali Germanos antecellant: mittit ad Venetos tubicinem, qui Antonio denuntiet, se paratum esse certaminis fortunam experiri. remissus ad Georgium tubicen refert, expectari cupide illum ab Antonio. itaque die dicta clausum in campum, atque ad id comparatum æquo inter bina castra spatio diuersa ex parte uterque armatus, atque adornatus se se intulit: & parua interiecta mora citatis equis concurrunt.



Antonius hastam in Germani pectus infringit: thorax ægre ha-  
stæ impetum sustinet. tum uero equus Antonii iam incitator,  
neque sat habilis contineri, in trabales campi munitiones ita im-  
pegit, ut iis perfractis, atque disiectis, ipso humi prolapso An-  
tonius se eiiceret. itaque pedes ex equite factus ubi hostem in  
equo iam conuersum districto in se gladio uenientem uidet;  
post tignum trabibus, repagulisq; sustinendis solo fixum se se  
continet. ita Germanum assultantem, atque ictus de superiore  
loco adigentem, districto item gladio repellebat: quæq; ipsum  
poterat, appetebat: nam equum lege prius dicta ferire Antonius  
non poterat. sed dum crebris ictibus acriter uterque rem ge-  
rit, neque quantum uult proficit; propterea quod galea, tho-  
race, cæterisq; ferreis indumentis totum penè corpus protege-  
batur: Antonius iracundiæ plenus, quod iniquam subire di-  
micationem cogeretur, seq; ipse tacite incendens, hosti cupi-  
dus ferienti impetu facto gladium aufert. ille ab ephippiis fer-  
rea, quam gerebat, abrepta claua pro gladio utitur. Tum ue-  
ro clara ad Germanum uoce, Quid tu autem, inquit Anto-  
nius, me cogis unum cum duobus depugnare: quorum alteri  
lex, alteri aliena arma sunt præsidio? si uir es, æquo Marte ma-  
num confere. ita Germanus existimationem hominum ueri-  
tus, & magno præterea animo, equo & ipse desiluit: compre-  
hensiq; statim inter se se, atque arte diu luctati, ambo concidunt.  
erant utrisque magna, & procera corpora, & uires cor-  
poribus pares. Germano tamen cadenti paulum superincubuit  
Antonius: sed eius dexterum brachium à sinistro Germani hu-  
mero, atque adeo armorum corporisq; pondere sic premeba-  
tur, ut eo uti non posset. tum Germanus impedito, atque im-  
plicito Antonio, ipse manu dextera liber, abrepta sica, quæ  
femori Antonii erat alligata, nates ei conuulnerat: ea tantum  
corporis parte sua illum tegumenta non munierant. uulnere  
Antonius accepto; cum omnino nullam defendendi se se uiam  
sibi reliquam, & facultatem uideret; sicq; aciem Germanus  
ictu altero, atque tertio adegisset; uince, inquit, quando ita  
uoluit fortuna, casu enim non uirtute uincis, gloriam certa-  
minis hosti dedit: quem quidem uictor magno apud se hono-



re plures dies ad exercitū habuit; curatoq; uulnere, donis etiam additis ad patrem remisit. Post hæc paucis interiectis diebus, cum Germani insolentius, atque laxius uagarentur, Venetiq; eos adoriri ex insidiis statuisſent, re ab hostibus per exploratores cognita, ipsi in hostium insidias inciderunt. ita excepti à pluribus pauciores, conglobati uirtute, atque armis se tuebantur, fortiterq; præliabantur: ex quibus Robertus modo uoce imperatoris curam, modo manu militis operam præstabat. uerum crescente hostium multitudine circumseptus iam iamq; tenebatur: cum Antonius filius id conspicatus (non enim longe aberat) in confertissimam hostium aciem se iniecit: fortissimeq; pugnās, aciemq; submouens, patri se recipiendi facultatem præbuit: ipse in hostium potestatem uenit, reliqui fugati paucis captis atque interfectis se in castra receperunt. neque multo post Camers in febriculam incidit: eoq; Veronam delato, rerum & totius belli administratio in Robertum incubuit. Germani autem cum inopia commeatus adducti, qui segniter subministrabatur, tum stipendii fide non seruata indignabundi palam ad seditionem incitabantur: cuius rei periculum eorum præfecti ueriti, inducias ab imperatore Veneto petierunt. sæpius re iactata, non impetratis induciis, nocte intempeſta Rouereti arcem incendūt; & prima luce conclamatis uasis omni cum exercitu abeunt. mirum id Venetis uideri: neque satis credere hostem abeundi consilio discessisse: itaque timere insidias, quas etiam essent experti. sed ubi illos longius profectos ab exploratoribus cognouerunt; Rouereti oppidum recipiunt. interim Robertus certior factus omnes hostium copias domum discessisse: auxerat enim eam rem, atque affinxerat multa rumor: sibi autem miles ex Ra uennati, & Piceno, & Umbria per eos dies accersitus animum addiderat: statuit ulterius progredi, Tridentumq; ipsum, si res processerit, obsidere: ut, qui ultro, ac sine causa bellum Venetis intulissent; scirent, atque cognoscerent, bellum gerere in eorum finibus & posse Venetos, & audere. eo consilio cum legatis communicato, Lucas Pisanus ætate iam grauior, quem senatus Petro Diedo summisserat, atque illum ad præfecturam Veronensem reuerti iusserat; existimare se se inquit, è rep, non esse tan-



tam rem eo tempore aggredi. primum, quòd credibile non esset Germanorum exercitum, quem ipsi florentissimum paulo ante uidissent, ita iam in ultimas Germaniæ terræ latebras se abdidisse, ut non modo reuocari, atque restitui, sed etiam adaugeri paucis diebus non possit in tam promptis ad arma capienda populis, tantoq; in periculo municipium ad gentes Italas continendas opportunissimum amittendi. deinde, quòd, si tum reipub. ad hostem repellendum copiarum satis fuit: quanquam quis eum reppulit? sua ipse sponte se recepit: sed sit omnino repulsus: ad inferendum tamen bellum, atque in hostium fines irrumpendum, obsidionesq; ducendas, id ipsum non suffecturum: præsertim cum existimandum sit omnem Germaniam, ne tantum dedecus admittatur, eò conuenturam, uiresq; suas in communem utilitatem explicaturam. postremo, quòd, si offensus in aliquo sit, non esset receptui locus circumuentis ab hoste undique mediis in alpium iugis. tum itinerum angustias esse pertimescendas, quas euadere uix pacati possent. præstare autem reip. bellum quoquo modo confecisse, dum oneribus extraordinariis finis imponatur: quàm spe melioris uictoria ipsam periclitari, ciuesq; conflictari tributorum conferendorum quotidie causa. defessam ciuitatem bello Ferrariensi otium inglorium laboribus paulo etiam honestioribus, certoq; cum fructu præponere: nedum ambiguis, & periculosis præferat. Hæc mea quidem, inquit, est sententia: qui fortasse uel meo uitio, uel etiam senectutis, omnia timeo. uos consulite: &, quod optimum factu est, id sequamur. Tum Marcellus facto à collega silentio in hunc est modum loquutus: Nihil sibi dubitationis dari, si ea ita essent, quemadmodum Pisanus dixisset, quin sit ab inuadendis hostium finibus Tridentiq; oppugnatione abstinentum. quæ enim eius regionis pars, quod municipium tanti esset, ut cum eiusmodi conflatione belli, totiusq; Germaniæ irritatione, consensuq; comparetur? uerum habere se rem suo quidem iudicio longe secus. nam neque Germanorum copias sua se sponte dissipauisse: sed cum rei frumentariæ inopia coactas, tum stipendio non persoluto egentes, desperantesq;, domum quenque suam reuertisse: neque qui collectam iam manum,



num, prospereq; agentem com meatu supportando alere, stipē-  
 diisq; repræsentandis retinere, ne diffugeret, non potuerit; eum  
 nouo conficiendo exercitui stipem, alimenta q; subministra-  
 turum: multo enim facilius contineri stantia, quàm lapsa, pro-  
 strata q; subleuari. Neque uero esse uerendum, conuenturam  
 contra Venetos Germaniam, quos amicos semper habuerit;  
 ut Sigismundi rebus auxilio sit; qui nullo reliquorum princi-  
 pum consilio, nulla ipse laceffitini iniuria bellum reip. intul-  
 lerit: præsertim cum Federicus imperator eius frater neque pe-  
 cunia, neque milite, neque ulla eum re omnino iuuerit; præ-  
 se q; potius tulerit, id se nunquam bellum probauisse. qui a su-  
 is negligatur; eum ab alienis, exteris q; hominibus auxilia impe-  
 traturum credere, cuius tandem esset timoris? quod si dica-  
 tur, non iam quidem Sigismundi, aut alicuius priuatim causa  
 Germanos principes ad arma capienda conspiraturos, sed pla-  
 ne sua; ne Tridento capto Venetis aditus pateat ad sese: respō-  
 deri posse, complura esse in alpibus reip. oppida, diuersis ac-  
 quisita, adiecta q; imperio tempestatibus; quibus ex oppidis  
 Germaniæ populi adeantur; ab his ipsis non longinquam locis  
 Feltriam, Belunium, quamq; in Carnis Ciuidalem appellant:  
 complura præterea itinera uicis, & castellis munita cum hoc in  
 alpium ad orientem solem tractu, tum uero etiam in Brixiano-  
 rum finibus ad Moernam atque Licates; in Bergomatium Sebi-  
 ni lacus fauces, uallemq; uniuersam Triumpilinorum, quiq; ad  
 Lepontios, Lariumq; lacum saltus, atque angustia pertinet.  
 Neque tamen ullo tempore Germanos principes conspirauisse  
 eis ab oppidis atque finibus repellendi Venetos causa: neque  
 nunc, si Tridentum capiatur, conspiraturos: falsuros potius  
 atque affirmaturos, iure id, meritoq; Sigismundo accidisse; qui  
 amicæ ciuitati bellum temere intulerit. Nā quod ad uiarum  
 angustias attinet; quantulum esset iter Tridentum usque? id ta-  
 men ipsum patefieri ante oportere; quæq; sint castella Germa-  
 norum ipsa in uia, ea esse capienda, ne quid hostile post tergū  
 relinquatur. Extremum autem quod fuerit in collegæ rationi-  
 bus, defessam ciuitatem belli oneribus malle quiescere: ad id  
 respicere ipsos non oportere: Tridento enim capto non eā mo-

B



do pecuniam, quam hanc in belli partem, paucorumq; dierum moram erogari oportuerit; sed illam etiam, quæ toto in bello per tot menses esset insumpta, cumulate sarcitum iri, uel magno potius cum fœnore, magnisq; utilitatibus repensum, & restitutum: uindicatum præterea iniurias ab iniquo acceptas hoste: auctum imperii fines: auctum etiam gloriam, nomenq; reip. clarius factum. quæ quidem omnia nisi tanti esse, quanti æstimanda iure sunt, maiores nostri duxissent; nunquam ipsos tot labores, atque tantos perluturos; nunquam ullum bellum suscepiuros fuisse; ut suam, & reip. gloriam unà cum imperii finibus protenderent. Postremo occasionis esse rem, ut Tridentum capiatur, uel militibus sua celeritate, atque uirtute in oppidum non præmunitum irrumpentibus: uel quod repentino nostri exercitus aduentu oppidani perterriti, ne deripiantur, deditionem faciant. itaque ad eos casus, euentusq; tentandos in iis, quas haberent ipsi, copiis satis uirium, atque præsidii fore. id si recte cesserit; ipsum illum suum collegam imprimis imperatorem summis laudibus laturum, qui eius rei consilium iniecit. sin se oppidum tuebitur; uastatis finibus, incensis eius regionis castellis, uicisq; incusso magno terrore hostibus, exercitum ultorem reduci oportere. id autem procliuiore omnium hominum uenia posse tum fieri; quàm si iam nunc inulti domum redeant. Porro non horis omnibus rei bene gerendæ facultatem exercitibus dari. quare cum datur; ab iis, qui præfunt, ea esse magnopere utendum: ne lapsæ temere, atque præteritæ recordatione pœnitentiâq; diu atque incassum torqueantur. Hac habita oratione à Marcello, Pisanus in collegæ sententiam se traduci facile passus est. itaque ambo imperatori permiserunt, uti de eo, quemadmodum sibi agendum uideretur, ita statueret. Ille, dimissis legatis, ad rem explicandam maturandamq; se dedit. sed quod erat in ipsa læua fluminis ripa, qua Tridentum, quâq; Roueretum est, inter utrunque oppidum ter mille ab Rouereto passus castellum Petra loco alto, atque edito, uix imminens sic, ut Petrensibus inuitis ea commeari tuto non posset; Petram in potestatem suam redigere, & itineris, & commeatus causa, & quod ita Marcellus censuerat, ne quid inimicum



micum post se relinquerent; primum omnium decreuit. Iis constitutis rebus, propterea quod à Rouereto uenientibus ob præcipitem montis, & crepidinum decliuitatem aditus ad Petrā omnino nullus erat: ab altera eius montis parte, qua adiri facile poterat, castellum oppugnare instituit. transmissō itaque Athesim per eum pontem, quem initio fecerat exercitu, atque aduerso flumine sesquihoræ itinere confecto, ad Callianum uicum, quod ultra Petram est passus circiter mille, ponte altero nauibus imposito iterum Athesim exercitum traducit; atque in planitie sexcentorum ferme passuum, quæ à montis radicibus ad flumen pertinet, consedit, præmissis equitibus leuis armaturæ, qui præcurrerent, atque, an manus aliqua hostium cogeretur, cognoscerent, sibiq; renuntiarent. equites spretis imperiis prædæ spe uagari, & populationem facere cœperunt. Interim cum Tridentini pontem esse factum cognouissent: non Petrensibus modo, sed sibi etiam, suisq; rebus ueriti, soluto exercitu, oppido non communito, imparati ab rebus omnibus, à Georgio Petræ planæ principe, quod est castellum ultra Tridentum, impetrant, uti cum iis, qui eò se receperant, militibus, coacta celeriter agrestium, & montanorum hominum manu, ire obuiam properet; hostemq; si potest, moretur, dum à Sigismundo auxilia conueniant, ille collectis, quos ei casus obtulit, militibus, & tum suorum, tum eorum, qui Besinum uicum in summis alpium Calliano imminentium culminibus incolebant, rapto agmine ad mille hominum numero, magno cum timpanorum & cornuum strepitu eo de monte se demittere incipit: atque, ut se iugum implicabat, agmenq; partim se ostendebat, partim latebat; magnæ ad speciem esse copię iis equitibus, qui prædatum ierant, uidebantur; magnæ succedere, & priores consequi existimabantur. itaque cum propius, maioreq; cum strepitu descenderet; illi in fugam uertuntur; atque in alios incurrentes, eos in fugam uertunt. iamq; permixti passim equites, peditesq; tumultuose reuertebantur. id cum fieret, adessentq; Germani, fuga magis hostium, quàm sua uirtute incitati; manus Venetæ, quas ea planitie pars exceperat, retrocedere, ac fugere contendunt; atque in aciem imperatoris, qui acceptis de suo-



rum fuga nuntiis eò properabat, implicantur. tum imperator, quantum temporis exiguitas patiebatur, suos perterritos, fœdēq; fugientes increpitare, atque conuertere, hostem sustinere ac reprimere adnixus, fortiterq; diu pugnans, ingenti cæde utrinque facta, urgentibus Germanis cum suorum globo in flumen deiicitur; ibiq; periit. reliqua multitudo magis magisq; perterita pontem fuga petere contendit. id conspicatus Andreas Burgius præfectus militum, sperans, si pons rescindatur, fore, ut milites, equitesq; ablata fluminis transcendendi facultate continerentur; seq; in hostes necessario conuerterent: accurrens solutis retinaculis pontem propulit: quæ res in cōtrarium, atque ipse existimauerat, uertit; propterea quòd timor consilium plerumque non recipit. qui enim semel fugæ se mandauerant, ea spe, ut, si flumen transire possent, in tuto sese crederent futuros; ubi pontem sublatum uiderunt, plerique omnes se in flumen præcipitauerunt; & armis, equisq; depressi, atque impliciti perierunt. pauci ripam tenere potuerunt; quòd flumine maximo, rapido, & uorticoso impediabantur: ut essent omnes, qui ab hostibus pugnâtes interfecti sunt, quiq; in fluminis rapiente interierunt, circiter mille. unus Guidus Maria Rubeus cum sua equitum turma pugnæ initio per medios hostium cuneos uiam sibi armis & uirtute cum fecisset, atque in campum euasisset; Germanos exultantes in se conuertit; quibus cum dimicans, quid in bello animus, constantiaq; possent, palàm fecit. eorum enim partem cecidit: reliquos disiecit, fugauit: atque ita clariorem sibi uictoriam ex hostibus uictoribus, quod raro fieri assolet, comparauit. reliqui centuriones, equitumq; præfecti, cæteri q; qui fuga se abstinerant, per montium inuia, superatis iugis, nonnulli nauiculis excepti ad Rouereturum redierunt: ex quibus fuit Rubeus: qui se, atque suos magno labore noctu flumen traiecit. interfecti ex Germanis permulti non incruentam suis eam Venetorum cladem fecerunt. Veneti complures dies reintegrandis copiis consumpserunt. neque interea Germani iis in locis quidquam mouerunt; quando clade non multo leuiore accepta, quàm illata, exercitu & ipsis reparando opus fuit, in Vicerinis tamen, & Feltrinis



7

& Feltrinis alpium iugis, atque in Benaci lacus regione ea manu, quam conficere per occasiones poterant, utrique sæpe congressi, eade facta, castellisq; aliquot uel captis uel incensis, se se inuicem inferendis cladibus intentos paratosq; tenuerunt. Arcum autem municipium, quod quidem abest tria millia passuum à Benaci littore, magnis & obsessum antea, & expugnatum uiribus; cum propterea, quod ei bello causam dederat inita de finibus altercatione cum uicinis sibi in ora lacus populis, Sigismundoq; ad arma capienda incitato; tum, quod eius oppidi principes Veneti hostes nominis existimabantur; senatus incendendum & diruendum censuit. Burgius interea prodicionis apud Decemuiros accusatus, quod pontem ad Callianum, ut exercitum in fraudem coniceret, dolo malo propulisset; atque in uincula coniectus, Marci Beatiani senatus scribæ, qui ei bello cum legatis interfuerat, testimonio absolutus est, ordinibusq; redditus. Miserat ante eos dies ad Sigismundum Innocentius Roma Paridem Episcopum Auximi, qui eum hortaretur, uti bello finem imponeret: non esse tempus, imminente regno Italiæ, & Romanis rebus Turca, ut duo potentissimi ad illum repellendum populi leuissimis de causis armis inter se decertarent, odiisq; mutuis contereretur: ipso arbitro suarum cum Senatu Veneto discordiarum, si uellet, uteretur: se ei pro rerum æquitate non defuturum. is apud illum Legatus dies aliquot tractandis pacis conditionibus fuit. Venetias deinde cum mandatis est profectus: quibus à Senatu non probatis, re infecta Romam rediit de mense Septembri: cum ante Idus Sextiles Seuerinas imperator interiisset. egerat illud idem etiam cum Senatu Veneto Pontifex per suum apud ipsos internuntium Nicolaum Francum Episcopum Taurisanorum: qui ciuitatem & hortari, & monere non destiterat: sed nihilo minus irritus omnis eius conatus fuit: quoad fessus belli dispendio Sigismundus (alere enim exercitum non poterat) missis sæpe inter eos legatis fœdus cum Venetis percussit Idibus Nouembris. fœderis conditiones fuerunt, uti bello ablata, quæ antiquitus eorum, qui amississent, fuerint, restituerentur; & negociatoribus Venetis damna illata sarcirentur: quæ superessent inter eos res;



quibus de rebus non conuenerat; de iis Innocentii iudicium  
esset. is finis bello Rhetico fuit. milites deinde in hyberna sunt  
deducti: dimissusq; ob remp. segniter gestam Iulius Camers.  
Roberti uero duo liberi, Gaspar, atque Antonius, in reip. mi-  
litiam conscripti, sexcentis equitibus præficiuntur; centurionesq;  
aliquot, qui egregiam operam nauauerant, donis militaribus  
aucti: quorum uni etiam dos filiae numerata auri ternæ libræ.  
Erantq; iam Sebastianus Baduarius, Bernardus Bembus pater  
meus, legati ad Innocentium profecti cum aliis de causis, tum  
ut apud illum de castellis Nomio & Iuano captis à Veneto exer-  
citu, de quibus erat lis, disceptarent. His ita constitutis rebus,  
quod exhilarata pacis nomine ciuitas iam etiam ante hoc bel-  
lum in omnem luxum domesticum se se effuderat; insequen-  
tis anni initio leges sumptuariæ reuocantur. itaque cœnis Pa-  
uones, Phasianæ aues, lautioresq; epulæ; cubiculis stragulæ ue-  
stes ex auro, argento, purpura interdiciuntur: omnis ornatus  
muliebris decem auri libras excedere non permittitur: ampla  
delatoribus præmia, seruis insuper libertas decreta. quanquam  
cauerant etiam patres in Rhetici feruore belli, ne alea, ne uel  
lo alio præter ludum latrunculorum cum in urbe, tum per xxy  
millia passuum extra urbis fines in pecunia luderetur, exceptis  
nuptiarum celebritatibus, & cauponis, & ea fori parte, quæ ad  
columnas est, atque ipsa fori porticu: edictumq; ne iis in locis  
lusio auri uncie partem quintam excederet. uiarum etiam ur-  
banarum angustiis prospectum est, sublati tabernarum pluteis,  
qui in uias prominebant: pontesq; lignei, quibus uniuersæ pro-  
pè urbis insulæ aquis interfluentibus discretæ coniungebantur,  
ex lateribus, & lapide Istrico publice tota urbe fieri cœpti. At-  
que inter hæc Ioannes Bentiuolus Bononiensis, eius oppidi prin-  
ceps, uisendæ urbis, & salutandorum patrum causa Venetias  
uenit: atque à Senatu liberaliter acceptus, cum plures dies ea in  
re atque studio consumpsisset donatus ciuitate, ac iure comitio-  
rum domum rediit. quo quidem tempore infans biceps Pa-  
tauii natus est; uixitq; horas aliquot. cum nos pueri ad urbem  
uidimus, cum pro miraculo circumferretur. eorum duorum  
capitum utrumque suo cum collo, atque ceruicibus à summo



ita pectore suspendebatur, ut toti corpori esse par atque proprium posset: utrique ori eadem species inerat. Post eos dies Regina Datia, Roma domum rediens, Venetias & ipsa se contulit: acceptaq; regio apparatu, urbe inspecta, suburbiisq; perlustratis, uia se reddidit. eo tempore Hieronymus Rhearius; qui Sixti Pont. Max. beneficio duorum in Flaminia oppidorum, Fori Liuii, & Fori Cornelii, regnum obtinebat; suo in cubiculo a suis ciuib; trucidatus, atque in forum de fenestra proiectus, fœdum spectaculum populo prœbuit: implicuitq; intestinis, exterisq; bellis, atque incendiis ciuitatem: quæ quidem incēdia uix, ægrēq; nobilitatis interitus, & multorum hominum consecrata cædes restinxerunt. Neque multo post Galeotus Māfredus, Fauentiam item obtinens, admissis noctu ab uxore sicariis, suo & ipse in lectulo confossus, oppidum tumultu, & seditionibus impleuit. hæc senatui nuntiata cum à rei maritimæ cura non auerterunt. Erat iam antea sane rumor, classē ingentē, à Baiafete Turcarum Rege comparatā, in mare Aegæum uela facturam. itaque Francisco Priolo classis præfecto designato mandarunt patres, maturaret proficisci: & quoniam existimabant Baiafetem eo quidem maxime tēpore mentem, atque animum ad Cyprum insulam adiecisse; eō, quo celerius posset, contendere iusserunt. Is mense Aprili conscendens, Corcyram, deinde unā cum Cosma Pascalice legato Methonem adnauigauit. quē subsecutus Nicolaus Capellus item legatus auxit earum, quæ Methone erant, longarum nauium numerum. quibus cum nauibus Præfectus; erant autem triremes uiginti quinque, minora nauigia longa plus minus decem; die quinto Cyprum attigit. ea intellecta re Turcarum classis omnis generis longarum nauium, cum à Cypro non longe abesset, mare Issicum præteruecta, sine ullo usu in Hellespontum rediit. Auxerat Cypriam patribus curam; quod intelligebant Ferdinandum regem Neapolis, in Federici filii sui nuptias regina plecta, occupandæ insulæ occasionem quærere. ea erat Caterina Venetiis oriunda è gente Corneliorum clara, atque illustri: quam Marcus Cornelius pater Iacobo Lusiniāno regi Cyprio in matrimonium collocauerat, numerata regi pecunia dotis nomine aurī ad libras mil-



le. Eam rex breui tempore profluuiio uentris sublatus prægnan-  
tem reliquit, scriptis tabulis, quibus illam regni hæredem na-  
scitura cum sobole instituerat sub Veneti Senatus tutela: quo  
à Senatu Corneliam, tanquam reip. filiam, publica interposita  
fide acceptam, uxorem duxerat. itaque post mortem patris na-  
tus filius anno uertente natali suo diem cum obiisset; nouasq;  
res nonnulli eo in regno principes molirentur; classe ad insu-  
lam celeriter missa cum legatis, & Cornelio patre, qui reginæ  
assiderent, eos Senatus facile tumultus compressit. Tranquilli-  
tate insulæ restituta, mulier uidua auctoritate reip. quindecim  
iam annos post uiri mortem pacate regnum obtinuerat: cum  
per internuntios Ritium Marinum Neapolitanum, qui regi Cy-  
prio perfamiliaris fuerat, & Tristanum Cibeletum Cyprium,  
cui erat soror è reginæ famulis, Ferdinandus rex clam eas, quas  
dixi, nuptias procurabat. ii cum à Rege missi in insulam descen-  
dissent, à præfecto classis capti atque in uincula coniecti sunt,  
Venetiasq; transmissi. tametsi Tristanus; qui, propterea quòd  
post regis Cyprii mortem tumultu excitato Andreæ Corneli-  
um reginæ patruum interfecerat, exulq; factus fuerat, sui pœ-  
nas sceleris se persoluturum sciebat; adamante, quem in annu-  
lo gestabat, per os in stomachum recepto, aqua insuper, quæ  
metalla diuidit, epota, dum portaretur, interiit. iis permoti re-  
bus Decemuiro: quanquam quidem non Ferdinandi modo ar-  
tes, sed Turcarum quoque insidias, inceptaq; timuerant: neque  
nihil etiam ab rege Syriæ propter uicinitatem metuebant: Ge-  
orgio Cornelio reginæ fratri dant negotium; uti se ad sororem  
conferat; eiq; persuadeat, ut relicta regni procuratione reip. ad  
urbem reuertatur; atque in patria malit, interq; suos, quod reli-  
quum est uitæ, secure, atque tranquille degere, quàm in remo-  
ta, suspectaq; insula alienigenis hominibus se se, uitamq; suam  
credere. Cornelius paruulo nauigio, ut celerius iter faceret, par-  
te itineris confecta, brumalibus diebus in Cyprum transmisit:  
& sorori, quam ob causam uenisset, exposuit. Nouitate rei per-  
mota recusare illa; neque sibi persuaderi uelle, uti regnum opu-  
lentum relinqueret, mulier regio uictu, regis honoribus assue-  
ta; quæq; sciret, quàm nullo præcipuo iure, quàmq; parce in  
rep.



rep. uiueretur: satis esse dicere, si, se mortua, ea insula in reip. potestatem redigatur. Contra Cornelius niti, rogareq; ne pluris terram. Cypriam, quam natale solum, quamq; remp. faceret: casus humanarum rerum esse incertos: fieri momento horæ posse, ut regno expellatur, tam potentibus regibus quasi obsessa, atque præcincta eius insulæ dominationem affectantibus; quam plurimis etiam Cypriis principibus à fœmina se se regi non obsecrare indignantibus. His eam casibus, & periculis una modo re, atque consilio pulcherrime ire obuiam posse; suum si regnum, quoniam liberis careat, reip. fidei iam nunc uiuens, florensque commiserit. Dum insidiarum, & suspicionum tempora non plenissima fuerunt; eam regno suo frui, non permisisse solum remp. sed etiam, uti frueretur adiunxisse; idque ipsi iucundissimum accidisse. Nunc autem; cum nihil à quoquam tuti sit; cum omnibus à uicinis regibus, atque etiam, à longinquis, & magno se iunctis, atque separatis mari omnes artes adhibeantur, & tanquam retia ei insulæ tendantur, quibus capi & teneri possit: Senatum ad id descendisse, quod unum sibi uisum esset omnium impendentium malorum, & periculorum remedium; quorum si reliqua ipsa nihil timeret; num illud non perhorresceret; quod, nisi præsidio celerrime comparato insulam Senatus firmauisset, æstate illam proxima Turcarum classis occupauisset; atque ipsam uel fugæ se se dare coegisset, uel captam Byzantium duxisset: quod eam casus, aut offensio aliqua compellere, turpiter uti faciat, potest; præstare, id incredibili reip. gratia, sui que facti summa cum gloria, celebritateque anteuertisse. Occasionem esse uariam, multiplicem, subitam: non singula hostium consilia prouideri semper posse: non semper homines in tempore adesse. inter intimum Adriatici maris sinum, Cypriaque littora multum terrarum, multa maria interesse. hæc illi cogitanda, hæc imprimis pensitanda esse. quod si nulla necessitas urgeat: quid esset tandem aptius, atque commodius ad eius famam nominis semperpiternam, quam suam illam patriæ regnum nobilissimum tradere: ut in annalibus referatur, Venetam remp. à sua ciue Cypri insulæ opulentissimæ imperio auctam, atque condecoratam fuisse: omni eam in regione nomen regium obtenturam. Si op



tio ipsius sit; cum tot annos apud Cyprios uixerit, debere eam cupere suis etiam ab ciuibus aliquando, suaq; in patria se saluta-  
ri, atque conspici; splendorē suum fratri, sororibus, propinquis,  
familia, demum ei urbi, in qua nata, alitaq; sit, communicare.  
nullius unquam fœminæ, neque etiam uiri, tam gratum aduen-  
tum reip. fuisse, quàm ipsius futurum. quòd si Venetiæ abie-  
ctum aliquod oppidulum esset, locoq; aspero, atque ignobili si-  
tum: esse tamen eius pietatis, atque humani plane animi, qua  
in terra nascens cœlum hauserit, reuiscere eam uelle, se seq; suis  
omnibus tanto post tempore ostendere. at cum ea omnino urbs  
omnes alias urbes, quas sol aspicit, propè excellere omnium  
hominum consensu prædicetur; atque ipsa in Italia omnium  
sit eius terræ urbium opportunissima: quidnam esse causâ pos-  
se, quamobrem à Senatu, atque à rep. tanto post tempore in-  
uitata non se eò libentissime conferat? quòd regina sit; quòd  
multos annos secure, atque feliciter regnarit; gratiam esse Se-  
natui, à quo id acceperit, referendam: eam gratiam pessime re-  
latum iri; si Senatum, se uocantem, omnibusq; honoribus prose-  
qui cupientem, despexerit. postremo cum ipse ei frater sit, atq;  
is frater, cui multum illa semper tribuerit; si hoc non impetret;  
non tam eam adduci non potuisse, ut reip. satisfaceret; quàm se  
noluisse; omnes homines existimatuos: eoq; se nomine ma-  
gnam totius ciuitatis inuidiam subiturum, liberisq; relicturum.  
itaque flecti se sineret: & cum sibi ipsa in præsentia consuleret:  
tum in posterū respiceret ad suos. nihil esse laudabilius, quàm  
secunda fortuna moderate uti, neque in summo semper gradu  
uelle consistere. Deos etiam immortales consueuisse, quibus  
se diu beniuolos præstiterunt, eos aliqua non iucunda re inter-  
dum probare, an se homines esse natos reminiscantur. nullas  
eam preces posse illis gratiores adhibere, nullam potiore ui-  
ctimam cadere, quàm eorum uoluntati, atque numini se se præ-  
sto esse profiteri. Deorum autem uoluntatem eam esse existima-  
re nos oportere, quæ patriæ sit, optimeq; cōstitutæ reip. Hæc Cor-  
nelius cum dixisset, homo apprime eloquens, non doctrina ille  
quidem, aut sapientiæ studiis, sed naturæ quadā ui liberali, atque  
munere: regina obortis iam lachrymis, ubi primum fari potu-  
it; si tibi



it; si tibi hoc ita frater uidetur, & mihi inquit uidetur: aut, ut uideatur, meo animo imperabo; sed magis à te patria regnum meum acceperit, quàm à me. His dictis, constitutoq; quid facto opus esset, anno insequente iam inito, classis præfectus, legatiq; re diuina facta, in Famagustæ oppidi foro, regina inspectante, atque iubente, reip. uexilla crexerunt: Cypriumq; regnum in prouinciam est redactum. Regina post hæc suppellectili regia imposita, Cornelio cum fratre naues longas conscendit; atque ad portus Veneti angustias æstate media appulit: exceptaq; ab Augustino Barbadico ciuitatis principe, & patribus, qui ei obuiam ierant, ad Nicolai fanum, quod est in portus littore, magna omnium ordinum, atque adeo omnium hominum in cymbis impositorum, prosequentiumq; lætitia, ipsa uēcta bucentauro naui, media inter patres, matronasq; nobilissimas ciuitatis, urbem est ingressa: quod ante id tempus Venetarum fœminarum contigerat nulli, lætissimusq; is profecto dies ciuitati fuit: Asulum subinde oppidum in Taurisanis collibus ei à Decemuiris dono datum, atque auri quinquaginta libræ in annos singulos constitutæ pensionis nomine: tum muneris in præsentia decem libræ. superiore anno autem; ut ad eas res, quibus de rebus ante dicendum fuerat, reuertamur; ne ciuitatem onerariarum nauium numerus, prouentusq; deficeret; Senatusconsultum factum est, quæ in nauibus exterarum nationum mercaturæ causa imponerentur; ea fisco deberi, uino Cretico excepto: pro quo tamen portorii nomine Venetis magistratibus pares amphorarum numero auri semuncias mercatores soluerent. tum quicumque nauem magnam onerariam fabricandam institueret; uti ei quæstores de triginta auri libris commodarent, eodem Senatus consulto continebatur. Post hæc cum Tremezeni rex; quod est oppidum Aphricæ, non longissime à freti angustiiis contra Hispaniam situm; à Senatu per legatos petiisset, uti ciuem Venetum eo mitteret; qui suis in oppidistribus ius reip. hominibus diceret: Senatus censuit; quo regiæ postulationi satisfaceret, uti magistratus crearetur, eoq; mitteretur, ad quem centesima mercium omnium, quæ merces eis in oppidis uenderentur, perueniret: estq; ad ea oppida omnium primus Aloisius Pizama



nus missus . eodem tempore Senatus iussu in Idri lacus ripa, loco alto, atque edito; quo in loco Anfo Brixiani agri uicus est: magni arx operis, crebraq; munitiones instituta, ac tertio confecta anno, omne millam oram tutiorem, ac celebratiorem reddiderunt. eodem quoque anno Decemuiri legem tulerunt, ne aperte suffragia inirentur: qui secus fecisset, suffragiorum iure, magistratibusq; annos duos careret. De Gracis item equitibus, qui reip. militiam faciebant, lex est lata; qui eorum colonia nomine ad insulam Zacynthum ire uellent; uti iis agri publice darentur, imprimisq; Theodoro Paleologo: si eò mittere aliquem suorum uellet; propter eius summum in reip. studium, summam fidem, singularemq; constantiam. Regis etiam Roxolanorum legatio cum præciosarum pellium muneribus ad Senatum uenit; petiitq; ut ad ipsorum littora reip. onerariæ naues longæ ad mercaturam exercendam mitterentur. ea de re propter longinquitatem itineris, nauigationisq; tedium, atque pericula, quod Meotis erat palus emetienda; nihil est impetratum. Legati, qui duo erant fratres, honorifice accepti, ueste uterque aurea, & auri libra publice donati Romam profecti sunt. In sequente uero anno; de quo paulo ante dicere incepimus: Franciscus Gózaga, qui Mantuæ regnum à maioribus traditum obtinebat; in reip. militiam conscriptus est: eiq; Senatusconsultum est missum: quo ex Senatus consulto equitibus cataphractis trecentis, sagitariis, qui equo uterentur, quadringentis; militibus ducentis & quinquaginta præesset. Cum autem Mathias Pannoniæ rex, homo rei militaris scientia, atque gloria clarus, bellum Federico imperatori duobus exercitibus intulisset; uno in Carnos, altero in Liburnorum fines immisso: Senatus uicinitate belli adductus per Antonium Bolduum, Dominicum Bolanum legatos, illum ad Federicum, hunc ad Mathiam missos, eorū regum animos iam exulceratos leniit. itaque indutiæ inter eos dictæ. Earum indutiarum tempore solutus belli occupationibus Federicus Tridentum uenit, omnem illum Italiæ tractum; qui à lacu Benaco ad Aquileiam secundum alpes est; si per Venetos liceat, animi causa perlustraturus. ea intellecta re Senatus Hieronymum Barbarum, Dominicum Grimanum; qui postea Cardinalis



dinalis fuit; Paulum Triuisanum, Hieronymum Leonem legatos ad eum misit: qui ei uenienti obuiam Roueretum pro retum profecti sunt; rei; p. nomine illum salutatum exceperunt. ea; postea legatio, quoad is in Italia fuit, ei praesto omnibus in reip. locis fuit: atque uti pro copia locorum quam maximi ei honores haberentur, studium, & diligentiam adhibuit. Federicus Benacum primum inuisens, omnia; littora biremi circumuectus, eius praesertim ora, quae ad meridiem uergit, aspectu atque fragrantia, quod est pomi medici plena, mirifice exhilaratus; tum aquae perlucidissimae amoenitate oblectatus, piscationibus; delectatus est. capitur eo in lacu propè medio, quae; altissima est aqua, piscis clarus Carpio ab incolis dictus, pedis plerunque longitudine: qui omnino piscis alibi non capitur. eum piscem capere, atque cognoscere Federico uoluptati fuit. Veronam deinde, tum Vicentiam, Bassianum, Tarisum, Cornelianum, Forum Iulii, Aquileiam, Portum; Naronis; qui locus in ipsius dictione est; lento itinere peruenit. E Naronis uero portu tres legatos ad Senatum misit actum gratias: quod per eius loca tam liberaliter, tantis; honoribus susceptus fuisset; tam; beniuolam in se se ciuitatis uoluntatem cognouisset. ab Aquileia finibus suum in regnum concessit. Eodem tempore ut infantibus uulgo quæsitis; qui publice alebantur, quorum; magnopere numerus excreuerat; largius uberius; esset: in Senatu lex est perlata; ut naualium urbanorum magistratus in annos singulos tritici molita sestaria, quae appellant, ducenta, uini amphoras duodecim eorum curatoribus darent: iis; rebus ex reip. horreis syluae caesae ad ignem domesticum carros ducentos eorum praefecti adderent. Terruit non multo post ciuitatem; quod ad diem tertium iduum Sextilis duae turres omnium, quae in urbe essent, maximae, atque altissimae noctu de caelo tactae conflagrauerunt, culminibus incendio late spectabili assumptis: una, quae in foro est, cuius erat culmen inauratum; altera, quae est media in urbe ad Francisci. Senatus post haec legibus aliquot promulgandis operam dedit; quae leges ad portoria urbis conseruanda pertinerent. etiam in Mariae clarum miraculis, unde ei nomen est, fanum exaedificatum iam eo lucu-



lentiore opere, quo ipsum angustius est, ut eius artificii elegan-  
tia, & sumptus aliorum templorum magnitudinem exæqua-  
rent; extremo anni die uirgines inductæ sunt. Anno insequen-  
te, quod in urbe sæuire pestilentia cœperat, triumuiros sanan-  
da ciuitate Senatus creauit: isq; postea magistratus nunquam  
est creari desitus. eo anno cum increbuisse rumor Baiasetis re-  
gis classem non multarum nauium in Aegæum prouchi, ut Ni-  
colaum Sumaripam è Paro insula, quam obtinebat, expelleret,  
eaq; potiretur: Nicolaus Capellus legatus cum triremibus qua-  
tuor Zacynthum contendit ei præsidio, si opus esset, futurus.  
Sumaripa ubi adesse legatum cognouit; insigne Venetum sustu-  
lit, se seq; reip. addixit. neque multo post Ioannes Cernoichius;  
cuius erat magnum in Illyrico nomē, magna auctoritas; legatos  
ad Senatum misit: cupere se se; ut Georgius filius suus Anto-  
nii Erici senatoris filiam in matrimonium duceret: petere, ut si-  
bi id facere Senatus uoluntate liceret. ea de re consultus Sena-  
tus, censuit, uti nuptiæ fierent. Erat eo tempore Antonius reip.  
nomine Ferrariæ magistratus; qui Prodominus appellabatur.  
itaque facta potestate ad urbem uenit, Georgio filiam spondet.  
ea dum per legatos in Illyricum traducitur; pater moriens filio  
regnum tradit: ita nuptiæ inter lachrymas, & gratulationem cō-  
celebratæ, clariorem exitum habuerunt. Guidus Maria Rubens  
paulo post Venetiis moritur magno totius ciuitatis dolore; fu-  
nus ei publice atque magnifice factum: laudatusq; à Sabellico  
est. eius stipendium, equitumq; numerus duobus eius liberis  
æquis partibus distributus. Eodem anno tametsi pacata, neque  
ullo bello implicata esset ciuitas; rei militaris tamen studium nō  
neglexit. inualuerat iam in bellis consuetudo, inuento Germa-  
norum nobis tradita; ut milites fistulis ferreis uterentur: quibus  
fistulis glandes plumbeas magna ui ignis impetu mitterent; atq;  
hostem è longinquo uulnerarent. eæ erant fistulæ ad formam,  
atque imaginem eorum tormentorum, quibus muri oppidorū  
deiciuntur: nisi quod illa ex aere fusili fiunt, maximiq; sæpe  
sunt ponderis: ut carris solidissimis, ferratisq; ac magno iumen-  
torum numero egeant; quibus sustineri, atque regi possint. fi-  
stulæ è ferro sunt; gestanturq; singulis ab militibus singulæ li-



gneis alligatæ arma mentis ; per quæ capiuntur ; & puluere ad ignem celeriter comprehendendum idoneo infarciuntur ; & glâ de immissa humeris sublata in hostem conuertuntur . eo telo qui uti scirent , ut reip . suppetere ; peritissimos eius rei homines undique conquisitos , accersitosq ; Decemviri suas ad urbes miserunt , qui iuventutem instituerent . atque ut agrestes maxime homines id armorum genus docerentur ; singulis in uicis , pagisq ; uti duo puberes ei artificio assuefierent , edixerunt : atq ; iis omnium onerum immunitatem concesserunt , quo studiosiores , & diligentiores unum ad id munus obeundum reliquis liberati oneribus ac tributis fierent : eosq ; puberes die dicta ad suum quosque oppidum quotannis signo glande feriendo conuenire uoluerunt : qui uicisset , eius toti pago , aut castello uacationem esse munerum annuam , eo excepto munere , quo ad Medoaci fluminis deriuatione tenebantur , imperauerunt . Inter hæc cum antea fures domestici lege antiquitus instituta pœna multo leuiore plecterentur ; quàm ii , qui eandem domum nō incoherent : qua ex re fiebat , uti aucta seruorum , & inquilinorum audacia omnibus penè in domibus furta exercebantur : maioribus in comitiis mense Sextili lex est perlata : qua lege eadem esset in seruos , reliquosq ; fures contubernales pœna constituta , idem ius , qua pœna , quoq ; iure in alienos , exterosq ; fures animaduertere ciuitatis magistratus consueuerant . at ea , quæ subsecuta est , hieme , tantus , tamq ; perpetuus niuium rigor fuit ; ut omnia urbis æstuarialia congelauerint ; neque pedibus modo , sed in equis etiã homines ex agris ad extremum urbis marginem com meatibus importandis sine periculo uentitarint : magistratusq ; Mestrinus ad Secundi fanum , quod est in mediis ad urbem uadis , curru peruenerit . quibus quidem diebus etiam in media latissimaq ; urbis uia ; per quam unam naues onerariæ magnæ permeant ; constricto glacie mari , niueq ; superaddita , admissis per ludi speciem equis Græci hastati equites concurrerunt . uini , ficus , oleæ , anni aliquot intra alpes , Athesimq ; , atque Padum flumina , exutis super terram arboribus , prouetum angustiore habuerunt . Vere insequente Innocentius Pont. Max. per suos internuntios eiusmodi sententiã Tridenti pronuntiauit : Quod Veneti à Si-



gismundo laceffiti bello Rhetico se defendiffent; impēſasq; magnas eo in bello feciffent: Nomium & Iuanum caſtella iure ab iis capta atque retenta ſibi uideri. à Senatu tamen petiit, uellet ea ipſa Sigismundo ultro reddere; id ſe propterea cupere oſtendens, ne pax inter ipſos inita ea de cauſa uiolaretur. Cuius auctoritate moti patres, præſidiis abductis Nomium, & Iuanum Sigismundo reſtituerunt. Obiit per eos dies mortem Romæ Marcus Barbus Pauli ſecundi Pont. Max. fratris filius è Cardinalium collegio, uir & doctrina, & probitate, & ſanctitate uitæ, & Romanorum ciuium gratia egregie inſignis: quiq; comitiis Pōtifficalibus Sixti morte habitis, parū abfuit, quin à collegio ſummum locum adipiſceretur. eo mortuo Innocentius Patriarchatum, ſic enim appellant, Aquileienſium, quem is multos annos obtinuerat, Hermolao Barbaro legato apud ſe Veneto attribuit. quod ubi ciuitas intellexit: tametiſi Hermolaus ad Senatum ſcripſerat coactum ſe à Pontifice uestem ſenatoriam mutauiffē: quoniam tamen ſacerdotiis cooptari ciues Veneti, qui legati Romæ eſſent, lege prohibebantur; grauiter tulit auſum, illum contra leges patrias facere. auxit eius rei magnopere inuidiā; quòd antea, ex Hermolai literis, quas ad Senatum de Barbi morte dederat, more inſtitutoq; maiorum comitiis ſenatoriis præiudicium patres fecerant, cuius ipſi ciuis nomen ad id adipiſcendum ſacerdotium Innocentio commendarent. itaque decēptos in eo ſe ſe ac prope deluſos querebantur. erat omnino Hermolai propter eius ſummam in literarum, atque optimarum artium ſtudiis præſtantiam, magnum apud exterarum nationum nomē, apud ſuos quidem certe maximum: nam ad doctrinæ ſingularē opinionem etiam uitæ perpetuam innocentiam adiunxerat. ſi mul is multum patris opibus, & gratia; qui ſummo proximum in ciuitate magiſtratum gerebat; multum clientelis, neceſſitudinibus, propinquitatibusq; pollebat. quibus tamen in rebus omnibus ſatis ſibi præſidii non habuit: cum pluris à patribus una legum charitas, maietasq;, quàm ullorum ciuium omnibus aucta nominibus dignitas, atque claritas, fieret. Decemuiſi enim literas ad eum ſeuere ſcriptas dederunt; mora omni, excuſatio neq; ſublata ſacerdotium repudiaret: id ſi non faceret; patrem  
magiſtratu



magistratu remoturos, & bona eius publicaturos præ se tulerūt. At pater, perspecta ciuitatis uoluntate, omnibus tentatis rebus, cum iam eam flecti, & leniri posse diffideret, ægritudine animi est mortuus. filius non multo post Romæ, editis Plinianis castigationibus, immensi propè laboris opere, priuatus plebeio morbo periit. cum uitæ finem Hermolaus habuit, omnium ex sua ciuitate, qui ante illum nati essent, Latinorum & Græcorum literis planè doctissimus. eo tempore ab Hieronymo Marcello literæ Byzantio uenerunt: erat is Venetus eo in oppido uetere cōsuetudine magistratus: quibus literis Marcellus Senatum certior faciebat, sibi ab rege imperatum statim Byzantio discederet: eius rei causam fuisse, quod rex diceret Marcellum suis de rebus, & consiliis ad Senatum scripsisse: uelle se, atque decreuisse, posthac suo in oppido ei magistratui locum non esse: fœdere tamen, quod cum Venetis haberet, uti antea tenebatur, se se teneri. his de causis Senatus ad regem Dominicum Triuisanū legauit, qui prima ad nauigandum idonea tempestate proficisceretur. neque multo post, anno insequente uix inito, regis legatus ad Senatum uenit: exposuitq; patribus, quas ob causas Baiafetes magistratum eorum Byzantio remouisset: erant autem fere illæ ipsæ, de quibus ad Senatum Marcellus perscripserat: adiunxitq; illud idem etiam omnibus aliarum nationum magistratibus fuisse denunciatum, quod Rex Marcello imperauisset. iisdem diebus antequam mensis Ianuarius desineret, ornandi eos ciues causa, qui pro patria mortem oppetiissent, Senatus decreuit, uti Damiani Mauri eius classis præfecti, quæ prior bello Ferrariensi Padum flumen est ingressa, hostium castellis aliquot in ripa fluminis ui captis, bellicis ex laboribus mortui duabus filiis dotis nomine quadraginta auri libræ ex publica pecunia darentur; sacerdotii autem nomine, si ei uitæ se dederent, senæ libræ. Post dies paucos, cum esset nunciatum Baiafetem regē classem, & exercitum parare; Senatusconsultum est factum, uti sexdecim triremes naues, alteraq; nauis oneraria magna reip. quæ ad anchoras erat deligata, confestim ornarentur; altera, quæ aquam non tetigerat, deduceretur, atque instrueretur. sed eo tamen anno eis nauibus resp. non est usa, classis, exercitusq; com

D



paratione à Baiasete penitus intermissa. neque multo post maiorum comitiorum lege; quam Lucas Pisanus consiliarius tulit; quadraginta uirale iudicium tertium duobus prioribus est additum, nam sunt in urbe magistratus duo, quos appellare in ciuilibus actionibus licet; unum ab iudicibus urbanis, alterum ab iis, qui publice in oppida, atque prouincias ad ius dicendum mittuntur, ii tamen ipsi per se magistratus nihil statuunt, nisi de minimis quibusdā rebus. sed ante eum diem ad alterum tantum modo eorum duorum iudiciorum quadraginta uirale, quæ antiquitus sunt instituta, res ab aliis iudicatas deducebant: illi sententias ferebant; quibus aut probarent, quæ deducebantur, aut rescinderent: eas ratas haberi oportebat. alterum iudicium uitæ, necisq; habet potestatem: aliusq; ad eos iudices magistratus causas defert. illud igitur iudicium quadraginta uirum ex duobus, apud quos ex prouocationibus, quæ ad duos illos magistratus fiebant, disceptabatur, cum actionum & causarum multitudini nō sufficeret; tertium simile ita est institutum, ut ueteri illi alteri ab urbanis iudicibus, huic recenti & nouo ab exteris interpositæ iudicibus appellationes proponerentur. ea re prouocantium querelis aditus, & iuris persecutio duplo faciliior, & explicatior est facta. aliam etiam magnopere utilem ciuitati legē maioribus comitiis Antonius Tronus consiliarius paucis post mensibus tulit: qua lege ferendorum suffragiorum nimiam creandis magistratibus licentiam, quæ ferri iam non poterat, facile sustulit. porro ante id tempus suffragiorum ferendorum ratio erat eiusmodi. Loculi lignei tornatiles pedis altitudine bini ciuibus per subsellia consedentibus, alter prasinus, albus alter, afferebantur. eorum loculorum superiore parte detecta, patulaq; uti manus inferri posset, media in angustum, atque arctum pars contrahebatur eo usque, ut uni modo suffragio uiam interius daret, extrinsecus ad circumferendum captu multo esset etiam habilior. infima erat pars plurimorum suffragiorum capax: eaq; detrahi, atque reponi poterat. detrahebatur autem numerandorum suffragiorum causa. in eorum loculorum utrum quisque uellet suffragium inferebat. id erat glandula parui pomi cerasi magnitudine ex tela facta, non quidem  
solide



folide compacta, atque firmiter, sed confuta leuiter; quòd, in quem cecidisset loculum glans, sentiri posse nolebant. itaque pugno etiam clauso manum lege in utrunque loculum demittebāt, ut ea quoque re cognosci non posset, quo in loculo suffragium esset relictum. nam quæ album in loculum glandulæ cecidissent; eæ candidato fauebant: quæ in prasinum essent coniectæ; iis glandulis candidati repellebantur. Hæc cum ita essent antiquitus constituta; ambitio, cui plane locus omnibus in rebus, semper fuit, eò licentiæ creuerat: ut, qui suorum aliquem creari magistratum uolebat; & ipse summis prehensam digitis glandulam album in loculū palam proiiceret; & qui ei proximi erant, idem uti facerent, postulare. illi candidatorum ueriti inuidiam, non suo plerunque iudicio, sed ad gratiam suffragium aperte ferebant. ea re fiebat, ut indigni sæpe homines, propterea quòd plus aut opibus, aut propinquitatibus, aut omnino clientelis ualuisent, bene de rep. meritis, optimisq; ciuibus anteferrentur, magistratusq; adipiscerentur; boni reiecti ac repulsi iacerēt. eam ad perniciem atque malum cum plures latæ leges nihil profuissent, uti è ciuitate tolleretur: una omnino Antonii legis latio saluti atque decori ciuibus fuit. nam qui bini ad eam diem loculi patuli, atque aperti binos erant per ministros publice circunferri soliti; eos & à superiore tectos parte, & unà coniunctos, inter seq; continentes fieri statuit oportere: iisq; ambobus sic connexis, & conglutinis unum tantummodo in superiori parte laterorsum os dedit: eiq; ori tubum prominentem circumduxit semipalmæ spatium ad interiores loculorum aditus obtegendos: quem per tubum recta utrunque ad loculum manus inferri apte posset, rursus eorum loculorum prior, tuboq; proximus is collocabatur; cuius loculi glandulæ candidatos reiciebant. id ea causa excogitauerat Antonius: ut, si quis aliter, atque ipsi liberet, suffragio ferendo cuiuspiam fauere cogeretur; is, dum manum per tubi os ad posteriorem loculum protenderet; quòd is esset loculus, cuius suffragia magistratum crearent; apertis clam digitis in anteriore sineret loculo glandulam decidere. ita ciues unum simulando, alterum dissimulando, illud re, quod cuique esset prius, audacter efficerent; neque deprehendi, aut cogno-



sci posset quid fecissent. ea lege post id tempus ciuitas maiori-  
bus in comitiis, atque in Senatu, & Decemuirum collegio cre-  
andis magistratibus semper est usa: liberumq; illi iudicium ab  
gratia, atque inuidia semper fuit. tametsi capitalibus, cæterisq;  
omnibus in iudiciis; uti, si cui non liqueret, is eò deferri posset;  
tertium etiam loculum adhibuerunt: cumq; seiunctum à duo-  
bus atque separatum esse uoluerunt. neque uero minus Decem-  
uiri ante anni exitum alia ex parte surgentem malorum ciuium  
ambitum se uero iudicio represserunt. erat in quadraginta uiris  
rerum capitalium iudicibus; qui omnes in Senatu adhibentur;  
Gabriel Bonus, eorumq; magistrum gerebat. creantur autem se-  
mel à collegio magistri numero omnes duodecim, eorum ma-  
gistrorum tres bimestre tempus apud Principem omnibus re-  
bus præfunt: habentq; cum in Senatu, tum uero etiam maiori-  
bus in comitiis ferendi leges potestatem. post eos tres item alii  
ex eodem numero tres eodem loci tantundem temporis præfici-  
untur usque eò, quoad octo menses abeunt: quod est eius col-  
legii temporis uniuersum spatium. eo cum esset in magistratu  
Gabriel, Francisco Falerio auctore, Principi, & reliquis ex eius  
collegio patribus legem à se scriptam proposuit: qua lege ciui-  
bus omnibus; qui re familiari angusta uterentur; quadraginta  
annos natis auri libra singulatim ex publica pecunia quotannis  
daretur: qua se stipe honestius, liberosq; suos alerent: qui in-  
tra eos annos nati essent; annum autem uigesimum quintum ex-  
cederent; ii semilibram eodem nomine acciperent. eam ipse le-  
gem ferre ad Senatum maioraq; comitia statuerat. itaque, ut cõ-  
sultis patribus ferretur, (id enim fieri aliter non poterat) eis tra-  
diderat legendam. Patres ubi legem inspexerunt; quæ morem  
improbi exempli in remp. induceret: ut unus temere ciuis tan-  
tum pecuniæ publicæ cæteris ciuibus elargiretur: idq; nulla alia  
de causa eum & Falerium esse aggressos animaduernerent, nisi  
uti ciuium gratiam ad magistratus adipiscendos aucuparentur:  
Principi negotium dederunt, ut utroque ad se uocato eos mo-  
neret, ne quod amplius ea de lege uerbum facerent. illi cum di-  
es aliquot siluissent, multorum autem ciuium, quorum uitæ  
lex erat opportunissima, uocibus increparentur; suam ipsorum  
dignitatem



dignitatem ab eis negligi; si legem ferrent, se se, quos uellent, magistratus adepturos, principesq; ciuitatis è uestigio futuros: ut, si quid eius facere possent, experirentur, curam, & studium adhibuerunt. ea re ad collegium delata, Decemuii Gabrielem Bonum, & Franciscum Falerium statim comprehensos, atque in uincula coniectos in Cyprum insulam deportandos curaue-  
runt, pœna capitis adiecta, ab oppido Nicosiense ullo tem-  
pore si emigrauissent. binos autem scribas fisci reip. quibus illi  
usi fuerant eius legis consultoribus, & tanquam administris, in  
Cretam insulam exulatum miserunt, eadem eis pœna propo-  
ta ab Rhythymna Cretæ oppido diffugientibus. atque hoc om-  
nino Decemuii grauioris animaduersionis esse iudicium uolu-  
erunt, non tam quidem, ut de iis supplicium sumerent, qui le-  
gem, tametsi perniciosam, neque dum tamen ad Senatum tule-  
rant, poterantq; per se ab ea re desistere; quàm ut reliqui etiam  
cives ab eiusmodi quicquam in posterum cogitandi consilio si-  
milis timore pœnæ duorum ciuium exemplo absterrentur.  
Eiusdem anni uere Laurentius Medices Florentinus, excellen-  
ti uir ingenio, qui principatum in sua ciuitate obtinebat, uita  
functus est: æstate media Innocentius, ille tres reliquit liberos:  
qui omnes breui tempore & principatu, & ciuitate eiectione exula-  
tum abierunt. huius locum Alexander Borgia Valentinus, opi-  
bus, & largitione nixus tenuit. atque hoc planè tempore ciui-  
tas prope quieuit. Insequente autem iam in uer progressu an-  
no, ut firmatis inter se trium maximarum Italiæ ciuitatum re-  
bus tempora etiam pacatiora fierent, ab Alexandro Pont. Max.  
& Venetis, & Ioanne Galeatio adolescente regnum in Medio-  
lanensibus obtinente, auctore Ludouico patruo, qui ciuitati eius  
nomine præerat, fœdus in xxv. annos percussum, atque uno eo-  
demq; die ab singulis concelebratum est: quo quisque fœdere  
ad reliquorum sociorum ditiones defendendas, hostesq; propul-  
sandos teneretur. Et quòd erat ea tempestate Romæ Giemes  
Sultanus, Baiafeti regis frater, homo magni inter suos nomi-  
nis; qui ab eo armis regno pulsus Rhodum confugerat: Rhodii,  
ne bellum in se conuerterent, eum ad regem Galliæ; rex ad In-  
nocentium rogatu eius miserat: itaque is ab Alexandro adhibi-



tis custodibus asseruabatur, cum ne fratri renouare bellum posset: cuius rei causa quadringentæ ab eo auri libræ quotannis Pontifici dependebantur, Romamq; mittebantur: tum ut eo nomine Baiasetem à bello christianis inferendo abstereretur: est in fœdere additum; ut, si Veneti armis à Baiasete lacefferentur, Alexander eis Gienem traderet; cuius auctoritate, atque gratia contra illum uti possent. ei fœderi Hercules Atestinus, dux, princepsq; Ferrariensium, Ludouico suadente paucis post diebus se adiunxit. his confectis rebus, cum propè omnia spectare ad quietem uiderentur; Leonora Ferdinãdi regis Neapolitani filia, Herculis Atestini uxor cum duabus filiis, altera Ludouici, altera Frãncisci Gonzagæ uxore, atque Alfonso cum filio, & eius uxore Anna Ioannis Galeatii sorore, conscensis ad Padi ripam nauibus secundo flumine in æstuarium, Venetiasq; se contulit, ut urbem læto illo tempore inuiserent. quibus quidem fœminis uti quam amplissimi honores haberentur, Senatus decreuit. itaque & obuiam eis publice itum in Bucentauro naui: qua in naui à magna Senatus parte atque à matronis centum triginta, tota penè ciuitate circumfusa, atque ad nauigante, sunt exceptæ: & per eos dies, quos in urbe confecerunt, nullum eis genus publicæ uoluptatis, aut liberalitatis defuit. nam & choreæ electissimarum fœminarum à principum liberis in comitio celebratæ sunt: & bellaria magni, & operosi sumptus data: & ludi tota urbe, certaminaq; multifariam edita. quibus ex omnibus unum nouum ciuitati fuit; ut complures cymbæ, quibus in singulis quatuor fœminæ remigarent, cursu propositis præmiis cõtenderent. quo in certamine propè mira res accidit: quæ à ciuitate animaduersa, diei, spectaculiq; lætitiâ, & hilaritatem conduplicauit: ut, quemadmodum Leonora duabus cum filiis & nuru aderat, quarum causa ea fiebant; ita cymba, qua in cymba mater cum duabus filiis, ac nuru remos impellebat, uicerit.



16

PETRI BEMBI RERVM VENETA-  
RVM HISTORIAE  
LIBER II.



Ix eæ mulieres domum redierant; cum ab Carolo rege Gallia, eius nominis octauo, certus homo ad Senatum uenit; cuius oratio eiusmodi fuit: Quoniam Carolus in Italiam cum exercitu sit uenturus ad regnum Neapolitanum, quod ad se iure hæreditario spectaret, in suam potestatem redigendum: scire eum cupere, quo in se animo ciuitas esset futura: uellet ne, qua in amicitia, & necessitudine adhuc quidem egregia, & constanti secum fuisset, in ea etiam in posterum manere. Ciuitas noua intellecta re, quæq; magnam rebus Italis commutationem esse allatura uideretur; consulto Senatu, ne regis in se inuidiam prima omnium excitaret: præsertim cum fieri posset, uti is uel per se se; ut sunt plerunq; hominum mobiles ad omnem fermè impetum animi; ab incepto desisteret: uel difficultate, atque magnitudine belli gerendi adolescens, neque rei militaris gnarus, abstereretur: uel aliqua interposita mora, atq; à cæteris regibus impedimento explicare se non posse: respondit, se quidem omni tempore pacem bello prætulisse; optareq; ut & ipse quiesceret; & reges principesq; Italos quiescere permetteret. sed si ueniat, ea de causa nihil moturam, neque ab eius amicitia recessuram. Pero (id enim erat ei nomen) accepta ciuitatis uoluntate Romam abiit. eumq; alii postea regis interpretes duo paucorum mensium spatio cum eisdem ferè mandatis separatim sunt subsecuti: quibus interpretibus idem est responsum datum, quod Pero ante acceperat. sed omnino ad eam belli ab rege capefendi causam, quæ ab illis prædicabatur, quod ei regnum Neapolitanum hæreditatis nomine deberetur; etiam aliæ causæ accedebant: ex quibus una hæc fuit. Galeatio Sfortia, qui Mediolani regnum obtinebat, complures ante annos per insidias intercepto, Ludonicus frater, uxore Galeatii è regni procuratione;



quam illa, ut Ioanni Galeatio filio suo admodum paruulo in fide atque officio ciuitatem contineret, post uiri mortem susceperat; reliquisq; administris paulatim deiectis, ipse se ei rei praproposuerat; annosq; tresdecim præfuerat. fratris autem filium, cui se regnum procurare præ se ferebat, ita porro aluerat, iisque moribus instituerat; ut omnem curam uideretur adhibuisse, ne puer ullam ad frugem perueniret. non rei militaris, non literarum studia, non denique artem ullam & disciplinam regiam edoceri illum uoluerat, adhibitis etiam ad puerile ingenium deprauandum corruptoribus; quorum ille conuictu in omnem luxum atque inertiam assuefieret. ei nondum planè puberi Alfonso Ferdinandi regis filius Isabellam filiam in matrimonium collocauerat: ex eaq; is etiam liberos procreauerat. at regni tamen sui gubernaculum à patrio nullam in partem admittebatur, id cum grauer ferret non Alfonso modo focer assiduus propè filiae lachrymisq; permotus, sed multo etiam magis auus Isabel la Ferdinandus; primo petere à Ludouico cœperunt; uellet pro sua fide, atque iustitia fratris sui filio non adulto modo atque firmo, sed etiam planè iam uiro, atque adeo duorum filiorum patri, aliquando tandem regnum tradere, suiq; illum imperii, suarum rerum compotem facere. ea postulatio cum sæpius interposita nihil profuisset; grauioribus apud illum expostulationibus, & querelis non semel egerunt: postremo eò rem deduxerunt, ut dicerent, se se illum bello persecuturos, ni Ioanni Galeatio, qui cum affinitatem, uti cum rege, contraxissent, regiam potestatem remitteret. horum ille regum minas atque potentiam ueritus; ne tam amplæ ciuitatis principatum, atque imperium ulli tradere cogeretur; quod suum unius efficere, in animo magno perere habebat, filiisq; suis relinquere; cum intelligeret Gallie regibus in regnum Neapolitanum ius esse; celatis ea de re Alexandro, Venetisq; quibus cum paulo ante fœdus percusserat; ad speciem salutandi regis, legationem maxime celebrem ad Carolum misit hortatum, ut id bellum susciperet: suasq; illi opes, copiasq; pollicetur. facillimum factu esse; modo alpes traiceret, atque in Italiam se ostenderet; eo regno potiri. ea tanti hominis hortatio apud Carolum momenti plurimum habuit. altera fuit eius



eius rei causa in Antonio, qui Salernū à maioribus suis traditum obtinuerat. is cū ob Ferdinādi regis inimicum in se se animum sedibus patriis excessisset; seq̃; in Galliam ad Carolum contulisset; propē quotidianis eum sermonibus admonebat, ut tam propriam regni opulentissimi capiendi oblatam sibi à diis immortalibus facultatem ne prætermitteret. Ferdinandum hominem esse auarum, crudelem, nulla fide, nulla iustitia: omnes eius regni principes, omnes populos illum odisse: nullius esse negotii rem eum regno expellere, præsertim Galliæ regibus; quorum nomen, atque auctoritas illis in regionibus maxime omnium tum uigeret, fueritq̃; semper plurimi. Alexander etiā Pont. Max. moleste ferens Virginium Vrsinum eius familiæ principem ausum esse à Francisco Cibo Innocentii Pont. ante se Max. filio oppidum Anguillariam in Sabatini lacus ripa, quod erat in Pontificum Maximorum ditione, abestq̃; ab urbe xvi. milia passuum, nulla facta sibi ab ipso eius rei potestate coemisse: quoniam Virginius à Ferdinando fouebatur, ne quid facere inuitus cogeretur: Carolum & ipse ad id suscipiendum bellum hortabatur, uindictam se de aduerso suis rebus, suaq̃; dignitati rege causa, quas ad res omnes etiam illud adiungebatur: quod ex Gallis principibus iis, qui apud Carolum auctoritate, gratiaq̃; pollebant, nonnulli rerum Italicarum, Romaniq̃; Pontificis, qua erat iter faciendum, occasione amplissimis sacerdotii dignitatibus se se iri auctum, & honestatum confidebant: alios exercituum, & regendorum populorum, quos essent subiecturi, spes, & cupiditas incendebat. multi etiam sua leuitate & nouarum rerum studiis mouebantur, ut regem ad profectiōē impellerent. interim autumnī mensibus tota ferē citeriore Gallia eiusmodi tempestates, tamq̃; continentes pluuiæ fuerunt, ut in Bergomatium finibus aqua denosquinos pedes præter cōsuetudinem excreuerit, ædificiisq̃; quamplurimis dirutis, ac pontibus lapideis abreptis, magnum puerorum, & mulierum, magnum etiam uirorum numerum repentino impetu oppresserit. neque in Brixianorum finibus flumina non ingentem stragem ediderunt. Athesis quidem cum Veronæ urbis magnam partem peruasisset, & complures domorum parietes subruisset;

E



etiam pontem firmissimum medio in oppido deiecit. Medoacus  
& ipse ripas non uno loco transgressus optimam Patavini agri  
partem illuue, uastitateq; fœdauit. Padus omnino utriusque ri-  
pæ uicinitates ita est depopulatus, ut omnia luctu, & mœrori-  
bus impleuerit. atque hanc quidem esse quasi Deorum immor-  
talium significationem, quæ Gallorum in Italiâ aduentum por-  
tenderet, omnes penè homines interpretabantur, & prodigii lo-  
co ducebant: erantq; permulti, qui maxime ad Venetos, quòd  
eorum regionibus & oppidis aquæ magnum detrimentum intu-  
lissent, eam rem, atque id prodigium existimabant pertinere.  
ordo rerum me admonet, ut duo ciuitatis iudicia hoc ipso facta  
tempore silentio ne obruam. erat in ciuium nobilitate Ioannes  
Georgius, homo ferox, nullaq; pietate: qui ab Antonio Ber-  
nardo Taurisanorum prætor ob maledicta in Deos, aliaq; sce-  
lera exul eius oppidi factus fuerat, damnatusq; ut, si eò rediret,  
lingua ei amputaretur, manusq; altera præcideretur. is Tauri-  
sum alio prætor cum reuertisset, uirginemq; ui adhibita uiola-  
uisset; Decemuiui missis illò suis rerum capitalium ministris at-  
que uindicibus Georgium comprehendi, deq; eo Antonianum  
supplicium medio in foro sumi iusserunt: eo sumpto Venetias  
adductum in Cretam deportari mandauerunt. neque multo post  
Antonius Bolduus Triumuir ex aduocatis reip. Dominicum  
Bolanum Candiani filium collegam suum accusatum acceptæ  
eo in magistratu ab reis, & litigatoribus pecuniæ ad Senatum  
detulit. cum Senatus eum comprehendi, atque ex uinculis cau-  
sam dicere iussisset; ille autem fuga se iudicio eripuisset: absens  
damnatus est; ut intra mensem se carceri dederet Caniam Cretæ  
oppidum exulatum deportandum: quod si non faceret, compre-  
henso ceruices abscinderentur, bonaq; publicarentur, magnis  
propositis præmiis iis, qui eū aut uiuum magistratibus tradidis-  
sent, aut ipsi occidissent. Post hæc de aduentu Gallorum fama  
percrebrescente, ac Ferdinando rege exercitum, & classem ad ho-  
stes repellendos comparante, atq; omnibus Alexandrum Pont.  
Max. pollicitationibus, ut suarum partium esset, sollicitante; Lu-  
douicus ueritus, ne, si inter eos conuenisset, Ferdinandus, præ-  
missis in Galliam suis, & Alexandri celeriter copiis, è regni eum  
procuracione,



procuracione, atque fastigio ante Caroli aduentum expelleret; ereptamq; filii sui genero dignitatem, atque imperium restitueret: à Senatu petiit, ut, quos haberet milites, equitesq; ad Ollii fluminis ripam, quod est in Brixianorum finibus, iuberet proficisci: uti regem ab eo ineundo consilio abduceret: aut, si id non posset, ipsi flumen transirent, se seq; tuerentur. ea re à Senatu non impetrata, quòd diceret sibi id necesse eius tam firmis rebus non uideri; iterum ad Carolum legatos misit rogatum, ut maturaret alpes transmittere: se se ei de pecunia commodaturum, suasq; copias cum illo coniuncturum, ubi primum terram Italiæ attigisset. Carolus, qui plures iam menses in ea modo prædicatione consumpsisset, uelle se Neapolim armis suam facere; atque iis, qui apud illum plurimum poterant, partim bellum suadentibus, partim dissuadentibus, nihil etiam nunc constituisse, quod pro firmo, atque certo haberetur: acceptis Ludouici tum hortationibus diligentioribus, tum pollicitis; fœdus cum Ferdinando, & Helisabeta Hispaniæ regibus percussit, non nullis eis oppidis in Pyrenæo saltu gratis restitutis; quæ pridem oppida Aloisius rex eius pater à Ferdinandi patre pignoris nomine acceperat. deinde ad diem nonum Calendarum Ianuarii adhibitis totius Galliæ principibus, statuit omnibus aliis omis- sis rebus proficisci. de eo cum esset amicorum literis celeriter Ferdinandus certior factus; primis anni diebus è uenatu lectu- lum petens acri urgente pituita intra biduum est mortuus: cuius Alfonsum maiorem natu filium Federicus natu minor, reliquiq; Neapolitani principes regem salutauerunt. Alfonsus regno pa- tris inito, per legatū Venetum, qui paulo ante ad Ferdinandum uenerat, insolitisq; ab eo & obuiam itionibus, & aliis honorum generibus exceptus fuerat, à Senatu petiit; ut cum Ludouico a- geret, ne is Carolum ad profectiōem incitaret; prædemq; se a- pud illum constitueret; nihil ipsum ullo tempore moturum, quo minus is regni Mediolanensis procuracione, quoad uellet, ute- retur. Senatus ea de re cum apud Ludouicum Alfonsi uerbis egisset, cumq; esset magnopere hortatus, ne Gallis in Italiam ue- niendi auctor, adiutorq; esset; ille autem nihil eiusmodi respon- disse, quo se ab eo consilio remoturus uideretur: ne frustra ope



ram infumeret, destitit; neque amplius eam cogitationem est aggressus. miserat ante eos dies ad Senatum Carolus Philippum Argentonium legatum: si se resp. in belli Neapolitani societatem cum ipso coniungeret; quam uellet eius regni partem sibi deposceret: nihil illum recusatum: id si non uellet; quod pollicita esset se ab eius amicitia non discessuram, in eo perseueraret: iussum se esse apud patres moram trahere; omniaq; regis consilia cum ipsis communicare. ad hæc ciuitas ita respondit: tantas esse Caroli regis ad id gerendum bellum facultates, tam præsentem omnium rerum copiam; ut sui auxilii nihil indigeat: itaque se more, exemploq; maiorum, qui bella nisi lateceati non fecissent, quieturam; nec partem sibi eius regni postulaturam, cuius nullum ipsa ius habeat: cæterum, quod aliis regis nunciis dixisset, pollicitaq; esset, ab eo non recedere: regisq; beniuolentiam se se plurimi semper facturam: ipsum quidem eo nomine & nunc libenter uidisse; & si maneat, eo libentius uisuram, quo erit etiam urbana mora, & quotidianis collocationibus familiarior: quæq; regis intererunt, pro sua uetere in patrem eius, atque ipsum necessitudine ea in dies, ut ipsi nota sint, curaturam. iisdem propè diebus Senatus Bartholomeo Collioni Bergomati imperatori suo, quod multa bella singulari uirtute, fide incomparabili gessisset, remq; militarem superiorum imperatorum negligentia collapsam restituisset; quodq; de rep. optime meritis, auri libras decies centies ei moriens testamento legauisset; statuam equestrem aeream inauratam in Ioannis & Pauli area ponendam censuit. ea tempestate uita functus est apud Naxios Ioannes Crispus; qui eam ex Cycladibus insulam tresq; alias obtinebat, Rhenem, Scyrum, Melum, duobus liberis paruulis ex pellice relictis. is propterea quod auare, atque crudeliter regnauerat; ciuitas concilio coacto statuit reges ulterius non perpeti. erat tum forte fortuna in insulæ, oppidiq; portu Nicolaus Capellus legatus, eò cum sex longis nauibus ad pyratas insequendos profectus. itaque nacti occasionē ciues, plebsq; omnis ipsis cum natu maioribus, matribusq; familias infantes in ulnis gestantibus, cumq; uirginibus, & pueris legatum adierunt: orantesq; uti se reciperet; mori enim malle omnes, quam amplius



19

amplius sub tyrannis esse; miro se studio reip. dediderunt. Nicolaus principibus eorum liberaliter appellatis, reliquam turbam solatus, ciuitatem in reip. fidem recepit: ciuemq; Venetum, qui præesset, iusq; diceret, attribuit. Naxii paucis post diebus legationem ad Senatum miserunt; quæ apud patres sacramentum diceret, se in eius fide perpetuo futuros. ea legatione adhibita Senatus consultum factum est; uti Naxii, qui sponte in deditiōem uenerant, reciperentur: recepti autem non essent; nisi prius Crispi liberis, & eorum matri alimenta præberentur, itaque omnis insularum earum prouentus illis, quoad uiuerent, dono datus est eo nomine. interea cum inter Alexandrum, quem quidem multis de causis magnopere pœnituerat Carolum regē ad id bellum incitauisse; atq; inter Alfonsum, qui ambo ad Variuicum uenerant, ut ipsi inter se colloquerentur, iis conditionibus esset fœdus, amicitiaq; inita; ut Pontifex regem in Romanæ reip. fidem reciperet, omniq; illum ab hoste, quâ posset, tueretur; ille autem Pontifici ob tributi ueteris reliqua auri libras mille se repræsentaturum, in annos uero singulos quadringentas persoluturum polliceretur; desponsa etiam filia Guisfredo Alexandri filio, ut societas eo pignore firmaretur: utrique se ad bellum cōmunire modis omnibus, explicareq; cœperunt. fuerat ea in re Alexander: ut sunt hominum mutabilia sæpe ingenia, & uoluntates: Virginio ipso usus interprete: qui etiam illum, & Alfonsum lautissime, splendidissimeq; sua in domo tunc suscepit. erat enim Virginii oppidum Vari, de quo diximus, uicus. iamq; Alfonsus classe longarum nauium amplius triginta, onerariarum maximarum duodeuiginti ad Ligustici maris orā infestandam, nauesq; hostium, quæ Genuæ instruebantur, impediēdas comparata; equitatu, peditatuq; cogendo, eq; Brutis educendo, atque in Galliam mittendo distinebatur: cum ob Baiasetis regis nouos motus, qui & classem, & exercitum comparabat, resp. & ipsa parare classem instituit. itaque primis comitiis Antonio Grimano classis præfecto declarato naues longas, quas confectas habebat, deduci, atque instrui iubet: quibus cū nauibus Antonius mēse Quintili soluens in Illyricum traiecit. Eo tempore Florentinorum legatio ad Senatum uenit petens;



propterea quòd Carolus rex à ciuitate postulauerat, ut per eorū fines exercitum ducere sibi liceret; uti Senatus consuleret, quid ipsis esset ad regis postulata respōdendum: tum hac tota in causa atque aduentu regio quid cauere, quid præstare ipsos opus esset, pro sua fide, atque consilio existimaret: magnopere enim se eius prudentiæ tribuere; confidereq; optimum factū id futurum, quod Senatus censuisset. Senatus unum modo existimans fore, ut, quidquid Florentinis consulisset, neque Carolum, neque Alfonso lateret; legatis respondit; nescire omnino se tam ardua in re, tamq; casibus, & euentui proposita, quid præstaret: quòd si se plures in unam sententiam coniecturæ, quam in alia omnia traherent; non tamē id audere ipsis dicere: propterea quòd fortuna plerunque in bellis dominatur; temereq; facta sæpe melius, quam ratione, atque consilio suscepta, ceciderunt: itaque auxilium à Diis immortalibus implorandum: eos unos scire, quid quaq; in re quenque aut sequi, aut fugere oporteat. Antonius Venerius profectus cum esset in Illyrico; legati ad eum ab Scardona, atque ab Clissa uenerunt: qui dicerent, cupere sua municipia sub reip. imperio esse: orare, ut ab eo reciperentur. Antonius legatos cohortatus, ut reip. uoluntatem expectarent, literas ea de re ad Senatum dedit; Corcyramq; contendit. at Alfonso classis, cui Federicum fratrem præposuerat, mare Ligusticum inuecta, obiecto Flisco Genuensi non minimæ inter suos auctoritatis, militibusq; ad Veneris portum expositis, atque ab hostibus repulsis, infecta re Triturritam rediit. confecerat autem per eos dies Genuæ Carolus, itemq; Ludouicus classē satis idoneā ad hostē repellendum. itaque & aduerso prælio suorum, & classis hostium timore perterritus Federicus, neque amplius tentandam iis in locis fortunam belli ratus, se se recepit. ea spe lapsus Alfonso suas cum Alexandri copiis coniunctas copias in flaminiam propere misit: quòd intelligebat Caroli exercitus præmissam iam partem Padum flumen traiecisse. ex cum Ariminensium finibus copiæ appropinquarent; Pandulfi eorum principis rogatu; qui erat in reip. militia; suisq; rebus ueritus tam suspecto, atque ambiguo tempore opem à Senatu postulauerat; Georgius Emus est eò missus: qui auctoritate reip. oppidū finesq;



tueretur . per quos dum ii pacate iter facerent ; Alexander Ioannis Galeatii frater nothus , qui erat in Ludouici partibus , Parma fugiens ad eos se contulit ; ut contra patrum esset . erant in eorum exercitu Ferdinandus Alfonsi filius , magnæ spei adolescens ; Nicolaus Vrsinus , qui Petilianum oppidum in Hetruria obtinebat , belli rebus , atque artibus clarus ; Virginius item Vrsinus , de quo superius diximus , Romanæ factionis princeps ; Iannes Iacobus Triultius Mediolanensis , homo magna inter suos gratia . hos est paulo post Guidus Vbaldus Vrbinas dux , princepsq; Metaurensum ad Cesenam consecutus . atque ii omnes equitum cataphractorum duum millium quingentorum , militum octo milium numerum habebant . ad eos cum præmissæ Caroli , atq; Ludouici copiæ appropinquauissent : uniuerſi congregari nō sunt ausi : itaq; aut oppidi planè firmi , aut fluminis interiectu munitis castris complures se dies cōtinuerunt . per occasiones tamen paruis , minutisq; præliis , quid utrique possent , aliquoties periculum fecerunt . at Carolus , qui Aloisium propinquū suum , principatum in Genabensibus obtinentem , & Iulianum Cardinalem Sixti Pont. Max. fratris filium , & Antonium Salernitanum , de quo supra dictum est , Genuam cum pedestri exercitu miserat , ut naues iam paratas conscenderent ; suiq; itineris ratione habita se subsequi iusserat , ut ingressum in regnum Neapolitanum suum mari etiam aperiret ; cum reliquo exercitu bene magno , planèq; paratissimo primis Septembris diebus alpes traiecit ; atque Astam uenit . ibi illum Ludouicus cum muliebri uxoris Beatricis comitatu , & Ioannes Galeatius fratris filius , Herculesq; Atestinus socer obuiam progressi uenientem exceperunt : qui cum de rebus utriusq; Ludouicus collocutus , cum eisdem illis , quos adduxerat , Ticinum rediit . ea itio , atque reditio itinerum omnium postrema Ioanni Galeatio fuit . profluuium enim uentris , ut uidebatur , lectulo impositus ; ut uero creditum est , ueneni à patre dato haustu , insequente mense periit . tantum in animis , metibusq; hominum mala regnandi cupiditas , atq; ambitio potest . Carolus inter hæc Astæ cum esset , Aloisium Genua mutato consilio accersiuit : ibiq; iussit esse . erat autem Aloisii oppidū Asta : quod quidem eius auia dotis nomine à patre Mediolani rege ac



ceperat. ipse pustulis correptus est; eoq; in oppido commoratus dum conualesceret, itineri deinde se dedit: atque ad diem duo decimum Calendarum Nouembris Placentiam peruenit, pro-  
cesserat eò una cum illo Ludouicus: qui postridie eius diei de fratris filii morte nuncio accepto Mediolanum rediit: urbemq; in ueste regia perambulans salutari regem se non modo passus est, sed maxime omnium uoluit: neq; ei minus id deliberatum propterea fuit, quòd Ioannes Galeatius moriens duos liberos Franciscum & Mariam superstites reliquisset. Carolus; qui antequam è Gallia proficisceretur, tametsi Florentinis ostendisset se per eorum fines iter Neapolim esse facturum, per Flaminiam tamen ire constituerat; ob eamq; rem exercitus sui partem eò miserat: cum Laurentini Medicis Florentini ciuis suasu, qui, cum Petro Medice propinquo suo, cuius erat in potestate ciuitas, magnas atq; acerbis similitates exercebat; tum Ludouici; qui eundem Petrum, quòd is uxore ex Vrsina gente ducta in eorum, atque Alfonsi partes se traduxerat, ingenti odio prosequeretur; ire Florentiam decreuit. ea res Florentiam perlata ciuitatem ad nouum, atque subitum capiendum còsiliu perpulit. Rex post hæc Placentia profectus, dextra se per Tari fluminis uallem flexit ad Apuanos, in Appennini radicibus municipium, Legatos Florentinorum obuios habuit: quos ad regem ciuitas, ut cum eo agerent, ne inimico ad se se animo accederet, misit. eius legationis Petrus Medices princeps fuit. is cum regem à se alienatum Laurentini, & Ludouici maledictis, calumniisq; comperisset: omnibus illum conditionibus lenire, beniuolumq; sibi redere est aggressus. itaque tria ciuitatis oppida in Appennini iugis, quæ Gentensium antea fuerant, tum Pisas & Trituritam in præsentia regi tradere, certasq; quotannis, quoad is in Italia esset, pecunias tributi nomine, atque equitatum pollicitus, cum illo in amicitiam rediit. quibus intellectis rebus ciuitas incitata illum, & Ioannem, & Iulianum eius fratres urbe, finibusq; suis expulit, domo eorum opulentissima direpta, bonisq; fisco addictis. quorum duo se Venetias contulerunt. Ioannes Petro nati minor Bononiæ primum, deinde in Tifernatibus apud propinquos suos complures se menses continuit: erat tamen è Cardinalium



Cardinalium collegio. Rex Appennini superato iugo Lucam, inde Pisas uenit: idq; oppidum à Florentiæ imperio, ditioneq; remouit; & sui iuris, liberumq; iussit esse. quod quidem ciuitas, plebsq; omnis cupidissime arripuit. Florentiam paucis post diebus est profectus: librisq; auri duodecies centies imperatis, in reip. formam ciuitatem redegit. Pisis libertati restitutis, senatores, reliquiq; ciues concilio coacto magistratus, qui Florétia uenerant, ex oppido, suisq; uicis, & castellis expulerunt: ex se se, quos uisum est, magistratus creauerunt. Leones marmoreos, depictosq; quod est insigne Florentinorum; è foro, locisq; omnibus sustulerunt. in exilium qui essent à Florentinis magistratibus missi, ii ut in oppidum, atque in suos quisque lares remigrarent, edixerunt. iisdem diebus ea Gallici pars exercitus, quæ in Flaminiam præcesserat; tribus in agro Forocorneliensium, & Foroliuiensium tum ui, tum deditioe captis castellis, Fauentiaq; in suas partes traducta, à Bretinoro uico, qui eos recipere noluerat, & indignantes, oppugnareq; aggressos sustinuerat, Appenninum traicere, atque, ut cum rege se coniungeret, iter facere cœpit. Ferdinandus cum omnino Gallos intercludere, morariq; non posset; suis ducibus, quo itinere uenerat, Romam rediit. at Veneti, ubi Carolum magna cum manu Padum flumen traicisse nunciatum est; legatos ad eum mittere decreuerunt; qui ei honoris gratia præsto essent: seq; ad omnes casus præmunire constituerunt. missi legati Dominicus Triuisanus, Antonius Lauredanus regē Florentiæ conuenerunt: eumq; postea sunt subsecuti. illis ipsis diebus Ioannes Senogalliam obtinens, Iuliani Cardinalis frater, Baiasensis regis legatum; qui Anconæ nauis expositus Romam proficiscebatur, Alexandro pensionem annuam librarum auri quadrigentarum Giemis nomine dependi solitam afferens; intercepti, ablataq; pecunia dimisit. Carolo Senas urbem transgresso, Alexander Virginium, & Nicolaum Alfonso exercitus duces, & Ferdinandum regis filium, qui Romæ appropinquauerant, intra mœnia recepit: ut & loca tuta hostibus præripere, & aduersarios cohibere, atque reprimere, & urbem ad Gallos repellendos uelle communire magnopere uideretur. ueruntamen paucis post diebus Carolo Romam recta ue-

F



niente Ferdinandum, reliquosq; duces est hortatus, uti Roma proficiscerentur; neque Gallos, quibus quidem iam nihil esset impeditum, expectarent. illi, quos omnia planè deficerent, Pōtifici paruerunt: Tiburq; cum ea, quam habebant, manu se contulerunt. Alexander, qui quidem Gallos ueritus de capienda fuga non semel cogitauerat, demum in Hadriani molem commeatu, & tormentis communitam se recepit. Carolus omni cum exercitu pridie Calendarum Ianuarii Romā uenit, pauloq; post cum inter ipsum, atque Alexandrum Ascanio interprete de pace sermones haberentur; Ascanius autem duras nimium, & seueras conditiones Alexandro imponeret: Alexander eam hominis audaciam compescendam ratus, Cardinalium concilio ad speciem quærendarum ab eis sententiarum coacto, illum, qui ad concilium uenerat, retinuit, nec nisi pace cum rege facta dimisit. Romæ Carolus complures dies commoratus, Alexandrum, quicum fœdus certis conditionibus percusserat, separatim primo, deinde publico in concilio salutauit eius ad pedes aduolutus: solemnibusq; sacris ministrante illo interfuit. post hæc Pontifex Episcopum Maclouiensium, cuius unius magnopere consiliis rex omnibus in rebus nitebatur, petente rege Cardinalem creauit. nauesq; onerariæ uiginti commeatum è Gallia prouincia regis exercitui supportantes ad Centumcellarum portum appelluntur. iisdem propè diebus ex tribus Venetorum longis nauibus, quæ publice in Britanniam ad mercaturam exercendam mittebantur, duæ in oceano tempestatis ui absorptæ sunt fluctibus: quibus in nauibus complures ex ipsa nobilitate ciues, reliqui amplius quingenti perierunt: mercium ad quater mille auri libras summa deperdita. quod quidem antea nunquam acciderat; ut eiusmodi naues, terra non tacta, mari, atque undis absumerentur. tametsi anno ab urbe condita millesimo decimo sexto duæ item naues longæ onustæ mercibus eo ipso in mari uentorum contumelia impactæ littoribus sunt amissæ. Dum ea Romæ apud Carolum geruntur; Alfonsus suis rebus planè diffidens, Ferdinando filio Neapolim accersito regnum tradit Federico fratre adhibito: eumq; uti Deos immortales uereatur, monet. ea oratione apud filium habita, in arcem, quæ est



quæ est in oppidi littore, & mari undique alluitur, quæ castellum  
 Qui appellatur; noctu se contulit, ut naues longas conscende-  
 ret. quod tum facere austro magno coorto uento prohibitus,  
 paucis post diebus nactus idoneam tēpestatem in Siciliam trans-  
 misit: eoq; anno in Panormitano agro priuatus moritur. Fer-  
 dinandus, profecto patre, regni principibus quatuor, qui erant  
 in custodia, primum omnium dimissis, oppidum in ueste re-  
 gia unà cum Federico patruo perequitauit: salutatusq; rex cum  
 se ad carceris parietem contulisset; reclusis patefactisq; fori-  
 bus rebelles aliquod, damnatosq; complures & libertati, & mu-  
 nicipio restituit: priuatas, publicasq; iniurias omnes remisit;  
 pollicitusq; est se proscriptos quosque reuocaturum. militibus  
 deinde appellatis, eos stipendio donauit: atque oppida nouis præ-  
 fidiis firmauit. Carolo ad diem quintum Calendarum Februarii  
 Roma profecto, Velitrasq; progresso, Cæsar Borgia Cardinalis  
 Alexandri filius; quem quidem pater legati nomine Carolo de-  
 derat, ut obsidis loco apud illum esset; noctu aufugit: ne ue pa-  
 tris uoluntate uideretur id fecisse, non Romam, sed Spoletum  
 se contulit. eodem tempore missi à rege milites, qui ex fœdere  
 Hostiensem, & Centumcellarum, Anxurisq; arces, quoad is in  
 Italia esset, custodirent, repulsi sunt ab Alexandri custodibus.  
 arcem enim Hostiensem; quam Iulianus Cardinalis exædifica-  
 uerat, præfidiisq; firmauerat; cum is Alexandri Pontificatus ini-  
 tio nihil illi fidens speculatoria biremi se ex ea sustulisset, con-  
 scendensq; Fabritio Columnæ, amico sibi homini, & magni, ac  
 erecti animi uiro, illam commendauisset, Genuamq; ac deinde  
 in Galliam esset profectus; Alexander, Nicolao Ursino Petilia-  
 norum principe cum exercitu eo misso, acri obsidione cinctam  
 expugnauerat, suiq; iuris fecerat. Rex Velitris profectus Forti-  
 ni montis oppidum munitissimum; quod quidem capi posse ni-  
 si longa obsidione non uidebatur; paucarum horarum spatio ce-  
 pit; itemq; Ferentinum; quæ utraque in Ferdinandi erant parti-  
 bus. ea re confecta suum hominem ad Pontificem misit: ni pa-  
 ctis, quæ sunt in ipsorum fœdere, steterit; se se primum omni-  
 um sua in illum arma conuersurum: quo accepto nuncio Pon-  
 tifex regis militibus arces tradidit. ferociore regis milites impe-



tu primum in Alfonſi ditione caſtellum in Caſſinate ſaltu, & mi-  
litibus, & comineatu communitum, ui captum diripuerunt, pro  
pugnatoribus incolisq; omnibus ad unum interfectis, quod  
præmiſſi ad oppidanos de deditioe nuncii ab iis male accepti  
fuerant. id caſtellum ſancti Ioannis mōs ab incolis appellatur:  
tenebaturq; ab Aterni regulo: quo uno nemo erat Ferdinando  
regi charior. itaque hoc ſucceſſu rerum ſuarum Carolus cum  
exercitu equitum militum numero triginta millium in regnum  
Neapolitanum ingreſſus ad Caſſinum uenit. quo in oppido Fer-  
dinandus cum eſſet; haberet autem milites numero ad quatuor  
mille, equites alteros totidem; oppidanos cohortatus, ne ſe di-  
ripi ſinerent, ſed fortunæ cederent, ſeq; in aliud tempus reſerua-  
rent: oppido proſectus Capuam ſuis cum copiis contendit. Caſ-  
ſinates eo proſecto ſe ſe Carolo dediderunt. ad quem non inter-  
miſſis itineribus Capuæ appropinquantem Caietæ ciuitas lega-  
tos miſit, ei ſe oppidum tradituram, imperatq; facturam. Cai-  
etæ in deditioem recepta, Capuani & ipſi regi oppidum tradi-  
derunt. Capuam ubi rex uenit, Giemes, quem Roma ſecum  
abduxerat, in morbum incidit: cuius ſuſtinere uim non potuit.  
At Ferdinādus cum Neapolim petiſſet; eius exercitu intra mœ-  
nia non admiſſo, ipſe cum ſuo comitatu, equitibusq; paucis eſt  
receptus. qui uoluntate ciuitatis intellecta; quæ Gallos expecta-  
re, ne diriperetur, neceſſabat; combuſtis duabus nauibus magnis  
ex tribus quas in portu habebat, ne in manus hoſtium perueni-  
rent; tertia Obiecto Fliſco tradita, equos propè trecentos egre-  
gie ſobolis ſuis ciuibus, amicisq; diſtribuit. deinde Neapolita-  
na, quam appellant Nouam, militibus, reliquisq; rebus ad obſi-  
dionem ſuſtinendam idoneis apprime communita, cum Federi-  
co patruo, & uxore Ferdinandi aui ſui, atq; filia in inſulam Me-  
garem ſe ſe contulit. ex ea inſula, quæ eſt non longe ab oppidi  
littore, Neapolitani reges arcem munitiſſimam effecerunt. Ca-  
rolo recta Neapolim cum exercitu properante, Virginius, Ni-  
colausq; Ferdinandi duces; quod intellexerant ciuitatem lega-  
tos de deditioe ad Carolum miſiſſe; Nolam ſe cum ea, quam  
habebant, manu receperunt. quos præmiſſi Caroli equites cum  
inſequerentur; Nolani Gallis portas aperuerunt, retentis, inter-  
ceptisq;



ceptisq; Nicolao, atque Virginio: qui ambo in Gallorum potestatem uenerunt: tamen si iam ante à Carolo petiissent, ut in suam fidem se se reciperet; idq; eis Carolus esset pollicitus. itaque in eo fides est regia desiderata. Carolus intellecta Ferdinandi fuga, Neapolim uenit, præmissis suis ducibus; ne militum, & equitum introitu oppidum egregium, atque opulentum diriperetur. eo potitus, per legatos Venetos, perq; literas Senatui gratias egit; quod otium sibi, atque beniuolentiam, quam pollicitus fuerat, præstitisset. Ferdinandus suis cum mulieribus, & suppellectili bene magna nauibus longis duodecim ad Aenariam traiecit, insulam & situ & opere munitissimam. abest à Neapoli duo de uiginti millia passuum. Interim fama de aduentu, deq; successu rerum Caroli ad Turcas perlata; propterea quod rex palam dictitauerat, Neapolitano regno capto se in Turcas profecturum, eisq; bellum terra, mariq; illaturum; tanta fuit eius rei opinio, tantusq; omnes eas gentes terror inuasit; ut in Illyrico, Epiro, Acarnania, Macedonia, qui maritimas earum regionum oras, atque portus incolebant, se introrsus reciperent, atque in longinquas à litoribus, & remotas latebras abderent. literæ etiam ab Antonio Grimano ad Senatum uenerunt; cum ad Naupactum Aetoliæ littora nauibus longis præterucheretur, Turcas eam esse classem Gallicam uerentes, omnes aufugisse, uacuaq; littora custodiis reliquisse. ut quilibet existimare potuerit; si se modo Carolus illis in locis ostendisset, paruo eum negotio omnes eas regiones in suam potestatem redigere potuisse. Baiafetes quidem rex iam inde, cum primum Florentiam Carolum esse ingressum cognouit, ueteres triremes reficere, nouas instituere cepit: militibusq; suis, & equitibus edixit, se compararent; ut, cum uellet, sibi præsto esse possent. eodem quoque tempore & naues sexaginta; quibus in nauibus erant militum sena millia, equites sexcenti; ab Hispaniæ missæ regibus, ut Siciliæ præsidio essent, Triturritam appulerunt: & Laurentius Suares, quem iidem reges legatum ad Senatum miserant, Venetias uenit. causa mittendi fuit, quod timuerant, ne Carolus Neapolitano regno capto in animum induceret etiam Siciliam insulam, quæ aliquando Galliæ regibus paruisset, eodem quo Neapolim iure



uelle suam facere . ii cum suis rebus timerent , Gallorum audaciam , atque potentiam ueriti , existimabant Venetos uicinitate periculi adductos , quòd magnum regem in Italia pollentem uiderent , eodem in timore uersari ; propterea quòd res omnes publicæ , ualidæ præsertim , atque firmæ , suspectæ , ac formidolosæ sunt regibus . itaque Suari mandauerant , ut salutato principe , & patribus , eos certiores faceret ; se se , quo ipsi animo in Carolū essent , eodem esse Venetos existimauisse . quòd si cauere sibi ab illo cuperent ; se paratos esse unā cum ipsis omnem fortunā experiri . scire se , qua prudentia , qua fide Senatus Venetus esset : nemine cum rege libentius , quā cum ipso , fœdus percussuros . uenturum in societatem periculi Alexandrum Pont . Max . qui nihil æque cupiat , atque hoc , ut ipsos , & Venetos sibi coniunctos habeat ; quorum armis , si quid durius accidat , se munire ac tueri possit . eo socio non minimū roboris , atque uiriū , plurimum quidem certe auctoritatis in cōmune accessurum : ut magnopere sperandum sit , si consenserint , omnia prospere , atq; feliciter casura . ea legati oratio gratissima fuit patribus : quos iam Caroli rerum successus circumspicere se se met , & uereri multa cogebat ; quæ ambiguo adhuc euentu belli non æstimabantur . huc accedebat , quòd Ludouicus ipse diffidere Carolo cœperat , cum ob eius literas imperiosiores ad se missas ; quibus eum literis rex Neapolim euocabat : tum propterea quòd Ioannem Iacobum Triultium , quem quidem ipse Mediolano expulerat , exulemq; fecerat , hominem sibi multis de causis inimicum , Carolus suam in fidem apud Neapolim receperat : postremo quòd Aloisium propinquum suum , quem Astæ relictum supra demonstratum est ; inde postea discedere Carolus noluerat . eæ res , quòd nonnullam ostendebant in Caroli animo inesse de Ludouici fide suspicionem , Ludouicum item suspensum animi fecerant , quantum regi esset credendum . de eo ipse apud legatum Venetum questus ei ostendit , libenter se ab Gallis discessurum , fœdusq; cum rep . renouaturum . erāt præterea in urbe Maximiliani regis legati , cuius pater Federicus imperator eo anno mortē obierat : qui Senatum in Gallos incitare non desistebant . eorum oratio , propterea quòd Maximilianus Ludouici fratris filiam



in matrimonium duxerat, eratq; cum eo planè coniunctissimus, ex ipsius ore Ludouici mitti propemodum uidebatur. tamen si Maximiliano quidem ipsi omnis erat ad Gallorum opes, atque potentiam inuisa, molestaq; accessio: quem quidem etiam recès accepta insignis iniuria contra Carolum stimulabat, Margarita filia sua, cum dote plures ante annos ei tradita, cui tamen Carolus propter aetatem puellæ nondum se adiunxerat, repudiata; Annaq; Armoricarum gentium regina, quam Franciscus pater Maximiliano sponderat, sibi à Carolo prærepta, & uxore ducta. interim Neapolitanis arcibus duabus partim ui, partim pretio expugnatis, magna Calabrorum populorum, magna Brutii, magna etiam Apuliæ parte in deditionem recepta; Carolo non iam ea, qua consueuerat, facie, facilitateq; legatos Venetos admittente; nonnihil etiam interdum iactante, breui fore, ut, qui se noluerant in Italiam traicere, Neapolimq; capere, eos suæ maliuolentiæ pœniteret: de fœdere inter eos sanciendo diligentius est agi cœptum per eorum omnium legatos apud Senatum: ad quem quidem Ludouicus eam ob rem nouam etiam legationem miserat. Suares quidem ipse iam ab initio suarum hortationum patribus dixerat, iussu se ab regibus, quancunque fœderis legem Senatus iuberet, in eius uerba iurare. satis sibi fore, si unum modo scirent, Senatum ita statuendum iudicauisse. nam omnino Alexander, qui iam Gallos esset expertus, dixissetq; palàm, si redeant, se Venetias, ne eos iterum uideat, profecturum; cupidissime, auidissimeq; illum ipsum expectabat diem, quo secum rep. reliquisq; coniungeret. itaque pridie Cal. Aprilis fœdus initum ab iis, sancitumq; est in annos xxv. maiestatem Romani Pontificis, dignitatem, libertatem, iura eorum, ditionesq; omnium tuendi, & muniendi causa. quo ex fœdere equitum triginta quatuor millia, peditum uiginti confecta, parataq; habere uniuersi tenerentur, suo cuique sigillatim attributo numero. is erat equitum quidem Alexandro quatuor millium, Maximiliano sex, Hispaniæ regibus octo, reip. totidem, Ludouico item octo; peditum uero singulis quatuor millium. quem si quis equitum, peditumq; numerum propter longinquitatem itineris, ac rei bene gerendæ celeritatem mittere in tempo



re non possit : ei sit in socios eorum stipendium conferendum  
auri sexcentenæ libræ : ii exercitum pro illo conficiant . quod si  
classis bellum indigeat : quibus adest parandarum nauium fa-  
cultas ; ii tantam , quanta opus erit , parent ; ab reliquis pro sua  
cuiusque parte stipendium attribuatur . ea lex eius fœderis fuit .  
quo omnino in conficiendo cum tot adessent legati ; tot ciuibus  
tractandæ rei adhibitis , toto demum uocato sapius , & consulto  
Senatu : tanta tamen fuit iussu Decemuirum in patribus , reli-  
quisq; omnibus continendæ uocis cura ; ut Philippus Caroli re-  
gis legatus , cum in curiam quotidie uentitaret , atque ab legatis  
reliquis appellaretur , nihil eius tamen cognoscere potuerit . ita-  
que cum postridie eius diei , quo die scripta lex est , in curiam uo-  
catus à principe fœdus esse percussum intellexisset , & nomina  
fœderatorum cognouisset ; mens penè hominem reliquit . tam-  
etsi princeps ei dixerat ; ea , quæ fecissent , non propterea esse fa-  
cta , uti bellum cuiquam inferrent ; sed ut , si inferretur , propul-  
sarent . demum is reuocato ad se paulisper animo , quid , inquit ,  
meus rex in Galliam reuerti non poterit ? tum princeps , ille ue-  
ro , inquit , poterit ; si redire amicus uolet : nosq; illum rebus om-  
nibus iuuabimus . quo responso accepto discessit : atque ubi , cu-  
ria egressus , remensis , quas ascenderat , scalis in aream descen-  
dit ; adscribam Senatus , qui eum comitabatur , conuersus , ro-  
go te , inquit , fodes , mihi eum sermonem recenseas , quem prin-  
ceps mecum habuit : nihil enim iam eius memini . Petierat à Se-  
natu Alexander , antequam de fœdere esset confectum ; uellent  
patres pro ea , qua semper ciuitas fuerat in Romanos Pontifices  
pietate , equites leuis armaturæ quingentos , milites bis totidem  
præsidii ad se causa mittere . ea enim factione , quæ regi se ad-  
iunxerat , Romanorum principum , omnia eius consilia magno  
pere impediabantur . itaque percussio statim fœdere patres iusse-  
runt ; ex illis , qui Rauennæ hyemauerant , equitibus , quiq; ibi  
adhuc quidem morabantur , is ut Romam numerus celeriter cō-  
tenderet : tum ut Hieronymo Georgio , qui apud Alexandrum  
legati munereungebatur , pecuniam quæstores è uestigio cura-  
rent , qua is pecunia mille in urbe milites conscriberet . literas ad  
Ludouicum præterea dederunt ; ipse quoque idem faceret , mit-  
teretq;



teretq; alteros totidem Romam milites, equitesq; : quo fultus auxilio Pontifex dignitatem posset suam facilius, atque honestius tueri. Legati post hæc, qui ad Carolum à Senatu missi fuerāt, domum sunt redire iussi. ipse uero interea Carolus cognito, de quo dictum est, fœdere, ueritus ne, si moram Neapoli traheret, dum ii nouas copias cogerent, exercitusq; coniungerent, ab eis intercluderetur, ne in Galliam reuerti posset; statuit optimum esse quamprimum discedere, sperans, si modo antequam ii omnibus ad bellum rebus instructi, paratiq; essent, proficisceretur, Italiæ itinera sibi ipsum illis etiam nolentibus patefacturum. nam mari tantum exercitum traiciendi nauium ei facultas non erat, quam enim Genuæ parauerat classem; ea maxima coorta tempestate afflicta, atque in littus ad Populoniam eiecta, nullum ei usum præbuerat: cuius quidem præfectus, & princeps Salernitanorum Antonius pedibus se ad eum contulerunt. interim à Ludouico maxime omnium se deceptum dictitans, auertere ab illius imperio Genuensium ciuitatem summo studio concupiuit, itaque Petro Fregosio Cardinale, qui dux eorum fuerat, suas in partes traducto, eum, & Obiectum Fliscum, & præfectum ex suis Segusianorum principem cum nauibus longis undecim, quas habebat ex sua classe reliquas, eò misit. ipse, equitum & militum octo millibus regni præsidio relictis, ad diem tertiumdecimum Calendarum Iunii cum reliquo exercitu Neapoli profectus uia se dedit. Alexander, ad quem quidem Veneti de Carolo id, quod accidit, opinione existimantes futurum, ut nuncio de fœdere accepto in Galliam redire contenderet, Pontificis timentes rebus iam ante eos dies alteros equites leuis armaturæ quingentos exiis, quos ab Epyro, Laconiaq; accersitos celeritate præstâtissimos habebant, miserant, quibus ad omnes casus uti posset; regem Romæ appropinquantem Cardinalibus, Romanisq; principibus adhibitis non expectare decreuit: septusq; equitum numero duum millium, peditum trium millium quingentorum discessit, atque Urbem ueterem biduo uenit. Illis diebus Carolus certum hominem ad Senatum misit, qui ei diceret: suum regem nulli unquam homini supplicauisse: scire tantum uelle, utrum ciuitas amico in se, an hostili animo esset.

G



ad ea princeps ita respondit: prudentium esse hominum, planeque sapientium, aliorum interdum uoluntati se permittere, aliorum opem poscere, precari: illud in ipso esse, amicus ne, an inimicus reip. uelit esse. is postea nuncius, & Philippus regis legatus una Venetiis discesserunt. Florentini autem cum intellexissent Venetos cum Pontifice, ac Ludouico, reliquisque regibus consensisse; Carolumque Neapoli, ut in Galliam rediret, discessisse; nouas militum copias celeriter conscribere, se sequi praesidio communire coeperunt: ut, si Carolus ea uellet iter facere, oppidumque ingredi, repellere illum possent. statuerat enim ciuitas nullis iterum conditionibus esse regem mœnibus recipiendum. Pontifice profecto, Carolus Romam uenit, atque ad Alexandrum legatos misit, uelle se eum alloqui: plurimum utriusque interesse, sibi eius rei fieri potestatem. colloquio non impetrato, Tuscanellam in uia Cassia oppidum, quod quidem magna opposita ruricularum manu Gallos intromittere noluerat, eius milites, itemque Fisconis montem ui ceperunt. quod ubi Senatus cognouit, reip. socium, & quidem omnium dignitate principem à Gallis uiolatum, belli que factum à Carolo initium in foederatos; eosque homines, cum intra fines imperii uel reip. uel Ludouici uenissent, à maleficio non temperaturos existimaret: praeter id, quod in Gallia terrestrium copiarum comparabatur, decreuit, uti Antonius ea cum classe, quam ciuitas illis ipsis auxerat diebus, ad Sasonem insulam accederet: ut in Apuliam traiciendi, cum iuberetur, mora ei nulla fieret, optimum enim esse statuerat; si Galli furere inciperent, ea etiam à parte illos laceffere. Carolus relicta Florentia, quae se praesidiis firmauerat, Pisas, deinde Lucam uenit. Pontifex, qui Perusiam erat profectus, equitibus, quos à Venetis, & Ludouico acceperat, reuerti iussis, Romam rediit. Hæc dum agerentur, Aloisius princeps Genabensium, Astæ à Carolo relictus, Salassis adiuantibus, tum è Gallia transalpina, atque ab Heluetiis milite celeriter accersito, uastatis Ludouici finibus, transmissis furtim Pado flumine Nouariam per proditionem cepit. erat eo in oppido ciuis; cuius fratris fundos ualde quidem fructuosos Ludouicus post eius mortem dolo malo suorum cuiquam addixerat, ipso ad sepulcrum in iudicium



cium sisti iusso . is fraternos ulciscendi manes studio milites Aloisianos reclusis bene mane portis intra mœnia recepit . ita Galli apertius eodem tempore alterius regnum socii reip. inuadere , ac priores bellum gerere cœperunt . illis ipsis diebus patres consulto Senatu decreuerunt , uti quina millia Italorum equitum noua conscriberentur : bina millia ex Epiro , Græciâq; præter illos , qui imperati iam erant , accerferentur . Francisco autē Mantuanorum principi Senatusconsultum prius in annos quatuor renouatum est , stipendiaq; uberiora constituta . tum scriptus unâ Rodulfus eius patruus . scriptus etiam ante eos quidem menses Guidus Vbaldus Feltrius , qui regnum in Metaurensibus obtinebat , cum equitibus quadringentis septuaginta : illis autem diebus Hannibal Bentiuolus Ioannis filius cum quadringentis , & Paulus Manfronius Vicetinus , qui Neapolitano in regno tunc erat , cum ducentis : equitesq; ab Epiro , Acarnaniaq; ad litus Venetum aduecti circiter mille . exercitu deinde lustrato milites , equitesq; in fines Brixianorum iussi procedere : creatiq; legati Malchio Triuisanus , Lucas Pisanus ad exercitum profecti sunt . Senatus etiam scriba Bononiam missus ; qui Ioânem Bentiuolum in officio contineret . itaque cū rex paulo post ad eum misisset , petens ut itineris per eius fines oppidumq; faciendi facultas sibi fieret ; impetrare nihil potuit . auri præterea quingentæ libræ Ludouico petenti mutuo à Senatu datæ , deinde etiam trecentæ . post hæc Senatusconsultum factum est , uti militum in Gallia , & Venetia quina millia imperarentur , ex Heluetiorū pagis bina millia accerferentur : qui autem iam tum pedites , equitesq; conuenissent , ii omnes in Parmensem agrum mitterentur . neque multo post alio Senatusconsulto Franciscus imperator dictus est ; eiq; res militaris permissa . præfectus etiam Græcis equitibus Bernardus Contarenus datus : tum uexillum imperatorium publice Francisco missum . qui facto ad Ollium flumen ponte exercitum traduxit : & firmato munitionibus ponte ab ea ripa , quæ in Cremonensi agro est , alterum pontem in Pado flumine nauibus imposuit ; atque ex utraque ripa fossa , & uallo , aggereq; præalto muniit . tum exercitus in Parmensem est agrum tractus . eius rei literis acceptis , imperator à Senatu



iussus est: si Galli, dum redeunt, ei molestiam exhibeant; ipse autem sine reip. incommodo posse id fieri uideat; in eos impetum faciat: sin res in angusto sit; praelio abstineat; suoq; se loco, atque milites contineat. quod si pacati iter faciant; nihil eis noceat, sed sinat intactos discedere. eo accepto nuncio imperator ad Tari fluminis pontem ducto exercitu, qui pons abest à Parma oppido passuum millia quatuor, castra posuit. cumq; eò Ludouici equites bis mille, milites totidem Ioanne Francisco Seuerinate duce conuenissent; exercitum traduxit: atque ad Opianicum uicum, quà Gallis erat iter faciendum, in ipsa Tari fluminis ripa, quod pedibus transmitti poterat; neque enim ripas præaltas habebat; confedit nō omnino pleno exercitu: quod non omnes, qui expectabantur, erantq; iam in itinere, equites, peditesq; conuenerant. reliquæ Ludouici copix apud Nouariam distinebantur. ad quem quidem à Senatu petetem, ut Græcos equites ei mitteret, quibus eo bello uti posset; Senatus Bernardo Côtareno præfecto sexcentos misit. Rex Luca profectus per Appennini iuga ad Apuanos Ludouici municipium uenit. oppidani Ioannis Iacobi Triultii suasu se se regi dederunt: quos tamen paulo post eius milites pace fracta diripuerunt, oppidumq; incenderunt. ex eo loco rex Triultium cum prima acie præmisit, qui montano confecto itinere se expectaret, exploratoresq; mitteret; ut, quid hostes molirentur, scire posset. interim imperator præmissis equitibus, atque militibus, quot uisum est, ad Gerulam uicum, qui à Foro Noui abest passuum millia tria; uti regis itinera cognoscerent, locumq; castris caperent; postridie eius diei mane cum reliquis copiis omnibus eò uenit. erat autem uniuersus exercitus equitum ad duodecim millia, militum propè altera totidem. ibi cum esset imperator; à speculatoribus certior factus est Triultium cum equitum cataphractorum & militum Heluetiorum manu præmissum è iugis in planitiem ad Forum Noui descendere. ille autem, ut postea cognitum est, uicum illum magnopere oportunum, in quo se regix copix confirmarent, atq; ab Appennini itinere reficerent, capere uolebat: eoq; partem suorum præire iusserat: ipse cum reliquis se, ut sequeretur, comparabat. ea intellecta re imperator Græcos equites  
sexcentos



sexcentos præmisit, qui eos impedirent: ipse cum equitum fir-  
 miorum agmine illis præsidio est subsecutus. Græci uelocitate  
 sua usi ubi primos uenientes conspexerunt, in eos impetu facto,  
 prælioq; commisso uniuersos repulerunt: repulso usque ad ca-  
 strorum munitiones consecuti complures eorum occiderunt, cō-  
 plures captiuos fecerunt, uno suorum tantummodo amisso: quē  
 parui tormenti pila è uallo missa traiecerat, eo mortuo capti-  
 uos propè omnes interfecerunt: capitaq; abscissa in castra reuer-  
 tentes attulerunt circiter quadraginta. Triulcius sibi, suisq; ueri-  
 tus extremum in iugum se se recepit: regemq; ibi triduum expe-  
 ctans est commoratus, quo si tempore Venetus illum adortus  
 esset; ea se manu defendere non potuisset: quo capto reliquum  
 exercitum expugnare, haud maximi negotii fuisset. ea re ab im-  
 peratore, atque ab legatis, & principibus iactata; quòd existi-  
 mabant, si primam aciem prælio uicissent, Carolum, reliquasq;  
 copias Lucam reuersuras, seq; in tutum recepturas; ne qua eos  
 manus elabi, effugereq; posset, ab illo aggrediendo destiterunt,  
 quanquam postea fuere, qui crederent Seuerinatem, qui eius  
 consilii princeps fuerat, non eam ob causam, de qua dixi, sed  
 propterea quòd ex Ludouici præscripto regi magnum fieri detri-  
 mentum nolebat; ne ciuitatis ex eo Venetæ nomen, existima-  
 tioq; augetur; summopere in concilio, id ne fieret; obstitisse.  
 Ciuitas interea cum intellexisset regem magno animo in Vene-  
 tos impetum facturum, quos imparatos adhuc plurimis ab re-  
 bus esse audierat; permota, largitiones in sacrarum uirginum  
 collegia, precesq; ad omnia templa fieri iussit: uotaq; pro salute  
 patriæ publice suscepta sunt. Rex triduum illud tormentis belli-  
 cis ex ære magni ponderis impeditissimis itineribus per inuia,  
 atque abrupta montium conuehendis moratus non iis modo,  
 quæ priore itione secum habuit; sed illis etiam, quæ cū reliquo  
 exercitu in Flaminiam præmiserat; cum omnibus copiis Forum  
 Nouii ante meridiem se contulit. eo die remissi Græci equites  
 usque ad regis castra compluribus cum Gallorum capitibus ad  
 imperatorem redierunt. è foro autem Nouii missus tubicen à  
 Philippo Argentonio, qui regis nomine itineris propter castra  
 faciendi facultatem ab legatis peteret; ea non impetrata, quòd



legati dicerent, nisi rex capta ab se atque suis sociorum reip. op-  
pida restitueret, se id non concessuros; ad regem reuersus spes  
pacis omnem sustulit. ea intellecta res magnum attulit Gallis ti-  
morem: qui è collibus castra Veneta prospexerant in amplissi-  
mum tabernaculis porrecta campi spatium: uisumq; eis est tan-  
tis oppositis hostium copiis rem ipsorum in angusto esse. itaque  
uulgo, qui sapientiores erant, tribuni, ducesq; magis magisq;  
regi, sibiq; uerebantur; grauissimumq; omnibus impendere ca-  
sum, atque periculum arbitrabantur. qui quidem timor ea, quæ  
secuta est, nocte auctus, conduplicatusq; est. magnæ enim plu-  
uiæ, ingentiaq; tonitrua, & crebræ, atque terrificæ coruscatio-  
nes fuerunt: ut cælum propè discedere uideretur; ultimamq;  
plurimi sibi noctem illam fore ea Deorum immortalium quasi  
denunciatione moniti crederent. solet autem ferè semper acci-  
dere; ut, cum semel uehemens aliquis mentes hominum incessit  
timor, etiam iis, quæ timenda non sunt, animi eorum magno-  
pere perturbentur. quam ob rem cum parum in somno, mul-  
tum in consiliis inter se fuissent: orta uix luce; qui fuit dies pri-  
die Calen. Iulias; Caroli præfecti aciem instruxerunt; atque i-  
ter facere cœperunt. interim consultis legatis, principibusq; reli-  
quis, quid nam esset potissimum agendum; legatis prælium dis-  
suadentibus cum propter Senatusconsultum, de quo supra di-  
ctum est; tum uero etiam quòd complures equitum turmæ, mi-  
litumq; centuriæ neque dum uenerant: nam & Pandulfus Arimi-  
nensium, & Ioânes Pisaurensium principes, & Paulus Manfro-  
nius cum sua quisque cataphractorum equitum copia, innume-  
riq; milites expectabantur: tandem Gallos aggredi, qui reip. so-  
ciorum oppida cepissent, atque incendissent, præliumq; com-  
mitti placuit. erant Gallorum copiar tres in acies instructæ: qua-  
rum in priore magnam spes duces habebant: quòd eam & nu-  
mero equitum, ac militum, & robore munierant: eiq; addide-  
rant quatercentos ex cohorte regia eorum, qui sagittis in equo  
utebantur: quos quatuor millibus Heluetiorum militibus, qui-  
bus maxime confidebant, immiscuerunt. in media erat acie rex;  
eâq; propè omnis Galliæ nobilitas continebatur. ab postremæ  
læuò latere impedimenta sequebantur: tormenta omnibus acie-



bus erant præposita: eaq̃; acies non ita magno inter se relicto spatio constipatae celeriter, uti, si possent, Venetos effugerent, uadebant. interea nuntii ad Venetorum castra, qui pacem ab legatis peterent, fallendi gratia mittebantur. ubi id imperatori nuntiatum est; militibus, ut arma caperent, imperauit. ipse deinde armato exercitu, & infessis equis copias omnes ita disposuit, ut ex iis nouem acies efficeret: quarum quinque equitum cataphractorum essent, tres militum, equitum leuis armaturæ una. quæ res impetum exercitus imminuit: nulla enim earum satis uirium ad hostem propellendum habebat. erat inter utrumque exercitū Tarus, de quo dictum est, flumen; quod ea nocte creuerat: eius autem uallis planities impedita nō ripis modo fluminis, sed glarea etiam, grandibusq̃; saxis; tum & uirgultis, & quod magnæ pluuiæ fuerant, lubrico, & lacunoso cœno; ut inæquabilē, & difficilem transitum daret. Gallorum prima acies cum ante castra Veneta peruenisset; armari milites conspicata, magnum in eos pilarū ferrearū numerū tormētis immisit: quas tamē propè omnes supra militum capita uis ignis, impetusq̃; abstulit, ne magnopere nocerent: percommodeq̃; ea in re accidit, quod tū cœlum erat pluuium: ut sua Galli tormenta, quorum magnum numerum habebant, amplius exercere non potuerint. tum uero imperator moras omnes posthabendas ratus, magno ipse animo, & rei bene gerendæ fiduciæ pleno, quem etiam prouehabat adolescentia; instructo exercitu, constitutoq̃; quid fieri oporteret, ac permissa patruo reliquas acies submittendi potestate, signo pugnae dato, & transmissis pedibus flumine, regis exercitū, qui quidem mille passuum iter, eoq̃; amplius iam præcesserat, citato gradu insequi cœpit: eumq̃; propè medium assecutus, in regis aciem, quæ se conuerterat, impetum fecit. prælio acriter commisso cum fortissime ab utrisque pugnaretur; Rodulfus acie una maxima, atq̃; plenissima, cui Antonius Feltrius Guidi Vbaldi frater nothus præerat, iussa consistere, altera castris præsidio esse, neque se loco ambas mouere, donec ipse eas uocet; imperatorem subsecutus, cum secunda acie in Gallorum globum se se iniecit, acerrimeq̃; pugnās eum disiecit: neque imperatori modo auxilium peropportune attulit cum illius acie se coniungens;



sed magnum etiam addidit suo aduētū eius militibus animum. itaque ambæ acies paruo temporis spatio magnum Gallorum numerum occiderunt, magnum ex suis amiserunt: rex cum paucis relictus, admonitus à suis pugnantibus se subripuit. eodem ferè tempore acies tertia, cui Deuerinas præerat, primam Gallorum aciem consecuta pedem statim retulit, non ausa, uel potius non iussa progredi. omnibus autem equitum aciebus, quæ ad regis exercitum contenderunt, idem ferè perincommode accidit: ut & flumine transeundo, & ripis superandis, & saxis peruadendis, & uirgultis, ac cænosa uia conficienda, multa etiam pluuiæ, non solum ordines seruari non potuerint; sed complures prolaberentur; complures se medio itinere cōtinerent; multi aliorsum flecterent: ut parua eorum pars prælio interfuerit. nam milites plerique omnes, exceptis ducētis Genua Veneto duce, paucisq; ex imperatoris comitatu, qui equitibus interiecti eius latus muniebant, pugnam detrectauerunt. at uero Itali equites leuis armaturæ, quos unà cum Græcis imperator iusserat ab hostium tergo læuum latus montium capere, atque ab latere ad uerso in eos impetum facere; ubi impedimenta conspexerunt, in ea spretis imperiis propè omnes cōuolauerunt; custodibusq; aliquot occisis, ea rapere, atque abducere contenderunt: quos Græci equites imitati idem fecerunt, exceptis eorum ducibus: qui cum paucis ad hostes laceffendos contenderunt. ea res magna ex parte reip. uictoriam interpellauit. nam si in hostium acies ab latere, ut debebant, eratq; eis imperatū, ii omnes impetum fecissent: Galli se pugnx subducere sine certa clade non potuissent. tametsi alia etiam ex parte casus adiumento, atque præsidio Gallis fuit. duæ enim equitum acies; quemadmodum Roldulfus imperauerat, ne se loco mouerent; prælio non interfuerunt, expectantes, quam is in partem eas uocaret. ille autem à Gallis interfectus fuerat. ita qui repulsi atque fracti fugæ se mādare cogitabant; restituto ab reliquis aciebus, quæ regi auxilio uenerant, prælio, se continuerunt. pugnatum igitur est acriter, ut ante dictum est, ab utrisque; cædesq; ingens facta: eoq; res horæ spatio deducta; ut, neutris planè uictoribus, defessis potius pugnando, quàm permittentibus Venetis, Galli se celeriter subriperent:



subriperent: ac magna impedimentorum parte direpta, cumq;  
 iis regio tentorio, & cubiculo, & suppellectili sacra, qua rex in  
 templo utebatur, signisq; militaribus aliquot amissis tantum iti-  
 neris, quantum lassitudine, atque uulneribus confecti poterant,  
 contenderent: noctemq; illam magno cum timore sub dio sine ta-  
 bernaculis, sine castris exigerent. Imperator sua in castra rediit.  
 desiderati sunt ex Venetis circiter mille quingenti: quorum nō  
 minimam quidem partem uel iniquitate loci detentam, & ua-  
 gam, uel acceptis uulneribus, aut suffossis equis prolapsam, &  
 morantem calones, lixæq; Galli, quorum permagnus erat nu-  
 merus, qui ab equitatu leuiore disiecti se ad acies referebant,  
 desertos à reliquis militibus plures singulos adorti securibus in-  
 terfecerant. ex iis, qui fortiter pugnantes interierunt, fuere, præ-  
 ter Rodulfum, imperatoris præfectus militum Ranutius Farne-  
 sius Romanus, claro loco natus, uir magna uirtute, Alexandri  
 Farnesii illius, qui postea Pont. Max. creatus, Paulus tertius di-  
 ctus est, patruelis frater; & familiaris imperatoris comitatus par-  
 te plus media; tum præfecti equitum uiri fortissimi duodecim,  
 centuriones quatuor. Bernardinus autem Montonius, multis  
 uulneribus acceptis, equo deiectus, inter caesorum corpora reper-  
 tus, per suorum humeros relatus in castra, seruatusq; est. in ipso  
 uero prælio Nicolaus Vrsinus; quem Nolæ captum à Gallis di-  
 xeramus, & rex custodiri iusserat; pugnantibus omnibus elap-  
 sus, ad legatos Venetos contendit; suamq; operam reip. polli-  
 citus, Gallos propè fractos esse; eos, si quæ uis una ipsorum aci-  
 es insequaret, terga daturus confirmans, contestansq; Deos; id  
 ut legati mandarent, magnopere suadebat: qui, perculso temere  
 exercitu, militibusq; aut dispersis, aut pedem referentibus, eam  
 rem aggredi non sunt ausi. ex Gallis interfecti sunt ad mille, at-  
 que ex iis dux uigilum regis, itemq; sagittariorum, & magistra-  
 tus is, quem ipsi magnum Mareffalem appellant, aliiq; præfe-  
 cti militum decem: tum nothus Boius, primæ ferè apud regem  
 auctoritatis, & magni inter Gallos nominis, uulnere accepto,  
 duoq; magnorum principum liberi, & sacerdos regius, aliiq; ca-  
 ptiui facti: cum eo prælio ex Venetorum exercitu nemo uiuus  
 in hostium potestatem uenisset. postero die rex ante lucem igne

H



plurimo facto, ut eius copiae ibi esse uiderentur, sine ullo strepitu abiit: celeritateque usus, quam longissime potuit, antecessit. Veneti mane consequi regem cum uellent; Taro flumine, quod ea nocte creuerat, impediti restiterunt. tum Seuerinas, qui praelio cum suis abstinuerat, imperatori, legatisque se se obtulit; si sibi equitatum leuiorem traderent, se regem remoraturum, dum ipsi cum reliquo exercitu ueniant. re impetrata, cum equitibus mille quingentis Italis profectus, longiore itinere per occasionem suscepto, quod flumen creuisset, consequendi regem eo die uolens tempus omisit. quem postea cum esset consecutus; ei dux, ministerque itineris potius, quam morator fuit Asta prope usque: ut id, quod petierat ab imperatore, legatisque, propterea uideretur petiisse, ut illum in tuto sisteret. id ab eo de Ludouici sententia esse susceptum ea res indicio fuit; quod Bernardo Contareno ab Ludouico petenti, uti se cum suo equitatu extremum regis agmen aggredi sineret, Ludouicus non permisit. eo biduo magnus equitum conscriptorum, multo maior militum numerus ad exercitum Venetorum uenit. Imperator subsidente flumine cum exercitu profectus, cum rex bidui eum itinere praecederet, consequendi regem facultate amissa, Graecos equites leuissimos sexcentos misit, qui eius agmen carperent, quaque possent, exercitui nocerent. ii dum iter facerent, multa in uia cadauera Gallorum passim iacentia conspexerunt: ut plus etiam, quam credebatur, exercitui regio esse illatum caedis appareret. atque ii quidem equites postremum regis agmen celeritate consecuti, compluribus interfectis, praeda etiam facta ad imperatorem redierunt. eo de praelio a Senatu supplicatio decreta est: gratiaeque Diis immortalibus actae; quod ciuitatem, magnopere suspensam tantarum rerum expectatione, fuga hostium liberauissent: Nicolaoque Vrsino auri librae decem dono datae. Sed rege Carolo Neapoli profecto; ut paulisper ad superiora reuertamur; Veneti, de classe regia in Liguriam missa, ut supra demonstratum est, certiores facti, suum hominem cum pecunia Genuam ad naues onerarias; quibus ad mercaturam uti ciuitas priuatim consuevit, habetque in portu fere semper multas; militibus, rebusque omnibus ad bellum propulsandum idoneis celeriter armadas, contendere iusserunt:



ferunt : cum Ludouicus item instrui naues longas aliquot ibidem iussisset. pollicitæ præterea sunt procurantibus patribus fœderatorum legationes Genuensium magistratui ; ut libentius cōtra Gallos arma caperent ; se curaturas , effecturasq̃ ; uti eis Florentinorum ciuitas Serezanam , Serezanulamq̃ , ac Petram Sanctam in Appennino oppida restitueret : eiusq̃ rei petentibus ipsis Senatus prædem se dedit. fuerant ea oppida complures ante annos Genuensium magistratus ; qui publicæ , priuatæq̃ pecuniæ , quæ in ærario uulgo deponitur , præest ; ob eamq̃ pecuniam dominis ternas centesimas quotânis soluit . sed ab iis , qui ciuitati tum præerant , pignoris nomine ad remp . Florentinorum peruenerunt , tercentum auri libris mutuo ab illa eis datis . ea sibi reddi oppida ciuitas magnopere studebat : erantq̃ illa ipsa , quæ Carolo tradere Petrus Medices pactus fuerat . Regis igitur classis ad littora Genuensium appulsa ; cui quidem etiam ex Appennini iugis rex equites aliquot , peditesq̃ Gallos quingentos auxilio miserat ; totam illam oram , quæ ad orientem solem spectat , in eius potestatem redegit Portu Veneris excepto . ita belli ab Carolo initium ea etiam ab regni parte in Venetorum socios est factum . postremo cum Galli , Paulo , & Obiecto ducibus successu rerum elati , pedibus Genuam aggredierentur ; ciuitas armata illos fudit , fugauitq̃ ; eo ipso die , quo rex ad flumen Tarũ aduerso cum Venetis prælio dimicauit . tum pridie Id . naues onerariæ , longæq̃ maiori ex parte reip . instructæ opibus obsessam in portu Rapalo classem Gallicam , Rapaliq̃ arcem expugnauerunt , nauibus omnibus cum earum præfecto captis : quibus in nauibus mulieres erant captiue permultæ , uirginesq̃ sacræ aliquot suis è Gaetæ fanis abreptæ , atque uiolatæ , aurumq̃ ; item sacrum & argentum ; ac fores æneæ portarum affabre illæ quidē factæ , magnoq̃ comparatæ pretio ; quas arcu Neapolitanæ Galli detraherant . pauloq̃ post Carretii principes , qui Finarium oppidum à Genuensibus acceptum obtinebant ; Entimilium oppidum , quod ad occidentem solem est , & Galli occupauerant ; recuperauerunt : omnisq̃ utrinque ora breui ad Genuenses rediit . atque hæc quidem in Liguribus gesta sunt . cumq̃ ad Ludouicũ signa Caroli regis quatuor è Gallorum capta nauibus Genuensis



ciuitas dono misisset: Ludouicus, magno reip. merito id se face  
re pronuncians, duo eorum legato apud se Veneto dedit. eodē  
quoque Genuenses tēpore legationem Venetias miserunt, quæ  
Senatui gratias ageret, quòd ea, quæ feliciter contra Gallos ges  
serant, eius liberalitate, atque ductu primo & initium, & incre  
mentum, postremo etiam exitum habuissent. Imperator autem  
Clastidii cum esset, regem subsequens; Ludouico postulante  
equites, militesq; ad bis mille, Dertonam, Alexandriamq; Sena  
tus iussu præsidio misit. eodem etiam petente, ut resp. legatos  
ex principibus ciuitatis ad se duos mitteret, qui secum rebus o  
mnibus tam ambiguo tēpore præessent; uti sui ciues, omnesq;  
homines cognoscerent, ei se curæ, regnumq; suum esse: Lucam  
Zenum, Andream Venerium, legatos Senatus creauit. ab iis le  
gatione propter ætatem renunciata, Marcus Georgius, Benedi  
ctus Sanutus ad id muneris eorum loco Mediolanum sunt ire  
iussi. inter hæc Senatus decreuit; ut eorum, qui fortiter, atque  
amanter ad flumen Tarum contra Gallos remp. gesserant, uel  
uiuentium, uel mortuorum ratio haberetur. itaque imperator  
Rodulfi patrum equitatu, stipendioq; auctus est; nomenq; ei cla  
rius datum; ut latissime imperator appellaretur: præterea do  
no quotannis auri triginta libræ constitutæ: centumq; in stipen  
dium in præsentia missæ. auctus & Bernardino Montonio equi  
tum numerus ad mille; sexq; auri libræ dono datæ in annos sin  
gulos: quæ quidem etiam nunc ad inutiles seruato annos, ulti  
mumq; senium, & uitam modo producenti pecunia penditur.  
Nicolao item Nonio tum equitum Græcorum auctus numerus;  
tum uero etiam stipis summa, qua in annos singulos à rep. do  
natus antea fuerat, amplior facta. Rodulfi uero liberi in reip.  
fidem recepti; pensioq; librarum auri decem uictus annui nomi  
ne ei data: decretumq; uti maribus singulis equitum turnæ sin  
gulæ, præfectiq; earum attribuantur, quoad ipsi exercere se per  
ætatem possint: fœminis, cum erunt nobiles, dos è pecunia pu  
blica pro earum, gentisq; nobilitate numeretur. Farnesii duobus  
liberis maribus equites quadringenti, quos primo à rep. stipen  
dio pater eorum habuerat, cum præfecto dati; dosq; ampla fœ  
minis publice pollicita. Vincentii Corsii liberis patris equitatus  
datus



datus: filia quam unam reliquit, dos auri librarum quadraginta constituta; intereaque, dum sit nubilus, in uirginum sacrarum collegio uti uictus publice subministratur, Senatusconsulto additum. Alexandri Beraldi Patuini equitatus Francisco fratri, qui cum illo eam pugna fuerat, uulneribusque acceptis superfuerat; & pensio annua, quae ei à Quaestoribus curabatur, attributa. idem in Roberti Strotii item Patuini fratre superstite seruatum. Literae praeterea publice ad legatos datae; curarent, ne quis, qui bene de rep. meritis esset, ab ipsis praeteriretur; quin de eo ad Senatum scriberent. ex eorumque literis in complures, compluriumque liberos, fratresque Senatus pietas, liberalitasque extitit. at uero interea rex septimo post praelium die Astam ingressus fugae finem fecit, confecto cum timore ac labore uiae, tum commeatus non omnino magna inopia exercitu. nam ut sunt ad conferendas manus, praeliaque committenda Galli omnium propè hominum paratissimi atque fortissimi: ita ad perferendos paulo diutius labores, inediaque toleranda supra ceteros animus eorum mollis, infirmusque est: omnisque illa ardens, ac uehemens breui tempore uirtus elaguescit, atque restinguitur. paucis post diebus edicto magistratuum Gallorum Veneti, Mediolanenses, Liguresque omni è Gallia, quae in imperio Caroli erat, exules facti sunt, poena iis, qui recepissent, constituta. itaque Petrus Pascalicus Venetus, qui Lutetiae Parisiorum philosophiae studiis, sacrisque literis operam dabat; seruili ueste se se occultans in Morinos aufugit. deinceps autem cum Ludouicus, legati que Nouaria omnes copias adduxissent; hostesque crebris ex oppido excursionibus eos lacefferent; secundiora cum iis ferè semper Veneti praelia fecerunt: quibus in omnibus Bernardi Contareni uirtus egregia extitit. postea uero quam communi consilio oppidum obsidione cingi placuit; & Aloisius regis propinquus, qui cum eo erant in oppido equites, milites uennumero ad millia octo, inopia frumenti laborare, commeatusque coeperunt: quod ante hostium aduentum eius rei nullam curam habuerant: missi ad eos furtim cum iumentis frumentariis equites regii ab eodem Contareno saepe intercepti; saepe una cum illis ii, qui ex oppido regiiis equitibus subsidio uenerant, caesi, fugatique sunt. neque rex interim nouas copias, ut Aloisium



obsidione liberaret, è Gallia quotidie postulare, accersere scriptis ad suos magistratus, atque ad uxorem literis intermittebat: quas ad literas illa, se iam viros, qui uelint alpes traicere, omnino nullos habere, regi respondit; fœminas uiduas se permultas habere, quarum uiri in Italia periissent. ab Heluetiis etiam per legatos, atque interpretes idem petebat. sed stipendiorum inopia, ne rem conficeret, impediabatur. quin etiam ea de causa ex Heluetiis, quos habebat, milites centum, ex Germanis alteri totidem ad Venetos transierunt. tum uero ab iis suburbana ædificia incensa, tormentaque muralia oppido propius admotæ: & obfessi modis omnibus acrius premi cœpti: quibus in rebus administrandis Nicolaus Vrsinus fistulæ glande plumbea supra renes percussus, pro mortuo sublatus, atque in castra relatus est: neque postea ei bello interfuit. Gallos igitur, qui obsidebantur, magis magisque in dies rerum omnium egestas, atque inopia premebat: ut equis in escam uti cogerentur; compluresque corruptis farinis, aut pane furfuraceo uescentes, tum aquæ potu, quo Galli, Germanique minime omnium uti assolent, interirent. percusserat autem paulo antea nummum æreum Aloisius, cum pecunia cum defecisset; qui pro argenteo polleret. hæc cum crebris occulte nunciis, literisque regi ab Aloisio significarentur: quorum plerique ab hostibus intercipiebantur; nonnulli noctu, magnisque imbribus profecti, diuersis, atque occultis itineribus ad regem perueniebant: sed ille per paucos posse ulterius dies obsidionem sustinere diceret: deceptum autem, & destitutum quereretur: rex ab hostibus pacem petere constituit. itaque per Argentonium tentare imperatorem ea de re cœpit. ab eo ad legatos, ab iis ad Ludouicum, cuius causa bellum gerebatur, re delata, sæpius deinceps eo libentissimo iactata; qui iam quiescere, quam alendis exercitibus conteri, & bello periclitari, malebat; induciæ primum factæ; deinde Aloisio cum paucis abire Nouaria permisum. demum pax ab rege, atque ab Ludouico circiter Nonas Octobres concelebrata iis conditionibus, ut Nouaria Ludouico redderetur: tum ex libris auri uicies centies, quas ab Ludouico rex in Neapolitanum bellum mutuo acceperat, mille ei, & quingentæ rependerentur, quingentæ regi cederent: Ludouici



cus autem naues Gallicas in Rapali captas portu nunciis regiis reddendas curaret: & Triultium, cuius bona publicauerat, exulemque ipsum fecerat, ab exilio reuocaret, in integrumque restitueret: ne ue auxilia Ferdinando regi mitteret: & Carolus quantam uellet classem in Liguribus comparare posset: easque ob res Genuae arx Herculi Ferrariensium principi uice obsidum traderebatur; quam ille regis nomine biennium obtineret. quam quidem ad pacem celerius sanciendam ea etiam causa regem impulit; quod Heluetiorum multo maior, quam ipse petierat, manus domo tandem egressa, ut regi auxilio eo in bello esset; partim Vercellas ad regem uenerat; partim appropinquare nunciabatur; omnes numero ad uiginti millia. quibus quidem iam stipendium, quod rex pollicitus fuerat, arroganter, ac seditiose postulantes rex persolvere non poterat, emuncta creberrimis, ingentibusque in bellum thesauris regi subministrandis transalpina Gallia; uicinisque regibus ferè omnibus, accepta superioribus mensibus mutuo ab eis pecunia, prorsus exhaustis. itaque cum intellexisset eos unos, qui uenerant, nocturna concilia de se capiendo habuisse; ueritus, ne, si reliqui Heluetii propius accessissent, uim eorum subterfugere non posset; pace statim facta eos sero uenisse ad speciem questus, atque in Taurinos properè abiens, domum, qua conditione potuit, remisit. ea de pace cum rege inuenda Veneti ab eius interpretibus, tum à Ludouico sæpe inuitati, consulto Senatu responderunt, se se omnino, nisi de sociorum uoluntate, atque consilio, quibus cum fœdus percussissent, nihil acturos. nam quoniam ex iis, quæ eo in bello gesserat Ludouicus, quantum ei esset credendum, non ambigue cognouerant: nouo se fœdere implicari cum tam infido homine planè nolabant. id ægerrime cum ferret Ludouicus, existimans Venetos alieno ab se se animo esse; questusque apud legatos, Senatum omnia alia, præterquam de sua salute, cogitare; suis militum præfectis clam imperauit, uti flumina, quæ esset exercitui reip. transeundum, si domum redire uellet, communirent, nauesque abigerent; ne traicere se inuito posset. ea per amicos reip. delata res ad legatos, magnopere eos commouit: quod tantis obiectis fluminibus iter se impeditissimum habituros intelligebant, Ludouici



exercitu munitissimis in locis se opponente. pontium autem efficiendorum facultatem sibi datum iri non uidebant, præreptis nauibus, quibus imponi possent. tum illud etiam timebant; ne, si uis adhiberetur, perfidia Ludouicus sua Gallos sibi adiungeret; ut rerum dominus, & pacis, ac belli arbiter uideri posset. hæc uersantibus legatis, Contareno adhibito, neque satis tutum eius rei exitum reperientibus; ubi omnes paulisper conticuerunt, ego, inquit Contarenius, iter uobis domum, si annuitis, patens, atque tutum comparabo. ad ea cum legati, quoniam id tandem modo, quo ue consilio esset effecturus, ab eo quæsiuissent: hodie, inquit, ut consueuistis, uos, & Ludouicus unà eritis communibus de rebus consulturi: aderunt cum illo sui duces, uester uobiscum imperator, præfectiq; fores claudentur: disceptabitur. tum ego illum, tanquam allocuturus, hoc uobis gladio confossum, atque confectum dabo. ea re patrata, neminem ex eius ducebus ferrum educturum certo scio. quis est enim eorum omni non scemina timidior? aut quis illum non pessime odit, uno aut altero excepto? qui tamen ipsi ad Carolum legati de pace profecti adesse non poterunt. Ludouici etiam exercitus ipso mortuo ad uos signa transferet, si se receptum iri intelliget, præsertim spe largitionis aliqua oblata. quod si fit; eius quoque regnum uestris in manibus uersabitur. ita ille, ut meritis est, suorum scelerum pœnas pendet: uos reip. iniurias nullo dispendio ulti uestram dignitatem pulcherrime retinebitis. erat Contareno procerum sanè corpus, & uiuidum, solidumq; uires immanes, uastæq; ac prope inexuperabiles; animus cum prudens, tum omnium magnarum rerum capax: ut, quod is polliceretur, etiam præstari posse confideres. itaque ea legati cum intellexissent; maximis illum laudibus certatim efferentes, quòd tantam rem aggrederi pro communi salute non dubitaret; constituerunt, hoc ad extremum reseruato consilio, experiri, num Ludouicus ad sanitatem bonis artibus conuerti posset. ea tamen de re, quam Contarenius proposuerat, notis scriptas literas ad Decemuirum magistrum confestim dederunt, postulantes uti rescriberent; uellent ne, atque permetterent, si necessitas urgeat, eo consilio ipsos uti. qui de collegii sententia rescripserunt, ex reip. dignitate sibi eam rem



33

rem non uideri. Ludouicus interea cum legatorum dissimulatione, atque prudentia; qui ea se nescire, quæ ab illo parabantur, ostendebant: tum sua sponte; quod nihil omnino tuti irritandis legatis in tam noua, suspectaq; dominatione se habiturum uidebat; ab eo per se consilio destitit. iis cōfectis rebus milites obsessi oppido Nouaria emittuntur. oppidū Ludouico restituitur. Legati Veneti post hæc omni cum exercitu Cremam cū uenissent; militesq; quos oportuit, dato stipendio missos fecissent; reliquosq; milites, equitesq; in hyberna deducendos curauissent: cum imperatore Mantuam profecti, ludis ab eo dies aliquot habitis, ad urbem reuerterunt. Carolus cupidissimis suis omnibus, multo cupidius ipse traiectis alpibus suum in regnum cōcessit.

PETRI BEMBI RERVM VENETARVM  
HISTORIAE LIBER  
TERTIVS.



Erdinandus ubi Carolum Neapoli profectū cognouit; acceptis Messanæ militibus ad mille, (ibi enim tunc erat) quos quidem ciuitas in uicini, atque amici regis gratiam depensotrium mensium stipendio ei præsto esse iussit; nauibus longis duodecim in Calabros traiecit: & Rhegium, Crotonemq; recepit: ac secundo cū Gallis pedestri facto prælio, interfectis, captisq; compluribus, reliquos cum eorum duce in proximum oppidū compulit. ad quos cum auxilia undique conuenissent; uictus ab iis ingenti clade cum paucis Rhegium fugiens uni saluticōsultuit suæ. idem autem paulatim se se confirmans; cum iam Gallorū imperii plerosque eorum, qui eos lubenti animo exceperant, magnopere pœniteret: nihil enim ferè cuiusquam neque sanctum, neque tutum ab illis erat: cum Hispanæ classis nauibus quadraginta, quam superiore libro missam in Siciliam dixeramus, & suis cum triremibus duodecim Enariā ad insulam,



quæ ab eo non defecerat, uenit. atque illis ipsis quidem diebus res eiusmodi acciderat; quæ magnam inuidiam in Gallos conflauerit. nam cum ii, qui Gaetæ præerant, nauem longam remigibus instruere uellent, municipesq; imponere; illi se cogi passi non sunt; palamq; prædicauerunt, nolle se contra Ferdinandum regem duci: atque ad arma capienda profilierunt. Galli eos ueriti se in arcem oppidi receperunt; atque ad auxilia proximis ex oppidis euocanda miserunt: quibus adductis magnam ciuium cædem fecerunt; magnam in oppidanos stragem ediderunt, matribus familias, & uirginibus uulgo in seruitutem, atque libidinem abductis. quæ intellecta res Neapolitanorum animos iam ante infensos, & labantes ab Gallis magnopere auerterat. ea cū sic cecidissent; ipse autem Ferdinandus Neapolim non obscuris multorum uocibus, sermonibusq; accerseretur; quem etiam ad uentare intelligebant: spei atque fiduciæ plenus ab Enaria naues soluit: atque ad littus Neapolitanum classe appulsa non longe ab oppido exponere milites cum uellet; impeditus à Gallis, atque reiectus, de tota re desperans, quod ab oppidanis nihil sibi auxilii emitti, nihil tumulti fieri animaduenerat; ad Enariam reuertebatur. at ciuitas ægre id passa, armis captis Gallos partim eiecit; partim in arces, quæ ab illis tenebātur, coniecit. id à piscatoria nauicula Ferdinando nunciatū spē ei pristinā facile restituit. quamobrē sua cū naui incitatis remigibus statim Neapolim rediens, magno populi consensu in oppidū receptus est. ita paruo temporis spatio sæpius modo bonam, modo aduersam expertus fortunam, ac uariis rerum suarū euentis, tanquā fluctibus, iactus; cum id minime fieri posse confideret, ab eadem quasi tempestate, atque uentis in portum coniectus est. pauloq; post Galli, qui ei arci præerant, quæ Capuana appellatur; se se, atque arcē Ferdinando dediderunt. tum naues Gallicæ sexdecim, quæ in portu Neapolitano erant; ueritæ ne interciperentur, egressæ ad insulam Megarem iactis anchoris se continuerunt. Ferdinandi classis ad Baias substitit. iis nunciatis rebus Nolani, Atellani Capuani, aliaq; uicina municipia propenso ad illum studio celeriter redierunt: uidebanturq; reliquæ eius regni ciuitates idem facturæ; si modo rex firma cum manu eodem accederet. ille autem  
per se



per se omnibus ab rebus, quæ ad bellum sunt usus, præsertimq; à pecunia planè imparatissimus, magistratum Venetum; qui uetusta consuetudine ea in urbe reip. hominibus iuri dicendo præerat; perhumaniter est allocutus: se se, quod Neapolim recuperauisset, reip. acceptum referre; quæ fœdus cum Alexandro, reliquisq; regibus iniisset: quod autem superesset, (quod quidem certe magnum, atque perplexum sciret esse, tot municipiis toto in regno, tot munitis oppidis Gallorum imperium secutis) eius se fidei, liberalitatiq; *permittere. eo sermone apud illum habito, Federicum patrum cum nauibus longis tribus ad Antonium, quem in Apuliam cum classe uenisse intellexerat, conueniendū, seq; illi commendandum propere misit. Antonius, paulo ante ad Salonem insulam Senatusconsulto accepto, tantum ut in Apuliam traiceret; Brundisium, quod municipium ad Gallos non transierat, uenit. oppidani Antonium amice, atque beniuole exceperunt: eiq; se dedere uoluerunt: atque, ut insigne reip. in oppidi foro sustolleret, ab eo magnopere petiuerunt. Antonius Brundisinis collaudatis, atque ut in regis sui fide permanerent cohortatus, ibi dies aliquot, dum quid imperarent patres scire posset, est commoratus. illi autem nisi de fœderatorum sententia, Hispaniæq; imprimis regum consociata uoluntate, qui classem paratam habebant, nihil omnino agere constituerat. itaque à legato regio missi in Siciliam nuncii eius rei euentum tardiorē reddiderunt. accepto tandem altero Senatusconsulto, quo bellum Gallis inferre iubebatur Antonius, biduo scalis, reliquisq; rebus ad oppugnationem oppidorum comparandis consumpto, cum triremibus uiginti, nauēq; una oneraria bellica, & altera, in qua erat equitum Græcorum non magnus numerus, ad oppidū Monopolitanorum, quod est in maris littore, à Gallisq; obtinebatur, accessit: præfectumq; Gallorum, uti se dederet, per inter-nuncios cohortatus, ubi illum ad propugnationem paratum uidit; expositis equitibus, qui discurrent, populationemq; facerent, & aliquid in agris aut uitis, aut oleæ succiderent, tectorumq; incenderent; si ea re ciues ad deditionem cōpelli possent; ubi neque id quidem quidquam proficere animaduertit; tormētis è naue oneraria murum oppidi deiicere aggreditur. id cum*



propter longinquitatem parum ex usu administraretur; Hieronymo Contareno legato, praefectisque triremium, uti naues te-  
rent ad ictus cum tormentorum, tum uero lapidum, atque telo-  
rum, quæ de muro adigerentur, imperauit: postmodumque eius di-  
ci mane iis, qui primi murum ascendissent, propositis præmiis,  
nauiisque omnibus sub conspectum hostium dispositis, oppu-  
gnare oppidum multo acrius est adortus: quæ in oppugnatione  
Petrus Bembus naui longæ præfectus, uir egregia uirtute, co-  
hortans suos pila ferrea traiecit, Antonius cum horas aliquot  
Gallis, atque oppidanis acerrime propugnantibus suos uulnera-  
ri, hostes non defatigari, minus denique rem procedere animad-  
uertisset; oppidum militibus diripiendum proposuit. tum uero  
prædæ spe milites, remigesque incitati, cohortati; inter se ad mu-  
rum conuolauerunt: scalisque positis cum amplius horis duabus  
continenter, atque fortissime pugnauissent, deiectis, interfe-  
ctisque propugnatoribus in oppidum se iniecerunt, diripereque con-  
tenderunt: Aloisiumque Tintum Venetum, qui eo in oppido mer-  
caturam exercebat, imprudentes occiderunt; domumque eius di-  
ripuerunt. Antonius reclusis portis in oppidum ingressus, mu-  
lieres, quæ natu maiorum usæ consilio ad aras Deorum immor-  
talium cum infantibus confugerant, à militum iniuria defen-  
dit; oppidoque est potitus: sectionemque earum rerum, quæ distra-  
ctæ nondum essent, multo minoris, quam uedi aliis potuissent,  
die laxissima oppidanis ipsis uendidit. quibus etiam, quo mino-  
re damno amissis rebus suis afficeretur, annos decem omnium mu-  
nerum, & tributorum leuationem concessit. eo oppido capto  
nonnulla eius regionis municipia se Antonio dederunt. atque  
hæc quidem adhuc ipsa Ferdinando Neapolim recipienti nota  
non erant. Antonius Nicolao Cornelio, qui Monopolitanis præ-  
esset, relicto; missoque Pulinianum, quod oppidum abest à littore,  
eique se dederat, Alexandro Pisauo eodem nomine, Sipontum  
est profectus: quod iam per se se ob Gallorum insolentiam, at-  
que libidinem in Ferdinandi partes oppidum redierat eiectione Gal-  
lis; qui se in arcem contulerunt. ad quos cum Antonius misisset,  
uti arcem Ferdinando restituerent: id ni facerent, eos se hostium  
loco habiturum: responderunt, nihil sibi cum Ferdinando rei  
esse



esse: ipse si uelit eos recipere, eius se fidei libenter permissuros. itaque acceptis in fidem Gallis Antonius, Federico, qui iam ad se Ferdinandi missu uenerat, arcem reddendam curauit. eodem tempore qui Tranensium arcem tenebant; missis ad illum interpretibus uelle se eius imperata facere Antonio significauerunt. ille, ut Ferdinando se se dederent, hortatus, eos non tam lubentes, quam auctoritate sua compulsos, tanquam de manu Federico tradidit. eidemq; Græcorum equitum dimidiam partem, quorum iam erat numerus ad quadringentos quinquaginta, petenti dedit. Patres, cum intellexissent Ferdinandum Neapolim recuperauisse; decreuerunt, ne quid Antonius oppidorum, ne ue omnino locorum amplius reip. nomine in regno Neapolitano caperet. tum Petri Bembi uxori, liberisq; uictus annuus à Senatu dono datus: duabus quoque filiis dotis nomine libræ auri quadraginta: duabus alteris in sacrarum uirginum collegia iam destinatis, quod ad id satis esset, constitutum. Antonio autem Tinti fratri, ab adolescente me in amici hominis afflictis rebus causa bis apud patres perorata, prouentus est annuus Senatus decreto, & liberalitate attributus: quo se nunc quoque, familiamq; suam senex, oculisq; captus sustinet. post hæc Alexandro à Senatu postulante, ut illam ipsam classem Neapolim ad Ferdinandum auxilio leuandum tā opportuno tempore mitteret; tametsi permagnis Gallici exercitus impensis ciuitas distinebatur, concedendum tamen censuit. itaque Antonius Græcis equitibus centum, & nauibus duabus Monopolitanorum præsidio relictis, Tarentum adnauigauit: quod quidem oppidum, appulso eò cū septem nauibus longis, quas ad eius tres Antonius addiderat, Federico, ad Ferdinandum tamen non redierat. ibi uentris profluvio arreptus Antonius, nauibus uiginti, quibus Contarenum legatum præfecit, Neapolim ad Ferdinandum iussis contendere, ipse cum reliquis nauibus (aliæ enim nonnullæ ad illum interea naues conuenerant) Corcyram est profectus. eodem anno cellis farinariis urbanis, quæ publice ad Rituum altum antiquitus sunt institutæ, longinquæ plebis, & inquilinorum partium usum incommodiorè præbentibus, alteræ apud forum, reip. q; horrea exædificatæ, Calendis Sextilibus exerceri cœptæ sunt ma-



gistratibus adhibitis . iisdē ferē diebus Florentinis Pisas bello re-  
petentibus ; cum per se oppidani contra tantas opes municipiū  
diutius se tueri posse diffiderent , suum ad Senatum interpretem  
secreto miserunt : uelle se sub reip . imperio esse : petere , rogare ,  
ut reciperentur . res primum noua patribus ; quæ neque statim  
reiicienda , neque temere suscipienda esse uideretur . deinde ma-  
gis , magisq̃ in eorum animos irrepere , pulchrum existimantiū  
augeri imperii fines , atque ad mare Ligusticum protendi . ma-  
gnum porro esse Venetum nomen : cui sponte tam longinqua ci-  
uitas , tamq̃ nobilis se se dederet : sed factum propē similibus re-  
rum euentis : quos si maiores nostri despexissent ; nulli nunc po-  
puli eius imperium appeterent . itaque recipiendas esse Pisas ;  
quas Dii immortales reip . addicerent . ea cum sententia maiori  
patrum numero probaretur ; res in Decemuirum collegio agita-  
ri cœpta est ; quo lex occultius ferri posset . tum Marcus Bolanus  
sexuir ex iis , qui principi assident , tacentibus reliquis , ac legis-  
lationi propē assentientibus , suggestum ascendens ; debere eos  
dixit , qui de rebus dubiis agunt ; non tam quid uelint ipsi , aut  
cupiant , quàm quid sit utile reip . cōstituere . necesse enim esse ;  
si suam modo libidinem sequantur , ut sui eos consilii tum pœni-  
teat , cum ea , quæ prouisa ipsis non sunt , magna interdum & for-  
midolosa rerum momenta , atque pericula existunt . an me quo-  
que , inquit , patres idem , quod uos , & optare maximopere , &  
optato frui , cupere non existimatis ? non Pisas modo , de quibus  
nunc consulimur , sed reliquas etiam Italiæ ciuitates , oppida , po-  
pulos iuris nostri esse ; mareq̃ superum , atque inferum in reip .  
imperio contineri ? ego uero ista percupio : mea q̃ morte cum  
fortuna paciscar , ut tam prospera reip . sit . sed cum hoc opto ;  
tum illud timeo ; ne , si Pisas receperimus , magno cum nostro de-  
core , rei q̃p . incommodo eas ipsas breui tempore amittamus .  
nam ; quemadmodum quidem sitæ , posita q̃ sunt Pisæ ; ad eas  
defendēdas auxilia mittere per alienos fines multorum dierum  
itinere nos oportebit . quorum populi nostris conatibus si ad-  
uersabuntur : aut erunt ipsi bello prius , atque armis subigendi ;  
ut , quidquid inter nostros , ac Pisarum fines iacet , pacatum iter ,  
atque tutum nostris exercitibus præbeat : aut nobis turpiter ab



incepto desistendum . nam mari tanto circuitu , tam suspectis  
littoribus , tantum exercitum transmittere ; quanto erit opus , ut  
cum unis Florentinis bellum geramus ; qui poterimus ? nullus  
vicinorum Pisis regum , nulla natio est ; quæ non Florentinos ma-  
lit , quàm nos , suæ ditioni finitimos habere : propterea quòd no-  
stram potentiam , nostrasq; opes magis , quàm illorum , uerentur ;  
magis nos , quàm illos , sibi esse metuendos intelligunt . est au-  
tem à natura omnibus animantibus comparatum , atque insitum ;  
ut , quæ eis plurimum obesse possunt , fugiant ; ad ea se applicent ,  
quibus ad nocendum minus est uirium , & facultatis attributum .  
itaque passeruli gallinas , anseresq; non uitant : cum columbis  
uero etiam nidificant : ab accipitre autem , & ab iis , quæ raptu ui-  
uunt , auiibus maxime quidem semper uolatu , latebrisq; se se au-  
ferunt . quamobrem cogitare debemus , etiam Ligures ; quæ una  
quondam natio quàm infesta reip . fuerit , annales nostri testes  
sunt ; quantas à nobis clades acceperit , omnis eius posteritas me-  
moria retinebit ; si suæ spontis sint , nos Pifarum dominos fieri  
nullis cōditionibus concessuros ; sed sua cum Florentinis arma ,  
suas classes , atque opes communicuros ; ut nos potiri Pisis ne  
permittant . quanquam , ut horum temporum mores sunt , ut fi-  
des in plerisque fluxa ; uereor , ne ii etiam , qui fœdera nobiscū  
pepigerunt , qui nobis sua regna se debere profitentur ; ubi nos  
eò usque uelle fines proferre nostros intelligent , nos celeriter de-  
ferant ; neque deserant modo , sed arma etiam contra nos capi-  
ant ; cumq; hostibus nostris coniuncti , communi nos bello , at-  
que consilio esse auertendos , & repellendos puten . Maiores no-  
stri Vicetinos , cum à rege Patauino premerentur , se se illis de-  
dere missis ad eos legatis cupientes , atque orantes in fidem rece-  
perunt . quid in illa huic simile deditio fuit ? oppidum vicini-  
tate propinquum , ac propè coniunctum ; ut iter impediri , atque  
accessio non potuerit : ipsum liberum , quodq; Patauini reges  
antea non obtinuisent . itaque remissis cum auxilio legatis faci-  
le defensum , atque retentum est . hostis autem eam ob rem no-  
uus nullus factus : sed cum eo , qui semper hostis reip . fuerat ,  
bellum acrius renouatum maiores iidem nostri prospere atque  
feliciter gesserunt . quòd si tam facilem rerum statum , paresq;



conditiones in Pisis recipiendis esse uebis propositas hoc tempore uidetis : si non amico populo , & reip. à qua laceffiti nullare sumus ; ut id , quod uolumus , assequamur , insignis est iniuria atque calamitas inferenda : si non , quæ in animis hominum iã pridẽ insedit opinio , nos regnandi cupiditate supra cæteros efferri ; eam hoc exemplo sic confirmaturi sumus , ut non sit posthac inficiandi locus : si non etiam Ferdinandi regnum adhuc quidẽ multo maxima ex parte , Ludouici haud ex minima Gallorum , quos hostes nostros fecimus , præfidiis , & exercitibus tenentur ; neque , quæ finem eæ res habituræ sint , satis consequi coniectura possumus , ut non tam de nouo bello capeffendo , quàm de institutis conficiendis , flammaq; illa , quæ optimas , atque pulcherrimas Italiæ regiones incēdio corripuit , extingueda , cogitare nos oporteat : legem patres , quam rogamini , decernite : ego ipse meum suffragium ad eam sancendam uolens , ac libēs afferō . sin uero longe aliter omnibus à partibus se res habet : ante quàm , Pisas esse recipiendas , statuatis ; ea , quæ ad bellum cum positis inter nos , atque Pisas nationibus , cumq; finitimis ei ciuitati populis agitandum erunt usui , comparate . Hac à Bolano dicta sentētia , magna est commutatio facta uoluntatum : neque quisquam omnium fuit , cui non Bolanus prudens , ac sapiens uideretur . itaque lex in præsentia reiecta . atque eo quidem tempore Alexander certior factus Carolum regem ad Nouariam obsidione liberandam multa quotidie aggredi , multa moliri ; neque adhuc Neapolitani regni cogitationē abiecisse illum intelligens ; quod quidem & firmis etiam nunc ueteribus præfidiis , & nouis comparandis tuebatur : naues enim Genuæ atque Massiliæ complures ad bellum instrui , ornariq; mandauerat : grauioribus eum litteris monuit ; ut intra mensem ex omnibus Italiæ locis omnem belli apparatus abduceret : id ni faciat , se se illi , eiusq; populi aqua & igni interdicturum . Nouaria deinde Ludouico restituta , paceq; facta , dedit etiam litteras ad Genuensium ciuitatem ; eodem se in eos interdicto usurum , si quid in classē opis Carolo contulissent , atque id ab eo Ludouicum petiisse , nemini dubium fuit ; ut ea se re , si uni fœderis capiti non steterit , Carolo purgaret : quod pluris apud eam ciuitatem Alexãdri auctoritas fuerit ,



rit, diuino præsertim iure adhibito, quo plerunque homines magnopere cōtinentur; quàm omnino sua. miserat ad Senatum prosperis reip. rebus cognitis Turcarum rex certum hominem gratulatum; quòd Carolum Galliæ regem Italia suis armis expulisset. is equum egregia forma dono patribus attulit: patres Bernardo Contareno miserunt. interea Ferdinando rebus modo prospere cedentibus; qui etiam Luceriam in Dauniis ui cepit; modo autem relabentibus; cum eum Galli aliquando intra oppidum ad Neapolim compulissent; diuersisq; in locis ei fortuna læta interdum, sæpius tristi se ostendente; ac spe regni sui recuperandi apud illius animum planè labante; Alexander eius precibus, atque periculo permotus à Senatu magno studio petiit, uti exercitus partem aliquam eius, qui Nouaria redierat, ad Gallos expellendos, Ferdinandumq; subleuandum mitteret: securaturum, uti aliquot eius regni oppida, quæ mare attingant, pignoris nomine, quoad, quidquid ea in re Senatus sumpti fecisset, Ferdinandus reponeret, reip. tenenda traderentur. Senatus, nondum decreta exercitus profectio, inclinatis tamen ad eam rem ciuium animis, Bernardum Contarenum cum Græcis equitibus sexcentis Rauennam præmisit: quo minus ei, cum decerneretur, itineris illò perueniendi superesset. quod postea quàm est Romam renunciatum; Ascanii suasu; qui diceret, Venetos sua sponte bellum suscepturos; non oportere quidquam eis oppidorum sumpti nomine à Ferdinando tradi; res dilata: legatq; regii; qui iam Venetias ad paciscendum cum Senatu uenerant; rogare tantum de exercitu: nihil ultra polliceri. id ubi Senatus cognouit; & Ludouicum inuidiæ suæ in remp. stimulis impelli, agiq; animaduertit: nihil enim ferè iis de rebus unquam Ascanius, nisi à fratre monitus, iussusq; loquebatur: legatos ab se reiecit, nihil esse confirmans, quod ea de causa in urbe horæ spatium morarentur. Interim cū Fauentini; qui æstate proxima petierant à Senatu, ut, quoniam certorum exulum insidias magnopere timerent, ipse pro sua pietate, oppidiq; uicinitate eius regendi curam susciperet; Hestoremq; plane puerum, Galeoti eius, de quo priore libro sermonem habuimus, filium, cuius erat in potestate ciuitas, auctoritate sua tueretur; postea ro-

K



gandi, & obtestandi patres ea de re tempus nullum intermisis-  
sent: mense Decembri Senatus decreuit; uti Fauentinorum ciui-  
tas, puerq; princeps in reip. fidem reciperentur: mitterentq; pa-  
tres eò ciuem Venetum, qui pueri nomine ius diceret: ipse autè  
puer equites cataphractos centum haberet, stipendiumq; in eos  
libras auri annuas octoginta. neque non tamen, ante quàm de-  
cerneretur, iisdem exulibus Florentinorum adiutis ope in eorū  
fines irrumpentibus; Bernardus Contarenus, qui Rauēnam ue-  
nerat, cum Græcis equitibus, militumq; manu auxilio à Senatu  
missus eos fudit, fugauitq; ac regnum illud puero, quod iam pro-  
pè amiserat, plane constituit. pauloq; post patrū suffragiis Do-  
minicus Triuisianus, uir grauis, atque prudens habitus, qui pue-  
rum Senatus nomine tueretur, oppidanisq; ius diceret; legatus  
est Fauentiam profectus, atque ante eos quidem dies, uti horolo-  
gium in foro ex reip. dignitate fieret; cui ædis Marciaë procura-  
tores aream darent; Senatus censuit. at Ferdinandi legati cum  
multos dies patribus placandis cōsumpsissent; pollicitiq; essent,  
Ferdinandum tria oppida nobilissima cum eorum agris, atque  
finibus, Trantum, Brundisium, Hydruntum, eo, quo dictum  
est, nomine, reip. traditurum: anni insequentis initio fœderato-  
rum omnium non approbantibus modo, sed etiam adniten-  
tibus legatis, pacta inita, fœdusq; percussum est: quo ciuitas fœ-  
dere traditis oppidis equites cataphractos septingentos, milites  
ter mille ad Ferdinandum mittere celeriter teneretur: qui una  
cum ea classe, quam Neapolim Contarenus legatus adduxerat,  
tam diu eius imperata facerent, quoad bellum esset confectum.  
capitaq; fœderi sunt addita; uti à quæstoribus urbanis libræ auri  
centum quinquaginta mutua Ferdinandi legatis è uestigio cura-  
rentur: uti si parte aliqua Ferdinandus Græcis equitibus, quàm  
cataphractis, uti, mallet; pro eo cataphractorum numero, quem  
de summa detraxisset, Græcos sesquialteros haberet: uti ex pu-  
blicis oppidorum prouentibus, si quid in magistratuum, & præ-  
sidiorum stipendia factis impensis superesset, id in accepti à Fer-  
dinando tabulis ferretur: uti quèquam eo in regno uirum prin-  
cipem, ciuitas in fidem, nisi Ferdinandi permissu, ne reciperet:  
uti frumentum, oleum, reliquumue com meatum eis ex oppi-  
dis,



38  
dis, & finibus asportari sine solitis portoriis ne liceret: uti Garga  
ni montis saltū, qui à Gallis tenebatur, cū illum Ferdinandus re  
cuperauisset, reip. traderet. quod tamen caput scriptum non est,  
uoce tantum, atque uerbis fidem fore quod conuenerat facien  
tibus agitatum, atque id omnino fœdus Alexander suis ad Se  
natum scriptis literis ratum, sanctumq; iussit esse. nam quoniā  
antiquitus in regnum Neapolitanum Pontifices Maximi ius ha  
bent; cauerant cum primis patres, ea ut res Alexandri auctori  
tate perscripta firmaretur. fœdere confecto, qui oppida reip. no  
mine à Ferdinando reciperent, missi: imperatorq; Franciscus cū  
ea, de qua dictum est, manu iussus in regnum sine mora profici  
sci. iis cognitis rebus, quas porro celerius more, atque instituto  
ciuitatis fama uulgauerat, quamplurima eius regni municipia  
breui tempore ad Ferdinandum redierunt. arces autem Neapo  
litanae munitissimæ duæ longa obsidione, certisq; conditionibus  
separatim Ferdinando sunt hos intra menses, pauloq; post red  
ditæ: cum Galli, qui eas obtinebāt, Alfonsum Aualum Aterni  
principem, uirum magna excellentiq; uirtute, ad colloquium uo  
catum occidissent: quæ quidem planè mors Ferdinando, qui  
eum impense amabat; aliti enim, educatiq; una fuerant; incre  
dibilem mœrorem, ægritudinemq; attulit. qua tandem excus  
sa, Ioannam Ferdinandi aui sui filiam, Alfonsi patris alia matre  
sororem, in matrimoniū duxit: easq; nuptias Alexander; quan  
do legibus fieri non poterant; sua indulgentia comprobauit. at  
que hæc tunc quidem in Ferdinandi partibus agitabantur. at Ca  
rolus in Galliam rediens nondum traiectis alpibus Philippum  
Argentonium ad Senatum misit: existimare se, eodem in fœde  
re, quod cum Ludouico fecisset, remp. esse comprehensam;  
propterea quod imperator Venetus, legatiq; ei fœderi, cum scri  
beretur, affuissent: quod si aliter se res habeat; scire se cupere, an  
uellet ciuitas tum demum comprehendi: petere autem, ut Mo  
nopolitanorum oppidum, quod ab suis ui, atque armis classis  
reip. præfectus cepisset, Senatus restitueret; atque à Ferdinādo  
auxiliis iuuando abstineret. quarum is rerum neutra impetrata  
discessit. Carolo in Galliam profecto filius, quem unicum ha  
bebat, tres natus annos moritur. qua quidem morte accidit, ut,



cum postea Carolus iterum exercitum coegisset ; quem ad Ferdinandum repellendum Aloisio propinquo suo duce mari Caietā mitteret; Aloisius , cui regnū Galliæ Carolo sine liberis maribus moriente lege Gallorum obueniebat , profectionem respuerit . itaque Carolus , cum alio duce nollet exercitum mittere ; rem iam propè confectam distulit : pauloq; post dilapsis cunctando militibus , ea omnino missio magnis impēsis instituta ; certissimaq; iis , quos Neapoli reliquerat , ducibus ; cum uerbis , tum literis , ac nunciis promissa totiens auxilia , interpositaq; regia fides ad nihilum reciderunt . Ludouicus autem Gallici belli metu depositus ; cum id , quod Pisarum ciuitas à Senatu petierat , amicorum literis cognouisset ; Pisani uero patefacta ipsorum postulatione legatos etiam palàm Venetias eadem de re misissent : ne id , quod uerebatur , accideret , uti ea ciuitas sub unius reip. imperium redigeretur , se se Senatui obtulit ; si Pisas esse defendendas existimaret , eius rei socium , & adiutorem futurum : uideri autem sibi , æquissimum esse eas defendi , propterea quòd Florentini fœdus cum Carolo percussissent ; cuius ipse fœderis legatum occulte ad Carolum proficiscentem suis in finibus interceperit . re sapius à patribus agitata , Ludouico magis magisq; quotidie adnidente , lex tandem in Senatu lata est fœderatorum omnium legatis approbantibus ; uti Alexandri , & reip. ac Ludouici armis , atque opibus Pisæ defenderentur : additumq; legi , ut in Liguribus milites bis mille reip. pecunia conscriberentur , Pisasq; mitterentur . id autem uti Ligures permetterent , Ludouicus antea se receperat effecturum . iis intellectis rebus Florentini , ante quàm auxilia cōtra se conuenirent , omni cura , diligentiaq; adhibita sex militū millibus celeriter coactis , non sine spe potiundi oppidi Pisas contenderunt , atque ad portas cum tormentis accesserunt . hostes patefactis portis impetum in illos fecerunt , fortiterq; pugnantes propulerunt , eorumq; tormentis sunt potiti . neque multo post Paulus Vitellius , ex Vrsina Romanorum factione , ac gente , uir fortis , quem Pisani suis copiis præfecerant , eorum stipendio emerito ad Florentinos se se contulit : ac præfectura , quam ei contulerant , inita , cum exercitum decem millium hominum confecisset ; Pisas acerrime adortus , in oppidi suburbium se iniecit



iecit: ex quo tamen ob oppidanis; qui quàm magnam potuerant manum & ipsi coegerant; reiectus, expulsusq; est. sed illud idem suburbium Florentini postea cum cepissent, retinerentq; Petrum Medicem ueriti, qui Vrsinos affines suos secū ducens in ipsorū fines iā iamq; irrupturus dicebatur, Pisis relictis ad sua se tuenda conuerterunt. interim conscriptis per internuncios reip. quingentis Genuæ militibus, Pisasq; missis, Ludouicus Gasparem Seuerinatem cum militibus, ut pollicitus est, alteris totidē; ut re euenit, paucissimis illò misit; qui utrisque præesset. quo quidem tempore Florentinis ab Carolo contendentibus, ut Pisarum arcem, quæ ab eius militibus tenebatur, pretio redimere sibi liceret; Pisani maiore etiam, quàm illi pollicebantur, pecunia partim pollicita, partim iam tradita arcem receperunt; receptamq; diruerunt. eius pecuniæ partem Decemuii Genuæ curatam persoluerunt libras auri ad quadraginta. uere autem iam aduentante, quòd Dominicus Calbus maioribus in comitiis Bernardino Minoto Petri filio pugnum in os impeggerat; Decemuirum Magistri Calbum è comitiis in carcerem duci iusserūt: deinde collegii decreto in insulam Cyprum exulatum deportari mandauerunt. tum, ut urbanorum naualium res multiplices, atque uariæ, quæq; magna, & perpetua indigent cura, diligentius administrarentur: ad reliquos naualium magistratus; qui antiquitus maioribus comitiis creantur; Triumuii ex principibus ciuitatis ex Senatorum suffragio adlecti sunt, additiq; illis tanquā magistri. iiq; postea Triumuii nūquam sunt creati desiti. æstate uero proxima; ne possessores bonæ fidei omni tempore turbarentur: nonnunquam enim accidebat delatorum improbitate, atque audacia, uti de suis rebus periclitari aliquem contingeret, etiam si per multos annos possedisset: legem Decemuii iusserunt: quarum rerum quis triginta annos in possessione fuisset, earum rerum peti ab eo nihil licere: neque deferri quenquam licere, nisi si Decemuirum magistri permisissent. Ludouicus, cum eiusdem ueris tempore à Maximiliano magnis largitionibus impetrasset, ut eum regem Mediolani appellaret: ea de re gratulatum Hieronymum Leonem, quem antea ad Ludouicum Senatus legauerat, ire patres iusserunt. atque illis etiam diebus à præ-



fecto classis reip. certum hominem Naupliam cum pecunia mis-  
sum, ut equites quot posset illis in locis conscriberet, nauigiisq;  
imponeret ad urbem deportandos; aduersa tempestate complu-  
res Maleæ dies cum detineretur, iterq; pedibus facere uellet,  
acceritis Nauplia equitibus ducentis, qui ei præsidio essent, se-  
ptum in itinere Turcarum equitatus magno impetu est aggressus  
numero amplius sexcenti: quibuscum Nauplii equites fortissi-  
me pugnantes maiorem eorum partem interfecerunt: reliquos  
fugæ mandarunt, paucis ex suis desideratis, uulneratis paulo plu-  
ribus. Contareus autem cum Græcis equitibus quingentis petē-  
te Ferdinando in eius regnum à Senatu præmissus ubi Sueffam  
uenit; seq; cum Federico regis patruo, qui Sueffæ erat, coniun-  
xit: oppida quatuor, quæ à Gallis tenebantur, se uti dederent cō-  
pulit. idem cum ad Gallutianos tentandos cum tercentis equiti-  
bus se contulisset; Galli autem, ut eos tuerentur, pluribus ex lo-  
cis manu coacta impetum in illum fecissent; fortiter pugnans  
eos sustinuit, prælioq; non intermisso interfectis compluribus in  
fugam uertit, oppidumq; cepit. idem etiam paulo post eodem  
equitum numero in insidiis se occultans, præmissis Frangetium,  
quo in oppidulo erant Galli, paucis ex suis, qui discurrent,  
Gallos paucitatem illorum suam prædā opinantes, infecutosq;  
ubi ad insidias peruenerunt, euolans incitatis in eos equis, cum  
multo illi plures essent, tamen fudit non paruo eorum interfe-  
cto numero, atque capto. interim imperatore cum reliquo exer-  
citu aduentante, Philippum Rubeum Guidi filium per syluam  
Casinatam sua cum equitum turma temere uadentem Ioannes  
Iuliani Cardinalis frater magna equitum, multo maiore mili-  
tum manu clamore sublato excepit: quibus cum Rubeus diu pu-  
gnans paucis, ex suis interfectis, atque captis, sarcinariis iumen-  
tis aliquot amissis, ad imperatorem se recepit. quod tamen de-  
trimentum Contareus facile sarcit. nam cum Ferdinandi mis-  
su excursionem in Seuerinatum fines usque ad ipsorum oppidi  
muros, atque portas fecisset: quo in oppido esse Virginium Vr-  
sinum, atque Vitellios ab exploratoribus cognouerat: neque  
quisquam egredi ausus ei se obuiam ostendisset: rediens Troia-  
num Sabellum cum equitibus cataphractis quinquaginta se ad il-



los conferentem in itinere deprehensum fudit, parte plus equitum media tum interfecta, tum capta. paulo autem post cum Gallorum exercitus timore; qui erat equitum cataphractorum ad octingentos, levis armaturæ ad quingentos, militum Helvetiorum ad quatuor millia; rex in oppidum Foliæ se cum suo exercitu contulisset, præsertim quod illis diebus Galli septingentos milites Germanos, qui in Rhetis conscripti ad illum se conferebant, interceptos male habuerant; seque oppidi muro Gallis obsidentibus tueretur: Contarenus, qui cum illo erat, apud eum questus, non esse æquum Græcos equites mœnibus inclusos contineri; petiit, uti se emitteret. qua impetrata re, Gallos sæpe lacessendo, sæpe imparatos aggrediendo, sæpe in uigiliis noctem totam continendo, nonnunquam male mulcendo, obsidionem relinquere, ac longius recedere, se seque in tutum recipere coegit. neque multo post imperator Gallis alio conuersis Valacæ oppidum cingens, murorum parte tormentis diruta, scalisque positus ui captum diripuit, interfectis, qui in oppido erant, omnibus: cum milites nec mulieribus, nec infantibus pepercissent: propterea quod ea in oppugnatione centum ex imperatoris exercitu fortes uiros hostes, oppidanique interfecerant. eodem impetu imperator multa eius regionis oppida breui ad deditiōem compulit. Galli Canusium aggressi, cum ab oppidanis quinquaginta auri libras accepissent, ne oppidum diriperent, neue ingrederentur: tamen Heluetis militibus irrumpentibus cædes ingens facta, oppidumque direptum est. in ea uero regione, quam Basilicam appellant, trium oppidorum populi per se se Gallos, à quibus regebantur, occiderunt; seque regi dediderunt. Contarenus & ipse multa cum præda per Seuerinatum fines ad exercitum se referens, magnam hostium manum oppido egressam, secumque congressam disiecit, militibus equitibusque septuaginta interfectis, captis nonaginta. tum Consalius Hispanæ classis præfectus, uir magni animi, egregiæque uirtutis, in Calabris egressus Crotonem, quod fugato pridem rege ad Gallos oppidum redierat, uicinitate cepit: Gallosque, qui eorum erant partium, iusto prælio fudit, interfectis centurionibus, præfectisque equitum septem, militibus, & equitibus ducentis, captis egregii nominis plus uiginti, equis



militaribus, farcinariisq; quadringentis. iis diebus naues longæ  
sex ex classe reip. quæ in portu Neapolitano erat, Genuam sunt  
ire iussæ: rumor enim inualuerat, Carolo regi classem in Galliæ  
prouinciæ portubus comparari: ut, quæ à Gallis administraren-  
tur, inspicerent; & si possent, impedirent; nauesq; incenderent.  
hæc dum sic agitentur; diuersisq; in locis dispari etiam euen-  
tu belli, meliore tamen quàm antea fortuna Ferdinandi regnū  
cædibus, & rapinis arderet: Galli ex euentu rerum timidiores  
aliquanto facti, Telam; quod à Venusia oppidum duodecim  
millia passus abest; non magna spe eius potiundi cum eorum  
duce aggressi oppidanos certis conditionibus se dedentes fide  
fracta ingressi diripuerunt. id intelligens Ferdinandus Contare-  
num eò præmisit: qui Gallorum partem prope oppidum reper-  
tam in fugam, atque intra muros compulit, equitibus cataphra-  
ctis plus triginta captis. cum subsecutus rex mille ad oppidum  
passus loco tuto castra posuit. eodem Cōsaluus è Calabria cum  
ea, quam habebat, manu; Guidus Vbaldus Metaurēsium dux,  
quem Senatus, fœderatiq; auxilio regi submiserant, è Brutijs ue-  
nerunt. aucto exercitu apud Telam rex cum esset; ad molas fru-  
mentarias corrumpendas, quibus oppidani utebantur, itineraq;  
duo intercludenda Cōsalui milites, qui tragulis utebantur, mi-  
sit; cum paulo ante Contarenum Venusiam misisset, ueritus ne  
inde hostibus, quorum erat in potestate oppidum, auxilia mitte-  
rentur, commeatusq; subministraretur. relinquebatur hostibus  
iter unum montanum: quo itinere commeatus in iumentis sub-  
uehi poterat. idq; magnis adhibitis præfidijs cum fieret; Cōtare-  
nus congressus præsidium dissipauit; commeatumq; cum iumen-  
tis omnibus interceptum abduxit. posteroq; die, centum ex suis  
uti Venusiam adcurrerent, imperauit. ii præda facta sub oppidi  
muris cum essent; oppidani autem milites tercentum cum pau-  
cis equitibus egressi recuperandæ prædæ spe prælium commis-  
sent: ex illis octaginta occiderunt, captiuosq; complures fece-  
runt: ex quibus erat Fundos obtinens. Eo tempore Antonio pri-  
mo anno superiore propter ualeitudinem à classe reip. quæ  
Neapolim mittebatur, remoto, deinde domum reuocato, Mal-  
chio Friuisanus ei suffectus cum nauibus longis aliquot Corcy-  
ra in



ra in Apuliam traiecit : atque in Calabros contendens, cum reliqua classe, quam ad se uocauerat, coniunctus, complura in litore, aut uicina mari oppida regis imperium recipere coegit. demum Paulam ueniens ; cum oppidani missis ad eos, qui oppidum regi peterent, deditiōem renuissent ; ille autem ad oppugnationem se comparauisset ; uelletq; muro succedere : mulieres passis crinibus porta cum infantibus egressæ ad illius se nauem plorantes, ac pacem petentes profuderunt. quibus commotus milites continuit : oppidumq; Paulam in regis fidem omnibus incolumibus oppidanis recepit. Ferdinandus ; quo ad Telā Gallos diligentius obsideret, omnemq; iis cōmeatus facultatem eriperet ; castra propius oppidum admoueri mandauerat. ea re Gallis enuntiata, magnum calorum & lixarum numerum, equitesq; cataphractos, qui eis præsidio essent, centum quinquaginta, leuis armaturæ, qui sagittis utebantur, alteros totidem celeriter portis emiserunt : uti ex uicinis oppido uillis, uicisq; , quidquid possent, pabuli colligerent, atque in oppidum comportarent : reliquū omne succenderent ; ne hostes eo uti possent. Imperator ea dere certior factus, cū Philippo Rubeo, equitibusq; Italis leuis armaturæ, quos circū se habere consueuerat, celeriter infecutus, prælio cum Gallis acriter commisso, cædeq; facta, refugere illos in oppidum compulit. quibus pulsus, castrisq; regiis propè oppidum positus ; cum Galli commeatu laborarent ; diesq; complures sine spe leuandæ inopiæ se continuissent ; equitibus præterea, & militibus stipendium deberetur ; neque pecunia suppeteret : missis ultro citroq; internunciis, ipsoq; duce cum rege ad colloquium admissio, tertio decimo Calēdas Sextiles pacti sunt : uti, si auxilia intra mensem ab rege Carolo ad se se non mitterentur ; quibus auxiliis exire oppido, atque in aperto consistere audeant ; regno Neapolitano cederent, exceptis oppidis Venusia, Gaeta, Tarento : ipsis interim ab rege commeatus copia fieret : cedentibus autem rex suum præsidium adiungeret ; quo Puteolos accedere, nauesq; in Galliam traiecturi cōscendere tuto possent. eiusq; rei cum ipsi obsides regi dedissent ; legatum Venetum, quem cum Ferdinando esse intellexerant, ab rege adhiberi uoluerunt ; qui eis ita fore, uti conuenerat, reip. nomine spō

L



for esset. Iis scriptis, firmatisq; conditionibus, Gallorum dux regi est pollicitus; si sibi centum auri libras mutuo det; quibus stipendia, quæ debet, exercitui persoluat; se se triduo cessurum; oppidumq; traditurum. accepta rex conditione quinquaginta ei libras numerari statim iussit: reliquas alteras quinquaginta Helvetiis militibus; quibus debebantur; quosq; sacramentum apud se dicere cupiebat; quæstorem suum numeraturum recepit. illi à Gallis missi regi lubentes paruerunt; ad illumq; transierunt. Gallis oppido tradito abeuntibus rex imperatorem Venetum adiunxit: qui cum Græcis equitibus, reliquisq; Italis levis armaturæ curaret, ne quid eis in itinere noceretur. Contarenius febri permolesta implicitus adesse ipse non poterat: ex eaq; febri paucis post diebus est mortuus, uir ad bella gerenda, atque remp. armis illustrandam, si ei uita suppeditauisset, plane natus. cuius postea matri auri libra annua in uictum à Senatu constituta: duabus autem sororibus alteræ dos auri libræ uiginti, alteræ in sacrarum uirginum collegium ternæ libræ. postea cum rex Salernum, ac nonnulla alia ui, nonnulla conditionibus oppida, municipiaq; recepisset; aliqua etiam sponte ad illum sua rediissent; Vrsinos, Vitellios, qui ex Gallorum erant partibus, fugauisset, planeq; dissipauisset; ipse autem si qui reliqui essent in eius regno Galli, ab iis nihil sibi magnopere uerendum existimaret: Græcos equites; quorum opera egregia, & fideli fuerat usus; quo minus sumpti faceret, primos omnium missos fecit. paucis post diebus imperatori ualetudine tentato omni cum exercitu abeundi facultas data. Metaurensium autem, & Pifaurensium principes, Alexandriq; filium; quibus stipendium à fœderatis pendebatur; Prosperumq; Columnam, cum sua quenque manu, nauesq; longas reip. decem, onerarias Hispanæ classis quamplures; tum Federicum patruum, qui præesset, Gaetam, quod Galli oppidum communierant, misit. atque à Malchione triremes duæ Salernitanorum principi sedibus patriis pulso; quibus ille in Galliam prouinciam transmitteret; petente Ferdinando traditæ. acceperat etiam in urbe à Senatu Ferdinandus mutuas auri libras sexaginta. iisdem diebus Vestini legatos de deditioe ad Senatum miserunt; neque sunt recepti. cumq; in Calabris Ferdinandi nauem



di nauem onerariam Galli, qui illis in locis erant, pace facta Neapolim appulsuri conscendissent, nauemque cursum eò dirigerent; illi nautis comprehensis nauem aliò conuertere cœperunt. sed cum magna cohorta tempestate malo infracto antennæ concidissent: nautis ad gubernaculum reuocatis, Neapolitano portu capto omnes in uincula coniecti sunt. Ferdinandus autem cū grauius ex intestinis in Vesuuio laboraret: episcopum Teani, quem habebat in custodia, securi uti percuterent, suis imperauit: addubitansque eius rei ministros se se ægro dicto audientes non fuisse, episcopi caput in cubiculum ad se afferri iussit: quo inspecto quieuit. pauloque post Neapolim allatus urgente ui morbi nonis Octobribus excessit e uita. cuius locum Federicus eo ipso die unā cū Malchione Gaeta Neapolim appropinquans, à regni principibus susceptus tenuit. is regiis acceptis insignibus primū omnium Salernitanorum principi abitum paranti auctor, ne discederet, fuit, regni præfectura, qui magistratus habetur amplissimus, ei tradita, filiaque sua illius desponsa filio. reliquos deinde uiros, principes: qui cum Ferdinando diffidebant; propè omnes sibi amicos certis conditionibus, atque muneribus reddidit. Nondum autem iis confectis rebus, dum reginas Federicus inuiseret: unam, quæ patris; alteram, quæ fratris filii uxor fuerat. Bisfinianorum principis, qui unā cum plerisque in procubiculo regem operiebatur, famulus gladio districto herum percussit geminatis ter ictibus interficere illum cupiens. comprehensus, quæstione habita dixit; id efficere, quod fecisset, se in animo annos tresdecim habuisse, propterea, quod princeps suam olim sortem uiolauisset: antea patranda facinoris occasionem idoneam sibi nullam datam: tunc rem ad exitum producere uel certo uitæ suæ periculo uoluisse. Paucis post diebus Federicus Malchione omni cum classe dimisso suum Gaetam exercitum adduxit: ac parte suburbiorum, & montis capta tormenta muralia ad portum conuersa collocauit: ut naues, quas habebant Galli, collabefaceret, atque deprimeret. quod quidem illi ueriti ea se conditione dederunt; si rex eos suis cum rebus omnibus mari discedere permetteret. itaque tribus onerariis conscensis nauibus, oppido tradito, non multis ante brumam diebus sunt profecti.



Accidit autem, ut naus ea, in qua erat Gaetae magistratus cum militibus trecentis, magno aduerso impellente uento Terracinae iniecta littori cum uectoribus perierit. Tarentini uero: qui ad eam diem Gallorum fidem secuti in magna rerum omnium inopia, magnisque in difficultatibus uersabantur, Caesare Ferdinandi fratrenotho & terrestribus obsidente oppidum copiis, & mari nauibus longis tribus commeatus importari prohibente: praefertim, quod siquid antea in uillis aut frumenti, aut pabuli circa oppidum fuerat, eo ne hostes potirentur, tectis incensis corruperant ipsi: Ferdinandi morte cognita, concilio coacto quid agendum sibi esset, inter se quaerebant, ea re longis disceptationibus agitata, ac tribus dictis sententiis; una ut Federico altera ut regi Turcarum, tertia ut Venetae reip. oppidum traderent: legem tandem magno studio tulerunt; ut Senatus fidei, & pietati se se committerent, itaque insigni reip. sublato literas ad Aloisium Lauredanum praefectum Monopolitanorum dederunt orantes uti se reciperet, literae Aloisii ea de re ad Senatum perlatæ, alteroque post eas literas die legati Tarentinorum cum eisdem mandatis Venetias aduecti, eius rei expectatione ciuitatem erexerunt, atque illis quidem hospitium publice datum est. Patres uocati complures dies sententiis dicendis consumpserunt: quarum pars non esse Tarentinos recipiendos; propterea quod in foedere caput erat, ne dedititios rege non permittente ciuitas acciperet: pars recipiendos censebant; ne obstinatis in Neapolitanos reges animis Tarentini regi Turcarum se se dederent, quod si fieret: non illis modo nationibus, Federicoque imprimis; sed toti etiam Italiae perniciosum futurum, nullum Senatus cum Federico foedus Ferdinando mortuo, quod tamen si esset: prestare id uno in capite negligi; quam permittere oppidum natura munitissimum, atque ad exercitus in Italiam transportandos, classesque continendas opportunissimum inimico Italici omnibus regi, atque bellicosissimo attribui, uicere demum, quæ neutra earum probata, Tarentum ciuem Venetum mitti oportere, sententia censuerunt: qui auctoritate reip. Federico ciuitatem conciliaret, commeatumque sufficeret, itaque Andreas Zancanius, Senatorum suffragiis, legatus est ad Tarentinos lectus, atque is ante quam nauem conscenderet



deret; Alexandri, atque Hispaniæ regum legati, itemq; Ludouici principem & patres adierunt; eosq; ne se in causam Tarentinorum insinuarent, ne ue quid agerent, monuerunt. quorum intellecta uoluntate; ne laborem cum inuidia patres sumerēt; Andreas Senatusconsulto retentus, neque postea missus est. atque illis diebus Ludouici ad Alexandrū scriptas literas Vrsini propè urbem interceperant: quibus literis Ludouicus ab Alexandro petebat; uti patres commonefaceret, à Tarentinis recipiendis abstinere: ne ue eos augere suas opes, suamq; potentiam nimium quantum iam auctam, permetteret. eas illi Senatus literas miserunt: ut quo esset in ipsos animo Ludouicus, patres inspicerent: qui tantis à rep. tamq; illustribus affectus beneficiis, à suis tamen moribus non recederet. Zancanio retento patres, quod cum Tarentinorum ciuitate illo misso facere decreuerant: id cum eorum legatis ipsimet sunt aggressi; ut illos Federico per eius legatum conciliarent. quod quidem perfecerunt: sponsoresq; Tarentinis fuerunt, regem illos in eum quo antea erant, statum restitutum; neque quidquam, propterea quòd à regibus Neapolitanis descuissent, ciuitati succensurum. quibus constitutis rebus Georgium Fracum Senatus scribam, unà cum legatis reuertentibus Tarentum miserunt, earum rerum firmandarum causa: annusq; insequens iam inierat. Illi autem intellecta oratorum suorum literis de se se regi pacandis Senatus uoluntate: pridie quam is Tarentum appelleret, aliquanto minus bonis conditionibus, quam illæ erant, de quibus transfegerat Senatus; se Federico dediderunt. cum exitum Tarentinorum obfirmatio habuit. iamq; in urbe aduenarum contagione, inuentioneq; syderum morbus peratrox initium acceperat is, qui est Gallicus appellatus: quo genitalibus ante omnia plerunque uitiatis, corpus doloribus afficiebatur. deinde pustulæ, maculæq; prodibant cū in membris reliquis, tum magnopere in capite, facieq; ac sæpe tumores, & tanquam tubera primum subdura, post etiam saniosa exoriebantur. itaque multi diu uexati membrorum propè omnium doloribus, deformatiq; tuberculis, & ulceribus, ut uix agnoscerentur, miserabiliter interibant. neque quorum medicamentorum pestilentia indigeret noua, insolensq; sciri poterat.



quamobrem annos complures omnibus in reip. municipiis, & finibus licēter peruagata magnum hominum numerum absumpsit; fœdauit multo maximum. sed quoniam eo de morbo Fracastoriani libri tres heroicis uersibus multa cum dignitate, uenustateq; conscripti uulgo in manibus habentur; nihil nos quidem attinet hæc scribentes commorari: præsertim quod eius acerbitas, & uis multo nunc iam remissior, tolerabiliorq; facta; uel inuentis ad ea mala perfugiis, opibusq; uel cœlo minus in dies sæuiente, plane deferbuit. uerum ad Pisanum bellum, de quo superius dicere cœpimus, reuertamur. quod tamen ipsum impeditum magis, & diuturnum, uariumq; cum impensæ plurimæ, atque multiplicis; quam usui, aut gloriæ ciuitati fuit. quanquam eius quidem rei culpam omnem Ludouici æmulatio, atque perfidia sustinuit: quæ tamen culpa uno ab illo fonte deriuata paulo post in ipsius caput redundauit. Magnum enim hostem natus; cum resp. sæpius ab illo laceffita, & prodita hominis infidelissimi, atque arrogantissimi societatem semel renuisset; regno expulsus, deinde etiam captus, turpissima in custodia uitam reliquit. adductis Pisas reip. auxiliis equitatus grauioris, leuiorisq; armaturæ per Ludouici fines; qui & ipse suos equites, multo tamen pauciores eodem miserat; tum per Lucensium: quos suscepti à tribus maximis Italiæ populis communi consilio belli fama compulerat, nihil ut eis esse negandum existimarent: conscripti Pisis reip. pecunia milites plus mille; quos ex Umbria, & Piceno, & Corsica prædæ, atque stipendii spes euocauerat, ad eos, qui Genua uenerant milites adiunguntur. itaque spei bonæ plena ciuitas suis, sociorumq; copiis aduicem, qui Pisanus appellatur, eratq; in ipsius potestate, hostium equitatum cæde facta in fugam uertit captis compluribus. Milites, qui tunc ab equitibustria milia passus aberant, cum suis præsto esse non possent, quod inter se, equitesq; interpositum hostem uidebant; eius aduentu non expectato raptim, temereq; quo cuiq; uisum est, fuga comparata sibi met consuluerunt. Paucis autem post diebus eodem ex municipio emissos pabulatores hostium est manus parua ex insidiis consecuta: ad quos cum ii, qui erant in municipio, equites cataphracti sexaginta, leuiter armati centum, milites minus trecenti



ti, auxilio accurrissent: reliqui se hostes ostenderunt, impetumque in eos fecerunt, equites utriusque armaturæ quingenti quinquaginta, milites ad duo millia. illi se paulatim referentes ad eius loci pontem constiterunt: fortiterque pugnantes; cum aliquot ex suis amisissent, aliquot etiam capti essent; se tamen loco non movebant, uulneraque, & cædes inferebant. quo in certamine Franciscus Siccus hostium præfectus accepto uulnere prælio excessit: pauloque post est mortuus. eo cedente finis est pugnae factus. atque illa quidem in pugna Veneti cum ad Lucium Maluetium Bononiensem Ludouici legatum, qui non longe aberat, misissent, uti sibi auxilio confestim ueniret; prandere se prius uelle respondit. is; quod ex eiusmodi ludibrio responsi, nec allato celeriter auxilio omnium se uocibus culpari sentiebat; honoris sui causa Pontem sacci castellum Florentinorum noctu adortus, scalisque ad murum positus cepit: cum tamen eo in castello esset Antonii Martiani filius adolescens cum equitibus cataphractis sexaginta; quorum pars in Lucii potestatem uenit. atque illud quidem castellum Florentini decimo post die, quam est captum, iisdem propè artibus recuperauerunt, euestigioque diruerunt. ita utrisque hæc, atque consimilia multa conantibus, aliquot menses abierunt; cum, utri eorum superiores in bello essent, constaret satis nulli. interim cum Pisani commeatus inopia propter anni tempus laborarent; idque patribus significauissent: Senatus ad suum statim hominem, qui erat Genuæ, traiecta pecunia imperauit; uti frumenta coemeret, Pisasque transmitteret. qui cum Senatus celeritate adhibita paruisset: annonæ subleuata reip. munere ciuitatem recreauit. Senatus ubi ea manu, quam Pisas miserat, quamque ibi, atque Genuæ conscripserat, æstatis parte iam præterita paru se proficere animaduertit: quingentos equites Græcos Iustiniano Mauroceno præfecto Pisas mittendos decreuit. is ante medium Quintilem mensem omni cum equitatu eo se contulit. tum autem; quod erat iam antea in Alexandri, & Ludouici, & reip. militia Ioannes Bentiuolus; pro sua parte misso ad illum stipendio Senatus, cum etiam Alexander misisset, uti se ad Pisanum bellum compararet, imperauit: simul ab Ludouico petiit, suam Ioanni partem itidem mitteret. id ille negare cum non pos-



set; se facturum recepit: neque misit tamen. quin etiam, ne ulla  
conditione proposita proficisceretur, clam ab eo impetrasse illū  
nemo non credit. nam Ioannes multa quotidie causari: multa  
temere ab Senatu petere: denique diem de die ducere: ut quili-  
bet scire posset illudi Senatum callidis, & propinquis ab homi-  
nibus Ludouico, & Ioanne. duxerat autem Hannibal Ioannis fi-  
lius in matrimonium unam ex Herculis Atestini filiis notham:  
altera, ut ante dictum est, Ludouico nupserat. itaque eam affinita-  
tem etiam animis ad improbitatem mutuis, paribusq; congluti-  
nabant. qua in mora illud accidit; ut Hercules eam equitum, mi-  
litumq; manum, quam tuendo regno habere consueuerat, pro-  
pè omnem cum præfectis dimitteret. missi euestigio Florentiam  
militatum abierunt: ne cui dubium fieret, qua hæc mente, quò  
ue consilio essent instituta. sed & illud Senatuscōsultum factum  
est: ut præfectis tribus, qui erant Pisis, equitum numerus auge-  
retur: Iacoboq; Tarsis, qui Rauennæ erat, pecunia subministra-  
retur ad milites in Fauentinis finibus conscribendos mille: qui-  
bus cum Pisas accederet, cæteris quoque militibus, qui reip. sti-  
pendium mererent, eo bello imperaturus. tum missi Pisas præ-  
fecti equitum cum sua quisque turma quatuor. iis imperatis re-  
bus, ac propè etiam confectis, Heluetii quadringenti, quos Lu-  
douicus Pisas miserat, domum discesserunt; cum dicerent sibi  
stipendium non subministrari. reliquæ deinde Ludouici copix,  
præfectiq; paucorum dierum spatium sigillatim abeuntes idem fe-  
cerunt Lucio excepto: qui quidem consilia cæterorum cogno-  
scendi, atque impediendi belli causa cum paucis equitibus remā-  
sit. ita, quod initio de communi sociorum sententia Ludouicus  
sumpserat, ut Pisas unà cum reliquis tueretur; id priuato consi-  
lio reiecit, furtim in medii feruore belli se se subtrahens. sed an-  
tequam Heluetii, & reliquæ Ludouici copix discessissent: pro-  
pterea quòd multo plus oneris, & uastitatis ciuitati, quàm aut  
præsidii, aut emolumenti afferebant; uidebaturq; id unum Lu-  
cio deliberatum esse, ut Pisanos conterendo, & maleficiis euer-  
teret; ciuitas ad patres misit: se se ulterius Ludouici auxilia per-  
peti, sustinereq; non posse: uelle, ac decreuisse, uni Senatui se  
addicere, uexillaq; reip. subtollere: rogare, ut eorum uolunta-  
te id sibi



te id sibi facere liceret. Patres Pisani collaudatis, quod eo erga  
 remp. studio, ea mente essent; aliud posse tempus accidere dixe-  
 runt; cum id & illi tuto facere, & ipsi eis permittere uti facerent,  
 iure possent. nunc uero illud curarent; ut liberi per eorum fidē  
 essent, qui pepigerunt: se in eo suas partes omni diligentia præ-  
 staturos: bonoq; animo eos esse iussos dimiserunt. Naues inte-  
 rea reip. longæ sex Neapoli in Liguriam, atque in Galliam pro-  
 uinciam missæ cum nihil earum rerum, quarum causa ierant,  
 reperissent; conuersæ ad eas naues Florentinorum insectandas;  
 à quibus ne frumenta, ne ue reliqui commeatus supportari Pi-  
 sas possent, magnum impedimentum afferebatur; plurimo usui  
 ea in re fuerunt. quibus quidem nauibus aliæ naues longæ com-  
 plures additæ eundem sanè usum, atque operam reip. præsti-  
 terunt, hostium nauibus, commeatibusq; qui Triturritam in-  
 uehebantur, deinde in eorum castra comportabantur, sæpe disie-  
 ctis, fugatisq; sæpe captis. Neque tunc terrestres reip. copię in-  
 cessatione fuerunt. sed & castella hostium aliquot sunt ab iis ca-  
 pta: & legatus eorum Petrus Capo interfectus: & prælia non-  
 nulla secundiora facta. quo etiam tempore Pisani Librafactæ  
 castellum ipforum, quod ab eisdem Gallis, qui arcem Pisanam  
 restituerant, etiam nunc obtinebatur, auri libris triginta præfe-  
 cto traditis magna hostium inuidia recuperauerunt. omnibus  
 autem ex utilitatibus, quas quidem classis, exercitusq; reip. in  
 medium eius belli contulit, eæ crebriores, neque postremæ fue-  
 runt; quæ ab Græcis sunt equitibus profectæ. nam & prædæ sæ-  
 pe ingentes abactæ ab illis sunt: & plurimi commeatus interce-  
 pti: & hostium turbata eorum audacia, atque celeritate cōsilia:  
 quodq; magis mirum uidebatur, castella quoque ab iis nonnul-  
 la capta: cædes uero pluribus locis factæ: ut laudari, & bene de  
 rep. meriti existimari iure possent. Dum hæc ad Pisas geruntur;  
 è Gallia transalpina nuncii uenerunt, ab rege Carolo reditum in  
 Italiam magno studio comparari: ipsum paucis diebus ad Lug-  
 dunum fore: in uia quidem certe iam esse. quamobrem Ludo-  
 uicus à Senatu quæsiuit; uellet ne, si Carolus urgeat, sibi exerci-  
 tum, & auxilia mittere: nam se promeritum, ne quam sui curā  
 resp. sumeret, probe intelligebat. Senatus ei respondit: tametsi

M



Pisano bello implicita ciuitas esset: cui bello quanto studio, quantisq; impensis opus sit, sciret ipse omnium optime: tamen se in eo tuendo non defuturum. simul Marcum Beatianum ad Heluetios misit; qui eis ab rep. stipendium polliceretur; ne ad Carolum se conuerterent. pauloq; post cum Triultius Gallorū manum secum ducens traiectis alpibus Astam uenisset; Ludouicus ad Senatum misit; uideri sibi optimum esse, Maximilianum regem suo, & Alexandri, & reip. stipendio in Italiam accersiri: ut sit, qui regem Carolum & auctoritate sua deterrere, ne alpes traiciat; & si traiecerit, suis, & sociorum opibus, & copiis comprimere facile possit: eiusq; se rei iam apud illum initia & fundamenta iecisse per legatos suos; à qua, ut uidetur, non abhorreat. ea agitata re de Alexandri, & Hispaniæ regum legati sententia celeriter à patribus, sextodecimo Calendas Iunias Senatus decreuit Maximilianum accersiri oportere: cui sit in trium mensium stipendia; tot enim menses satis fore; à rep. quadringentæ auri atque octoginta libræ, à Ludouico alteræ totidem, ab Alexandro parte dimidia pauciores: ducatq; is Heluetiorum secum militum quatuor millia: quibus ipse stipendium numeret singulis mensibus libras auri centum uiginti. ea cum lege, mandatisq; Franciscum Foscarum legatum Senatus ad illum misit. quæ quidem lex eo festinantius est lata, quod literæ ad Senatum uenerant: Heluetiis; qui se profitebantur nihil eorum, quæ uellet Carolus, esse facturos; nisi prius reliqua, quæ debeat, quæq; permagna sint, eis persoluat; iam ab rege quingentas auri libras esse curatas: quod tamen, ut postea cognitum est, falsum fuit. Beatianus ad Heluetios missus effecit, ut tres eorum pagi reip. sacramentum dicerent: stipendiumq; eis dedit. Maximilianus accepta à patribus pecunia in fines regni sui uenit Comensem agrum uersus. eum Ludouicus cum uxore Beatrice obuiam profectus excepit: pransiq; unà uenatum secum duxerunt. qua commotus fama Aloisius dux Genabensium Astam oppidum communiuit, ueritus Maximilianum eò primum omnium suas copias adducturum. ille autem; ut Philippo filio Belgarum regi ad se uenienti sui conueniendi potestatem faceret; etiam interius in alpes reuersus suspicionem multis attulit se se amplius in Italiam non



non uenturum . atque illis ipsis diebus Henricus Britanniae rex inter foederatos est receptus : missique ad Maximilianum legati duo, Antonius Grimanus, Marcus Antonius Maurocenus ; qui uenientem exciperent . Maximilianus conuenio filio rediens Comum , quo ei praesto Ludouicus fuit , deinde in agrum Mediolanensem ad Vigeuenum uenit . ibi cum esset ; literas ad Pisanos dedit ; uelle se suum hominem , qui eis consuleret , ciuitatemque regeret , eo mittere . ciuitas ad ea respondit ; unum se ab eius initio belli semper optauisse , diligentissimeque curauisse ; ut in libertate , qua permultos annos caruerant , quamque Dii eis reddiderant , permanerent : si eius praefectum recipiant ; contrariam rem suis studiis facturos , sibique ipsos dominum imposituros : se uero non consiliorum indigere , sed auxilii . itaque cum paulo post Maximilianus illum ipsum praefectum ad eos misisset ; non est receptus . interim cum de aduentu Caroli rumor , nunciique refrixissent ; Ludouici suasu , qui omnino nihil eorum , quae impedire paulum modo possent , ne Pisa sub reip . ditionem redigerentur , praetermittebat ; Senatu non abnuente Maximilianus statuit Pisas accedere ; ut ei bello finem imponeret . itaque Dertonam est profectus cum equitibus , quos secum duxerat , trecentis , militibus Heluetiis duobus millibus , equitibus Ludouici mille . Dertonae res huiusmodi accidit . Legatis Florentinorum duobus , qui ad Maximilianum uenerant , in uia forte obuiis legati Veneti salutem dixerunt . illi eis ne uerbum quidem unum reddiderunt : sed illiberali contumacia ire perrexerunt . postridie autem eius diei iterum obuii cum de uia legatis reip . non cederent , arrogantiusque in eos cum suo comitatu propere conglobarentur : Maurocenus ; cui quidem praecleara , atque mirifica faciei dignitas cum uasta membrorum magnitudine inerat ; alterum illorum ita repulit , ut in luto prouolueretur , disce cedere te maioribus pronuncians . A Dertona Genuam Maximilianus profectus arcem oppidi sibi tradi postulauit . ea non tradita , postridie eius diei oppido egressus in suburbio paranda classe complures se dies continuit . nonis autem Octobribus omni cum sua copia conscendens nauibus longis reip . octo , Genuensium duabus , onerariis item decem , quas Genuae armari , atque instrui curauerat , ad-



uersa tempestate, quòd in onerariis tunc erat, paulisper est iactatus: postà Dominico Mari petro præfecto classis Venetæ receptus, cum dies aliquot in mari, portubusq; consumpsisset; Arni fluminis hostium ingressus nauicula cum eodem præfecto, priorq; legato reip. (nam recentiores affecti ualetudine domum abierant) Pisas appulit. ibi explorato loci situ, concilio legatorum, & præfectorum, & ciuitatis coacto, Triturræ arcem; quæ mari undique alluitur, & ponte sublicio littori coniungebatur, eratq; hostibus oportunissima; quòd ea una omnes maritimi Pisfanorum conatus, & rei frumentariæ administratio magnopere impediébatur, oppugnare instituit. itaque legatis reip. qui exercitui præerant, iussis in diuersas partes equitatum mittere, ut hostes aliis in rebus occupati morarentur; milites Heluetios trecentos è nauibus cum tormentis, & præfectis suis principibus egresfos occupare eum collem, qui è regione arcis est, imperat; ædiculamq; in colle positam capere: ne auxilia iis, qui in uico, atque in arce sint, quòd erat illac transeundum, ab hostibus submitti possint, qua re animaduersa Triturræ portis emissi animo ædiculæ præripiendæ in collem euolant. prælium committitur; cædesq; utrinque fit. tum præfectus classis milites è nauibus, remigesq; auxilio laborantibus submittit. ab iis hostes repelluntur. ipsi, & Heluetii fugatis hostibus ad naues reuertuntur. hostes postea eam ædiculam diruerunt. interim naues aliquot è lōginq; uisæ sunt eò cursum tendere: ad quas suis cum triremibus præfectus; ut unde, aut cur uenirent, scire posset; & si hostiles essent, ipse eas adoriretur; statuit accedere. naues enim onerariæ, quòd uentus erat aduersus, commouere se non poterant. Maximilianus eius consilio comprobato triremes & ipse conscendit. cum ad naues præfectus appropinquasset; quæ quidem erāt sex, omnesq; Gallicæ, ac plenæ commeatus, & armatorum militum à legatis Florentinis Caroli permissu in Gallia provincia conscriptorum: eas aggredi non est ausus: quarum una erat amphorarum supra mille ducentarum capax: reliquæ plus minus quadringentarum. itaque sine molestia cursum tenentes ad Triturræ iactis anchoris constiterunt. sequebatur magno eas intervallo naus una reliqua longa, uerum non ita uelox; remigioq;



gioq; habilis, ut triremes sunt; sed altior, latiorq; ac magno ad  
 bellum usui, amphorarum circiter sexcentarum: ad quam præ-  
 fectus omnibus cum triremibus contendens, eamq; assecutus;  
 ubi se, qui in naui erant, milites septuaginta uelle defendere ce-  
 perunt; tormentis æneis pilas ferreas in eos magni pōderis emit-  
 ti è triremibus imperauit. quorum terrifico strepitu audito, con-  
 spectisq; ignibus Maximilianus sua cum triremi abiit. eum aliæ  
 quatuor triremes sunt subsecutæ. præfectus cum reliquis in na-  
 uem Gallicam facto impetu eam cepit: qua in naui erat frumen-  
 ti magnus numerus. id nauis hostium maior, quæ in portu iam  
 erat, conspicata, uento paulisper conuerso sublatis anchoris, ut  
 auxilio sociæ naui esset, uela ad naues Venetas fecit. sed præfe-  
 ctus nauem captam remulco breuiorem in aquâ abstraxit: quam  
 illa terra tacta assequi non potuit. Venerat interim Pisas Hanni-  
 bal Bentiuolus patris loco cum equitibus septingentis, & militi-  
 bus ducentis. eum Lucius ueritus, quod erat ex aduersa factio-  
 ne, abiit: neque postea Pisis fuit. is igitur Hannibal, copiæq; re-  
 liquæ Venetorum omnes cum legatis instructo exercitu se se ad  
 Triturritam contulerunt: in itinere castellum unum ui ceperunt:  
 alia se duo sponte dederunt. exercitus castris positus ubi arcē  
 obsidere, ac concutere tormentis cepit; ii sunt imbres consecuti,  
 ut Maximilianus obsidionem reliquerit. itaque suis cū equi-  
 tibus quingentis, militibus mille trecentis ad uicum Pisanum  
 profectus est. inde propè subirator, seq; deceptum dictitās, nul-  
 lo loco cōmoratus Ticinum, pauloq; post suum in regnū rediit.  
 at domi; ut, more, institutoq; maiorum, ciuibus ædium suarum  
 incendio damna perpeffis publice subministraretur, quo facili-  
 us amissa restituerent; Decemuiui legem tulerunt, ut Petri Mo-  
 lini filiis auri libras uiginti, Hieronymo & Marino Albertis  
 quindecim, quibus utrisque ædes ad Cassiani, & Apollinaris cō-  
 flagrauerant; Andreæ Ripæ, cui suburbium in Muriano, alte-  
 ras totidem; Veneriis, quibus domum cum taberna mercium  
 Indicarum maxime celebri ad Bartholomæi ignis absumpserat,  
 auri libras triginta Quinquuirum sale procurādo magistratus  
 daret. neque multo post onerariis nauibus duabus naufragio a-  
 missis Pilippo Bernardo, Aloisio Contareno, quorum illæ fue-



rant naues , auri libræ sexaginta æquis partibus Decemuirum ite  
lege ab eodem magistratu sunt curari iussæ ea conditione , si na  
uem alteram eorum uterque fabricandam reciperet . Florentini  
ea re elati , quòd Maximilianus , à quo sibi magnopere timue  
rât , infecto negotio discesserat ; castella complura , quæ à Pisanis  
tenebantur , aggressi , partim ui , partim se deditia recuperaue  
runt . Legati Veneti exercitu distributo Pisanum ad uicum , &  
Cassinam , & Butrium , & Librafactæ municipia se in hyberna  
contulerunt . Græci equites centum , ut commeatus inopiam sub  
leuarent ; quòd illis diebus naues Gallicæ quatuor Venetorum  
naues duas frumentarias Pisas conuehentes interceperant ; hye  
mandi causa Rauennam profecti sunt insequente anno ini  
to . aliquot etiam eorum , qui remanserant , ad hostes ob stipen  
dia non soluta transierunt . quibus etiam diebus Fauentia arcis  
præfecto ægerrime ferente oppidum à reip . legato ita regi ; ut si  
bi , quod antea consueuerat , magistratus creandi , pecuniam pu  
blicam auertendi , quidquid collibuisse patrandi facultas non  
esset ; nouasq; res cum sui similibus moliente , ut legati ius , & ma  
iestas impediretur ; puero etiam delinito , & in suas partes tradu  
cto ; Senatus ea intelligens literas ad legatum dedit : quibus lite  
ris legatus iubebatur , Hestori puero ciuitate adhibita denuncia  
re : Senatum non ambitionis , aut dominationis causa ciuem su  
um Fauentiam misisse : sed , cum prius otii , & quietis cupiditate  
eius hostes , qui illum regno propè deiecerant , suis auxiliis re  
pressisset ; postea & ciuium precibus , & ipsius periculo permoti  
constanti eius , diuturnoq; rogatu id fecisse : ut esset , & qui oppi  
danis ius æquabiliter diceret ; & quem eius inimici propter rep .  
uererentur : ne is quotidie ob ætatis imbecillitatem , & hostium  
audaciam suo de regno periclitari cogeretur : illum etiam in suâ  
militiam scripsisse ; stipendio iuuisset , ornatumq; esse uoluisse ;  
dignitate auxisset ; sua beneuolentia , pietateq; fouisset : atque hæc  
illum ab Senatu omnia sine ullo scenore , tanquam à patre filiū ,  
impetrauisset ; annumq; integrum his reip . muneribus , & libera  
litate usum fuisse : nunc uero ; quando non modo nulla gratia tā  
tis officiis referatur ; sed etiam legati iurisdictio impediatur ; reip .  
auctoritas labefactetur ; uelle Senatum , & legato iubere , ut sta



tim decederet: fatuum porro eum esse, qui alteri suo cum dispē  
 dio beneficium dat; quod ipse, cui datur, inuitus accipiat. iis li  
 teris palam à legato recitatis, puer rogare illum lacrymans, ob  
 testansq; cœpit, ne decederet: multiq; idem optimates frustra fe  
 cerunt. nam legatus nihilo secius decedens domum rediit. Inter  
 hæc Carolus, Iuliano Genuæ, ac Sauonis ei deditionem polli  
 cente, Alexandriæ, Dertonæq; Triultio, modo ipse reditum in  
 Italiam apparet; Lugdunum uenit. quibus intellectis rebus fœ  
 derati trium millium militū numerum in Liguria celeriter con  
 scripserunt: eosq; per arces oppidorum & castella distribuerunt:  
 & Ioannem Aloisium Fliscum aduersæ factionis, hominem ma  
 gna auctoritate; qui tum Genua exulabat, resq; nouas molieba  
 tur; ciuitati restitutum, communi stipendio ei tradito, ut quie  
 sceret effecerunt. Crebrescente uero iterum fama, Carolum ad  
 Lugdunum magnos exercitus cogere, Senatus decreuit, ut tre  
 centi equites cataphracti Ludouici auxilio mitterentur: princi  
 pisq; collegium ciuem legeret; qui eis quæstor, & legatus esset.  
 Patres Vincentium Valerium legerunt. pauloq; post equites le  
 uis armaturæ alteri totidem Mediolanum sunt à Senatu missi.  
 Triultius cum eo, quē & secum è Gallia transalpina ducere, &  
 in Salassis, ac Heluetiis cogere potuit, exercitu in Ludouici fines  
 ingressus castella quinque haud paulum oportuna, communitaq;  
 perceleriter cepit, expulso Ioanne Francisco Seuerinate Ludo  
 uici præfecto; qui ne primum quidem hostium impetum susti  
 nuit. alia ex parte cum militibus sex millibus Asta Iulianus pro  
 fectus Sauonem uersus, præmissis, qui eam ciuitatem pollicita  
 tionibus incitarent; cum nihil eo studio profecisset; itinere non  
 intermisso illò uenit: atque in colle apud oppidum castra posu  
 it. Jamq; Pisis Sauonem Senatus iussu uenerat classis præfectus  
 cum triremibus reip. septē, onerariis nauibus Federici regis qua  
 tuor: ad quas utraq; Genuenses duas eiusdem generis addide  
 rant. itaque Lucius, & Seuerinas legati, quos eodem Ludoui  
 cus miserat, sua cum manu, & cum equitibus Græcis, militi  
 busq; quos ex hybernis, & Pisano agro Genuam cõtendere Se  
 natus iusserat, adiunctis classiariis prælio cum Iuliani copiis cõ  
 misso, eas repulerunt. iis repulsis, submotisq; (retro enim ces



ferant) Nouium oppidum tormentis positis, ut se dederet, com-  
pulerunt. classis autem præfectus ea littora percurrēs naues ma-  
gnas, paruasq; complures commeatu onustas; qui è prouincia  
cum Iuliano, quem quidem iam Galli oram illam tenere confi-  
debant, tum Florentinis afferebatur; nauiculasq; longas milita-  
res aliquot paucis diebus cepit. Triultii autem rebus, successi-  
busq; cognitis Senatus decreuit; ut Nicolaus Vrsinus, cui om-  
nium reip. copiarum præfectura decreta erat; Bernardinus Mō-  
tonius Mediolanum celeriter contenderent: imperatorq; Franci-  
scus se compararet: ut, si opus esset, ipse quoque eò proficiscere-  
tur. legati etiam ad bellum Gallicū lecti Nicolaus Fuscarenus,  
Andreas Zancanius ire celeriter sunt iussi. tum centuriones mi-  
litum, tribuniq; delectibus conscribendis, quibus uterentur, ad  
plura loca missi. ubi Vrsinus una cum altero legato Mediolanū  
uenit. nam Zancanius in itinere ad Cremam luxato pede resti-  
tit. Ludouicus edici frequenti foro iussit: quæ legati Veneti ius-  
sissent, mandauissent; iis uelle iubere se, ita omnes homines au-  
dientes esse, uti si ea ipsemet imperauisset. Triultio uero; cui an-  
tequam exercitus reip. illuc accessisset, omnia secundiora fue-  
rant; Vrsino, & Montonio, reliquisq; præfectis, & tribunis mi-  
litum suas ei copias opponentibus, primo ad Castellatiū, quod  
municipium tormentis concutere instituerat, mille & quingen-  
tis Gallis ab equitatu reip. leuis armaturæ male habitis, non le-  
ue detrimentum est illatum. deinde cum prælio decertare nō au-  
deret; paulatim se retrahens, & castella Ludouici capta dese-  
rens, apud Astam octo millia passus castra posuit, & communi-  
uit; ante tamen Bergomascio Ludouici castello de uia ei obuiō,  
propterea quòd se dedere noluerat, ui capto, interfectisq; ad  
unum, qui in eo erant, omnibus. ex Veneto etiam, & Ludouici  
exercitu equites, & milites Montis alti municipium, quod à No-  
uaria tria millia passuum abest, expugnauerunt, simulq; diripu-  
erunt, atque incenderunt. Saoune autem, & Genua recte firma-  
tis, cum Pisani commeatus inopia conflictarentur, propterea  
quòd classis reip. ab eorum littoribus abfuerat, Florentini suis  
nauib. frumenta in oppidum supportari prohibuerant; paucu-  
losq; se dies sustinere posse ulterius significauissent: reip. classis  
præfecto



præfecto cum triremibus quinque, nauigiis minutis frumentariis, quibus erat præsidio, supra quinquaginta è portu Veneris Pifas reuertenti, ex omni sua copia Florétini fortissimo quoque milite nauibus imposito Triturrita soluètes occurrerunt. naues erant eorum sex, quatuor biremes, una & ipsa longa, sed triremibus multo uastior, atque procerior, oneraria magna alia, militibus amplius sexcentis, tormentorum, atque missilium omni genere instructissima. ex iis ad impediendas frumentarias, ne Arni fluminis hostium ingredi possent, biremes miserunt: reliquæ duæ magnæ, ut in naues triremes impetum facerent, remis, uelisq; propellebantur. id præfectus conspiciens, triremem unâ, cui maxime confidebat, commeatui præsidio reliquit: ipse cum reliquis prouectus; tametsi periculosum esse intelligebat cum tã magnis nauibus conflare; tamen, propterea quòd uidebat omnem eius belli fortunam in eo commeatu supportando consistere; ad eas conuersus citatis remigibus suæ nauis proram in longæ hostium latus magno animo imprimit. conflictu mutuo ambæ naues concutiuntur, & hostes manum ferream in præfecti nauem iaciunt, eamq; retinent. itaque omni telorum genere comminus acerrime utrinque pugnatur. sed de superiore loco hostium milites tela in Venetos adigentes facile eos uulnerabant. tũ pilas piceas igne succenso in triremem iaciebant. quæ res magnum incommodum præfecto attulit, transtris compluribus, & maiore uelo igne combustis: ut qui proximi pugnarent milites, remigesq; perterrerentur, atque animos, uirtutemq; remitterent. ueruntamen & reliquæ aderant, ut quæque poterat, triremes; & utranque nauem hostium uirtute magis, atque artificio gubernandi, celeritateq; remorum, quàm uiribus, & facultate lacebant: & modo hac, modo illac concitata inferebantur. at nauis magna hostium pilas ferreas creberrimas tormētis in triremes iaciebat: & si qua ei appropinquasset, saxa & tela in super è carchesiis iaculabatur. pugnatum est acriter ab utrisque continenter horas fermè quatuor: cum interea nauigia commeatum conuehentia unius triremis præsidio, quæ biremes quatuor fortissime pugnando repulerat, hostium Arni fluminis capiunt uno tantummodo nauigio amisso: quod tamen sponte ad Triturritā

N



uela conuerterat. præfectus id, quod unum maxime cupiebat, affecutus, ut comineatum in tuto sifteret; nauibus hostium, magno & ipsis detrimento illato, uento adspirante se subtrahētibus, interfectis suæ nauis hominibus permultis, uulneratis centum uiginti, ex reliquis nauibus non paucis desideratis, uulneratis parte plurima, hostes discedentes, Triturritamq; conuersos reliquit. Terrestri autem itinere dum reip. milites, & Græci equites Pisa missi reuerterentur: Ceuræ oppidi; quod est supra Sauonē, atque in Gallorum partibus à regulis indigenis obtinebatur; fines ingressi eos percurrere cœperūt. ea intellecta re oppidani per moti cum militibus, quos habebant complures, armis captis ad eos contenderunt. quos illi excipientes uniuersos fuderunt: cōplures occiderunt: captiuos ducentos fecerunt. deinde ulterius progressi, cohortatiq; inter se in oppidi suburbia bipartito irrum pentes, præda, & cæde facta duabus ex partibus ignem intulerunt. Atque ea propè omnia tametsi ex Ludouici usu, & reip. uoluntate maxime tunc quidem cecidissent: tamē, propterea quòd illis ipsis diebus nuncii crebriores sunt allati, Carolum omnino aut ipsum in Italiam uenturum, aut magnos exercitus missurum; Senatus decreuit, ut imperator cū equitibus octingentis ad exercitum contenderet; copiarq; reip. omnes ad Padi ripas se se sisterent. delecti etiam centuriones decem militibus Brixia conscribendis mille, ad exercitumq; adducendis. ex Rhetis quoque trium millium militum numerus pusilla pecunia conscriptorum aduentare dictus est; ut Brixia solidum stipendium acciperet. Ea per populos opinione de Carolo, timoreq; crebrescente, Tristanus Saornianus e' Fori Iulii principibus, Hieronymi frater, homo reip. amantissimus, Bernardum Bembum patrem meum Decemuirum magistrum adit. proponit habere se necessarium sibi hominem Epirotam, callidum, & ingenio peracri; nihil omnino ut sit, quod ei non mandari recte possit: huic esse cum propinquo suo, quem Carolus Gallorum rex cubiculi ministrum habeat, magnā, perq; ueterē beneuolentiā. audere illū in Galliam proficisci; & uel propinquo persuadere, ut ueneno, quod secū allaturus est, regē tollat; uel, illo de ea re cælato, ipsum per se regē tollere uelint, si Decemuiro: Epirotæ illi tantæ rei præmiū aliquod



50

quod statuere; sperare se, atque confidere, breui negotium ab eo confectum iri. Bembus, tametsi sciret ea flagitia à magistratibus repelli; more tamen, institutoq; maiorum re cum reliquis Decemuirum magistris communicata, atque ab ipsis ad collegium perlata, Tristano ad se uocato de collegii sententia respondit: eiusmodi contra hostes insidiis ad eam diem nunquã usam rep. fuisse; cum sapenunero potuerit: neque nunc uelle incipere: magis Deos immortales, quàm humanas opes, uereri: porro uinci ab suamet nequitia illos, qui per scelus alios uincere perq; nefas parant.

PETRI BEMBI RERVM VENE  
TARVM HISTORIAE  
LIBER IIII.



Is in Italia rebus administratis, Caroli & Hispaniæ regum legati: qui quidem reges ad saltum Pyrenæum exercitibus missis bellum inter se gerebant: sex mensium indutias in Aquitania faciunt: quibus uterque rex indutiis non ab altero modo ipsorum, sed à sociis etiam & fœderatis bello laceffendis abstineat. quamobrem Carolus, ubi id ei nunciatum est, ad Triultium mittit imperans, ne quam Ludouici rebus indutiarum tempore turbam aut molestiam inferat. ea intellecta re Senatus suas & ipse copias domum reuocat. ita, qua ex parte, quoq; tempore maximi tumultus expectabantur; subitum ocium est allatum. eas ob res Senatus Dominicum Triuisanum, Antonium Bolduum ad Hispaniæ reges legauit: qui procurarent, uti ex indutiis semestribus diuturna pax fieret. quibus profectis Antonius, eloquentia plane singulari, & præstanti uir ingenio, in itinere aduersa ualeitudine interceptus Genuæ interiit. eius morte audita Senatusconsultum factum est: cū Antonius Bolduus Andr. F. ex equestri ordine nullum laborem pro rep. refugiens lega-



tionem ad reges Hispaniæ suscepta in itinere mortem obierit; Senatui placere; ut Gabrieli Bolduo eius filio primo quoque tempore in fano Patauino sacerdotium attribueretur: quo se fratresque suos alere commodius atque honestius possit. idque paulo post sacerdotium ab Alexandro Senatu petente Gabrieli est attributum. Miserrant illi quidem reges superioribus mensibus ad Senatum per Franciscum Capellum legatum, qui ex Hispania domum redierat, Fortunatarum insularum unius regem dono mediusfidius non spernendo: quando ea porro elementi ora solidi; quæ in oceano Athlantico est circiter decies centena millia passus à continenti meridiem uersus; multis ante patres nostros sæculis ignorata, eorum indagatione ac diligentia tota tum demum reperta, & colonis magistratibusque missis in potestatem redacta, orbi terrarum adiungitur, cum regem publice Patauio enutriri Senatus iussit. Eodem ferè tempore patres certiores facti Franciscum imperatorem stipendio reip. non confecto cum rege Carolo agere, ut se in suam militiam recipiat: illum ad urbem accersitum; ubi morbo, ne uenire posset, impediri se respondit; Decemuirum decreto missum fecerunt. is auri libras ducentas stipendiorum nomine ante tempus acceptorum reip. debebat: falsis autem crediti, neque dum soluti, centum, accidit tamen, ut eo ipso missionis die infrequenti comitatu Franciscus Venetias appelleret, dictitans se à Ludouico eiusque genero Galeatio in fraudem ob inuidiam coniectum: qui literas ab eo conscriptas finxissent, ad patresque misissent; quas ipse nunquam scripserit, eius rei satis magnum argumentum esse; quod ipse in eorum potestatem uenerit. quod si alia etiam pignora patres postulent: arces se sui regni, suosque liberos reip. traditurum: modo sibi purgandi iure criminis facultas ne intercludatur, neque tamen ut sententiam patres mutarent, impetrare potuit. qui ad eum tertio post die miserunt; moram in urbe diutius ne traheret. is etiam, quo ab urbe discessit die, Joannem fratrem ad patres misit: quibus se ab eo conueniri non est uisum. Post hæc dum indutiarum Aquitanicarum tempus labitur; Hercules ad urbem uenit principem, & patres salutatum, rogatumque ut Ferdinandum filium suum in equatu reip. uellent esse. quod quidem ei patres liberaliter concesserunt



51

ferunt, equitibus cataphractis alendis centum stipendio adole-  
scenti per Senatum attributo. Quod autē ad Pisanum bellum  
attinet; ut eodem saepius reuertamur; is quidem annus & pro  
parte insequens nihil propē, quod magnopere memoratu di-  
gnum esset, habuerunt. missi ad Florentinos per Trituritam cō-  
meatus in tam magnis nauibus, ut eas aggredi naues reip. non  
sint ausae. capti ab eorum exercitu milites Veneti centum, & exu-  
ti armis, conscripti ab eisdem equites leuis armaturae tercentum;  
qui sagittis contra Græcos uterentur: atque ii eorum impetus ad  
modum represserunt. ob id ab Senatu equites ferreis cum fistu-  
lis ad exercitum missi, & item Græci submissi. cataphracti quo-  
que equites conscripti noui, dilapsis ueteribus. qui Pisanum por-  
tas custodiebant; iis addita ab Senatu stipendia; ut studiosiores  
suo in munere obeundo essent: missa etiam ad Senatum Ludo-  
uici noua legatio; quae ad componendas Pisanorum cū Floren-  
tinis controuersias patres hortaretur: Præstare eos Florentinis  
attribui, quàm bellum diutius alere: omnia in Italia pacis & quie-  
tis plena momento temporis futura; si Pisae restituantur: ut nō  
tam commutata illius tempore aut euentibus consilia uiderētur:  
quid enim tum noui? quàm semper illum id unum spectasse pa-  
lam fieret; ne resp. eo municipio potiretur. sed nihil plane ul-  
tra. aliis uero de rebus perpauca. nauis reip. longa ex earum  
genere, quae ad mercaturam proficiscuntur, more institutoq; ma-  
iorum conuehendis iis hominibus; qui aut uoto suscepto, aut  
religione permoti Christi Dei filii sepulcrum, quod est Hiero-  
solymis, adire atque inuisere cupiunt; in Syriam quotannis sta-  
to tempore mitti solita; cum ad Maleam iter faceret; in Turca-  
rum regis classem Arige præfecto incidit. ea erat nauium onera-  
riarum duarum, triremium item duarum, biremium quinque.  
quarum biremes duae ad nauem reip. præmissae uela demittere  
iusserunt. mos est nauticus eiusmodi: ut, qui plus aut uiribus aut  
dignitate pollent; uelint, ut quae sibi occurrerint naues uelifica-  
tionem intermittant, antennisq; demittant cum honoris sui cau-  
sa; tum ut, si quid ab illis quærere aut petere uelint, possint. id  
qui nolunt facere; ius est bello cogere ut faciant. saepeq; accidit;  
ut ea de causa pugnae maximae existerent, plurimorumq; homi-



num cædes consequerentur. Aloisius Georgius: is enim erat na-  
uis Venetæ præfectus: classem esse illam pyratarum existimans  
antennis non demissis cursum tenuit. quod ubi Turcæ conspex-  
runt; ab utroque illum latere suis triremibus cinxerunt; & sagit-  
tarum magnam uim in eum mittere cœperunt. id cum parum  
proficeret; nauibus suis omnibus illum expugnare contende-  
runt. eo in certamine Turcæ nauis Venetæ scalam sæpe conscen-  
derunt, aliisq; à partibus in nauem prosilierunt: sæpe ignem inie-  
cerunt: quo & plutei combusti, & præfecti cœnaculum ipsa in  
puppi, & maiora uela conflagrauerunt. sed tanta remigum, &  
nautarum, atque imprimis aduenarum uirtus fuit; ut, cum ab ho-  
ra diei sexta usque ad quartam decimam pugnauissent; Turcæ  
receptui canentes, & signo pacificationis sublato priores pugnam  
desinerent; Arigesq; missis ad Aloisium ex suis, qui salutem illi  
dicerent, magnumq; atque fortem uirum esse testarentur, pacē  
beniuolentiamq; cum illo iniit. missi quadraginta milites ex iis,  
quos ianizaros appellant, suis in nauibus interfectos esse Aloisio  
significauerunt, ex Veneta interierunt quinque: uulnerati cō-  
plures: in his præfectus quatuor uulneribus acceptis: neque ta-  
men periit. In Punicis etiam littoribus Bernardus Ciconia eius-  
dem generis nauibus à rep. præfectus Perucam Pyratam inge-  
nio magis quàm uiribus expugnauit, erat uterque ad Tuncta  
in portu: atque ille nauem onerariam permagnam habens, ut  
exirent Veneti, expectabat, illos in mari aggressurus: seq; id cona-  
turum, palàm antea præ se tulerat, multa minaciter oblocutus, in-  
terim Dalmatæ, qui sub imperio reip. degebant, nauem nō ma-  
gnam eundem in portum adducunt. id ut est Ciconiæ nunciatū;  
nocte ex suis nauibus homines cōplures in illā imponit: nauesq;  
aptari ad pugnam imperat. ea re, tamen si furtim fiebat, tamen  
a pyratibus animaduersa, confestim Peruca relictis ob celeritatem  
anchoris è portu se se eripit. Ciconia illum cum triremibus se-  
quitur: tranquillitateq; oborta remigum labore affecutus, oppu-  
gnansq; cōminus, ubi propter nauis altitudinem nihil fermē uir-  
tute militum proficit, & suos facile uulnerari de superiore loco  
uidet; fabros in nauis scapham iubet descendere: eosq; suæ pup-  
pis pluteis armamentisq; cōtegens, ex pyratæ nauis stuppas inter



tigna constipatas paulum sub aqua extrahere imperat. ea re hosti-  
 bus imprudentibus effecta, implenteq; se naui aqua, Peruca illi  
 deditur. Nostro autē in mari Andreas Lauredanus, nauis onera-  
 riæ bellicæ à Senatu præfectus, magna uir uirtute, cum intellexif-  
 set à Crotoniatis Petrum Cantabrum pyratam recipi, qui reip. ho-  
 minibus damna intulisset; eumq; ad Oricellam esse cum nauibus  
 longis quatuor; secum nauiculas, quas appellant Gripas, quæ  
 commeatum aduexerant, duas ducens eo proficiscitur: iactisq;  
 procul anchoris noctem opperiens in sua nauis scaphis duabus  
 atque in Gripis milites trecentos imposuit, imperans ut ante lu-  
 cem egressi, turrim ipso in littore, qua in turri esse Cantabrum  
 intellexerat, circumfunderentur; ne is effugere posset; eamq; ex-  
 pugnare conarentur. missi, quod iter erat longius, orto iam so-  
 le in litus descenderunt. Cantaber ubi naues aduenientes è lon-  
 gino uidit; coactis non suis modo, sed eius etiam loci copiis  
 equitatus & peditatus; quas Antonius Cétilius, cuius erat in po-  
 testate castellum, ut ei præsidio essent, ad illum statim miserat;  
 in eos impetum fecit. Veneti cum sex horas continenter pugna-  
 uissent; interfectis compluribus, uulneratis octoginta, Catabroq;  
 ipso, omnes in fugam coniecerunt. fugientes loci castellum reci-  
 piens texit. turri deinde expugnata; quiq; in ea erant, propugna-  
 toribus nouem recte suspensis, castellum capere sunt aggressi. bi-  
 duo in ea oppugnatione consumpto cum acerrime castellum de-  
 fenderetur; murorū parte deiecta, uastato agro, tormentis hostiū  
 abductis, uno suorū tantummodo amisso, uulneratis perpaucis  
 pyratæ classem incenderunt; ad nauemq; redierunt. Superio-  
 ri uero æstate Ioannes Coruinus, Mathiæ regis Pannoniæ filius,  
 per suum legatū Senatu significauit, cupere se se perpetuo amo-  
 ris & beneuolentiæ uinculo cum rep. coniungi: itaque petere  
 ut in ciuitatem & ius comitiorum reciperetur. quamobrem ma-  
 ioribus in comitiis ciuitas, & ius comitiorum ei datum. Arme-  
 nii quoque, qui Venetias uenerant, tabellas testamentarias, Zia-  
 ni principis tempore ab homine Armenio confectas, ædis Mar-  
 ciæ procuratoribus ostenderunt: quibus tabellis domum in urbe  
 demortui pecunia emere procuratores iuebantur: quam qui-  
 dem domum Armenii ad urbem uenientes incolerēt: eamq; po-



stea domum cum sacello emptam ad Iuliani fuisse in laternarum  
uia, quæ tunc à procuratoribus locetur: itaque illam ipsam do-  
mum sibi restitui ex testamento petierunt, à procuratoribus intel-  
lecta eorum postulatione domus est Armeniis restituta, atque  
ab iis incolis cœpta. ipsi à ciuitate comiter & liberaliter accepti,  
gens tam longinqua, urbi amico spectaculo fuerunt. Vere au-  
tem insequentis anni iam medio Ludouicus regni ac dominatio-  
nis ingenio & natura cupidissimus, eiusq; rei magnopere impa-  
tiens, quod uidebat Pisas ciuitatem multo reip. amiciorem  
esse, magisq; tribuere, quàm illius uel beniuolentiæ, uel fidei: Lu-  
cam oppidum suam in potestatem redigere malis artibus est co-  
natus: quo facilius uel Pisas, si quæ posset, occuparet ipse, suasq;  
faceret; uel reip. occupare illas cupienti firmiter obsisteret, muni-  
cipio omnem ad copiam opportunissimo, & uicinitate coniun-  
ctissimo suæ ditioni adiecto, ad seq; traducto. itaque compositis,  
quas intendebat ei municipio, insidiis ire se Genuam simulat: ut  
Lucenses imparatos aggredi, tanquam aliò properans, impro-  
uiso possit. sed in itinere dum esset, detecta proditione oppida-  
ni se communiunt. potiundi oppidi occasione amissa Ludoui-  
cus, ne simulasse uideretur; Genuam profectus est: ibiq; dies ali-  
quot commoratus domum rediit. Senatus iis Ludouici artibus  
cognitis, cum in se plane uno positam omnem eius belli ratione  
& constitutam uideret; Græcos equites trecentos, qui in agro Pa-  
tauino hyemauerant, Pisas mittere, prioribusq; addere decreuit:  
militumq; numerum duum millium statim imperare, qui Pisas  
mitterentur: tum legatum exercitui legere, qui Iustiniano domum  
redire postulanti succederet. lectus Thomas Zenus uia se de-  
dit. quæ intelligens Ludouicus, palam, ut etiam reip. legatus  
exaudierit, ea quidem Senatusconsulta, inquit, quod spectent, ui-  
deo. uolunt enim patres Pisis potiri: sed eos euentus frustrabi-  
tur: nunquam enim potientur. Inter hæc Carolus Galliæ rex mo-  
ritur. itaque accidit; ut, cum Marcus Lipomanus reip. legatus  
ab Ludouico peteret, uti Zeno cum Græcis equitibus Pisas eun-  
ti iter ad Apuanos Ligures pateret, Ludouicus nihil responderit;  
tum ipsi in Ludouici fines progresso itineris facultas permissa nō  
fuerit. Senatus iis de rebus certior factus, reputansq; id, quod  
erat.



erat, Ludouicum nihil sibi amplius à Carolo timentem, propter quod reip. indigeret, spiritus sumpsisse; neque quidquam præterea in Pisani belli administratione reip. concessurum illum existimans; ad Herculem misit, ut equitibus & legato reip. per Mutinæ Regiūq; Lepidi fines iter daret: qui quidem dedit. Ludouicus autem ea re cognita; tum è Gallia certior factus Aloisium ducem Genabensium, qui in Galliæ regnum Carolo successerat, quem Galli Ludouicum appellabant, iam ad bellum in se se animum & cogitationem adiecisse: Senatui significauit: nihil se de itinere legato reip. negauisse: illum potius perperam ipsius uerba interpretatum: suos fines omni tempore Senatus exercitiis patuisse, neque unquam oclusos fore. quamobrem Zenus ipse per Ludouici fines, quod iter erat commodius, Pisas uenit: cum tamen equites Pado iam traiecto per Herculis fines antea misisset. Florentini, qui omnino sæpe à Græcis equitibus male habiti eos pessime oderant; edictum proposuerunt; ne quis ex eis captiuus duceretur; sed captus interficeretur. ea intellecta re legatus Venetus edici contra iussit; idem sui milites facerent; neque ulli omnino ex hostium numero parcerent; sed omnes per æque interficerent. statimq; in eorum fines Græcos equites educens, excursionem introrsus facta, quoscunque in agris reperit, interfecit. qua re cognita Florentini edicto publice rescisso ad morem belli pristinum redierunt. pauloq; post Butrium magno impetu aggressi, scalisq; ad murum positos repulsi sunt à propugnatoribus detrimento paruo accepto. sed non paruo illis detrimento ea, quæ subsecuta est clades, fuit. Iacobus Sauornianus turmæ equitum reip. præfectus, adolescens impiger, cum suis equitibus centum Græcis quatercētum in hostium fines Populoniæ uersus è castris prædabundus proficiscitur: multisq; millibus passuum confectis ad Castellum; quo in castello halumen proximis è secturis erutum incredibili dominorum lucro plurimarum nationum usui conficitur; accedens, oppidanos ad illud repellendum egressos fugat: ædificia, quæ pro portis sunt, incendit: alias in partes incurfione facta, atque in ea biduo cōsumpto, magna cum pecudum & armentorum præda dum reuertitur; hostes de ea re certiores facti omnibus copiis ad ea loca, quæ per



illum iter facturum putabant, contenderunt. alia ex parte Zenus legatus ob Iacobi longiorem moram ueritus ne hostes intellecta re in itinere illum aggrediantur; cum reliquo exercitu obuiam Iacobo proficiscitur, præmisso tibicine, qui eum de suo aduentu certiores faciat. hostes Iacobum nacti impetum in eum faciunt. interim tubicen celeritate usus de legati aduentu eum admonet. ille id intelligens hostium modo impressionem lente sustinere: etiam cedere interdum: deinde pugnam paulisper redintegrare. id ubi aliquandiu facit; legatus aduenit. hostes pugnantes à tergo repente aggreditur. tum Iacobus Græciq; clamore sublato acerrime in eos inuehuntur. quod ubi hostes uiderunt; omnes perterriti fugere contenderunt. interfecti ex iis plus ducenti. capti ex præfectis Ranutii Martiani frater, Gallusq; is, qui ob uirtutem bellator magnus appellabatur; aliiq; complures; ex equitibus centum septuaginta, ex militibus quingenti: signa militaria quinque relata. Ranutius ipse toti exercitui præfectus equo amisso fugiens uix ægreq; se in proximum oppidum contulit. reliqui aut idem in oppidum, aut in montes atque syluas fugientes se abdiderunt. Florentini clade accepta Paulo Vitellio; qui priore stipendio confecto ad gentiles suos, quibus cum Alexander bellum gerebat, in Romanum agrum se contulerat; imperium totius belli deferunt: Vitellotio eius fratri præfecturam equitum tradunt. ii cum equitibus trecentis in eorum castra perceleriter ueniunt. Caterina Forum Liuii & Forum Cornelii obtinens, Ludouici fratris filia notha, mulier uidua, milites quater mille suis in oppidis atque finibus imperat magna celeritate adhibita. eos, quod nulla suberat causa cur imperarentur; Ludouici iussu cogi omnes homines existimauerunt; ut illos auxilio Florentinis mitteret. Ludouicus ipse Franciscum Mantuanum principem, quem resp. missum fecerat, imperatorem suis copiis deligit sub Maximiliani copiarum nomine. iis intellectis rebus Senatusconsultum fit; ut equitum præfecti aliquot Rauennam mittantur: ut Vincentius Naldius Fauentinus magna in oppidi finibus auctoritate homines montanos cogat reip. pecunia numero ad mille: ut Antonius Ordelauius Foroliuiensis; cuius pater eius oppidi regnum obtinuerat; quemq; ipsum resp. complures



plures in urbe annos enutrierat; Rauennam proficiscatur, bellū  
 Caterinæ, ni quiescat, suorum factione rei; p. opibus illaturus:  
 ut Ferdinandus Herculis filius, quem Senatus in suam militiam  
 adlegerat; & Ioannes Ripa, equitum præfectus, iter Pisas è uesti-  
 gio suscipiant: ut Nicolaus Vrsinus Bernardinusq; Montoni-  
 us ad Ollii fluminis ripas se se conferant. post hæc, propterea  
 quòd Ludouici legatus eo Senatusconsulto intellecto inter pa-  
 tres dixerat, res, quas uellent, alias cogitarent; unum modo, Pi-  
 sas se tueri posse, ne cogitarent, ne ue in animū inducerent: adhi-  
 bitis fœderatorum legatis Barbadicus princeps eis ostēdit, quòd  
 bellum resp. in Florentinos Pisis tuendis suscepisset, factum so-  
 ciis quidem omnibus consentientibus, Ludouico autem ma-  
 gnopere hortante, ac belli æquam partem in se se recipiente.  
 quantas eo bello impensas Senatus fecerit; quātos exercitus eò  
 miserit, aluerit, quot triremes naues; ignorare prorsus neminem.  
 Maximilianum in Italiam adduxisse quidem & reliquos, sed  
 unius Ludouici causa; ut esset, qui illum ab Carolo bellum ei  
 primum omnium parante pari auctoritate tuereitur. eos tamen  
 sumptus omnes unum propè Senatum sustinuisse, largiterq; Ma-  
 ximiliano suppeditauisse. annos esse elapsos duos, ex quo bel-  
 lum initium habuerit. nunc autem, cum eò res perducta sit; ut,  
 si, quam Pisanorum ciuitati fidem Ludouicus dedit, etiam præstet,  
 illa suam libertatem facile retineat; eum non modo suas domū  
 copias reduxisse; sed hostes etiam Pisanorum fouere milite, pe-  
 cunia, consilio, rebus omnibus: ut, qua ipse perfidia uolens lu-  
 bensq; in Pisanos utitur, uelit alios cogere, ut eandem perfidiā  
 uel inuiti exerceant. is quoniam Senatui animus non est; scire  
 eum cupere, quid sibi his rebus Ludouicus postulet. nam si pa-  
 cem agere destinat; pacis ei Senatum auctorem fore; dum in fi-  
 de, quam Pisanis dedit, maneat. sin bellum gerere mauult; bel-  
 lum ei per Senatum non defuturum. earum duarum rerum pa-  
 cis belliq; utra ei magis cordi est, eius eligendæ se se potestatem  
 illi facere. ipsos autem legatos non tam suæ orationis testes ha-  
 buisse; quā ut, si quid durius Ludouico acciderit, sciant me-  
 moriaq; teneant iure id meritoq; accidisse. Ea oratione habita le-  
 gatus Ludouici tempus se dixit sumere, dum, quid ad illa respō-



deri Ludouicus uelit, scire possit: neque tamen dubitare se iam nunc, quin auri libras quindecies millies Ludouicus habeat: quibus Florétini tanquam suis eo bello uti possint. paucisq; post diebus literæ sunt ab Ludouico ad patres datæ: mirari se se, quã ob causam, ea Senatus mandata nunciari sibi iussisset; qui quidẽ non socius modo atque amicus, sed plane filius reip. semper fuerit. æquissimum sibi uideri, quam pecuniam Pisis tuendis ciuitas erogarit; eam pecuniam Senatui restitui. itaque si uelint, cū reliquis fœderatis rationem patres ineant; quo nam id quidem modo agi commode conficiq; possit: se nihil eius impediturum. lisdem diebus Decemuiri Petro & Hieronymo & Aloisio Bragadenis Andræ filijs; propterea quòd ii Nicolaum Georgium, rationibus publicis præfectum, in eius ædibus dum alloquerentur, uerbis arrogantioribus interiectis minis fuerant usi; ius comitiorum & magistratuum adipiscendorum facultatem annos decem interdixerunt: qui quidem ante id tempus nequeant restitui; nisi omnibus collegiis sententiis ea lege absoluatur. idem postea in Vincentio Barbaro seruatum; quòd is Dominico Lamberto magistratus pacis scribæ male dixerit. Florentini æstate ineunte per Caterinam, perq; Ludouicum, qui eis pecuniam mutuo dederat, confirmati, nouisq; aucti copiis militum reip. nõ magnum numerum; qui Lunam, ut eorum locorum dominis præsidio essent, ab legato missi fuerant; cæde facta in fugam uerterunt. deinde, tametsi Senatus cum Petro Duodo altero legato Pisas profecto equitatum, qui sagittis utebatur, eodem misisset; tamen apud Cassinam magna caligine oborta ita, ut conspici non possent, maximam copiarum omnium partem fuderunt Ioanne Gradonico, qui eis præerat, interfecto, captis compluribus. reliqui Sauornianus Tarsiasq; qui erant Cassinæ, ueritine interciperentur, tormentis abductis se se Pisas contulerunt; atque ad muros castris positos constiterunt. his intellectis rebus Senatus exercitu restaurando Guidum Vbaldum Metaurensiũ ducem suam in militiam adsciuit: cui stipendium esset in equites cataphractos ducentos, leuis armaturæ centum, auri libræ annuæ centum septuaginta. Petrum autem Marcellum legatum declarauit; qui Vrbinum accurreret, ut Guido Vbaldo præsto esset,



55  
esset, militesq; mille in eius finibus conscriberet. tum, quod Pe-  
trus Medices patribus significauerat; quoniam Vrsini propin-  
qui sui pacem cum Alexandro fecissent: si ei pecunia in stipen-  
dium subministraretur, illos se omnes, quocunque opus esset, ad-  
ducturum: Senatus ea de causa Petro Medici pecuniam decre-  
uit; equitesq; Græcos, qui æstiuæ in agro Taurisano habebant,  
quiq; tum è Græcia uenerant, in Flaminiam mittendos censuit:  
ut alio itinere Pisas contenderent. nam per Ludouici fines unum  
modo militem, aut omnino nuncium eò patres mittere non po-  
terant: quando is & itinera clauserat, & omnes tabellarios excu-  
tiebat, atque interceptabat; ne Senatus certior illis de rebus fieret.  
itaque nihil iam noui Pisis afferebatur; compluresq; dies magna  
earum rerum ignoratio Senatum tenuit. emanauit tamen hoc:  
Florentinos cum Genuensibus Ludouico procurante fœdus per-  
cussisse: quo ex fœdere Genuenses littora Florétinorum ab reip.  
classibus tuta reddere tenerentur. neque multo post eorum ma-  
gistratus Marco Beatiano, quem antea Senatus Genuam mise-  
rat, asperioribus uerbis denunciauit; se nunquam passuros, ut  
in reip. imperium Pisæ redigantur. cui Beatianus respondit; mi-  
nus iniuste eos & Ludouicum facturos, si semel iniuriæ in reip.  
fierent, fœderum & societatis, quam Diis hominibusq; testibus  
sanxissent, læsæ atque uiolatæ nomine: nunc illos dupliciter pec-  
care atque delinquere; semel in eo, quod infidelitate se pollu-  
unt; iterum autem propterea, quia reip. ambitionis insimu-  
lant: quæ profecto nunquam Pisas sui iuris facere concupiuit,  
sed tantum libertati restituere: quemadmodum se facturam unâ  
cum ipsis initio spondidisset. His igitur atque aliis unius Ludo-  
uici artibus: nunquam enim quiescebat: cum suum magnope-  
re Florentini exercitum autumnî mēsis amplificauiſſent; reip.  
autem copiæ multis essent partibus attenuatæ: Paulo imperato-  
re Butrium aggressi per deditionem oppidum capiunt. eo tamē  
ita capto omnibus tormentorum magistris, ne amplius exerce-  
re artem possent. manus dexteræ præciderunt; suaq; cuiusque  
collo appensa eos dimiserunt. quorum pars ad urbem ueniens se  
se patribus commendauit. patres, quoad uiuerent, stipendium  
singulis cum uacatione omnium munerum tribuerunt. illi ma-



nibus ferreis fabrefactis se ad artem redituros, & reip. usui futur  
ros, suasq; iniurias, si Pisas remittantur, uindicaturos, fidem Se  
natui fecerunt. Auxit patrum curam exercitus instaurandi Butri  
um captum. itaque Baliones, familiam Perusinam magnopere  
militarem, antiqua necessitudine cum Vrsina Romanorum gen  
te consociatam atque coniunctam, equites cataphractos centum  
quingenta pollicentem, Senatus conduxit: qui per suos fines  
& Senarum agrum Pisas proficiscerentur. eo tempore Petrus  
Medices cum se uia dare uellet, ut in fines Florentinorum con  
tenderet, in febrim incidens substitit. interim Paulus omni cum  
exercitu ad Pisanum uicum castra posuit oppugnadi oppidi cau  
sa. quod cum plures dies tormentis percussisset, atque ad mu  
ros milites adduxisset; sæpe cum clade repulsus oppidanis acer  
rime propugnantibus, tandem oppidum per deditionem capit.  
eius oppugnationis tempore accidit, ut Veneti quoque castellū  
Pisanorum, in hostium potestatem redactum, in quo erant mili  
tes ducenti quingenta, noctu aggressi uno impetu expugna  
uerint. quo successu incitati paulo post ad castellum Pisano ui  
co proximum item noctu cum accessissent; re per exploratores  
significata repulsi à propugnatoribus, tum in reditu ab hostibus  
intercepti magnam cladem acceperunt. Vico capto & clade ac  
cepta Senatus censuit, uti Perusiæ milites conscriberentur nume  
ro ad duo millia: & quod Senarū ciuitas per suos fines iter reip.  
copiis nō dabat; Petrum Medicem Guidumq; Vbaldum in Fla  
miniam uocauit; ut per Fauentinorum fines in hostiū agrum ir  
rumperent. ea enim de causa cum ad eos Iacobum Venerium le  
gatum misisset: ciuitas concilio conuocato reip. copias senten  
tiis propè omnibus recipiendas censuerat. itaque etiam Hestori  
puero pœnitentia ducto, quod se per suos malis artibus à rep. di  
strahi permisisset; pristinum Senatus locum gratiæ restituit cum  
reliquis stipendii ueteris nouo stipendio tradito. Hostes interea  
Pisanum uicum, quem quidem murorum parte magna tormen  
tis nudauerant, restituerunt. Veneti se in Pisanum suburbiiis uallo  
cinxerunt. Librafactæ autem in colle, qui è regione oppidi est,  
castello excitato, classiariisq; septuaginta cum tormentis introdu  
ctis munierunt. quæ tamen eis cura studiumq; haud multum cō



tra Pauli artes profuit. nam cum illi Librafactæ copiis omnibus profecto, diesq; complures castellum oppugnantū parum usui cetera fuissent; cuniculis partem muri sustulit, submissisq; per ruinas militibus, non tamen sine cæde, castello est potitus. co capto, Librafactæ iam & ipsum tormentis murorum parte nudatum, tridui spatium ad deliberationem sumpto se dedit. Rebus apud Pisas in aduersum reip. labentibus, & Paulo nihil eorum, quæ ex usu esse possent, prætermittente, Senatus decreuit, ut Guidus Vbaldus, Petrus Medices per Fauentinorum fines Maratam Crispinumq; municipia natura magis quam artificio communita, quæ prima eo latere in hostium sunt finibus, aggredierentur: ut illis expugnatis aditus in agrum Florentinorum eis pateret. itaque tormenta ad muros deiiciendos Rauennam patres miserunt; quæ eo supportarentur: Ioannemq; Paulum Gradonicum & in Vbaldi exercitu Quæstorem, & Græcis equitibus, quos ei præsto esse iusserant, præfectum legerunt. Iulianus autem Medices Petri frater cum Fauentiam prior uenisset, Maratam profectus ab oppidanis libentissimis recipitur. Laurentii enim recollectione, magni clarissimiq; uiri, eorumq; municipio amicissimi; qui ciuitatis principatum multos annos obtinuerat; permoueri se se dixerunt; ut quam beniuolentiam patri, si uiueret, se debere sentiebant, filio præstarent. Maratæ arx summo in colle posita militibus referta se se tenuit. Interim Bartholomæus Liuianus ex Vrsina Romanorum gente in Medicum partibus, homo paratissimus, Fauentiam & ipse cum equitatus parte præmissus milites centum quinquaginta, quos in Ferrariensium finibus Caterina scripserat, atque ad se uenire iusserat, in itinere aggressus omnes cepit, armisq; exiit. Petrus medio inter Maratam Fauentiamq; spatium, ne commeatus intercludi eis posset, Guido Vbaldo relicto, suis cum equitibus militibusq; mille iugū, quod Maratæ arci imminet, capit: tormentisq; in eo iugo positos muros deiicere aggreditur. iis uallo portæ diruto legatus, qui in arce erat, sibi ueritus, ac domum clam recurrens, eius capiendæ occasionem hostibus utique dedisset; si eius fuga cognosci potuisset. ille uero ad arcem defendendam, quæ maximo momento ipsorum rebus esset, ciuitatem incitans, maioris etiam præsidii ce-



leriter eodem submittendi causam præbuit. qua re effectum est; ut, tamen in ea oppugnatione complures dies exercitus reip. cōsumpsisset; arx tamen capi non potuerit: quoad Ioanne Francisco Seuerinate Gaspareq; eius fratre cum exercitu ab Ludouico Forum Liuii missis, ut unā cum Florentinorum coniuncti copis in Vbaldum impetum facerent; Petrus & Iulianus oppugnationem relinquere coacti sese Vbaldo adiunxerunt. Baliones tardius profecti Rauennæ constiterunt. itaque cū in magna consiliorum inopia patres uersarentur, Paulo modis omnibus Pisanas res urgente, nouo exercitu reip. nihil proficiēte; Franciscus Matuanus Senatui se obtulit; si ei pristinum locum gratiæ restituar, illi præsto celeriter futurum, ueteremq; suam fidem magno cum reip. usu tam dubiis temporibus præstaturum. re à patribus agitata Decemui priore iudicio in Franciscum rescisso, ac lege missionis antiquata, Senatui permiserunt; uti de eo, quod sibi è rep. uideretur esse, id statueret. eo cognito Decemuirum decreto Franciscus equites leuis armaturæ septuaginta, quos ad Caterinam miserat, statim reuocauit, & Rauennæ iussit esse reip. obtemperaturos: & Ioannem fratrem ad urbem misit actum patribus gratias; tum ut militiæ conditionem à Senatu acciperet. Senatus Francisco equites cataphractos ducentos quinquaginta, Ioanni centum attribuit: qui si numerus in tempore expleri ab illis non posset; binos equites sagittarios unius cataphracti loco uterque eorum conficeret: statuitq; ut ex reliquo equitatu reip. tot ad hos cum præfectis adiungerentur; ut essent omnes octingenti; quos Franciscus secum adduceret. itemq; ut milites ter mille magistratus Taurisani, Vicetini, Veronenses, Brixiani, Bergomates celeriter conscriberent; qui Francisco traderentur; ut Pisas uel inuitis iis, per quorum fines iter esset faciendum, peruenire posset: legatumq; ei Nicolaum Fuscarenum declarauit. Senatus cōsulto accepto Franciscus è uestigio ad urbem uenit: principisq; pedibus propè aduolutus tempus dixit sibi exoptatissimum uenisse; ut fidem studiumq; in illum suum, atque amorem erga rep. quem à puero susceptum constantissime semper coluisset, improborum eorundemq; inuidorū hominum maledictis offusum & interpellatum Senatui probaret. Patres ei libras auri centum in stipendii



stipendii partem numerari statim iusserunt : quibus decem dono data adiungerentur. his Pisas rebus celeriter perlatis ciuitas animos iam propè infractos confirmauit : spemq; cepit fore , ut hostes nō diutissimam ex recenti uictoria latitiam essent habituri : se seq; ad omnem oppugnationem sustinendā , dum auxilia instituta adducerentur , comparauit . neque tamen ea porro fama deterreri Ioannes Bentiuolus satis potuit ; ut per suos uellet fines exercitui reip. Senatu postulante iter dare : quod diceret , sibi apertissime Ludouicum denunciauissē ; si id faceret , exules se Bononiā reducturum , atque illum principatu oppidoq; eiecturū : tanta tamq; atrox in reip. æmulatio , tam auersa à bonis moribus cupiditas eius mentem atque animum occupauerat . sed fuit ea plaga leuior . uel enim ui contendere Ioannes noluisse : uel copiis multo maioribus exercituq; firmiore per Fauentinos in hostiles iri fines atque irrumpi potuisset . illa grauis ; quod statim Franciscum à suscepti cura muneris nouis pollicitationibus Ludouicus auertit . misso enim ab Senatu Mantuam legato cum ad profectionem suscipiendam admoneretur ; quod reliquæ copiae iam cōuenissent : nolē se dixit proficisci , propterea quod ab Ludouico meliores ei cōditiones proponerentur : quibus quidem conditionibus se addixisset ; quoniam patres , quo se nomine appellarent , nihil dum deliberauissent . itaque libras auri nonaginta ex centum , quas in urbe acceperat , Nicolao restituit : decem , quæ essent reliquæ , se dixit reip. militibus adnumerauisse . conditiones autem erant huiusmodi . Maximilianus bello in Italia gerendo suis illum copiis imperatorem declarauerat ; Ludouicus item suis : Florentini præfectum ipsorum loco . equitatus utriusque muneris magnus ei numerus ab singulis attributus . itaque numi etiā eo nomine missi : sed à Ludouico tantum . Maximilianus enim suam modo unius auctoritatem in commune proponebat : pecuniæ nihil conferebat . Florentini propter belli diuturnitatem , quas afferrent , nō habebant . additum etiam conditionibus : ut , si bellum in reip. finibus geratur ; quidquid agri , quidquid oppidorū in regum Mantuanorum ditione aliquando fuisset ; quod nunc Veneti possideant ; id omne Francisco restitueretur . quibus intellectis rebus legatus à Senatu iussus domum rediit . neque mul



to post Ioānes Francisci frater se ad urbem contulit: uelleq; reip.  
stipendium facere patribus confirmauit. patres cum mistum fe-  
cerunt. Verum enimuero cum antea de Francisco restituendo  
patres agerent; Senatus decreuit; uti is exercitus, qui Marata se  
receperat, Antonium Ordelaſum in Fori Liuii regnum induce-  
ret expulsa Caterina; quæ Florentinis auxilia in remp. miserat.  
id cum propter municipum in fœminam impudicam & crudelē  
odium, tum pro Antonii factione posse ad exitum perducī pa-  
tres existimauerunt. sed prouisis ad eam oppugnationem iis re-  
bus, quarum rerum exercitus indigeret, noua occasio patribus  
oblata Senatū à sententia remouit. Est in Appennino Metaurē-  
sium proximum finibus castellum Sollianum: cuius castelli ager  
ad Florentinorum fines pertingit. id castellum Rambertus Mala-  
testa obtinebat. is igitur Rambertus ad Petrum Medicem ueni-  
ens ei ostendit posse Venetos per fines suos in hostium, qui sibi  
finitimi essent, agrum atque uicos penetrare nullo prohibente.  
facillimum esse docet; propterea quòd nemo id cogitet, nemo  
uereatur; hostes eo ab latere imparatos adoriri, magnumq; iis ter-  
rorem incutere, magnam perniciem inferre; antequam occurri  
ab eis possit. cupere se se in reip. fidem recipi. non sine reip. usu  
futurum demonstrat, si recipiatur. Medices explorato ab eo iti-  
nere, reliquisq; rebus cognitis ad urbem celeriter uenit; patri-  
busq; rem denunciat. patres Rambertum in reip. fidem recipiūt  
stipe annua quinque auri libris ei constituta. reuerso in castra Me-  
dice, reliquisq; rebus à legato ducibusq; constitutis, Liuius;  
cui quidem & item Carolo Ursino Virginii filio Senatus præfe-  
cturam equitum tradiderat; ad eam rem tentandam deligitur. is  
itaque Liuius castris, quæ in Foroliuiensi erant, magno silen-  
tio profectus cum equitibus leuis armaturæ ducentis quinquā-  
ginta, militibus octingentis per Cesenæ agrum & Solliani fines  
noctu itinere confecto ante lucem ad fanū Camaldulense, quod  
est in ualle angusta magnis montibus circumdata, dum sacerdo-  
tes nocturnas preces facerent, peruenit: uocatisq; qui portas a-  
perirent esse se reip. Florētinae milites, qui ad imperatorem mit-  
terentur, patefactis portis fano capto, & quoniam arcis uicē tur-  
ri præalta parietibusq; solidis præbebat, præsidio in eo collocato  
ac



56

ac reſectis cibo potuq; militibus Bibienam oppidum eadē uſus  
celeritate contendit: præmiſſisq; paucis equitibus Leonis nomen  
antiqua eorum appellatione conclamantibus (ea eſt enim ſigni-  
ficatio Florentinæ ciuitatis; quæ uoce accipitur, & redditur) ma-  
giſtratum itemq; arcis præfectum ad ſpeciem imperatoris iuſſu  
ad ſe uocatos retinuit; oppidumq; cepit. ſtatimq; ad Marcellum,  
qui rem ei nunciarent, atque ut occiſſime cum reliquo exercitu  
ſubſequi contenderet, hortarentur, miſit. Legatus Carolum Vr-  
ſinum & Baliones, qui ad eum aliquando tandem uenerant, au-  
xilio ad Liuium iuſſit præcurrere. ille interim aliud ad caſtel-  
lum proſectus eo capto Popium uenit celebre municipium, &  
ſibi iam exemplo Bibienenſium cauens. quod quidem ad muni-  
cipium inſidiis cognitis Florentini milites ducentos cum legato  
& ſtipendio miſerant. ſed eos Liuius ex itinere congreſſus fu-  
dit interfectis captisq; compluribus: parumq; abſuit, quin lega-  
tus caperetur, ſtipendiumq; interciperetur. Popio deinde per im-  
peratorem Paulum militibus ſexcentis intromiſſis confirmato,  
Carolus Balionesq; adueniunt. Guidus Vbaldus reſenſo exerci-  
tu; in quo erat Hannibal Bentiuolus à Senatu in reip. militiam  
ſeparatim antea ſublectus; itineri ſe dedit. Liuius auxilio ſub-  
miſſo caſtella hoſtium quatuor; quorum in uno erant milites du-  
centi; Popio circumfuſa ui cepit. uenerat autem Popium cum  
militibus ducentis etiam Populoniam obtinens. Guidus Vbal-  
dus eo in itinere tardior, quàm cogitauerat, fuit; propterea quòd  
milites ad duo millia ſingillatim fugientes eum reliquerāt, Han-  
nibale furtim, ut id facerent, per ſuos cohortante ſub nō dati in  
tempore ſtipendii querela. eius enim fugæ initium ab iis, qui cū  
illo uenerant, factum legatus poſtea quærendo reperit: tum illos  
ipſos, qui auſugerant, propè omnes ex Bononiensibus fuiſſe co-  
gnouit. quin etiam Hannibalis equites clam ſe quotidie caſtris  
atque turmis ſubtrahebant. iamq; Gaſpar Seuerinas cum equiti-  
bus à Ludouico miſſus ad ea loca peruenerat; Ranutiusq; unā cū  
illo Martianus: cui, uti Venetis occurreret, Florentini mandaue-  
rant. etiam libræ auri centum Florentiam a Ludouico miſſæ ma-  
gno eis uſui ad celeritatem, cuius res magnopere indigebat, ad-  
hibendam fuerunt. Liuius aliud caſtellum cepit, uulnere in fa-



cie accepto, ac diripuit. atque illis ipsis diebus (hyems autem iam aduenerat) milites ter mille; qui Francisco attribui debuerant; Rauēnam sunt, ut ad Marcellum contenderent, missi. dum hæc sic administrantur; Paulus ad Pisas castris positus uerberare muros tormentis cœpit. id cum parum propter murorum firmitudinem processisset: crates in latitudinem quoquo uersus pedum denum in altitudinem fenum inter se coniunctas noctu muris ad mouit: terraq; iniecta milites uti murum suffoderent tecti cratibus imperauit. Pisani autem, cum in muro consistendi propter tela multitudinemq; hostium potestas esset nulli; fossam intra muros latam atque altam duxerunt, castellisq; munierunt. Paulus turrim oppidi muro cōiunctam deiicit. ea deiecta per ruinas militibus introire iussis, ubi fossam esse obiectā, & Pisanos in aggre circumiectos hostes operiri, ut in fossa telis atque ignibus eos conficerent; & magnū irrūpentibus instare periculum cognouit: receptui cani iussit. paucisq; post diebus in hostium captis ab se castellis præsidio relicto castra mouit; ut in Clusentinos saltus cōtra Medices Liuianumq; contenderet. Pisanis obsidione liberatis Græci equites portis emissi castellum Calcem deiecto Pauli præsidio expugnatum diripuerunt. classis præfectus, qui Pauli obsidionem unā cum reliquis sustinuerat; cum classiariis egressus eosdem Græcos equites secum ducens castellum ad Pontem stagni ei appositum itineri, quod Triturrita Pisas ducit, magna ipsum opportunitate tormentis concussū ad deditionē compulit; agrumq; Pisanum eo ab latere satis patentem ad sementes faciendas ciuitati colonisq; restituit. neque multo post iidem Græci equites; quod intellexerant in Populoniæ fines Clusentinos homines, ut primum exercitus reip. ad ea loca uenerit, sua, quæ potuerant, armenta compulisse: eō celeriter profecti ingentem inde prædam abduxerunt. deinde Volaterranum percurrentes agrum, præda onusti Pisas redierunt. paucis autem post diebus Tarsias unā cum Valerio quaestore & præfectis militum equitumq; Pisis egressus itinere in fines hostium medio fere inter Pisas Florentiamq; spatio ad castellum Montopolim noctu confecto oppugnare portas cœpit. eæ cum ab oppidanis, qui clamoribus interea exciti undique conuenerant, portæ defenderentur:



59

rentur: Tarsias ad aliam castelli partem; quæ, quòd ab eo latere nihil timebatur, propugnatoribus uacua tum quidem erat; milites tacite atque celeriter misit. horum audacissimi atque leuissimi murum per hastas subleuati conscenderunt; aliosq; ut conscenderent adiuuerunt. intromissi portas aperuerunt. ita oppidum captum ac direptum est, nuptiarum apparatu, quas erant illo die oppidani celebraturi, prædæ militum atque direptui addito. Vbaldus cum ad fanum Camaldulense peruenisset: quod quidem fanum eiectò Liuiani præsidio eius regionis homines recuperauerant: prælio aggressus portas irrumperere non potuit. itaque discedens, Popiumq; uersus ducens, Græcos equites, ut præcurrerent, dimisit. ii milites hostium centum; qui molas frumentarias Popianorum muris propugnaculisq; communitas tormentis circum dispositis custodiebant; aquila traiecta in fugam uerterunt: quorum maior pars tum cæsa, tum capta; tormentaq; incensis ædificiis abducta. id Populonium obtinens cum intellexisset; ne intercluderetur, Popio relicto discessit. Vbaldus Bibienam profectus tormenta, quibus Popianorum muros deijceret, à senatu missa expectare constituerat. sed ea propter nives, quorum magna uis itinera impeditissima reddiderat, adduci non potuerunt exceptis leuioribus minoribusq; aliquot: quæ tamen ipsa uix ægrèq; sunt perducta. quibuscum nihilo fecius Liuianus castellum Orniam obsidens; cui castello milites erant ducenti præsidio; breui spatio cepit. eo digressus ad castellum Qualianum castra posuit. oppidani casu Ornienfium permoti se celeriter dederunt. itaque duobus captis castellis, cum pluuiæ continentes omnia itinera illuue fœdauissent; Bibienam rediit. Tædet me eius belli leuiora consèctari. quis enim legat sine fastidio singula; præsertim si ad rerum exitus, ut plerunque fit, tantummodo properet: sed mihi facile ueniam omnes homines daturos puto; cum scierint illud me assequi hoc scribendi labore uel cum primis cupere; ne cui uidear publice gesta meorum ciuium, quæ nihil habeant dignitatis, silentio dissimulauisse. Hostibus post hæc propter Pauli aduentum ad sese: iam enim is in Clusentinos fines uenerat) magnopere confirmatis, in Veneto exercitu de ducendo bello ducibus diuersa sentientibus, senatus



anni exitu decreuit, uti Vbaldus cum parte copiarum legatoq; Bibienæ in hybernis se cōtineret, reliquam Liuianus partē ad Auer-  
niā hybernorum causa deduceret. is abest uicus à Bibiena septē  
millia passuum, monti uastæ crepidinis impositus, Francisci in-  
deorum numerū recepti mora atq; domicilio celebr. tum ut mi-  
litum duo millia in Vbaldi finibus conscriberentur, ad eosq; mit-  
terentur præsidii hybernorum causa, eodem Senatusconsulto cō-  
stitutum. Liuiano etiam, propterea quod equites illius octogin-  
ta Crniæ præsidio relictī ab hostibus furtim introductis capti  
fuerant; pecunia est amissis sarciniis à Senatu dono tradita. an-  
te autem, quā hæc ita fierent; Ramberti suasu; qui diceret; si  
sibi exercitus tribuatur, in Vallem stagni sibi finitimam, quæ in  
Florentinis esset finibus, se irrupturum; qua capta priorem ad  
exercitum & commeatus supportari, & copiæ submitti facile pos-  
sent; Brixia equites tum præfectis septem euocatos, Ioannē Pau-  
lum Gradonicum cum Græcis, quibus præerat, equitibus, &  
militum non magno numero Rauenna profectum Senatus eō  
mittendos censuit. ii Ramberto duce usi, uallemq; ingressi, castel-  
lis hostium quatuor captis, aliud castellum, quod erat commu-  
nitius, tormentis leuioribus adorti, Cyriacum præfectum uirum  
fortem cum militibus sexcentis egressum prælio cōmisso in fugā  
coniecerunt: Turcam centurionem cum plerisque occiderūt, ca-  
stellumq; ceperunt. neque tamen is exercitus propter niues impe-  
ditaq; itinera ulli præterea usui reip. fuit. Gradonicus etiam ad-  
uersa ualitudine implicitus Rauennam, deinde ad urbem rediit.  
Anno autem insequente uix inito ex Caroli Vrsini turma com-  
plures, qui nondum in hyberna conuenerant, sunt cum castello,  
in quo erant, capti. captus etiam à Gaspare Seuerinate legati scri-  
ba Marcelli ex Vbaldi finibus cum stipendio & commeatu & mi-  
litibus quatercentis, Græcis equitibus ducentis Bibienam se se  
conferens; in quos quidem Seuerinas difficillimis in iugis de su-  
periore loco impetum fecerat. pauloq; post cum equites circi-  
ter quingenti à Guido Vbaldo in eius fines propter commeatus  
inopiam missi per angusta loca iter facerent; ab hostibus interce-  
pti sunt; magnumq; iis detrimentum est illatum: quorum ple-  
rique fuga capta itinerum ignoratione in manus hostium mon-  
tanorum



tanorum hominum peruenerunt. His acceptis incommodis Senatus Nicolaum Vrsinum paulo ante ab se stipendio auctum cum equitibus grauioris leuiorisq; armaturæ octingentis, militibus quot contrahi & conscribi possent, commeatu, quem oporteat, Bibienam submitendum Vbaldi auxilio censuit. eius quoque uxor per se se & milites, & commeatus, quod ad uirum mitteret, comparauit. sed is ualitudine tentatus ab hostium ducibus cum peteret, uti medico ad se uenienti iter darent; nihil impetrauit. sibi autem paulo post morbo ingrauescente domum redire cupienti, uti darent, impetrauit. itaque cum paucis suum in regnū discessit. ad hæc intentis patribus cum nuntiis esset crebrioribus allatum, à Turcarum rege classē non spernendam comparari: Andream Zancanum Senatus legatum ad illum misit. Causa mittēdi fuit; quod timebat Bajasetem in remp. cum aliis de causis incensum, tum propterea, quod Nicolaus Pisaurus classis legatus nauem onerariam unius ex regis ducibus, quos illi Bassas appellant, æstatis exitu in Aegæo depressoerat; bellum facere Venetis instituisse. ea res autem sic acciderat. Dum Nicolaus apud Mitylenem cum triremibus quatuor iter faceret; & naui onerariæ bellicæ militibus, tormētis, reliquisq; rebus omnibus ad pugnandum idoneis instructissimæ amphorarum plus trecetarum, quam uento ferri uiderat, appropinquauisset: uela uti demitterent, uectores admonuit. illi autem non uela modo non demiserunt: sed pilis ferreis tormentis emissis Nicolai præfectum inter fecerunt; ac nonnullos ex remigibus sagittis celeriter coniectis uulnerauerunt. quod ubi fieri Nicolaus uidit: arma suis uti caperent imperauit: atque in nauem Thraciam impetu facto eam expugnauit; cumq; omnibus, qui pugnae superfuerant, depressit. erant ea in naui homines circiter ducenti quinquaginta. Zancanius Byzantium profectus magnum quidem classis apparatus institutum cognouit: à rege tamen nullo ostenso in remp. offensi animi indicio liberaliter est acceptus. qui cum reip. bellum facere decreuisset, existimans, propterea quod ei Ludouicus receperat eodem se tempore bellum in Gallia reip. illaturū, hostibus eo ab latere occupatis omnia sibi prospere atque feliciter cessura: ut magis Venetos eluderet, fœdus quidem cum Zan-



canio renouauit : sed fœderis capita latinis scripta literis ei dedit, est autem in eorum legibus ; ut, quæ suæ linguæ uerbis scripta nō sunt, ea præstari non sit necesse . erat tum Byzantii ciuis Venetus Andreas Gritus ; qui mercaturam ea in urbe annos complures exercuerat ; uir faciei elegantia, corporisq; pulchritudine, quæ inter Venetos suæ tempestatis omnes facile præstitit, & morum grauitate ac liberalitate insignis, eiq; nationi apprime atque magnopere charus . is ; quod omnia Turcarum instituta callebat ; ea de re Zancanum admonuit : atque, uti fœdus uerbis Thraciis conscriptum haberet, pro sua in patriam charitate illum est hortatus . Zācanius re tentata cum nihil efficere potuisset ; cum fœdere latinis scripto literis ad urbem rediit : ne ue nihil uideretur attulisse ; id, quod ab Gritto ea de re Byzantii accepisset, Senatui reticuit . ea fœderis tam propensa renouatio magis etiam suspensos patres fecerat, existimantes ea de causa regem sua consilia suppressisse ; ut eos imparatos atq; inermes adoriretur : præsertim quod missæ ad illum à Ludouico atque à Florentinis communi cōsensu paulo ante legationes multa de Senatu questæ, nihil eorum, quæ regis animum in remp. inflammare possent, prætermiserunt, quamobrem ut muniti ad omnes casus essent ; Senatus decreuit, uti naues onerariæ bellicæ tres confestim ornarentur ; eisq; præfectus legeretur ; lectusq; est Aloisius Marcellus : uti nauis item oneraria magna ; quam Sebastianus Marcellus ædificari sibi curauerat ; quæq; Naupliæ tunc erat ; armaretur, classiq; adiungeretur : literæq; ad illum publice datæ, ut Corcyram nauem adduceret : uti naues triremes triginta deducerentur : quarum nauium decem ipsa in urbe, totidem Cretæ, sex in Apulia, quatuor in Illyrico magistratus Veneti remigibus atque militibus instruerent . pauloq; post decem aliæ triginta prioribus sunt additæ . at Aloisio rege Galliæ salutato ; uti supra dictum est ; legati sunt ad eum ire iussi tres gratulatum reip. nomine, Antonius Lauredanus, Nicolaus Michaelis, Hieronymus Georgius . missæ deinde ab Senatu regi dono Aquilæ in Creta insula captæ sexaginta ex earum genere, quibus in aucupio reges uti consueuerunt : pellesq; pretiosiores canis ab summo inter nigrum colore conspersæ ducentæ . quæ ille munera uultu lætissimo accepit : egiq;



egitq; de iis Senatui gratias apud legatos, cum iam ii ad illū peruenissent. sed ea dum ad regem legatio proficiscitur; Triultius; qui se Astæ cū equitatu continuerat; Bretolam oppidum; quod quidem illis in finibus fratres duo in Ludouici fidem recepti obtinebant; capit. Ludouicus per legatum ea de re certiores patres facit: eorumq; consilium exquirat. patres molesta sibi esse, quæ intellexissent, legato responderunt: belli. n. initium se se factum uidere: ita se tamen Ludouici prudentia confidere; ut omnibus illum incommodis remedia celeriter adhibiturum esse non dubitent: præsertim cum is tantum auri possideat; quantum paulo ante ipsemet eius legatus exploratu sibi esse palam dixerit. Legatis in Galliam profectis rex proposuit, constitutum sibi esse, Mediolani regnum, quod sibi hæreditatis iure deberetur, ab Ludouico armis repetere: cupere se remp. eius belli sociam habere. illi se ad Senatum ea de re literas daturos dixerunt; eiq; quod Senatus iussisset, renuntiuros. illis autem in literis legati adscripserunt, nihil prætermittere Ludouicum per amicos regiones orando, pollicendo; ut se in Regis amicitiam insinuet. patres, re complures dies agitata, tamen si uideret periculosum esse, maximum amplissimumq; regem sibi finitimum in Italiam adducere: tamen, propterea quod existimabant neminem eo in regno perniciosiorem ciuitati esse posse, quam is erat, quem permultos annos habuissent; uerebanturq; si regis amicitiam repudiarent, ne se is cū Ludouico in reip. fraudem coniungeret: quam certe societatem Ludouicus nullis non conditionibus esset accepturus, ut bellum ab se attereret: ei rei animum adhibuerunt. accedebat ad superiores causas etiam hæc, quod non nihil recentes ac perpetuæ in remp. Ludouici contumeliæ oblata prope à Diis immortalibus facultate ciuium animos ad uindictam expetendam incitabant. nonnullos etiam augendi fines imperii cupiditas, iusto præsertim nomine, iustisq; de causis, incēdebat: ut sunt plerunque homines natura proclinati ad ea propaganda, quæ possident. itaque literas ad legatos dant: regi respondeant; se cum eo consensuros, bellumq; unā suscepturos, atque gesturos: modo is ipsorum ditionem tutam ab se atque tectam uelit esse. ab legatis quærenti regi, quānam id ratione uellent fieri; quod uē. septum suis fini-

Q



bus aut propugnaculum exposcerent : responderunt : si Cremo-  
nam oppidum reip. concesserit cum eo agro finibusq; omnibus,  
qui citra flumen Abduam sint ; tutos se fore existimatu-  
ros . tum rex concessurum quidem se reip. eam , quam peterent , ex Ludo-  
uici regno partem recepit ; quam quidem sciret esse totius regni  
optimam atque opulentissimam ; Lecco tantummodo excepto ;  
de quo nulli cedere statuerat : ( id est municipium in læua Abduæ  
è lacu Lario exeuntis ripa ) petere autem & ipsum pro iis rebus ab  
rep. equites in id bellum septies mille , milites sex mille , auri li-  
bras mille . ea sibi datum iri si polliceantur ; fœdus se cum illis  
initurū . His intellectis regis postulatis Senatus legatis rescripsit,  
se se milites equitesq; , quot rex peteret , in commune adductu-  
ros : de pecunia nihil polliceri ; cum propterea quòd tribus ge-  
rendis nullo interiecto temporis spatio bellis , Gallico , Neapoli-  
tano , Pisano , grandem pecuniam insumpsissent : tum etiā quia  
in id , quod ab Turcarum rege in præsentia bellum reip. immi-  
neat ; cuius rei fama certioribus in dies nuntiis iam percrebue-  
rat ; ad classem comparādā sātis superq; ciuitas muneris atque  
oneris esset habitura . ea rex cum intellexisset , in alium diem re  
dilata , ubi ea dies uenit ; pecuniam nisi dent , nihil se de fœdere  
acturum legatis renunciauit . id ea causa fiebat ; quòd erant non-  
nulli magna apud illum Galli homines auctoritate ; qui Ludoui-  
ci rebus fauebant . ii cum palām regi obsistere , ne bellum susci-  
peret , non auderent ; existimarent autem Venetos ad conditio-  
nem dandæ regi pecuniæ non descensuros : in eo illum ut perse-  
ueraret , hortabantur . nonnulli etiam fingi à Venetis , quæ de  
rege Thracio nunciarent , dictitabant . accidit autem , ut , dū hæc  
agitarentur ; literæ ab Rhodiorum magistratu ad regem uene-  
rint : quibus rex literis certior fiebat , Baiasetem classē ingen-  
tem comparare ; atque in ea cura dies atq; noctes uersari , ut quā  
posset maximam atque ornatissimam educeret . ea intellecta re ,  
Venetos nihil fingere ubi rex uidit ; quinto Idus Februarias nul-  
la pecuniæ mentione habita iis , quibus dictum est , legibus fœ-  
dus in omne tempus cum legatis percussit ; ea etiam conditione  
fœderi addita ; ut , si , quo rex tempore in Italiam transmitteret ,  
bello Thracio resp. impediretur , ad auxilia ei danda non tene-  
retur .



retur. iſto fœdere : quæ quidem res longe alium , ac ſibi Ludoui-  
 cus perſuaſerat , excitum habuit : ( is enim , cum quis ei ſuorum  
 conſenſuros cum rege Galliæ Venetos contra illum diceret ; bo-  
 no es animo , inquiebat : nunquam id Senatus decernet : nunquã  
 Veneti maiorem ſe finitimum ſibi regem ſtatuent eſſe : itaque in  
 remp. quos uolo , meo iure ludos facio , eius rei non dubius ;  
 quin me malit , ita ut ſum , quàm regem Galliæ mei regni domi-  
 num ) ſed fœdere cõcelebrato Ludouicus ſæpe ſe ipſe accuſans ,  
 qui nunquam id in animum potuerit inducere ; Ioannem Fran-  
 ciſcum Seuerinatem ; quem quidem ad Piſanum bellum bona-  
 cum manu Florentinorum auxilio mittere ſtatuerat ; retinuit : ut  
 Aſtam uerſus ; ubi iam Triultium copias cogere nuntiabatur ;  
 eum mitteret . interea cum in fines Guidi Vbaldi Nicolaus cum  
 eo , de quo diximus , exercitu perueniſſet ; neque propter niues  
 difficiliaq̃ itinera , & hoſtium copias per anguſtos montium adi-  
 tus & caſtella diſtributas Bibienam ſe conferre ſatis poſſe tuto  
 conſideret ; ciuitas uero deſeſa ſtipendiis in id bellum erogan-  
 dis ſurdior ad tributi uocem fieret , præſertim bello Gallico alia  
 ſtipendia alias impenſas iam depoſcente : Senatus Herculi ; qui  
 ſe reip. pridem obtulerat , ſi uellet , ſe cum Florentinis curaturũ  
 uti bellum pro eius dignitate componeretur ; aures tandem præ-  
 buit ; permiſitq̃ ut ea de re agere inciperet . ille primo per Bernar-  
 dum Bembum patrem meum , qui Ferrariæ prodominum gere-  
 bat ; deinde per ſuos , quos in urbe interpretes habebat ad fallen-  
 dum idoneos ; ſat bonis conditionibus propoſitis effecit , ut Sena-  
 tus , exiſtimans illum de conditionibus fidem ſeruaturum ; cum  
 de iis iſtis patres omnibus in ſermonibus & collocutionibus  
 antea egiſſent , atque inter ipſos Herculemq̃ conueniſſet ; po-  
 teſtatem ei faceret de Piſano bello , quemadmodum ſibi uideretur  
 , ita ſtatuenti . poteſtate ab utriſque tradita Hercules cum le-  
 gatione , quàm ad illum Florentini miſerant , cumq̃ Ludouici le-  
 gato ad urbem uenit . in urbe cum eſſet ; tres ei ciues Principis  
 collegium attribuit , qui ei præſto eſſent , ſi quid petere aut cogno-  
 ſcere uellet ; atque ad Principem & patres renuntiarent . ſcripto  
 autem , neque dum prolato iudicio , cum ſe id Hercules patribus  
 oſtenſurum eſſe diceret ; ut , ſi quid aboleri aut commutari uellẽt ,

Q ij



liceret: Georgius Cornelius unus ex principis collegio patres est hortatus, aſterri ad ſe libellos iuberent, atque inſpicerent; ne ignaris ipſis, quid Hercules iudicaturus eſſet, ſententia proferretur. ſed is reprehendus à patribus; qui dicerent, non eſſe æquum data Herculi per Senatum poteſtate ſuo arbitrio iudicandi, nunc ei leges uelle imponere; ſi quæ ſcripſerit, ſint improbatuſi; ſi nō ſint, fruſtra inſpici, quæ non improbentur; conticuit. Hercules octauo Iduum Aprilium ſententiam tulit; ut remiſſis atque abolitis, quæcunque in Florentinos quoquo modo Piſani detrimenta eo bello intuliſſent, Piſæ reſtituerentur: ut reip. auri libras mille octingentas Florentini darent annis duodecim expenſi nomine: multis capitibus ad ſpeciem Piſanæ rei meliorem in ſtatum atque formam redigendæ, quàm antea fuiſſet, ſummæ iudicii additis; re autem, quibus ad priſtinam ſeruitutis conditionem temporis momento Piſæ reciderent. Biduo poſt Hercules ſalutatis patribus; quorum nemo fuit, qui eum non inuitus & non mœſto uultu uiderit; uel etiam qui non de eo magnopere ſit queſtus; quòd fidem, quam reip. dederat, tantis præſertim de rebus, non præſtituiſſet; mediam per urbem uerbis contumacibus & ſibilis à populo exploſus domum rediit. Senatus Ferdinādum Herculis filium, & Bentiuolos patrem & filium, & Baliones, & Marcum Martinengium, quo exercitus præfecto Piſis uſus fuerat; qui ſe omnes neque ſtrenue, nec amanter eo bello geſſerant; miſſos fecit. Guidum Vbaldum autem; qui ualitudine curata ſe ad patres ſalutandos inuiſendosq; contulerat; præfectura equitum & ſtipendio confirmato in reip. fidem recepit. Aloifiſius Galliæ rex Ludouico bellum illaturus ex eorū numero, quos conſulere ſingulis de rebus conſueuerat, legatos Venetos facit. ipſe legationē ad Senatum mittit. ad bellum equites eius generis mille octingentos, quorum ſinguli more Gallico equites ſex ſecum ducerēt; militum numerum decem millium habere inſtituit. Triulſiū ſuis exercitibus in Italiā præſcit. Veneti ubi fœdus cum rege ictum ab legatis intellexerunt: ſacris in æde Marcia ſolenni ritu factis foro apparatiſſimo uerba fœderis in uulguſ pronuntiare pro ſuggeſtu uoluerunt. ea dum pronuntiantur; uentus cohortis uexillū reip. tēpli turriculis implicuit uexilli parte abſciſſa. quod



quod quidem postea ex euentu rerum portenti loco ciuitas habuit. neque multo post alios regi legatos Marcum Georgium, Benedictum Triuisanum Senatus creauit; prioribusq; legatis, cum hi ad regem peruenissent, domum est reditionis facultas data. Rex ætate media suis in Italiam copiis præmissis Lugdunum uenit. Senatus exercitu & ipse cōparato Melchionem Triuisanum, Marcum Antonium Maurocenum legatos exercitui subiegit. alteroq; ex duobus legatis, quos ad urbem rex miserat, unā cum illis ad exercitum reip. profecturo, ut rebus omnibus interesset, equus pro eius dignitate, ac tentorium, & ferrea corporis tegumenta cum auri libris duabus à Senatu dono data. Inter hæc Federicus rex Neapolis per suum legatum patribus significauit, uelle se equites quingentos Ludouici auxilio Mediolanum mittere. patres, neque eum illa copia Ludouico profuturum; cui longe firmioribus præfidiis ad salutem opus esset; & se ea re inferri sibi magnam ab eo iniuriam existimatuos; regi rescribere legatum iusserunt. nullos plane homines maiora in Ludouicum beneficia contulisse, quā se se: pro quibus ille rebus gratiam unā tantum semper re, maleficiis contumeliisq; alia super aliam inferendis, reip. retulisset. uenisse nunc tempus, ut Deos iratos habeat, quos fefellit: rectius itaque eum facturum, si quieuerit. pauloq; post Ludouicus ipse; si quo pacto Venetos placare posset; legatum ad Senatum misit. sed is cum Ferrariam appulisset; Hercules suum hominem ad patres cum Ludouici literis præmisit; petiitq; ut Ludouici legato ad eos ueniendi potestatem facerent. in Ludouici literis erat scriptum; se magnis utilibusq; de rebus suo & Ascanii fratris sui nomine legatum ad eos mittere: petere à patribus, ut reciperetur, mandataq; cognoscerent. patres lectis literis Herculis internuntio iusserunt, uti statim urbe discederet: literasq; Ludouici legato regio legendas dederunt. Triultius; ad quem quidē regis duces duo cum equitum duobus millibus accesserant; in Ludouici regnum ingressus municipia complura partim ui cepit, partim ad deditionem compulit. deinde Nonium profectus; quod quidem municipium Ludouicus septingentis militibus intromissis communierat; tormentis ad murum positis, atque uno tempore omnium



ferreis emissis pilis oppidanos ita terruit , ut confestim se dederent . milites in arcem recepti cum se ad propugnationem comparauissent : tantus Gallorum militum impetus , & tormentorum reliquarumq; rerum apparatus tam subitus tamq; ardens fuit ; ut quinque horarum spatio arcem expugnauerint ; militesq; Ludouici omnes ad unum interfecerint . quo successu ad celeritatem usus Triultius paucis diebus castella numero ad uiginti , Torto-  
namq; oppidum cepit . Iis rebus cognitis Antonius Maria Seuerinas Galeatii frater , qui una cum illo Alexandriae præerat ; Ticinum rediit : neq; ab oppidanis est receptus . Veneti , ubi à Triultio belli factum initium cognouerunt ; exercitu equitum amplius septem millium , militum supra sex milliū coacto , Ollioq; flumine cum parte copiarum Liuiano duce trāsmissō , plura uno die municipia per deditionem capiūt . reliquaq; ad priorem exercitus partem adiuncta parte , paruo temporis spatio uicis castellisq; , quæ cis Abduam flumen sunt , compluribus in deditionem acceptis , Carauagium , quod est eius regionis caput , exercitum adducunt . legati ad oppidanos miserunt : si se oppugnari sine-  
rent , se se oppidum militibus tradituros . ea nocte nullum est responsum datum . itaque stationibus militum ad oppidi fossas dispositis legati , ut muros mane quaterent , se comparabant . oppidani autem prima luce ad legatos uenerunt , seq; eis dediderunt arce excepta ; quæ ab ipsis non tenebatur : eamq; fuisse causam dixerunt , cur non se legatis euestigio permisissent ; quod arcem quoque tradere uoluissent . legatis introductis , missisq; ad præfectum arcis internuntiis , postridie eius diei arx deditur , legato Ludouici , qui in ea erat , militibusq; omnibus abeundi potestate impetrata oppidanis postulantibus . hoc idem Sonzinales fecerunt . sed arcis præfectus missō ad legatos internuntio uelle se ar-  
cem tradere sponte pollicitus ; quæ quidem esset tormentis rebusq; omnibus munitissima ; ab eis petiit , ut sibi ciuitatem & ius comitiorum darēt . illi eius rei facultatem se habere nullam cum respondissent , literasq; ad Senatum datuos recepissent : præfectus se in eo reip. fidei uelle permittere , ne qua propterea mora legatis fieret , liberaliter pronuntians , arcem tradidit . Iisdem diebus parte altera Triultio Alexandriam tormentis oppugnante  
Galeatius



Galeatius Ludouici gener, qui oppidum defendebat; cum paucis clam noctu egressus Mediolanum abiit, qua intellecta re complures eius equites militesq; oppido aufugerunt. itaque mane Galli ab oppidanis introducti oppidum capiunt. Placentini missis ad Triultium legatis, itemq; Ticinenses se se ei dederunt. Mediolani autem militibus Ludouici stipendium postulantibus; cum eos Ludouicus ad quaestorem suum reiecisset; ille uero moram interponere ei rei uellet; milites multis illatis uulneribus quaestorem propè interfecerunt. ciuitatis principes ueriti ne diriperentur; simul, quod nouis rebus studebant; agrestes homines in oppidum adduxerunt; se seq; munierunt. quibus rebus cognitis Ludouicus incitata plebis studia omniumq; plane hominum in se inuidiam pertimescens, liberos & concubinam (nam uxor mortem obierat) & Ascanium Cardinalem fratrem, Federicumq; Seuerinatem item Cardinalem Galeatii fratrem oppido eductos Comum misit. oppidani ubi Ludouicum suis rebus diffidere ipsum intellexerunt; concilio ciuitatis coacto quatuor ex principibus legerunt, qui rebus omnibus præsenserent. ii ad Ludouicum profecti uelle se oppidum regi tradere dixerunt: eius autem rei causam ipsum dedisse, qui liberos & familiam emiserit. Ludouicus intellecta ciuitatis uoluntate, stipendio equitibus leuis armaturæ quingentis dato, postridie eius diei unâ cum Galeatio genero equitibusq; paulo plus ducentis discessit: cum reliqui stipe accepta eius imperio se subtraxissent: arcemq; artificio atque immani mole murorum omnibusq; idoneis ad obsidionem sustinendam rebus, tum militum duobus millibus apprime communitam, Bernardino Curtio uni ex suis maxime intimis; cui supra cæteros confidebat; quemq; ipse à paruulo aluerat; commendauit; cum eam tradere Ascanio fratri custodiendam, qui se illi obtulerat, nolisset. Triultius quadriduo post à Mediolanensibus magna hominum gratulatione in oppidum receptus est: reliquaq; oppida, quæ supererant, ei se confestim dederunt. Venetis Cremonæ appropinquantibus ciuitas legatos obuiam misit, qui tempus ad deditionem peterent. quo tempore missis ad Triultium interpretibus ubi se principes ciuitatis in ea regni parte, quæ ad remp. ex fœdere spectabat, esse intellexerunt: omni



cum Senatu & sacerdotibus atque pontifice ad portas progressi legatos unâ cum ducibus accersitos sub tentoriolo sacro in oppidum introduxerunt: postulantesq; ut tributis à Ludouico uel impositis nouis, uel adauctis acerbissime ueteribus ciuitatem leuarent; impetrauerunt. erat in oppido arx perquam munita, difficilisq; captu, si qua alia. eam Petrus Antonius Battalio à Ludouico acceptam custodiebat. legati postridie eius diei, qui arcem reip. nomine ab illo peterent, miserunt. à præfecto interpretibus ultro citroq; missis; cum ei libras auri ducentas quinquaginta legati partim dedissent, partim se daturos recepissent; ciuitatem & ius comitorum ipsi patriq; eius posterisq; eorum unâ cum domo urbana, & fundo, & uilla in agro Veronensi Senatus permissu donauissent: arce sunt potiti. eodemq; ferè die Triulcius auri libris item ducenties quinquagies Curtio numeratis, concessaq; Ludouici & Galleatii suppellectili sane regia, quæ in ea erat, Mediolani arcem, de qua diximus, tenuit. ita is, cui fides ab se se data rata atque sancta nûquam fuisse; neminem habuit suorum, qui ei fidem, quam dederat, cum id facere nullo negotio posset, tam duro eius tempore pauculos modo dies præstaret. Cremona in reip. potestatem redacta, magistratus, qui ius dicerent, Dominicus Triuisianus, Nicolaus Fuscarenus eò missi: oratoresq; adlecti duo ad priores alios, qui adhuc in urbe præstolabantur, Nicolaus Michaelis, Benedictus Iustinianus: Mediolanumq; unâ omnes ire iussi ibi regem excepturi, eiq; reip. nomine nouo de regno gratulaturi. quos quidem postea rex, Mediolanum cum tenuisset; nam tum quidem esse in alpibus dicebatur; perhonorificetractauit, apud seq; habuit. eorum tres; quorum in numero erat Antonius Lauredanus, qui ex Gallia cum rege uenerat; suo functi munere domum redierunt. petierat ab legatis reip. qui in Gallia transalpina fœdus cum rege percusserant; Ludouicus Luxemburgius regis propinquus; ut, cum ad urbem rediissent, sibi à patribus ciuitatem & ius comitorum impetrarent. itaque eius postulatis intellectis ciuitas utrunque munus Ludouico est elargita. eadem liberalitas in Hannibalem Angusciolum, qui arcem Sonzinationum reip. legatis tradiderat; & Marsilium eius fratrem collata: annuusq; insuper prouentus utrique dono additus. Victor



65

ctor quoque Martinengius Brixianus unus ex principibus ciuitatis, Ioannesq; Maria eius frater ob eorum egregia in remp. officia ciuitatem & ius comitiorum paucis post diebus sunt adepti. Ludouicus in Rhetos profectus, ut exercitum cogeret ad Gallos repellendos; id enim fama uulgauerat; Heluetiis Lepontiisq; tē-  
tatis nihil efficere, quod ex usu esset, potuit. rex adhibitis lega-  
tis, qui Mediolani erant, omnibus, uelle se Federico regi bellum  
inferre pronuntiauit; ut regnum Neapolitanum, quod paulo  
antea Caroli fuisset, suam in potestatem redigeret. cui statim Hi-  
spania regum legatus, ego uero, inquit, bellum tibi à meis regi-  
bus denuntio; si id aggredi statueris. non enim sunt passuri, ut  
propinquum suum regno quis eiiciat. rex de eo se cogitaturum  
respondit. deinde duos cum menses Mediolani fuisset; Genuen-  
sium ciuitatem certis conditionibus in fidem recepisset; Triul-  
tium; cui etiam Vigeuenum in Ticinensi agro, oppidum regiis  
ædibus atque ad uenationes opportunum, dono dederat; una cū  
altero ex suis ducibus noui regni rebus omnibus præfecisset: in  
ulteriorem Galliam rediit.

P E T R I B E M B I R E R V M V E N E -  
T A R V M H I S T O R I A E  
L I B E R V .



V M hæc in Gallia citeriore geruntur: ad Ba-  
iafetis nouos motus; qui exercitum & classem  
magno studio comparabat; Antonio Grima-  
no præfecto classis declarato, uti profectiōē  
maturaret, patres iusserunt. is ante quàm con-  
scenderet: propterea quòd ab ciuibus tot su-  
periorum defessis continētium bellorum mu-  
neribus lente ac morose tributa exigebantur; libras auri octogin-  
ta in remigum stipendia reip. mutuo dedit. alteras octoginta se-  
cum se laturum est pollicitus; quibus Corcyrae reliquisq; in lo-  
cis ad classem constituendam uteretur. constat, illis diebus in Apu-  
lia coruos uulturesq; tāta ex aere ui tantisq; agminibus inter se cō-

R



fixisse: ut carri duodecim eorum cadaueribus explerentur: Corcyrenses cum uiderent in magnis parandæ classis difficultatibus propter temporis angustias reip. uersari: quòd Baiafæti classis uela iam facere dicebatur: polliciti sunt: si eis frumentum & tormenta subministrarentur, se se gripos sexaginta suis hominibus suaq; pecunia ornatos: quibus Antonius eo bello uti posset. quod quidem Corcyrensiu auxilium oportune oblatum Senatus libentissime accipiens numum aureum in singulos eorum, qui conscenderent, ad ea, quæ petierant Corcyrenses, etiam addidit. iamq; ab Hiadertinorum magistratu literæ ad Senatum datæ certiores patres fecerunt, Turcas equites ad duo millia incursiones in eorum fines fecisse; magnūq; agrestiu hominum numerum abegisse; neque postea discessisse; sed ibidem confedisse. quæ res omnem dubitationem expulit, quò esset classe rex irrupturus, cum in fines reip. terrestres copias induxisset. nam eum nonnulli Rhodiis bellum esse illaturum etiam nunc arbitrabantur. lecti itaque legati duo, Franciscus Ciconia; qui in Aetolia & Achaia reip. oppidis præfset; Andreas Lauredanus, qui Corcyra. tum Andreas Zancanius item legatus cum præsidio in Carnos missus: cum patres eo etiā ab latere Turcas impetum facturos comperissent. latum etiam, ut biremes complures ornarentur: quæ maris Hadriani præsidio essent contra biremes Turcarum: quas eloi fluminis hostio Aulonē deductas Senatus intellexerat: eisq; biremibus Augustinus Maripetrus præfectus datus cum trireme una, quam ipse conscenderet. ob eas res atq; bellum: quod quidem fore omnium, quæ ciuitas cum Turcis unquam gessisset, maximum & formidolosissimum uidebatur: aucta per Senatum urbis uectigalia sunt parte ex tertia; uini, panis, carnis portoriis tantummodo exceptis: atque, uti magistratus omnes urbani prouincialesq; mediam stipèdiorum partem unius anni reip. remitterent, lex lata: cautum tamen, ne quadraginta uiralia iudicia ea lege tenerentur. lecti etiam uiri, qui censum ciuibz omnibus prouinciuq; opibus decernerent ea conditione; ut is, quem decreuissent, reip. à quoque ciue census donaretur; si auri semunciam nō excederet: supra id mutuo erogaretur: neque tamen auri libras tres ullius ciuis census posset excedere. simul, quòd illis ipsis diebus



bus terrestres etiam equitatus & peditatus copias ex Gallorum regis fœdere Senatus contra Ludouicum cogere, atq; in Galliam mittere tenebatur: pecuniâq; erat uno tempore in classem atque in exercitum separatim subministranda: lex est lata; ut quæ ciuitates sub reip. imperio in continenti essent, iis literæ daretur: uelent pro suo in reip. studio tam difficili eius tēpore subsidii nomine pecuniam publice ad urbē mittere, sua cuique ciuitati dicta & constituta summa, Patauinis auri libris centum, Vicetinis octoginta, Veronensibus totidem, Brixianis centū uiginti, Bergomatibus quinquaginta quinque, Taurisanis quinquaginta, Crementibus uiginti, cæterisq; item infra hæc: quæ quidem ciuitates ut in rebus tā urgentibus lubentes atque alacriter suā quæque partem in ærarium contulerunt: Alexander etiam Pont. Max. omnium prouentuum, quibus sacerdotes in imperio reip. fruerentur, partem plus tertiam in id bellum Senatui concessit, Cardinaliū sacerdotiis exceptis. Iis administratis rebus, æstatis parte iam præterita, Bajasetis classis nauium omnis generis circiter ducentarum septuaginta, quo in numero erant biremes quadraginta, naues duæ onerariæ immani magnitudine; freto egressa, Euboeamq; insulam præteruecta ad reip. in Achaia litora se conuertit: & exercitus maximis instructus copiis, cui præerat rex ipse, terrestri itinere eodem proficiscitur: cum rex, antequā Thessalonica discederet, ciues Venetos, qui Byzantii commorabatur, in uincula conici mandauisset: in quibus erat Andreas Grittus de quo supra dictum est. is, quod ad magistratum, qui erat Nauacti, charitate patriæ iuuenilem animum stimulante literas notis conscriptas omnibus de rebus deq; regiis consiliis dederat, du riore conditione quàm reliqui omnes in custodia fuit: parumq; abfuit, quin interficeretur. Antonius magna diligentia omnibus ex reip. maritimis municipiis atque insulis classe celeriter coacta pulcherrimeq; instructa; quæ quidem erat triremium quadraginta sex, longarum nauium ex iis, quæ ad mercaturam profiscuntur, decem septem, nauium onerariarum numero ad quadraginta, biremium & reliquarum item quadraginta; Methone ex anchoris, quid Turcæ facerent, circumspeciebat. pauloq; post è portu apud Acritā egressos appropinquare eos intelligens ad Spha-

R ij



ghiam insulam, quæ contra Methonem est, uela cum omnibus  
nauib. facit. Venetias cum esset nuntiatum, classem Thraciam  
ad ea reip. litora processisse, quibus in litoribus & portibus esset  
Veneta; neque esse dubium, quin sint congressuræ: supplicatio  
est à Senatu decreta: tum in sacrarium uirginum & sacerdotium  
collegia farinæ triticæ sextaria trecenta dono data: atque auri li-  
bræ quinque remigibus senectute aut ualitudine affectis, qui ali-  
quando stipendia in classibus reip. fecissent, per urbem distributæ.  
Antonius, constituto qua ex parte hostes, quotq; cum triremi-  
bus quisque legatorum aggredereetur; quemq; loci præfecti na-  
uium onerariarum maiorumq; longarum caperent; quot naues  
post reliquas, ut subsidio laborantibus essent, se continerent: me-  
dia ipse in acie quatuor circum se triremes ducens; prouectusq;  
paululum in mare; cum naues Thraciæ non longe ab eo iter fa-  
cerent, possetq; illas secundo uento aggredi; prælium tamen di-  
stulit. at Aloisius Marcellus nauium onerariarum præfectus, ut  
ei erat imperatum, paulisper se ad classem hostiū conuertit: qua-  
re animaduersa illi statim alia insulæ parte se in portum, qui Lon-  
gus appellatur, receperunt. constat autem, illis diebus ita eos reip.  
classis nomē perhorruisse; ut multi se suis cum nauibus litori ap-  
plicuerint; quo facilius, si classes congregarentur, terra fugam ca-  
perent. Antonius Methonem rediit. idq; cū bisterq; postea pau-  
corum dierum spatium accidisset; ut & Turcæ portu egressi con-  
specta classe Veneta in eundem portum redierint, aut in proxi-  
mum se intulerint; & Antonius, eductis nauibus ut configeret,  
uisis hostibus, cum ei uisum non fuisset congregari, eos redire aut  
progredi sine impedimento permiserit: Turcæ audentiores fa-  
cti, quod existimarent Antonium metu perculsum ea facere. pri-  
die Idus sextiles se, ut iter facerent, explicabant. erant autem non  
longe à Methone litori, quàm mari aperto, propiores. Antonius  
classe educta: quod superioribus fecerat diebus: ut, quemadmo-  
dum ab initio communi legatorum & præfectorum omnium cō-  
silio constituerat, in eos impetum faceret, se comparabat. atque  
eo ipso tempore Andreas Lauredanus Corcyræ magistratus adue-  
nit gripos undecim & naues onerarias quatuor, in quibus erant  
milites plus mille, secum afferens. is ad Antonium recta profe-  
ctus



ctus, uenisse se ad républicæ auxilio iuuandam proponit. petit, ut, quid se facere uelit, imperet. erat in Andrea magnus animus, magna uirtus, plurima belli & rerum maritimarum experientia. itaque illo uiso uniuersa classis clarum lætitiæ signum dedit: salutatusq; est plausu uocibusq; militaribus mirandū in modum. id an ægre tulerit Antonius: uenisse hominem; qui, si quid recte sit administratum, fauore uulgi atque beniuolentia eius rei omnem sibi laudem præripiat: explorati nihil habeo: multi quidem certe crediderunt, & testatum reliquerunt. sed illi nauem onerariam ex duabus magnis reipublicæ nauibus, quas habebat, uti conscenderet, eiq; imperaret, permisit. Andreas cymba ad nauē statim uectus: neq; .n. temporis exiguitas longiorem moram dabat: in eam se se intulit. altera in nauī magna reipublicæ erat Albanus Armerius præfectus. is, ubi est imperatum, ut in hostes impetus fieret: quod sciebat de concilii sententia datum sibi negotium ab Antonio, ut nauem Thraciam alterutram ex duabus, de quibus supra dictum est, adoreretur, ad eam ex illis, quæ quidem erat uastior, contēdit: Lauredanus sua cum nauī ad nauem hostium alteram appropinquat. sed ea fuga comparata in mare sinistrorsum se proripuit. tum Lauredanus suam & ipse nauem in maiorem hostium nauem cōuertit. quam cum essent ambo consecuti: iniectis manibus ferreis eam religant. erant in naue Thracia milites mille: qui se cōminus acriter fortiterq; defendebāt. id dum fit, ignis in nauē hostium iactus puppim succendit: qui extingui cum non posset; neq; nostris nauibus explicandi se ab illa facultas daretur; uento latus naues Venetas comprehendit. ita tres earum classium maximæ instructissimæq; naues conflagrauerunt. sed fuit quidem eorum, qui in nauī Thracia erant, longe casus, atque fors melior: propterea quod Turcæ reliqui ubi suam comburi nauem uiderunt; biremes nauculasq; aliquot eò celeriter miserunt. eæ biremes atque nauculæ, qui se in mare proiecerant milites; quod necesse erat fieri; eis auxilio fuerunt; omnesq; sustulerunt. nostri homines, quibus in tempore subsidium adesse non potuit, cæsi ab iis, qui suis uenerant auxilio, omnes interierunt, præter paucos ex utraque nauī; quos Thomas Duodus, qui in oneraria erat, suæ nauis scapha sublatos conseruauit, præterq; Albanum, quem



Turcae inter suos e mari captum substulerunt . processerat eo dem impetu atque ardore animi una cum Albano cumque Lau redano naus alia oneraria non ita magna, ut naues Thracias ad rireretur . sed ea pilis ferreis ab hostium nauibus pugnae initio con iectis depressa suis cum militibus interiit . unus Vincentius Po lanus triremem , cui praeerat : erat autem ex iis, quae ad mercatu ram instituuntur : in classem Thraciam magno animo intulit . is paruo temporis spatio circumscrip tus ab hostium longis nauibus omnis generis compluribusque ; cum se fortissime horas duas de fendisset ; nauesque hostium nonnullas tormentis perforauisset ; ip sos audacter in eius saepe nauem conscendentes interfecisset ; ali quot ex suis amisisset : uulnerata parte plurima, coorto forte uen to, uelisque factis, se se hostibus eripuit . ex reliquis reip. nauibus nulla cominus congressa, pilis tantum e longinquo emissis omnes in mare dexteram ad partem classe hostium relicta abierunt : ex quibus Aloisius Marcellus in nauem hostium onerariam incidens iniecta manu ferrea eam secum abduxit : longeque ab reliquis na uibus captam atque direptam incendit . ibi Antonius animo tur batus, ob eos euentus, quos tristes conspexerat, nihil praeterea tentare ausus, se recepit . classis Thracia eodem ipso in loco se continuit : Veneti ad Prodonum insulam iactis anchoris consti terunt, cum tamen naues onerariae complures maioresque triremes propere omnes biduum fere, antequam eo conuenirent, consum psissent . Albanus postea Bizantium productus, dum ei rex uitam se concessurum dixisset, si Maumettum Turcarum deum deinceps coleret, negans id unquam se facturum in duas sectus par tes magna constantique uoluntate mortem obiit . Petierat ab Aloisio Galliae rege iam a primo Baiasetis apparatu Rhodiorum ma gistratus classem, qua se tueri posset : propterea quod eam ad in sulam atque oppidum suas esse copias, suamque classem Baiasetem illaturum multorum uocibus & nuntiis afferebatur . rex ne sui regni initio parum diligens ad reip. Christianae partes munien das, atque tuendas uideretur : classem nauium duarum & uigin ti in Gallia prouincia coactam ad Rhodios miserat, ea classis uti cum classe reip. se coniungeret ; quod Rhodiis nauium nihil opus esset ; Senatus ab Rege libentissimo impetrauerat : qui etiam omnes



omnes suas opes, sequi ipsum per literas perque legatos in id bellum reip. obtulisset. itaque dum Antonius eo loci est, nuntiat ei classem Gallicam Zacynthi esse. qua intellecta re ipse tota cum classe Zacynthum profectus cum illa se coniunxit; ad quam quidem Rhodii & ipsi naues onerarias tres adiunxerant. classis interim Thracia inferius aliquanto ad eum locum, qui Tornefium appellatur, se receperat. Antonius Galli que eam aggredi communi consilio decreuerunt. itaque cum omnes, ut uidebantur, alacriter ad eam Zacyntho cõtendissent: animaduersum est Turcas classem ad litus accommodauisse sic; ut ferè terram puppibus tangeret: proras nauium in mare conuertisse. ea re cognita Antonius nauiculas onerarias sex minus ad bellum idoneas hominibus, tormentis, cæterisque rebus ablatis ulua sicca implendas curauit, puluere ad comprehendendum ignem idoneo interiecto; quas incensas classi Thraciæ obiceret. is dies ea in re consumitur. postero di mane iis nauibus triremes magnæ sexdecim Antonii iussu ubi se in hostes promouerunt; cū illi statim classis partem contra eas miserunt: quibus uisis Venetæ triremes se se continent: Turcæ progressi nauiculas sex eas, quæ remulco longarum nauium processerant, ab iis relictas, qui attraxerant, capiunt. Veneti ea re commoti in illos se concitant: atque usque ad classem insecuti aliquot eorum nauigia deprimunt: triremesque tres & biremem unam cum hominibus capiunt. Biduo autem post, cum omnino aggredi classem Thraciæ Antonius Galli que statuisent: atque ad eam tam proxime accessissent; ut tormentorum pilæ in hostes mitterentur nescio: quo fato paululum commorati redierunt. id quod à Gallis damnatum fuit. Demum eo triduo hostibus uela facientibus, ut sinum, qui proximus erat, caperent: Antonius classem explicuit: eosque cõsecutus cū aggredi suo uento posset; eodem iniquo fato, ut tunc quidem creditum fuit, se continuit: aliquot tamè naues longas hostium audacter progressas, quæ paulo ulterius ex Venetis processerant naues, facto in eas impetu ceperunt. quod si reliquis eadem uis animo fuisset: hostes deleri facile potuissent. omnibus enim illis diebus; quibus parte aliqua prælium commissum est; cū plures naues Thracias militibus rebusque omnibus instructas Veneti ceperint: nulla



tamen ex eorum nauibus cum hominibus est capta . quin etiam illud accidit . extrema erat nauis una oneraria Gallorum eo in re-  
ditu ut sæpe fit , multo reliquis tardior : itemq; ex Venetis altera .  
in eas præfectus classis Thraciæ magnam suarum nauium par-  
tem conuertit ; ut plus triremes ac biremes triginta nauem Galli-  
cam circumsisterent , Venetam plus uiginti : quæ tamen duæ cū  
acriter diuq; oppugnarentur , præter pilas tormentorum , quas ho-  
stes ei aculauerant , sagittarum uita in eas coniecta , ut mali , an-  
temnæ , plutei , latera earum denique signorum modo sagittis cō-  
stipatis fixa essent : complures hostium biremes & triremes de-  
presserunt ; ut reliquæ magno accepto detrimento eas reliquerint .  
Galli post hæc cū sibi nulla in re defuisse uideretur , cognosceretq;  
fortunam omnibus nostrorum conatibus aduersari , Antonio  
relicto abierunt . hostium classis Naupactum se cōtulit : eodemq;  
antea rex cum magno exercitu erat profectus . is cum oppidum  
terra mariq; uno tempore cinxisset : nullo à nostris auxilio allato ,  
oppidani coacti deditionem faciunt . hæc ad urbem allata ciuiū  
animos ; qui longe alium rerum exitum expectabant ; magno do-  
lore affecerunt . cumq; uulgo legati , reliquiq; ; qui separatim aut  
nauibus onerariis imperauerant , aut longis præfuerant ; homi-  
num sermonibus carperentur , Antonius ante alios totius populi ,  
quemadmodum imperatoribus , qui res minus feliciter tentaue-  
rint , plerunq; solet accidere , maledictis lacerabatur , quod istan-  
tam , tamq; speratam , atque à diis immortalibus oblatam ac plane  
traditam augendi imperii facultatem suis emanibus dimisisse ui-  
deretur : si eam hostium classem Antonius iusto prælio superauis-  
set , prout eum facere potuisse existimabant omnem Pelopone-  
sum Græciæq; oram Euboeamq; insulam sub reip. imperium re-  
digere illū nullo negotio potuisse : nunc cum omnia secus , quàm  
sperauerant , euenisse intelligerent ; ac Lauredani & Armerii inte-  
ritus memoriæ hæreret infixus ; omnes magno odio in eum fere-  
bantur , acerbiusq; accusabant . his atq; talibus causis patres moti  
legem in Decemuirum collegio tulerunt ; ut Antonio præfectus  
classis sublegeretur ; qui statim conscenderet ; ipsi imperiū abroga-  
retur : & quoniā Thomas Zenus , qui magni animi , magnæq; uir-  
tutis esse uir ab omni plane ciuitate existimabatur ; fisco pecuniā  
debebat ,



debebat; fisci autem debitoribus antiqua lege magistratus mandari nullus poterat: uti Thomæ Zeno ea lex fraudi ne esset, quominus ei nauium præfectura quælibet attribui per Senatū possit, in lege Decem uirum est additum. itaq; & Malchioni Triunifano, qui legatus bello Gallico Cremonam illis diebus per ditionem ceperat, maioribus comitiis classis est imperium delatū, & à Senatu præfectura longarum nauium maiorum deceseptem Zeno tradita magna cum potestate. lectiq; à principis collegio earum nauium præfecti tresdecim ueterum præfectoꝝ loco. qui omnes statim profecti sunt cum militibus triginta quilibet. latum etiam de ueteribus; ut ob male gestam reip. ad urbem redirent, custodiæq; traderentur. datumq; Trium uiris ex aduocatis reip. negotium, ut eos in iudicia deducerent, quibus à iudiciis, qua meriti essent, pœna condemnarentur: idemq; postea de Antonio constitutum. lectus etiam per Senatum, qui Corcyrae magistratus esset, Lucas Quirinus cum militibus mille oppidi præsidio. is & Zenus sine mora sunt profecti. pauloq; post Malchio Cremona à Senatu accersitus uexillo reip. accepto conscendit; cum ei libras auri ducentas quinquaginta, quibus in classem uteretur, patres ex ærario dedissent. Zancanius mense Quintili in Carnos profectus, ut ab hostiū impetu, quos eopares uenturos intellexerant, reip. fines tueretur: ratione hominū, qui ferre arma poterant, earum regionum habita; quorum fuit numerus circiter centum uiginti millium; Græcis equitibus & leuis grauiorisq; armaturæ, Italis quāplurimis, peditibusq; coactis, munitissimo in castello apud Sontium flumen, quod Gradiscæ appellatur, paulo ante nostram ætatem publice exædificatum, multos est dies commoratus; dum ad eum ex Gallico exercitu auxilia conuenissent. Turcæ interea equites septem millia magno ac difficili itinere confecto per Iapidum & Liburnorum fines Sontio traiecto non longe à Gradiscis castris positos se continuerunt, eo consilio, ut, si Zancanius castello exiret, prælium cōmitteret. eorum dux ubi Zancanium extra munitiones non audere egredi animaduertit, duo millia equitum prædatum mittit: iubet, quoquo uersus incursiones faciant: celeriterq; uti redeant, monet. equites planitiem nacti magnam atque apertam, agrestes

S



homines inopinantes; quòd se ab illis tutos opposito reip. exercitu fore credebant; capiunt, ui eos diripiunt, incendunt; qui se defendere parant, interficiunt: in quibus fuerunt agrestes ducenti, qui Vicetia missi, ut ad Zancanium contenderent, in eos ex itinere inciderunt. ea re à proximis audita, usque eò fugere omnibus ex partibus contenderunt; ut, cum duorum fluminum obiectu Plauis Silisq; hostes impedirentur; quorum alterum nullo tempore uado transiri potest; alterum ita sæpe augetur, ut magnum etiam detrimentum uicinitatibus inferat; ad urbis tamen æstuariorum modo, sed Patauinorum etiam magna multitudo timore se in oppida receperit. A' Foroiuliensi magistratu autem Græci equites, Italiq; qui sagittis utebantur, ex oppido emissi trecenti; ut, si quâ possent, hostibus nocerent; partem nacti centum eorum occiderunt. quòd si Zancanius cum suis, quorum erat magnus numerus, in hostes impetum audacter fecisset: honestiorem res exitum habere potuisset. sed is pedem porta egredi adoriendi hostes causa nemini omnino homini ex suo exercitu permisit. Turcæ, qui excurrerāt, præda facta cum ad ducem redire uellent; atq; ad Tillaueti fluminis ripas, quod ea nocte creuerat, peruenissent: quo latum flumē traicere facilius possent, superioris ætatis, quos habebant captiuos, in ripa fluminis ad duo millia interfecerunt, reliquos traduxerunt, & præda onusti unâ cum duce, quâ uenerant, abierunt. Zancanius imperii male gesti accusatus, cum in Senatu à magistratibus defenderetur; iiq; legem tulissent; qua lege Zancanio imperium prorogabatur: Franciscus Bolanus Quadragesima uirum rerum capitalium magister legem tulit, ut is ad urbem è uestigio rediret, carceriq; se dederet: eamq; legem Senatus frequens, damnata altera, comprobauit. qua ex re Bolanus magnopere laudatus paulo post, quo die ciues sexaginta suffragiis comitialibus deliguntur qui annum in Senatu sint: (usu autē semper fit, ut omnes ciuitatis principes, & natu maiores ad id muneris deligantur) ipse nō unus modo ex eo numero fuit; quod tamen ipsum ei ætati atque ordini magnum & inusitatum uideri poterat; sed pluribus etiam suffragiis, quàm cæteri complures, eū magistratum est adeptus: quod propè incredibile ante illum diem



70

diem fuisset. tantā eo tēpore imperator legati præfectiq; ob igna-  
 uiæ opinionē ciuitatis in se inuidiā excitauerant: amorē aut̃ & be-  
 niuolentiā conciliauerat fortitudo. nā & Antonius Lauredanus  
 Andreæ Lauredani frater; & Aloisius Armerius, Albani fra-  
 ter Armerii; magistratum sale procurando omnibus suffragiis  
 sunt adepti: quem omnino per se se dignitatis, & ciuitatis gradū  
 decennio post uterq; posse assequi ne sperauisset quidem. & Ia-  
 cobo Polano, Vincentii Polani, eius de quo sermonem habui-  
 mus, patri magno consensu locus datus est inter sexaginta ciues,  
 qui quot annis Senatui adici solent. itaq; Zancanius ad urbem  
 rediens, custodiāq; traditus à Senatu, condemnatus est, ut Pata-  
 uii annos quatuor exularet: neq; ei profuit, quòd Antonii & re-  
 liquorum, qui remp. male gessisse dicebantur, necessarii & pro-  
 pinqui ei fauerent, ut uel omnino absolueretur, uel leuissime con-  
 demnaretur, quo patres huius exemplo iudicii placabiliores in se  
 fierent: quæ eos opinio fefellit. Naupactō Antonius amisso na-  
 uibus longis maioribus, & onerariis compluribus abeundi fa-  
 cultatem concessit. ea res molestissima fuit patribus; qui nuntio  
 de Naupacti deditione accepto per literas Antonio mādauerāt,  
 ne classē diminueret. uisumq; est multis id Antonium non fa-  
 tis bono consilio fecisse. ipse deinde Cæphallenem insulam ag-  
 gressus, ubi nihil se proficere cognouit, Corcyram reliqua cum  
 classe se recepit: ibi acceptis de Senatusconsulto imperioq; abro-  
 gato literis, classe, pecunia, rationibusq; publicis legatis tradi-  
 tis ad urbem rediit: cui præsto fuit Dominicus filius, uir philoso-  
 phiæ studiis clarus, è Cardinalium insuper collegio, Roma ue-  
 niēs, ut, si quid posset, apud ciuitatem sua pietate atque officio or-  
 dinisq; amplissimi auctoritate patrem subleuaret. neque multo  
 post tamen maioribus comitiis, causa in uinculis dicta; quòd  
 Senatus lenitatem trium uiri, qui eum accusabant, ueriti rem ad  
 multitudinem & iudicium totius nobilitatis deduxerant: exilio  
 in Illyrici maris insulas Apforum & Crepsam damnatus exulatū  
 abiit. Nicolaus Michaelēs unus extrium uiris magno fauore ci-  
 uitatis eius locum ad ædis Marciae procurationem suffectus te-  
 nuit. His rebus ciuitate domi forisq; occupata; quoniam Alexan-  
 der à Senatu atque ab Rege Galliæ impetrauerat, uti eorum uo-

S ij



luntate: aliquot in Flaminia oppida, quæ Romani iuris essent, Cæsari Borgiæ eius filio obtinenda cederentur: Cæsar sua cum manu, cumq; iis, quas ab rege altero cū duce Mediolani acceperat, copiis in Flaminiam est profectus. erat is antea, ut superioribus libris dictum est, in Cardinalium collegio: sed magistratu repudiato, uxorem in Gallia duxerat, ac primum quidem Forū Cornelii & Forum Liuii oppida ipsa castris ad muros positis tormentisq; adductis acri oppugnatione ad deditionem compulit. arces uero eorum oppidorum; quod erant munitissimæ; uarios euentus habuerunt. altera enim complures dies obseffa conditio nibus acceptis Cæsari anni exitu deditur: Foroliuiensium arcem autem, in qua erat Caterina ipsa, diu ac magnis oppugnatam, uiribus paulo post Cæsar muro tormentis delecto militibus irruentibus multa cum suorum cæde tandem cepit: Caterina captiua facta. interea, ut suos & eorum fines Senatus, quos è Flaminia in fidem recepisset, ab Alexandro, atque ab Cæsare tantū exercitum habente, si quid aggredi, & conari uellent, tueretur; tria militum millia, duo equitum Liuiano duce Rauēnam misit, quos per oppida distribueret. simul legati duo, Franciscus Cappellus, Christophorus Maurus, alter Ariminum, alter Fauentiam profecti, qui eis oppidis reip. nomine præessent. Arce Foroliuiensium capta Cæsar cum Pisaurum uellet patribus permittentibus exercitum adducere: propter nouos Mediolani motus destitit. nam patres, cum ad urbem Ioannes Princeps Pisauensium de Cæsaris in se uoluntate certior factus uenisset; oppidumq; uellet reip. tradere; modo ipsi aliquid in reip. finibus oppiduli, aut castelli Senatus daret, quo se alere & sustinere posset: consulto Senatu responderunt, nolle se ei præsidio esse, qui reip. obesse uoluisset. id autem propterea patres cōmemorauerant, quod Ludouici legatos ad Turcarum regem contra remp. missos Ioannem hospitio accepisse, nauibus rebus omnibus iuuisse, regisq; itē ad Ludouicum legatum naue Pisauri egressum domi suæ habuisse, clamq; ad illum misisse, tum ipsum singulis de rebus, quæ in urbe agerentur, literas ad Regem dedisse, antea cognouerant. sed Mediolani motus fuerant eiusmodi. Ludouicus copiis nō maximis in Rhetis comparatis, eorum factione, quos Galli irritauerant,



rant, quique res novas moliebantur, magnopere adiutus, in fines  
 se regni contulerat insequente anno inito. eius aduentu Triul-  
 tius duxque regius ex duobus alter uehementer; permoti atque per-  
 turbati; quod ciuitatis defectionem timebant; copias regias, quæ  
 cum Cæsare aberant, reuocauerunt, atque ad se celeriter reuerti  
 iusserunt. itaque Cæsar multo maiore sui exercitus parte ablata de  
 Pisauro expugnando cogitationem in aliud tempus omisit, Ro-  
 mamque se contulit. Ludouico ad recuperanda, quæ amiserat, cum  
 exercitu reuertente, Senatus decreuit ut milites equitesque reip. om-  
 nes in agrum Cremonensem euestigio cõtenderent, ut Helue-  
 tiorum militum tria millia celeriter accerferentur: legati que ad bel-  
 lum Petrus Marcellus, Christophorus Maurus lecti: ipse interea  
 Ludouicus Corno per suos sine ui atque celeriter recepto: Galli  
 enim, qui in eo erant, ueriti ne ab oppidanis atque ab hostibus in-  
 tercluderentur, municipio relicto discesserant: Ascanium fratrem  
 cum parte copiarum Mediolanum præmisit: quo appropinquã-  
 te, ciues armis captis Triultium & Gallos eiccerunt, ei que portas  
 aperuerunt: biduoque post ipse cum reliquo exercitu adueniens in  
 urbem est receptus. His intellectis rebus Decem uiri legem tulerunt,  
 uti ciuis probata uirtute Cremonam mitteretur, qui arcem oppidi  
 præset: missusque est ipsorum suffragio lectus Nicolaus Priolus  
 decemuiralis. missi etiam alii quatuor egregii nominis, qui toti-  
 dem oppidorum in Cremonæ Abduæque fluminis finibus arces  
 custodirent. Mediolani Ludouicus paucos cõmoratus dies, dum  
 à ciuibus humili subdolaque oratione pecuniam corrogaret, Tici-  
 num proficiscitur: neque ullo in loco magnopere impeditus Gal-  
 los, qui se quotidie in ulteriorem regni partem recipiebant, inse-  
 quens postremo Nouariam, quæ Triultius præsidis firmauerat,  
 aggreditur: & quod erat à muralibus tormentis imparatior, cre-  
 bris assultibus premere oppidum insistit. simul ad illum Sequani  
 equites sexcenti auxilio à Maximiliano missi adueniunt. iis ad  
 summouendos hostes usus, & modo per insidias detrimento ac-  
 cepto, modo fufis hostibus illato, abductis demum à Triultio  
 præsidis, quod diffidere oppidanis cœperat, neque iam commea-  
 tus interclusis suppetebat: Nouariam se dedentem recipit. interea  
 exercitus reip. Cremonam Abduæque ad ripas cõfestim profectus,



Laudem Pompeii : quod iā oppidum Ludouici milites introdu-  
xerat : misso præsidio expulsisq; militibus regi retinuit . Placen-  
tiam nutantem per se atque labantem confirmauit . Triulcius re-  
uersis iis, qui cum Cæsare in Flaminia ierant, Gallis, simul ab re-  
ge missis ad eum equitibus ex Gallia Transalpina, atque ab Hel-  
uetiis coacto exercitu non longe ab Nouaria contra Ludouicum  
castra posuit; itineribusq; ne commeatus Ludouico supportari  
posset, propè interceptis, paulo post commissio prælio illum in op-  
pidum repulit: posteroq; die, cum se fugæ dare decreuisset, omni  
cum exercitu oppido egressum ueste pabulatoria & strigoso in  
equo inter milites se celantem, permittētibus Heluetiis perqui-  
situm cepit. ea re cognita pars regni omnis, quæ defecerat, ad  
regem statim rediit. Ludouico capto Ascanius principesq; ciui-  
tatis permulti ex iis, qui Ludouici rebus fauebant, una Mediola-  
no aufugerunt Padum flumen uersus; ut se in tutum reciperent.  
uerum ab Soncino Benzonio turmæ equitum reip. præfecto, qui  
id, quod re euenit, opinione existimans futurum itinera observa-  
bat; in Cremonæ finibus intercepti sunt: Ascanius etiam Vene-  
tias adductus in comitii turricula publice obseruatus est. pau-  
loq; post rege illum ab Senatu petente septius custodibus in Gal-  
liam transmisit; quò antea Ludouicus perductus, custodiæq; tra-  
ditus, ea in custodia aliquot post annos est mortuus. Ea æstate  
propterea quòd Gaspar Seuerinas reliquiq; fratres Roberti li-  
beri bellum contra remp. gesserant: Senatusconsulto Citadella  
oppidum receptum: & bona eorum fisco sunt addicta. Sed Nau-  
pactum amisso, ut docuimus, Aloisium Manentium, in decem ui-  
rum collegio scribam, Senatus Byzantium ad regem misit que-  
stum: quòd nulla laceffitini iniuria, pacem, quam paulo ante cū  
Zancanio legato firmauerat, bello terra mariq; illato uiolauis-  
set: postulatumq; ut mercatores Venetos, qui nihil deliquissent,  
quorum etiam aduentu eius portoria facta essent meliora; quos  
belli initio in uincula coniecerat; liberaret: Naupactum iniu-  
sto bello captum reip. restitueret: demum, si id noller, pacem re-  
nouaret. id autem ea de causa sibi tentandum Senatus decreue-  
rat, quòd ab nōnullis, qui plurimum apud regem poterant, spes  
ei proponebatur, fore, ut, si legatum mitteret, pax inter ipsos con-  
ciliaretur:



72

ciliaretur: tum quòd grauissimū ciuitati fore intelligebat, si clas-  
 sis eo etiam anno esset comparanda contritis per tot bella nō ur-  
 banis modo opibus, sed etiam prouincialibus; rep. insuper ni-  
 hil prospere contra illum moliente. nam cum Naupacto ab ho-  
 stibus expugnato Caphallenē insulam capere primo Antonius,  
 ut antea dictum est, deinde Zenus, postremo etiam Malchio clas-  
 se adducta diuturna oppugnatione tētauissent: labor tamen om-  
 nis omnium irritus & inanis fuit. Manentius anni initio profe-  
 ctus Bizantium ubi peruenit, nihil eorum, quorum causa missus  
 fuerat, impetrare potuit: rex enim ita respondit, pacem Veneti si  
 uelint, Methonem, Coronem, Naupliam, quæ haberent in Pelo-  
 poneſo oppida sibi tradant; auriq; libras centum stipendii nomi-  
 ne singulis annis dependant: alia se conditione pacem cum rep.  
 non facturum: itaque infecta re discessit. sed Manentio ab urbe  
 profecto: quòd nuntii afferebātur in Epiri finibus magnū Tur-  
 carum equitum numerum cogi: Senatus ueritus eam manum su-  
 perioris anni præda impunitateq; allecā in Carnos finesq; reip.  
 esse uenturam; Petrum Orium, Angelum Barotium legatos crea-  
 uit, qui unā cum Foroiuliensiu magistratu earumq; rerum peritis  
 regiones inuiferent, & quibus in locis atq; itineribus operæpre-  
 tium esset, munitiones instituendas curarent, quibus hostes repel-  
 li possent: Liuiumq; cum equitibus, quibus præerat, & Gurli-  
 num Rauennatem, qui priores ordines gerebat, cum militibus  
 duobus millibus legatis dedit. Petrus etiam Marcellus, alter ex  
 duobus in Gallico exercitu legatis, iussus cum copiis in Carnos  
 proficisci. Turcæ tamen, propterea quòd Rex eorum ducem Bi-  
 zantium euocauerat, se in Carnos non intulerunt. æstate autem  
 media, quòd eadem rursus fama crebrioribus nuntiis percrebue-  
 rat, parari hostium exercitum, qui sit in fines Reipublicæ impe-  
 tum factururus, Nicolaus Vrsinus cū magna copiarum parte cūq;  
 Ioanne Baptista Caratio militum omnium Reipublicæ præfecto,  
 Senatu iubente in Carnos est profectus, omnesq; eius regionis in-  
 colæ se, & sua in oppida, & castellos contulerunt. hostes, uel  
 quòd loca communita scirent esse: uel quòd iis in bellum Pelo-  
 poneſiacum, de quo dicturi sumus, uti rex uoluerit: ab incur-  
 sionibus in eam reip. partem se continuerunt. Manentius tātum



ad urbem redierat ; cum patres Corcyrae insulae ueriti : propterea  
quod ea in potestate hostium redacta ; quae oppidum munitum  
& portus egregios haberet ; omnis Adriani maris nauigatio , &  
in Ionium reliqua ; maria exitus magnopere impediabantur :  
Decemuirum lege Angelum Quirinum, Aloisium Decanalem  
cum militibus centum eo miserunt , qui duabus oppidi arcibus  
praessent : quae quidem arces quod promotoriolis ite duobus oppi  
do coniunctis sunt impositae , spatiumque perangustum habent :  
multorum propugnatorum non indigent . nuntii deinde Aprili  
mense uenerunt , classem Thraciam , quae Naupacti ea hyeme  
fuisset , magno studio esse refectionem , aliamque in sinu Ambracio in  
stitutam classem deduci , ut se cum illa coniungeret : ipsum re  
gem maximo cum exercitu breui in Peloponnesum uenturum ; ut,  
quae oppida in pacis conditionibus a Manentio petierat , bello per  
sequatur . iis rebus cognitis Senatus decreuit , uti naues longa de  
cem ex iis , quae ad mercaturam instituuntur , onerariaeque ; magnae  
quatuor armarentur : decemque iis qui imperaret , Iacobus Venerius  
datus ; singulis autem nauibus suus praefectus cuique : auctaque iis sti  
pendia , quo libentius proficiscerentur . missusque ad supplendam  
classem remigum opportunus numerus ; quem ex continenti Se  
natus conduxerat . iussi etiam praefecti militum uiginti bona cum  
manu , cumque iis rebus , quae idoneae ad munitiones faciendas es  
sent , Methonem proficisci , pecunia insuper in classis stipendium  
missa . Senatus etiam consultum factum , ut naues longae minores  
non paucae prioribus adderentur : biremesque complures con  
festim armarentur , classique submitterentur . Malchio & ipse ; qui  
Corcyram uenerat , nauibus aliquot relictis ad Cephallenae insulae  
non tam quidem oppugnationem , quam ut in statione ibi es  
sent , ne praesidium hostibus submitti posset ; recentioribus de clas  
se Thracia , regioque exercitu nuntiis certior factus , uti e Creta mi  
lites & commeatus & tormenta Naupliam mitterentur , curam  
& diligentiam adhibuit . & quod Naupliam primum omnium ue  
turum regem multi existimabant : pars ab illo praefectorum mi  
litum est eo transmissa : commeatum etiam omnis generis Me  
thonem misit . ipsi etiam oppidani ; qui frumenta in agris pabu  
laque omnia circum oppidum corruerant ; aedificia combulse  
rant,



rant, ne hostibus opportuna fierent: munitionem in portu magni operis effecerunt: aggeremq; in mari excitauerunt; quo ab aggere naues hostium arcerentur, ne ad muros propius accederent: aditumq; uni tantum naui reliquerunt; quo se tueri facilius possent, quàm si cum multis uno tempore nauibus eis esset propugnandum. Malchio deinde Zacynthum profectus classem eò conuenire iussit, nauium longarum & onerariarum circiter septuaginta: in quibus erant naues longæ magnæ sexdecim. Turcæ interea suam classem duobus locis comparatâ apud insulam Leucadiam coegerant magna reip. populorum querela: quod Malchio quiq; præerant legati, ne id per hostes fieri posset, minus prohibuissent: partem eius classis utralibet separatam ab altera parte atq; semotam superari ac deleri non maximo negotio potuisse: nunc eam coniunctam atque plenam nihil non ausuram, ad exitumq; perducturam. adiungebatur ad eas querelas etiam hoc, quod Malchio laborare aduersa ualitudine cœperat. Sed rex, coacta classe nauium omnis generis plus ducentarum uiginti, cum exercitu in Naupliæ fines est ingressus, missa equitum parte, qui ad oppidum accederent. cum iis oppidani equites congressi mille quingenti prælium secundissimum fecerunt: itaque Nauplia relicta rex Methonem uenit. præmissi autem ab eo Turcæ Pilon oppugnare sunt aggressi. quod quidē abest Methone millia passuum decem, loco edito impositum, portu adiecto. Ii, quod eo ipso tempore Contarenus legatus cum nauibus longis aliquot adueniens auxilium propugnatoribus attulerat; repulsi, spe castelli capiendi amissa, abeuntes cum reliquo se exercitu coniunxerunt. Inter hæc Malchio apud Caphallenem moritur: pauloq; post legatorum & præfectorum omnium suffragio Hieronymus Contarenus legatus Malchioni pro imperatore sufficitur; quo ad patres, quem præesse uelint, imperent. Rex Methonem omni cum exercitu acerrime oppugnans magnam prooppidi murorum partem tormentis deiecerat. milites, qui priores ordines gerebant, à Senatu missi principesq; municipii ueriti non posse, se eam partem tueri, rebus omnibus & materia, quæ in eo erat ablata, atque in oppidum abducta, prooppidum reliquerunt. hostes ingressi maiore iam spe murum oppidi deicere labore nō in

T



termisso institerunt. Dum hæc ad oppidum geruntur: Contare-  
nus omni cum classe Zacyntho proficiscitur, ut, si quâ posset, aut  
afferret oppidanis auxiliū, aut classi hostium noceret: cuius clas-  
sis naues onerariæ Sphagiam insulam circumuehebantur: reli-  
quæ naues è Pili portu se promouebant, quas ubi Veneti è longin-  
quo uiderunt: eas aggredi magno animo decreuerunt: itaq; tri-  
bus effectis ex omni classe cornibus in hostes contēderunt: quo-  
rum in uno naues erant longæ minores uniuersæ: in altero maio-  
res continebantur: tertium cornu naues onerariæ conficiebant.  
atque hoc aperto mari, illud litori propius erat. naues triremes  
magnæ medium satis idoneo inter utrasq; spatio relicto classis lo-  
cum obtinebant. hostes ubi contra se ueniri animaduertunt: na-  
ues longas circiter centum in Venetos conuerterunt. Venerius  
medio è cornu, cui præerat signo pugnae dato omnium primus  
impetum in hostes facit: trirememq; contra se uenientem unam  
ex prioribus aggreditur: ex eaq; trireme magnus hostium nume-  
rus tormentis est interfectus: ex reliquis triremibus magnis sex  
& ipse cladem non paruiam classi Thraciæ intulerunt, cōpluresq;  
triremes deprefferunt; ex minoribus uiginti prælium commise-  
runt: eōq; res est deducta, ut Turcæ, quemadmodum postea co-  
gnitum est, litori naues impingere, fugamq; capere cogitarent.  
reliquæ triremes congregari non sunt ausæ. obfuit autem plurimū  
etiā fortuna ipsa; quæ multum in bellis potest: quòd naues onerariæ  
trāquillitate magna oborta se mouere nō potuerunt. Turcæ  
utrunque conspicati, & naues onerarias uento silente detine-  
ri, & longarum magnam partem à pugna conferenda deterreri:  
animum sumpserunt: prælioq; redintegrato atq; ad noctem per-  
ducto; cum horas tres continenter pugnauissent; ex Venetis tri-  
remibus maioribus una depressa interiit; altera interfectis quam  
plurimis est capta: cum omnibus abeuntibus tamen sola totam  
noctem impetum hostium sustinuisset. Contarenius proimpe-  
rator, naui sua perforata, atque aqua eam degrauante, in aliam se  
contulit: Zacynthumq; ut & illam & reliquas aliquid ex concur-  
su passas incōmodi reficeret est profectus. interea cum de Mal-  
chionis aduersa ualitudine Senatui esset nuntiatum: patres è ue-  
stigio, ut ei classi imperator sublegeretur, decreuerunt: qui si  
cum



eum saluum offendisset; reip. nomine hortaretur, ut ad urbem rediret. idq; eo deliberatius fecerunt; quod de Malchione quotidie, quæ non magnopere uellent, audiebant. itaque maioribus comitiis Benedictus Pisaurus magna cum potestate lectus, pecunia in stipendium largiter ei curata, die ab ea die tertia conscendit. Contarenius relictis nauibus auxilium & comitatum Methonem mittere cum decreuisset; ueritus ne oppidani omni subsidio desperato se se hostibus dederent; naues longas quinque omni ex classe delegit; atque in iis, quæ opportuna essent, imposuit. ante tamen optimum esse ratus oppidanos ea de re certiores facere, ut se ad frumentum atque arma reliquasq; res celeriter ex nauibus extrahendas compararent: hominem fortem, atque audacem cymba ei tradita cum remigibus decem eò misit. is per mediam hostium classem omnibus inspectantibus, quod erat meridiei ferè tempus, celeritate adhibita peruolans mandata Contareni oppidanis pertulit: posteroq; die, qui dies erat ante diem quintum iduum sextilis, Contarenius nactus idoneam tempestatem Methonem uersus uela omnibus cum triremibus facit. hostes classe uisa, id, quod erat, rati, ad oppidi se portum opposuerunt. Contarenius præfectos cohortatus, ut magno animo ad oppidum contenderent, remq; suorum ciuium opis & uirtutis egentem subleuarent: eos ab se dimisit. ex iis quatuor triremes, inter hostium naues elapsæ, se ad oppidum magna difficultate contulerunt. una quod erat tardior, multis hostium nauibus iter impredientibus; cum reliquarum celeritatem se imitari posse diffideret; ad Contarenum rediit. oppidani nauibus auxiliariis conspectis, ut ea, quæ afferebantur, celeriter in oppidum asportarent, læti ad portum conuolauerunt. tantaq; fuit eius rei cura, ut ii etiam, qui muros alia ex oppidi parte contra hostium exercitum seruabant, cum festinari ab aliis uiderent, eodem & ipsi accurrerent; stationesq; relinquerent, sic, ut murus defensoribus spoliaretur. id ubi hostes ab exercitu conspexerunt: occasione rei bene gerendæ nō omissa per ruinas murorum, quas tormenta fecerant, scalis positis nix paucis defendentibus interfectis, se in oppidum intulerunt. oppidani præfectiq; & milites præsidio & comitatu iam è nauibus abducto ea de re certiores facti hostibus medio in oppido occur-

T ij



rerunt: atque ibi prælio acerrime commissio cum diu fortiterq;  
pugnaissent; ac magnum eorum numerum occidissent; demum  
crescente hostium multitudine, plenis iam omnibus, & obsessis  
uiis, circūsepti undique ac pressi propè omnes interfecti sunt una  
cum præfectis nauium, qui tunc uenerant, duobus, remigibusq;  
permultis, ex municipibus ii: qui superfuerant, omni ex parte op-  
pidum incenderunt: suaq; omnia & suos comburere uoluerunt:  
ita oppidum ardens ac semicōbustum capitur: cum quidem Ve-  
neti multam in noctem se defendissent. eo capto Rex Pilon du-  
cem suum misit. is, ut fidē oppidanis faceret, Methonem in re-  
gis potestatem uenisse, magistratū reip. qui Methone erat in uin-  
culis adductum eis ostendit cum ciuibus Venetis nōnullis. qui-  
bus uisis, ea conditione, ut neque libertatem neque quicquam ex  
rebus suis amitterent, oppidum regi tradiderunt. at classis Vene-  
ta cum Zacynthum reuerteretur, magna cohorta tempestate cur-  
sum non tenuit: itaque nauibus omnibus disiectis nonnullæ lon-  
ginquas insulas, Cretamq; usque delatæ, uel amissis gubernaculis  
uel malo infracto, uel dissutis contignationibus iactura facta  
ægreq; se in tutum receperunt: triremis una impacta litori saluis  
hominibus interiit. Coronē post hæc cum magna exercitus par-  
te unus ex ducibus ab rege missus oppidanis proposuit, si se, ante  
quā oppidum obsidione cingeretur, regi dederent; fore ut bo-  
nis conditionibus uti possent: sin uim expectarent, omnes ad  
unum interituros. quibus intellectis rebus Coronæ casu Metho-  
nensium perterriti spretis præfectorum imperiis, qui se ad propu-  
gnationem comparauerant; æquissimis conditionibus ducē in-  
tromiserunt. Rex deinde Naupliam eadem qua Coronem celeri-  
tate suo se imperio adiecturum existimans, exercitus partē in Nau-  
pliorum fines induxit: missoq; ad oppidum cum suis equitibus  
Paulo Contareno ciue Veneto egregia uirtute, Bernardi Conta-  
reni, eius qui bello Neapolitano Epirotarum equitum præfectus  
mortem obierat, fratre, qui Corone uxorem duxerat, illisq; in re-  
gionibus erat notissimus; quemq; rex, ut ad id uteretur, Corone  
in deditionem recepta habere secum uoluerat: iussit illum oppi-  
danis suadere ut se regi dederent. is medio in sermone; quē cum  
Naupliis, ad urbis muros, atque portā uocatis, ingressus fuerat;  
equo



equo incitato equitibus imprudentibus se subripuit: atque in oppidum, uallo saltu equi superato, est receptus. oppidani primo cum Pauli hortatu ac studio, tū per se se plane paratissimi magno animo impetum hostium sustinuerunt: egressi; præterea per occasiones prælia nonnulla secundiora fecerunt. postea uero quā rex cum reliquo exercitu eō uenit: portas clauferunt, & munierunt; itaque inclusi magna se uirtute, atque constantia tuebātur. interim ex classe Thracia, quam rex Naupacto, ut terrorem hostibus incuteret, Naupliam ueterem cōuenire uniuersam uoluerat: naues triginta Eginam ad insulam missæ oppidum capiunt: relictisq; regio nomine qui præessent, Naupliam reuertuntur. hæc dum sic administrarentur: Benedictus Pisaurus Corcyram, deinde Zacynthum profectus dies ibi aliquot, antequam classis, quæ propter tempestatē aberrauerat, eō conueniret, se continuit. coacta classe nauium longarum maiorum duo de uiginti, minorum uiginti quinque, onerariarum plus uiginti; quam quidem paucorum dierum spatio magna cum diligentia, tum uero etiam seueritate adhibita remigibus, militibus, rebusq; omnibus ornatiorem melioremq; reddiderat; ad hostium classem insequendam se se promouet eo animo; ut, si assequi posset, prælium committeret. sed Rex de illius ad Zacynthum aduētū certior factus suæ classis præfectis, ut domum redirent, Byzantiumq; se reciperent, imperauit. posteroq; die ipse; qui quidem non magnopere suis iā copiis confidebat: propterea quod neque paruam, neq; sane spernendam militum equitumq; partem eorum, qui Methonem obsedissent, eo in bello expugnationeq; amiserat: omni cum exercitu abiit. eodem tempore Pisaurus Naupliā speculatoriis præmissis nauibus classem Thraciam & exercitum abiisse certior factus, Eginam contendit; expositisq; militibus Turcas, qui præerant, interfecit eorum duce capto: atque insulam reip. restituit. Mitylenen deinde triremibus leuioribus accelerans, quod appulso hostes intellexerat, ferro, atque igni omnia demetens prædā, & quidem opulentam quam abegerat, remigibus & militibus cōcessit: posteroq; die Tenedum diripuit, incendit, classisq; hostium fugientis atque in Euripi angustias iam ingressæ reliquias affecutus, naues complures extremo in agmine cum hominibus



cepit: fixisq; utroque in litore non unis crucibus captos Europæ  
atque Asiæ spectaculo recte suspendit, agros & uicos depopula-  
tus, ut qui oras incolerēt magnopere perterreretur. Samo Thra-  
ciam ad insulam post hæc eadem celeritate adueniēs; cum intel-  
lexisset oppidanos ægerrime Turcarū imperium perpeti; Aloisio Decanali triremis præfecto ad oppidum misso eos libentissi-  
mos in deditionem recepit: petentibusq; ciuē Venetum, qui præ-  
esset; pollicitus est se missurum. illi partem decimā suorum fru-  
ctuum quotannis ei se daturos receperunt. deinde Caristo dire-  
pta ad naues longas maiores onerariasq; rediens, Naupliam se  
contulit; municipibusq; & militibus collaudatis, stipendio, quos  
oportuit, recreauit, & sua liberalitate subleuauit. iis confectis re-  
bus discedens dum Coronæ litora præteruehitur; de Carolo Cō-  
tarenō, qui magistratus reip. Pilo præfuerat, oppidumq; situ &  
natura communitum hostibus nulla coactus uel obsidioneq; tradi-  
derat; in suæ nauis prora supplicium sumpsit. ibi cognoscit Hi-  
spaniæ regum classem reip. auxilio missam Zacynthum uenisse. ii  
enim Reges Aloisii Galliæ regis prædicatione permoti, qui re-  
gnum Neapolitanum bello aggredi statuisset; tum classe ab rege  
Thracio comparata, ne insulam Siciliam sine præsidio relinque-  
rent; classem & ipsi confecerunt; illoq; miserunt Consaluo Ferdi-  
nando præfecto, qui bello Neapolitano dux eorum fuerat. eam  
classem ut reges auxilio reip. uellent esse, posteaquam suis iam fi-  
nibus nihil timerent; Senatus ab iis impetrauerat; Alexandro ad-  
iuuante. ea erat nauium plus quinquaginta. quibus in nauibus mili-  
tes imposuerant numero ad septem millia. cognito Consalui ad-  
uentu Pisaurus Zacynthum ad illum uenit. quem quidem reip.  
magnopere prodesse cupientem cum reperisset: rebus belli ratio-  
nibusq; omnibus unā cum illo communicatis, ex ipsius, & reli-  
quorum Hispanarum nauium præfectorum, quos Consalius in  
concilium adhibuerat, & legatorum sententia statuit ad Metho-  
nem recuperandam unā proficisci. eam ad profectionem, atque  
bellum quod res multæ materiæ indigebat cum ad castella, quæ  
parare instituerant, excitanda; tum ad nauium scaphas contegē-  
das, quibus in primis uti decreuerant; dato omnibus, qui aderāt,  
iureiurando, ne quis quid enuntiaret; concilio dimisso Cæphal-  
lenem



lenem ad insulam, quæ sylvis admodum abundabat, uterq; suam classem adduxit. Illis propè diebus cum ex Ioānis Crispi, de quo dictum est; qui Naxum insulā obtinebat; liberis is, qui natu erat maior, Mathei Lauredani filiam in matrimonium duxisset; Senatus placuit, ut magistratus reip. amplius eò nō mitteretur; Naxi; Ioannis filio iam adulto restituerentur; dum is paterni regni formam ne uellet imitari, Senatusq; liberalitate ad iustitiam & temperantiam uteretur. Interim autem dum ad Caphallenē materia cæditur; & turres reliqua; quæ sane plurima eius belli administratio requirebat; per fabros cōficiuntur: ne reliqui milites tempus temere contererent; communi consilio statuerūt Caphallenes oppidum aggredi; turpe futurum existimantes, si ab insula re non tentata discessissent: posse Turcas gloriari duabus classibus tam paratis atque tantis animum ad id capiendum defuisse. iis cōstitutis, rebus navis una oneraria trium millium amphorarum Genuæ ab Aloisio rege Galliæ auxilio reip. comparata Caphallenem appellitur; ut Pisauro præsto esset. ad eius navis præfectum, qui erat infirma ualitudine; Pisaurus legatos misit salutatum, actumq; regi gratias quòd in reip. liberalis tam opportuno tempore fuisset. præfectus expectare se se nauem alteram dixit; quæ item Genuæ instructa secum unā soluiisset; tempestateq; acta cursum non tenuisset: earum nauium, & militum mille quingentorum, qui in illis erant, trium mensium stipendia regem subministrauisse; ea stipendia desinere ad diem duodecimum Calendarum Decembris. is autem dies, quo die illa dicebantur, erat ante diem sextum Iduum Nouembrium. eis si nauibus post eum diem uti uellent, ipsos stipendia præstare oportere. ad ea Pisaurus respondi iussit, se nisi de Senatus auctoritate nihil acturum; literasq; de eo ad Senatum daturum. præfectus ubi ei rei moram esse interpositam uidit; nactus idoneam tempestatem uela fecit; atque abiit. de nauis altera post illa nihil est auditum. Pisaurus interea Consaluisq; tormentis muralibus editis, oppidi muros uerberare cōplures dies institerunt. nā quòd erat loco editiore, monti etiam pluribus à partibus prærupto oppidum impositum, ea res magna cum difficultate administrabatur. deinde suo cuiq; legatorum, & præfectorum nauium attribu



to munere; ut, quam quisque oppidi partem signo dato aggrediretur, irrumpereque conaretur, antea cognosceret; statuerunt experiri quantum in hostibus ad propugnationem animi uirtutisque inesset. erant autem, quemadmodum à profugis intellectum est, milites oppidi praesidio trecenti. die oppugnationis dicta eiusmodi tempestates fuerunt, ut res differri oportuerit. demum pluuiis remittentibus, pilis ferreis frequentioribus eiacularis omnes se ad muros contulerunt: conscendereque scalis positos aggressi, hostibus saxis sagittis omni missilium telorum genere accerrime se defendentibus, oppidum capere non potuerunt. itaque nonnullis interfectis, uulneratis compluribus, se in castra receperunt: quorum ex numero fuere Hispani praefecti aliquot, Venetique ciues sex, & Gurlinus uir egregia explorataque uirtute: quem Pisaurus Nauplia obsessa plurimum oppidanis profuisse; & praecleara multa oppido tuendo instituisse effecisseque cognouerat; & secum abductum militibus suis omnibus tum praefecerat. atque is magno nostrorum omnium, & Consalui dolore, qui ei largiter iam tribuebat, paucis post diebus est mortuus. eo accepto detrimento, duces ualidum excitari usque eo, ut munitionem, quam hostes intra oppidum deiecto muro fecerant, superaret, suis militibus mandauerunt. Dum haec ad Caphallenem geruntur; Pilos per insidias ad reperiendum rediit. erat in Pisauri trireme miles signifer Demetrius quidam Methonensis, is amicum Epirotam item militem in Pili praesidio cum haberet: ad eum bis ter uel amicitiae nomine ubi uenit hominem spe pollicitationibusque impulit, sibi ut socius magni facinoris uellet esse. re constituta ad Pisaurum reuertitur. Pisaurus ei milites quinquaginta ex omni classe deligendi potestatem facit: eos ei milites attribuit. ille cum iis trireme impositus Pilon noctu proficiscitur: expositusque clam in Epirotae domum oppidi muro uicinam se atque milites occultuit, quoad die inlucescente portae oppidi aperirentur: apertis portis Demetrius cum suis in oppidum irrumpit, & Turcas, qui oppidi erant praesidio, imparatos obtruncat circiter quinquaginta, paucis elapsis; qui se muro deiecerunt. ita oppidum recipitur. ad id Pisaurus triremes duas cum militibus, & Hieronymo Pisano legato, qui praesset, oppidumque communiret; Venetoque ciue Syluestro Trono, quem is magistratum



magistratum ibi relinqueret, statim misit: nam quod erat portu  
 egregio, reip. fore usui ad classes recipiendas & tuendas mirum  
 in modum existimabatur. eo capto equites centum quinquagin  
 ta cum uxoribus & liberis Corone se Pilon è uestigio contulerunt,  
 oppidumq; munierunt. sed iam uallo ad Caphallenem excitato,  
 uti de superiore loco nostri in oppidum introspicerent; duces op  
 pugnare, quibus à partibus poterant, uno tempore sunt adorti,  
 eo uterq; animo, eaq; cura, ut, utrius plures essent eo in bello par  
 tes, non facile dignosceres; Consaliusq; ciuis esse Venetus & ip  
 se uideretur. neque eius quidem milites ullo in munere à nostris  
 se militibus relinqui sustinebant; homines duri parcoq; uictu as  
 sueti, & cum audaci in primis uirtute, tum maxime habiles, qui  
 oppidorum oppugnationibus adhiberentur. ea in aggressione  
 Marcus Orius nauium onerariarum præfectus unà cum Hispa  
 no homine impigro; quem ei Consalius muneris socium dede  
 rat; militesq; aliquot se in muro atque munitionibus primi om  
 nium illatis signis ostenderunt. ea re hostes perterriti cedere, seq;  
 recipere in arcem oppidi cum uellent; irrupentibus omni ex  
 parte reliquis cæsi captiq; sunt, præter paucos, qui se primo impe  
 tu in arcem intulerunt: qui tamen paulo post se Consaluo dedi  
 derunt, cum Venetorum iram; quos & ipsi sapius elusissent, &  
 rex eorum maximis incommodis affecisset; non iniuria pertime  
 scerent. Caphallene in reip. editionem anni exitu redacta, oppi  
 do Aloisius Salomonius,arci Ioannes Venerius, toti insulæ Frā  
 ciscus Leo à Pisauro sunt præfecti dati in annos duos. arx etiam  
 ut multo communior fieret, institutum. missaq; Pilon nauis one  
 raria magna; qua in nauis Coronei, qui cum familiis eò uenerāt,  
 Caphallenem adueherētur. nam quod eam insulam propter bo  
 nitatem agrorum maxime esse feracem intelligebant; & illi, qui  
 libere Pilo exire, atque agros colere hostibus Methonem obtinē  
 tibus non poterant; & multi præterea homines Turcas perosi eò  
 ad incolendum è continenti commigrauerunt. quam quidem ad  
 rem portus perampli perq; optimi facultas, quo nullus est eo to  
 to mari ferè præstantior, magnum adiuumentum afferebat. itaq;  
 paruo temporis spatio à magna est aduenarum multitudine coli  
 cæpta; cum per biénium à classibus reip. uexata cultoribus infre



quentior fuisset. illis diebus triremes duæ Naupliam à Pisauro  
missæ, dum redeunt, biremes Thracias quatuor expugnaverunt;  
biremēq; unam Veneram, quam illi ad Eginam insulam ceperat,  
recuperauerunt. Consalvus, qui suam classem in aqua menses  
complures habuisset; magnamq; nauium partem inutilem ad na-  
uigandum breui futuram uideret; Methones autem recuperan-  
dæ negotium Pisaurus in aliud tempus distulisset; quod Turcæ,  
Pilo amisso, eam militibus apprime communierant, diligentiusq;  
tuebantur: se reuersurum uere ineunte pollicitus, ad classem refi-  
ciendam primis anni diebus in Siciliam rediit. ante autem quā  
proficisceretur, uini Cretici amphoræ quingentæ, casei libræ sexa-  
ginta millia ei dono à Pisauro datæ. alia etiā ab urbe munera pre-  
tiosiora à Senatu mitti nunciatum: quæ ille Senatui gratias agens  
se non cupere præ se tulit: suorum enim regum in temp. beniuo-  
lentia causa uenisse: quibus satis omnibus pro muneribus esset  
par atque mutua Senatus in illos uoluntas & beniuolentia. Se-  
natus tamen, postea quā de Consalvi abitu est ei nunciatum,  
legem tulit, uti Consaluo ciuitas cum iure comitiorum daretur;  
cuiusq; Venetus cum libris argenti fabrefacti ducentis sexaginta  
sex in Siciliam ad illum mitteretur, qui eum de rep. optime me-  
ritum diceret, lectusq; Gabriel Maurus, unus ex magistratibus,  
qui res maritimas in Senatu procurant; paulo post est profectus.  
Pisaurus cum sciret in sinu Ambracio naues longas complures,  
quas hostes fabricari curauissent, esse iam deductas: nauibus lon-  
gis aliquot, onerariāq; una Caphallenæ præsidio relictis, decimo  
Calendas Februarias sua cum classe triremium leuiorū quatuor-  
decim, grauiorum octo, nauium onerariarum quatuor; reliquas  
enim missas fecerat; ad insulam Leucadiam est profectus. eius  
in insulæ portu, in quo nihil offendi poterat, ex omni triremium  
numero leuioribus lectis octo; atque in illas ex reliquis nauibus,  
quos uisum est, remigibus & militibus impositis; cum iis ad si-  
num Ambracium prouehitur, reliquis nauibus in portu relictis. is  
habet sinus aditum perangustum, quā naues commeant, ut lapide  
manu iacto ferè traiciatur. reliqua latitudo uadis breuioribus  
impedita, nauigia triremesq; non recipit. in eius ore sinus, turris  
est communita ad arcendos, si qui ingredi ui experiantur. Pisau-  
rus



rus citatis remigibus dum turrim præteruehitur, lactu ab ea tormentorum tribus aut quatuor militibus interfectis, ad triremes Thracias numero undecim rebus iam omnibus armamentisq; in structas processit. portus est in sinu Ambracio, in quem flumen, quod nunc appellatur Preuesa, influit. eo in portu naualia ad tuendum locum idoneo sunt castello proxima: aditus uero ad portum eiusmodi, ut singulae tantum triremes ingredi possint. iis in nauibus fabricatae naues Thraciae tum in portu stationem habebant. eo ingressus Pisaurus, expositisq; militibus, hostes castello egres-  
 sos, quiq; naues adseruabant, acerrime cum iis congressos fudit; incensisq; aedificiis præda etiam rerum ad armadas naues comparatarum ingenti facta, triremes hostium nouas omnes remulco e portu abduxit: duas ueteres, quæ semiplenæ aqua ad litus erant deligatae, incendit; cum iis in rebus administrandis quadraginta ex suis præda cupidius allectos, temereq; procurentes amisisset. abductas deinde lateri suarum nauium adglutinans, atque ad turrim conuersas trahens, reliquis omnibus incolumibus ad eos, quos in portu Leucadiae reliquerat, rediit; Corcyraeque omnibus cum nauibus ad supplendam classem ante diem Calendarum Februar. uenit. ibi Hieronymo Contareno legato reperto, qui ex Leucadiae litoribus uoletudinis, ut aiebat, causa nullo Pisauri permisso Corcyram discesserat; cum ignominia notauit; ut legatione praefecturisq; omnibus annos duos careret. eodem tempore, uti qui pro rep. mortem oppetissent, inornati ne relinquerentur, in Senatu lex est lata: ut Gurlini Rauennatis, qui Cæphallena, Antonii Fabri, Pauli Epirotæ praefectorum militum, qui Methone interfecti fuerant, liberis, quoad uiuerent, pensiones annuæ curarentur: ipsorum præterea filiabus sex dos sexquidra auri singulis constituta. neque multo post Aloisii Michaelis liberis, & Ioannis Maripetri fratribus; quos utrosq; triremium praefectos auxilio Methonensium à proimperatore missos ab hostibus interfectos dixeramus; arcis Mestrinae, itemq; Patuinae ad Medoaci in oppidum influxum praefecturas, alteris per annos quindecim, alteris, quoad eorum maior natus uiueret, & uni uirgini dotem ciuitas dono dedit. reliquis triremium praefectis, qui Methone capti eodem impetu fuerant, seq; pecunia redemerant; Alexan-



dro Gotio Corcyrensi, in ea insula magistratus; Nicolao Cucaro Hydruntino, in sua urbe item magistratus, & auri libra unciaeq; septem annuæ; Iacobo Balbo Parenfi, auri totidem libra unciaeq; item singulis omnium tributorum immunitas attributa, præmia insuper in complures uiuos, qui se fortiter atque amanter gesserant, ex Pisauri literis honorifice collata: dataq; lectis ad id magistratibus cura; ut Methonensium, quibus quidem aut parentes, aut fratres, aut liberi pro rep. interfecti fuissent, qui Venetias uenissent, causas cognoscerent; deq; eis ad patres referrent; ut pro cuiusq; incommodis, & iacturis à Senatu sarcirentur, aut omnino subleuantur. latum præterea de Naupliis, uti eis, bello confecto, immunitas per annos decē concederetur; domusq; eorum, quas ipsi dirui permisissent, ut oppidum communitus fieret; reip. pecunia restituerentur. his rebus domi, forisq; administratis Cæsar Alexandri filius, cui paulo ante à rep. petente patre cum iure comitiorum ciuitas data fuerat; puellam ex Elisabetæ Metaurensium reginæ famulatu, ad Carratium reip. militibus præfectum, cui erat nuptui tradita, proficiscentem, medio inter Ariminum, Rauennamq; itinere: missis Cesena suis equitibus ui rapuit, comitatu eius pulso, uulneratis compluribus. eius ille oppidi paucis ante mensibus regnū obtinuerat, Alexandro tradente, tum Pisauri atque Arimini rep. ægre illa quidem, quod ad Ariminū attinet, ac penè subinuita, sed tamen, ut perpetuis Alexandri postulatis, precibusq; satisfaceret, unā cum Aloisio rege Galliæ, qui suas ei copias iterum dederat, annuente atq; permitte. ea erat puella miræ pulchritudinis. itaque amore incensus adolescens, cum pretio aut precibus assequi se se posse nihil uideret; sumptis à nouo regno animis ad uim faciendam se conuertit, & uirgine per scelus est potitus. ea re ad patres celeriter delata, Decemuirum decreto Aloisius Manentius est ad Cæsarem eo ipso die iussus contendere (is erat fori Cornelii) questum de iniuria tam insigni, quā resp. pro suis in eum beneficiis nihil meruisset; puellamq; repetitum. posteroq; die Aloisii regis legatus, re à patribus grauius apud illum expostulantibus cognita, sua sponte ad Cæsarem iisdem cum mandatis est profectus, cum eā fraudem, atque iniuriam etiam ad suum regem, qui Cæsarem ut

Flaminia



Flaminia potiretur, adiuuisset, existimaret pertinere. nihiloq; se-  
 cius literæ sunt ad Alexandrum à Senatu datæ magna cum quere-  
 la. sed neque Manentius, neque regis legatus quidquam apud  
 eum ualuerunt: ne dum literæ ad patrem missæ proficerent, per-  
 negauit enim ille suo iussu id fecisse, qui puellâ rapuissent; neq;  
 se, qui essent, adhuc quidem comperisse: repertis autem raptori-  
 bus, cui quidem rei omnem esset diligentiam adhibiturus, se da-  
 turum operam; ut & rex, & Senatus Venetus, & omnes homines  
 intelligerēt, quàm ægre tulerit suis in finibus id fuisse facinus atq;  
 flagitium perpetrātū: puellas sibi non deesse; quas habere facile  
 possit; ne hac tanta cum reip. offensione, atq; inuidia, & suo cum  
 probro per uim atque fraudem potiri concupierit. patres uerba  
 sibi dari intelligentes, cum mittendis nuntiis, ac literis multos  
 dies consumpssissent; quòd rebus belli ab ea cogitatione auoca-  
 bantur; Carratium, qui ad eos questum uenerat, consolati, eius  
 uindictam sceleris in aliud tempus distulerunt. Post hæc autem  
 reip. legati, qui ad Vladislaum Pannoniæ regem anno superio-  
 re missi fuerant, ut illum ad bellum in Turcas incitarent; fœdus  
 cum rege aliquando tandem percusserunt. quo ex fœdere bellū  
 regi Thracio inferre omnibus copiis Vladislaus iuebatur; res  
 uero p. mille auri libras tribus pensionibus regi Pannoniæ mitte-  
 re, quotannis tenebatur; quoad bellum esset confectum. ei fœ-  
 deri feriendo Alexander & auctoritatem adhibuit suā missō Ro-  
 ma legato è Cardinalium collegio; & auri libras annuas quadrin-  
 tas regi Pannoniæ per triennium pollicitus est se daturum. domi-  
 uero inter hæc, ne ad bellum pecunia deesset, lex est lata, uti qui  
 fundos atque agros in continēti possiderent pro quoque soli cul-  
 ti iugero siliquas argenti septem in ærarium conferrent; semel  
 quidem tantum præter Carnos, quorum se in fines Turcæ supe-  
 riori anno intulissent. literæq; ad ciuitates datæ, quæ eas horta-  
 rentur, tam duris reip. temporibus ne deessent, atque urbem la-  
 borantem subleuarent. Pisaurus classe Corcyræ remigibus reli-  
 quisq; rebus instaurata ad naues longas, quas Turcæ in Loi flu-  
 minis ripis ædificauerant, atque in flumen deduxerant, capien-  
 das, aut incendendas animum adiecit. itaque cum sciret eius flu-  
 minis hostium adiri magnis à nauibus non posse alueo diffun-



dente se se magis, quàm demittente, nisi cum flumen ex imbris  
creuisset: tametsi inuecta hostium nauigia satis alta aqua excipie  
bat, onerarium & longarum nauium scaphas complures inte  
gi iussit. quibus in scaphis atque in biremibus duabus milites im  
posuit, Marcumq; Orium nauium onerarium præfectum, qui  
se obtulerat, ei negotio præposuit. ipse Aulonam cum longis na  
uibus est aggressus; ut hostes occupatos ea in propugnatione di  
stineret, ne suas peti naues existimarent. porro Turcæ uel de ea  
re, ut sæpe fit, certiores facti; uel ipsimet propter recentem in sinu  
Ambracio nauium suarum iacturam idem in Loo flumine me  
tuentes; eas naues longius ab hostio in flumen introduxerant,  
passuū millia quatuordecim; atq; unā composuerant sic, ut pro  
ras secundum cursum fluminis conuersas haberent; ipsæ, quod  
remi nondum erāt impositi, inter se coniunctæ totum flumen ca  
perent. ripas autem Turcæ tormentis communierant ad naues  
hostium repellendas. Orius, audacissime superato flumine, cum  
nauibus Thraciis appropinquauisset: eas magno militum præfi  
dio fultas, atque instructas est conspicatus: tum missis in eum ex  
utraque ripa frequentibus tormentorum pilis, ad illas propius  
accedere non potuit. itaque omnem aditum frustra expertus, cre  
scēte hinc atque hinc hostium multitudine, scaphas retrahi impe  
rat. redeuntibus Turcæ summis in ripis atq; ipso propē in flumi  
ne occurrerunt; nauiculamq; unam truncis ramisq; arborum,  
quos in flumen deiecerant, impeditam oppresserunt. ipse cum  
reliquis incolumibus ad hostium fluminis cum reuertisset; atque  
interim mare, quod uadum late erat, magno coorto uēto se ex  
citauisset; erumpere ausi mediis in uadis naufragium fecerunt.  
quorum pars interiit, atq; in his Hieronymus Maurocenus pro  
pinquus meus, nauis onerariæ bellicæ præfectus magno animo,  
magnaq; uirtute. reliqui pleriq; in littus eiekti, ab hostibus capti  
sunt; præter nauiculas pauculas; quæ tépestare superata se Dyr  
rhachium contulerunt; quò iam uenerat Pisaurus; eaq; illum de  
re certiore fecerunt. Marcus Orius, & Vincentius Pascalicus,  
nauis item bellicæ præfectus, capti. ac fuit eorum, qui interierūt,  
& qui in manus hostium peruenerunt, numerus circiter trecenti.  
Pisauro Dyrrhachio digresso, Georgii Castriotæ Epirotæ horta  
tu &



tu, & Antonii Boni legati sponte se Alexiani dediderunt. est Alexium in Drino flumine, quod uado transiri non potest, insula triquetra, mare uno ab latere attingens, ab reliquis flumen, quod ipsa dirimit. eorum quodque laterum tria millia passuum efficit: ipsa uallo circumunita: quam ad insulam, capta ab rege Thracio, & corda, eorum locorum se se homines contulerunt, atque incolere coeperunt. ea Turcae ad mercaturam utebantur; magnumque frumenti numerum, quo montani late homines earum regionum alerentur, neque paruum salis copiam quotannis eo conuehebant. picis autem ceraque ac mellis magnam uim eodem ab interioribus Illyrici finibus, atque ab Epiro importari solitam coebant. iisque reip. usui futurus locus uidebatur. Eo tempore Alexander triremes reip. uiginti pecunia sua sacraque se armaturum pollicitus; quibus ciuitas bello Thracio uteretur; quindecim modo per suos ministros, ut instruerentur, diligentiam adhibuit: reliquas quinque Senatui armandas remisit: cum ei pecuniam sacram, quam homines imperio Veneto, ut criminibus, & maleficiis obnoxii, ob commissam post mortem apud inferos poenali berarentur, ex Alexandri literis persoluerent, bello Thracio insumendam permisisset: quarum omnino uiginti nauium imperium legatus ab se se datus obtineret. is fuit Iacobus Pisaurus Episcopus Paphiorum ex Veneta nobilitate: qui etiam maiori earum nauium parti, quam Venetiis armandam curauit (nam reliquam in Flaminiae maritimis municipiis Anconae instruxerat) praefectos ciues sibi Venetos adlegit. pecuniae uero sacrae summam libuit mihi huic loco adscribere: ut intelligi possit, quantaque ardens eo tempore fuerit in hominum mentibus religionis existimatio, & Deorum immortalium timor. porro in urbe auri librae ducentae nonaginta septem eo nomine sunt confectae, Patauii una & sexaginta, Vicetiae sexaginta quatuor & semilibrae, Veronae una & triginta, Brixiae quadraginta octo, Bergomi ferè quadraginta quatuor, Cremonae xii, Cremae plus nouem, Taurisi uiginti quatuor, Feltriae duodecim & semilibrae, Ciuicidali Carnico nouem, Utini quadraginta duae. atque ut à claris urbibus ad tenuiora oppida descendamus, Fossa Clodia libras auri paulo minus octo facile contulit: Portus, quem Gruarium appellant,



ferè undecim : Colonia, qui quidem uicus est in Vicetinorum finibus, quatuor : itemq; supra quàm quis crederet alia in continenti castella, uiciq; : ut esset summa omnis auri libræ septies centies & nonies, eoq; amplius. Atq; illo ipso tempore Cæsar Alexandri filius diu pressam armis, atque acri obsidione Fauentiam, à qua patres Alexandri precibus legatum suum reuocauerant, certis conditionibus tandem cepit : Estoriq; puero ea lege se dedit, uti saluus sospesq; esset, fidem fregit : Romamq; adductum, atque in custodia complures menses adseruatum necauit. Per eos etiam dies Patauii Baptista Zenus è Cardinalium collegio moritur, grandi pecunia, argentiq; fabrefacti magno pondere testamenti tabulis suæ genti, & propinquis, & sacerdotum collegiis, & reip. relicto. abscondiderat is Roma ueniens aliquot ante annos auri libras ducentas sexaginta Anchonæ in ædis sacrae pariete. de eo Alexander à Senatu certior factus aurum abstulit. Zeno ad urbem delato funus amplissimum publice curatum, laudauit Angelus Gabriel, postea ei ex testamento Senatus in ædis Marcia porticu sepulcrum ex ære ponendum locauit. Interea in Achaia magnum incommodum publice est acceptum Pilo ab rege Thracio iterum capta. is enim cum eò & terrestri itinere equitum millia complura, & mari triremes quatuordecim, & biremulas quinque (sic enim naues eas appellant, quæ ferè semitriremium loco sunt) Camali præfecto misisset; essentq; in Pili portu triremes reip. tres sine ulla statione, aut specula: eas Camales improviso aggressus, non magno negotio cepit. aliquot ex iis, qui in eis erant, fuga in scaphis elapsi ad triremes quinque maiores reip. quæ cum mercibus Beryto illo ipso tempore uenerant, erantq; in anchoris portui uicinæ, se contulerunt. eæ quinque eadem formidine usæ, cum terrori esse hostibus potuissent, uelis factis abierunt. quarum conspecta fuga, qui Pilo præerant, se se hostibus dediderunt. earum triremium præfectis eo minus ignoscendum fuit; quòd paulo ante Cretæ cum essent; à Pisauro eis erat imperatum, ut se Pili expectarent. isq; postero die cum triremibus quindecim eò uenit. sed Camales, cum Pisauri classem è longinquo uenientem ii, qui in specula erant positi, conspexissent: id enim ne accideret, uerebatur, ut in Pisaurum,



rum, quem breui eò uenturum à captiuis intellexerat, imprudens incideret: è uestigio triremes captas abducens, litusq; proximum legens, ei se uitabundus eripuit. Pisaurus deinde Corcyram adueniens, quòd audierat naves longas Turcas è Loo flumine, quæ in eo erant, breui educturos; triremes aliquot misit, quæ hostium fluminis adseruarent. ipse cum reliqua classe longarum nauium uiginti quinque in Achaïam reuehitur, atque in Coronæ sinibus magnum hominum numerum cum uxoribus & liberis suis in nauibus imposuit, quos Caphallenem ad incolendum traduceret. paulo post Eginæ cum esset; intellexissetq; Megaræ & biremes fabricari, & frumenti magnam copiam esse: Aloisium Lauredanum legatum cum nauibus octo, si quid ex usu efficere posset, eò misit. is bireme una cum hominibus, altera uacua captis, expositis militibus, & equitibus Nauplii adhibitis, prælio cum Megarensisibus commisso eos fudit: atque arcem, quæ à Thracibus defendebatur, magno impetu cepit: ac recte suspensis iis, qui oppugnationi superfuerant, quosq; cum biremi ceperat, frumētoq; omni abducto, oppidum incensum, ac solo æquatum delēuit: ne impedimento Naupliis esset, quo minus eo ab latere quàm uellent libere uagari eis liceret. idem postea complures ad insulas, postremo ad Euboeam profectus, prædam, & quidem opulentam abegit: oppidaq; aliquot & castella multa incendit: ac magnum propugnatorum numerum interfecit, ingenti undiq; omni illo in mari terrore hostibus atque formidine incussa. quo quidem tempore captis ab se oppidis rex metuens, Coronem, Methonem, Pilon muris, & propugnaculis, reliquisq; rebus ad hostem repellendum idoneis, & militum præsidio apprime communiuit. Nauplii autem equites, cum hostes ad illos laceffendos in eorum propè suburbia irrupissent, egressi eos fuderunt: ex quibus ducenti quinquaginta interfecti atque capti. idem paulo post alii hostium equites Catarbeio duce aggressi, omnes à Naupliis capti sunt præter ducem, qui cum duobus equitibus aufugit. Reuerso Corcyram Pisauo, ut classē regis Galliæ, itemq; regis Lusitanæ, de quibus proximo libro dicitur, expectaret: magistratus reip. qui Dyrrhachio præerat, morbo affectus, ut ualitudinem curaret, Olcinium se contulit cœli salubrioris gratia. eam oc-




casionem nacti hostes, noctu Dyrrhachium furtim aggressi, scalis  
ad murum positis se in oppidum intulerunt: interfectisq; paucis  
somnia expergefactis oppido sunt potiti. sed ea æstate foris Pilo  
atque Dyrrhachio amissis, nullo autem negotio, quod ma-  
gnopere ex usu esset, confecto, domi Augustinus  
Barbadicus uita functus est de Mense Septem-  
bri, cum annos X V. ciuitatis principa-  
tum obtinuisset.



82

PETRI BEMBI RERVM VENE-  
TARVM HISTORIAE  
LIBER VI.



**T**ALIBVS iactatae incommodis ciuitati  
malum etiam inopinatum ab longinquis gen-  
tibus & regionibus extitit. Petri enim Pascali-  
ci apud Emanuele Lusitaniae regem legati li-  
teris patres certiores facti sunt, regē illum per  
Mauritaniae Getuliaeque oceanum conuehēdis  
ex Arabia Indiaque mercibus itinera, suis tenta-  
ta saepe nauibus, demum explorata compertaque habuisse: nauesque  
aliquot eo missas pipere, & cinnamis, eiusmodique rebus onustas  
Olyssipponem reuertisse: itaque futurum, ut eius rei facultate Hi-  
spanis hominibus tradita, nostri in posterum ciues parcius, angu-  
stiusque mercarentur; magnique illi prouentus, qui urbem opulen-  
tam reddidissent toti penē terrarum orbi rebus indicis tradendis,  
ciuitatem deficerent. eo nuntio patres accepto non paruum ani-  
mi aegritudinem contraxerunt; quam tamen compendiis alio-  
rum populorum solabantur. simul & illud cogitabant; amabile  
*profecto esse nouas regiones alterumque* propē acquiri orbem, gē-  
tesque abditas atque sepositas celebrari. ac postea quā hunc ad  
locum meorum me commentariorum cursus perduxit: nō alie-  
num esse arbitror; quod eius rei omnium, quas ulla aetas unquā  
ab hominibus effectas uidit, maximae, atque pulcherrimae fue-  
rit initium; tum quae terrarum portio post id, quae uel gentes &  
quibus moribus sint repertae quantum suscepti operis ratio per-  
mittet, breuiter dicere. Erat Columbus homo Ligur ingenio per-  
acri; qui multas emensus regiones, multum maris, & oceani per-  
lustrauerat. is; ut est humanus animus nouarum rerum appetēs;  
Ferdinando & Isabellae Hispaniae regibus proponit, edocetque;  
illud, quod omnis ferē antiquitas credidit, quinque esse coeli par-  
tes, quarum media caloribus, extremae duae frigoribus sic afficiā-  
tur, ut, quae sub illis sint totidem terrae plagae, incolae ab homini-  
bus nō possint, duae tantum inter eas sub eisdem positae coeli par-



tibus possint: inanem esse antiquorum hominū fabulam, & nul-  
lis ueris rationibus fultam, & confirmatam descriptionem: im-  
prouidum propè necesse esse haberi Deum, si ita mundum sit fa-  
bricatus; ut longe maior terrarum pars propter nimiam intem-  
periem hominibus uacua nullum ex se se usum præbeat: globum  
esse terræ hunc eiusmodi; ut commeandi per omnes eius partes  
facultas hominibus ne desit. cur sub media cœli cōuersione de-  
gi nō possit; ubi diei calor cū noctis frigore pari dimenso utriusq;  
moræ spatio temperetur? præsertim cum tam cito sol in alterutrā  
declinet partem: cumq; sub iis cœli conuersionibus, in quibus  
nostro uertici propior longinquam sol moram trahit, tamen de-  
gatur? argentes sub septentrionalibus esse terras: sed eas homi-  
nibus non defici: sic sub australi terras esse frigidas uertice, esse  
animantium, atque hominum genus: quem oceanum scriptores  
appellarint, eum non esse inertis magnitudinis; sed insulis atque  
terris scatere, quas homines inhabitent: itaque uigere atque in-  
coli uniuersum globū, qui ubique sit uitalis auræ particeps. Hac  
oratione apud reges habita petit, ut sibi liceat eorum opibus no-  
uas insulas, noua litora quærere: spem se habere, nō defore ince-  
ptis fortunam: ditionemq; ipsorum magnopere iri auctum, si  
rem susceperint, confirmat. Ab regibus noua spe allectis sen-  
tentia Columbi, quam quidem totum septennium reiecerant, ad  
extremum comprobata; quā tamen multo antea Possidonii phi-  
losophi Panetii discipuli primum, deinde etiam Auicennæ medi-  
ci fuisse uideo, magni, & præclari uiri; anno ab urbe cōdita mil-  
lesimo septuagesimo primo tribus cū nauibus Columbus ad in-  
sulas Fortunatas; de quibus superioribus libris sermonem habui-  
mus, quas Canariās appellant; profectus, atque ab iis tres & tri-  
ginta totos dies occidentem sequutus solem, sex numero insulas  
reperit; quarum sunt duæ ingentis magnitudinis; quibus in insu-  
lis luscinix Nouembri mense canerent; homines nudi, ingenio  
miti, lintribus ex uno ligno factis uterentur. frumentum hi ha-  
bent, quod maicem appellant, multo, quā nos, spica, & culmo  
grandioribus, arundineisq; foliis, & plurimo ac rotundo grano;  
quod spicæ infixum membrana pro aristis uestitur; quam quidē  
maturefcens reiiciat. animalium quadrupedum genera habent  
per



perpauca, ex his canes pusillos; qui muti etiam sint, nec latent: auium uero longe plurima, nostris tum grandiora, tum etiam minora, adeo ut auiculæ inueniantur, quæ singulæ suo cum nido uigessimam quartam unciae partem non exuperent: psittacorum magnam copiam, forma, & colore uariam. uellera sponte nascentia ex nemoribus atque montibus colligunt. sed ea cum uolunt candidiora melioraq; fieri; ipsi purgant atque apud domos suas ferunt. aurum, quod in fluminum arenis legunt, habent: ferrum non habent. itaque præduris atque acutis lapidibus & ad lintres cauandos, & ad reliquam materiam in usum domesticum formandam, aurumq; molliendum pro ferro utuntur. sed aurum cultus tantummodo gratia molliunt: idq; auribus, & naribus perforatis pendulum gerunt: neque enim numos nouerunt, neque stipis ullo genere utuntur. harum duarum insularum unius cum rege amicitia fœdereq; inito Columbus duo de quadriginta ex suis apud illum relictis; qui mores & sermonem gentis addiscerent, seq; breui rediturum expectarent; decem ex insularibus secum duccens in Hispaniam rediit. hæc illorum itinerum origo, institutaq; ad incognitas orbis terrarum oras nauigationis initium hoc fuit. Anno autem insequente, ut pollicitus fuerat, Columbus cum nauibus decem septem, & militibus, & fabris, & commeatu omnis generis missu regum eodē rediens, cum se ad læuam uersus parumper flexisset, quamplures ad insulas est delatus: quarum partem homines incolebant feri trucesq; qui puerorū et uirorum carnibus, quos aliis in insulis bello aut latrociniis cepissent, uescebantur; à fœminis abstinebant; Canibales appellati. uicos hi habebāt uicenis aut tricenis domibus singulos: domusq; erāt omnes ligneæ, ac rotunda forma, palmis & stipulis contextæ certarumq; arborum & arundinū foliis ad arcendos imbres. aere utebantur adeo temperato, ut Decembri mense auium aliæ nidos ponerent, aliæ pullos educarēt suos. sed cum ad illam insulam, à qua reditum anno superiore apparauerat, Hispaniolamq; ipsam appellauerat, Columbus reuertisset: propter soli bonitatem magnitudinemq; insulæ, oppidum opportuno loco condere, ac terram colere cœpit. arbores frondibus nullo anni tempore spoliabantur, una aut altera exceptis, quarum Hispani, præter pinum,



palmanq; nobis cognitam uiderunt nullam. insulares duobus  
se è specubus terra proditos atque natos dicunt. Deos penates,  
quos appellant Zemes, colunt. eos plebs habet communes, suū  
uero ex regibus quilibet; eorumq; simulacra lana contexta in  
bellum profecturi capiti alligant; iuuariq; se ab iis maiorem in  
modum putant. noctu uagari mortuos credunt; posseq; omnia  
humana membra sumere præter umbilicum. ab suis Zemibus  
eiusmodi responsa non multos ante annos accepisse illos cōstat:  
uenturam eō indutam uestibus gentem, quæ regionem subigeret,  
& ipsorum aboleret Deos. sed uicinæ huic insulæ hominibus  
alterius ex duabus, de quibus supra dictum est, in sulis; quā  
quidem & propter magnitudinem Hispani terram esse continētem  
crediderunt; & hominum genere atque auri copia multum  
præstare cæteris intellexerunt; & Cubam appellari didicerunt:  
serpētes noua totius corporis specie ac forma præditi, sesqui per  
dis plerunque longitudine, qui ex terra & ex aqua uiuunt, in lau  
tioribus erant epulis. uerum enimuero & illi, & qui proximas  
obtinebant insulas; quarum magnus erat numerus; plerique au  
ream ætatem agere; nullum agri modum noscere; nō iudicia, nō  
leges habere; non literis, non mercatura uti; non in posterum  
sed in dies uiuere. ac dum hæc conquiruntur, Ioannes Lusitaniæ  
rex per legatos apud Hispaniæ reges queritur, sua litora, suasq;  
regiones ab ipsis tentari: eas, quas reperissent, insulas ad se specta  
re; qui Hesperides habeat; & cuius maiores oceanum percurrere  
ante omnes alios sint ausi. contra Hispaniæ reges dicere: quæ  
non fuerint ullo ab homine ante parta, omnibus hominibus pa  
tere: se nulli esse iniurios; si ab cæteris ignorata, labore & studio  
acquisiuerint suo. itaque magnis ex ea re obortis inter eos disce  
ptationibus; ne controuersia eiusmodi ad bellum deduceretur;  
utrique se Alexandri Pont. Max. iudicio staturos spondent. Ale  
xander tota re cognita statuit; ut à septentrionibus directā ductā  
in australem polum linea, quæ à Gorgonum insulis tercentena  
millia passus in occasum distaret, quæ pars orbis in oceano ad oc  
cidentem solem esset, ea Hispaniæ regibus cederet; quæ ad oriē  
tem spectaret, iuris Lusitani censeretur. ita orbis terrarum ab ea  
oceanī ora in duas diuisus partes duobus regibus perquirendus,  
&



& obtinendus est traditus. ad quā quidem certe rem magna uterque diligentia consequendam se dedit. Sed Hispanis ulteriora tentantibus terra est obiecta continens paulo minus decies centena millia passuum ab Hispaniola protensa meridiem uersus : atque in ea populi sub rege bellum cum finitimis gerente occurrerunt : quorum fœminæ uirum passæ nullam partem corporis , præter muliebria , uirgines ne illam quidem tegebant . regem ii suum honoris gratia sublime in humeris ferunt. Tū alii deinde populi capillo promisso , & liberali aspectu , auro atque gemmis culti . uino ii utuntur albo nigroq; ex quibusdam confecto fructibus sapore delectabili . post hos item alii , qui certarum se herbarum coloribus pullo & purpureo inficiunt : aspectuq; sunt in pugna eā ob rem tetriore ac horribiliore . Demum gens inuenta agilis admodum , & item nuda , genitalibus tantummodo cucurbitula uel marina testa inclusis . cadauera ibi regum & magnorum hominū desiccata in domibus asseruātur ; eaq; in honore magno habent . est etiam , ubi arida facta conterant , eoq; puluere in epulis & poculis honoris causa utantur . Postremo autem ad meridiem audacius in dies iter flectentibus Hispanis cū uertex se subducere noster cœpit ; tum è regione alia quædam magnopere splendentium quatuor stellarum forma atque series extitit ; quam esse australis uerticis faciem crediderūt . Visi post hæc homines nostris longe proceriores , & magno ad obeundas pugnas animo . tum flumen refertum insulis immani latitudine : patet enim amplius passuum millia centum : & syluæ arborum , quæ materiam habent ad tingendas lanas idoneam ; aliarumq; ita procerarum , ut eas uiginti hominum extremis se manibus contingentium capere complexus sæpe nequeat . filiquas hæ producunt longitudine palmari , pollice crassiores , lanæ mollissimæ cōcisæq; plenas ; quæ quidem ob tenuitatem , & breuitatem deduci in subtegmina fufis nō possit ; sed ad farcienda strata culcitræq; magnopere sit idonea . animal eæ syluæ nutriunt cuniculi magnitudine , gallinis infestissimum : quod quidem fœmina loculum habet è pelle utero adnexum , quasi uterum alterum , fœcundum uberibus , in quo catulos secum gestant , emittitq; cum uult . itaque si animal noxium uidet , si uenatores adesse intelligit , loculo illos recipit ; & inclu-



fos fugiens aufert. idq; tandiu facit; quoad catuli per se, & quæ sibi usui ad uictum sunt, quærere, & uitam tueri possint. In ea terrarum parte homines impuberes in omni ætate sunt propè uniuersi; neque ullos habent pilos. iidem magnopere natandi artè callent, tum mares tum fœminæ: eiq; rei ab paruulis insuescunt. filios ex sororibus sibi hæredes instituunt, quoniam non dubie suæ gentis sunt. mulieres adolefcētes parere, seruire ducunt esse. itaque si prægnantes fiunt; herba ad eam rem idonea abortum faciunt. cum uero ætatis flos exaruit; tum pariunt, ac proli student. sed quæ regio sunt sanguine; negare aliquid ulli uiro, qui ex nobili sit genere, in turpibus habent rebus. ferè semper cum rege mortuo uxor una, & altera sepeliri uult eo cum ornatu, què uiuens adamauit: tum serui etiam, & clientes. ita enim se cum illo apud superos tota tempora uicturos putant. nonnullæ gentes Deorum imagines filiorum suorum infantium spargunt sanguine. mitiores aliæ sacerdotes ita habent institutos; ut barbâ, si quam habent, aut capillum neque tondeant, neque peccant totius uitæ tempore. quibusdam in locis propter paludes incolæ domos in arboribus ædificant; easq; inhabitant cum uxoribus & liberis. atque omnibus ferè in continentis regionibus aurum ex fluminibus colligunt, aut ex uicinis fluminibus locis, non magna tamen diligentia: neque enim numos cudunt: minutis plerunque cum terra globulis, sed sæpe etiam librali pondere, ac nonnunquam multo maioribus. gemmas uero maximæq; margaritas ii habent populi, qui Cubagæ, & Cumanæ, & Teraræ, qui insulis (sic enim eas appellant) in septentrionem uersis paulû à media cœli conuersione declinantibus sunt proximi: ubi eas urinatores expiscantur, tanta cum mari assuetudine, ut semihoræ interdum spatium conchis margaritarum conquirēdis sub aqua se contineant. earum magna uis ab incolis regibus Hispanis tradita, nobilium fœminarum mundum facile auxit. atque ea quidē omnia ante hos plane annos, quibus hæc à nobis conscribi cepta sunt, contigerunt. nam quæ proxime gentes bello ab Hispanis sunt deuictæ; eæ porro & uestiû cultu, & oppidorum nobilitate, & bellandi studio, & hominum frequentia, & finium ac regnorum amplitudine reliquis earum regionum omnibus multum



tum præstant. quorum nonnulli solem & lunam, uti uirum, & uxorem colunt: neque impuberes plane sunt uenusta etiam forma, & probis moribus fœminæ, tum ornata gemmis præter cætera extremas quoque furas ad talos usque. auro autem sic abundant, ut parietes templorum, ac domorum reges eo uestiant: & uasis ad uictum domesticum propè omnibus, uti nos ab ahaneis aut testaceis, sic illi aureis utantur. itaque uicti magno auri pondere Hispaniam referferunt. cum iis, quos superius diximus, populis Messicum Temistanæ regionis oppidum egregium in lacu falsæ aquæ situm, sub cancro ferè ad conuersionem positum, numerare nos oportet, cum plerisque non oppidis modo, sed etiã regionibus, ac magno terrarum spatio uectigale factum. quòd si, quas etiam terras ad australem uerticem positas Hispaniæ imperio adiecerint, æstimabitur: nullus propè antiquorum hominum labor eorum industriam æquauerit. Alia ex parte Lusitani, classe ab rege comparata, in austrum ab Hesperidibus conuersi, Africæq; promòtorio, quod Bonam spem appellant, traiecto, Ethiopici oceani se primum ostendentibus litoribus, ad continentem nigrorum hominum terram, quæ appellatur Cephála, naues apulerunt auro diuitem: quòd interiores eò important populi; ut res alias contra mercentur; nullo id pondere aut mensura, sed tantum frustis ex oculorum fide atque arbitrio permutantes; ut, qui accipiunt, sæpe lucrum centupli faciant: atque ibi arcem conderunt. Deinde ad Mogambicem regionem delati, portu egregio, & aduenarum frequentia nobilem, arce item posita, eius sunt imperio potiti. labrum inferius hi sibi homines perforant: ostiisq; aut gemmas foraminibus appendunt cultus honestioris gratia. Quiloæ deinde regem bello deuictum expulerunt, eumq; tenuerunt. oppidani domus nostro more habent exadificatas, colore ipsi inter nigrum albumq; uestibus liberaliter induti. Aliis post hos relictis populis, mare rubrum ingressi, complures nigrorum item & bonorum hominum ac bello fortium ciuitates adierunt: qui natis statim fœminis naturam consuunt, quoad urinæ exitus ne impediatur: easq; cum adoleuerint, sic consutas in matrimonium collocant; ut sponsi prima cura sit conglutinas atq; coalitas puellæ oras ferro interscindere: tanto in honore apud



homines barbaros est non ambigua ducendis uxoribus uirginitas. Ac Lusitanis mediam rubri maris partem transgressis Zides se oppidū obtulit amplo cum portu: ad quod quidem Indici populi suas merces conuehebant. eas Aegyptii; qui eo loci mercaturæ causa quotannis conuenire consueuerunt; Camelis imponebant, Alexandriamq; perferebant. quas quidem Veneti merces, statō anni tempore eam ad urbem adnauigantes, coebebant; domumq; conuectas omnium gētium mercatoribus, ea se de causa uulgo petentibus, uenditantes, incredibili auri prouentu ciuitatem locupletabant suam. sed posteaquam ad eas regiones Lusitani uenerunt; magna rerum commutatio est consequuta. quicquid enim ferè mercaturæ causa ex omnibus Arabiæ Indiæq; locis mare rubrum importabatur; ipsi emere domumq; conuehere cœperunt. qua adductus necessitate rex Aegyptius anno ab urbe condita millesimo octogesimo Zidensium in portu, qui quidē intimi eius maris sinu sunt, classem magno sumptu comparauit; ut ab Indiæ maris navigatione Lusitanos auerteret. sed ab illis ad Dium in hostio Indi fluminis oppidum uictus classe capta atque incensa rem inchoatam reliquit. Zidēs nullam postea, uel omnino modicam rerum indicarum aduectionem habuerunt. ita Aegyptios Venetosq; instituta antiquitus mercaturæ ratio, quæ intercipi nullo posse tempore uidebatur, aliō conuersa prope deseruit. neque hercule propterea Lusitani finem progrediendi fecerunt: sed ad complures Arabici, Persici, Indiciq; insulas oceani, atque ad innumeros continentis portus conuentusq; hominum profecti, syluis felicibus, odorum omni genere, ebore, argento, auro, gēmis beatos, se contulerunt: & Colocuete, oppido propter affluentem earum rerū, quas imprimis quærebant atque adambabant, copiam maxime omnium opportuno, præliis secūdis factis, & munitionibus institutis in potestatem redactō, eas regiones tenuerunt: Tapobrancq; insula multorum mensium itinere post tergum relicta; quō nemo unquam penetrauit, sui regis signa audacissime felicissimeq; intulerunt. tametsi maiore omnino audacia, felicitate autem nunquam alias audita, si uiuisset, Ernādus Maglaianes Lusitanus fuit. qui, Hispaniæ regum opibus classe cōparata, uiæ initio in austrum se flectens, atque ultra mediam cœli conuersionem



conuerſionem propter continentis terræ oras dextrorſum ueliſi-  
cans, magno ſpatio ad polum uerſus peracto; ut illum longius  
altiore, quàm nobis noſter ſit, eo in itinere habuerit; & freti,  
quod nunc Maglaianis appellant, anguſtiis trecentorum milliū  
paſſuum in longitudinem decurſis; iterum ad medium cœli ſpa-  
tium ſe conuertit. deinde ad auroræ populos atque inſulas odo-  
ratarum arborum plenas, quas Molucas appellant, medium cō-  
plexus globi ſolidi ſpatium peruenit; ibiq; pugnans interiit. po-  
ſtremo illius comitatus per Luſitanorum partis oceanum labore  
plurimo uniuerſi orbis terrarum nauigatione triennio confecta  
in Hiſpaniam rediit. cumq; totius itineris enumeratis diebus ra-  
tionem, quam in tabulis habebat, repetiſſet: uno ſibi annos illos  
die longiores factos de dierum nominibus domi audiens repe-  
rit. qui omnino anni: ſi ſe iſ ad orientem, domo profeſtus, con-  
uerſiſſet; ac contra ſolem uſquequaque currens illud ipſum iter  
uniuerſum confeciſſet: uno breuiore die redeunti ſanè fuiſſent.  
ſemper enim tanto citius orienti ſoli occurrens, quanto plus iti-  
neris poſt ſe circumuectus reliquiſſet, emenſo demum totius ter-  
ræ globo die uno prius ſolem ſibi orientem, quàm cum uiā ſe de-  
derat, profeſto habuiſſet. Eodem ſerè tempore, quo legati Paſca-  
lici literæ ad Senatum uenerunt; Aloifiſus rex Gallorum Tridē-  
ti per legatum ſuum Cardinalem Rotomagenſem; cui Mediola-  
no proficiſcenti (illi enim urbi atque regno præerat) Georgium  
Cornelium Brixiæ magiſtratum reginæ Cypriæ fratrem Senatus  
legauit; pacem cum Maximiliano imperatore certis conditioni-  
bus fecerat: quarum illa erat maxima; ut iſ ſe regem Mediolani  
appellaret; ipſe in corona, ex qua Maximilianus iure imperator  
dici poſſet, more inſtitutoq; maiorum à Pontifice Max. Romæ  
tradenda, auctoritate opibusq; ſuis præſto ei eſſe teneretur. Car-  
dinali per fines reipub. cum magno comitatu eunti & redeunti  
ſumptus eſt publice factus, ſed Barbadici; quem uita functum  
dixeramus; loco Leonardum Lauredanum plurimis neceſſitu-  
dinibus, & propinquitatibus atque affinitatibus ſultum ciuitas  
ſibi principem declarauit. Eo comitia primū habente, ædis Mar-  
ciæ procuratio; quo in magiſtratu Philippus Tronus, cuius pater  
Nicolaus annos ſex ciuitatis principatū obtinuerat, illis ipſis die-



bus erat mortuus; Benedicto Pisauro classis præfecto magno fa-  
uore ciuitatis est delata. eiusdem uero ædis procurationem eam,  
ex qua Lauredanus summum locū inierat, Marinus Garzonius  
alteris comitiis est adeptus. classis interim Gallica itemq; Lusita-  
na; quas uterque rex, ut reip. auxilio essent, se se receperat missu-  
rum; non uno tempore altera Corcyram, altera Zacynthum ad-  
ueniunt. tametsi neutra omnino earum ulli reip. usui fuit. Galli  
enim priores apud Zacynthum cum essent, Pisauro non expecta-  
to, quem Auster uentus Corcyræ multos dies perincommode  
flans detinuerat; Rhodū uersi profecti sunt. sed naues illas Alo-  
sius ad Federicum regem Neapolis regno expellendum inita cū  
Hispaniæ regibus societate comparauerat. itaque pulso illo, ac  
diuisis regni regionibus ex fœdere; ut Apulia Calabrisq; Consal-  
uo eorum duci traditis reliqua omnia Aloisius obtinuerit; clas-  
sem, cuius præterea non magnopere indigebat, iuuandæ ad spe-  
ciem reip. illò misit. Lusitani autem paulo post à Pisauro Corcy-  
ræ perliberaliter accepti; cum ille ab eis petiisset, ut secum aut ad  
Dyrrhachium recuperandum, aut ad insulam Leucadiam oppu-  
gnandam accederent; neutro negotio suscepto; quòd dicerent  
suum sibi regem mandauisse, ut contra classem Thraciam unā  
cum Veneta omnem belli fortunam experirentur, ab oppidis ob-  
sidendis aut omnino tentandis abstinerent; quo itinere uenerant,  
domum discesserunt. ea erat classis nauium onerariarum una de  
triginta: quarum quinque satis magnæ, reliquæ pusillæ: sed om-  
nes magna tormentorum ui, & numero militum pulcherrime in-  
structæ, tum opertis singularum tegumeto uersicolore puppibus,  
ut late aquam tentoria tangerent, fluctibusq; uerrerentur; quoniā  
in nostris classibus id non fit, præterquam in nauibus longis; neq;  
illo impendio, sed ad usum tantum; inusitatam atque egregiam  
classis faciem præbuerunt. illis destituti patres classibus rogatio-  
nem iusserunt; ut triremes in Creta insula decem armarentur;  
eisq; triremibus, quo libentius ciuitates imperata facerent, præ-  
fecti Cretenses imponerentur. itaque triremes ex naualibus, pe-  
cunia in stipèdium ex ærario est in Cretam missa. latum etiam; ne  
quid intentatū patres relinquerent; ut Franciscus Capellus, cui  
legatione apud Aloisium functo Dominicus Triuisanus, Hiero-  
nymus



nymus Donatus de regno Neapolitano sub eius imperium redacto gratulatum à Senatu missi successerant, ad Henricum Britanniae regem socium atque amicum reip. proficisceretur auxilium in Turcas postulatam. tametsi nuntii uenerant, Baiafetem à rege Pannoniae bello laceffitum suas uires eò conuertisse nauium aedificatione intermissa. nam è Pannonia literæ ad Senatum datæ certiores patres fecerant, Turcas equites, cum Danubium flumen traieciissent, ut in fines hostiū incursiones facerēt, à regio exercitu fusos duobus millibus interfectis reuertisse: tum transmissio ab eodem exercitu flumine Turcas duobus itineribus interclusos maleq; habitos partem suorum non spernendam, unā cū duce filioq; ducis amisisse. Pisaurus profectis Lusitanis, uti classe Gallica se coniungeret, omnem diligentiam adhibuit. itaque eā demum ad Maleam nactus muneribus, & cōmeatu largiter præfecto classis missis ad Mitylenem expugnandam propè inuitus unā se contulit: cum Galli nihil ea de re antea cum illo communicauissent; neque, quid sui consilii esset, ab eo petiissent. nihilo tamen secius omnibus in rebus suam illi operam præstitit, itaque tormentis expositis Galli nostriq; oppidum aggressi muro deiecto, repulsis, atq; occisis propugnatoribus, magno impetu ipsum ceperunt. arcem oppidi autem, sine qua teneri oppidum nō poterat, cum iā Veneti turri deiecta signa in muros intulissent; idēq; Ligures ex classe Gallica Venetis proximi fecissent; tamen capere non potuerunt: quòd duorum præfectorum interitu, quos hostes interfecerant, Galli perterriti se in castra receperunt. erant autem ex Armoricis finibus plerique, qui suorum ducum dicto audientes non fuerunt. eos se recipiētes ceteri omnes subsequenti oppugnationem reliquerunt. ita uictoria iam plane parta, si suum Galli munus obiiissent, interpellata pedem retulit. accidit autem ab Thracibus ea in oppugnatione res permira, quæ uirtutem illorum atque animum ostenderet. nam cum tot nauibus oppidum obsideretur; tot hostium millia circumfusa ad muros stationes haberent: una in biremi, & tribus nauigiolis milites trecēti à Baiafetis filio è Magnesia, cui præerat, auxilio missi in arcem se inferre uelle non dubitauerunt. sed ab Gallis intercepti cum se fortissime defendissent; reliquis interfectis uiginti eorū Gal-



los elapsi, quò intenderant, tenuerunt, atque in arcē recepti sunt. præfectus classis ea spe deiectus Pisauro relicto discessit: tempestate turbidissima deprehensus ad Cytheram insulam, naui sua elisa, ex hominibus quingentis, qui in ea erant, ipse per paucosq; qui se in parte naui fracta scopuloq; infixi continuerunt, euaserunt. naui ex huius classe altera cum sexcentis hominibus interiiit. Pisaurus, multis diebus ad bellum gerendum idoneis Gallorum causa frustra consumptis, hyeme præcipiti se ad Melū insulā contulit. forte ibi Ericus Trax; qui piraticā multos annos exercuerat, plurimaq; damna Venetis hominibus intulerat; quòd ex Africa ueniens naufragium ad insulam fecerat; captus à Meliis in custodia tum erat. id simul est Pisauro nuntiatum; Ericum ad se adduci imperauit; proptereaq; quòd is aliquot ante annos ciuem Venetum Ambrosium Contarenum Francisci filium; cum quo mercaturæ societatem inierat; nihil ab eo metuentem cum eius naui per insidias contra iurisiurādi religionem apud Thessalonicam à se captum igni excruciatum necauerat: uiuum comberi iussit. hæc dum foris administrantur: domi, quòd pecunia publice deerat, Senatus decreuit; uti, quam ipse legem prius, deinde comitia huius belli initio iusserant, ut magistratus omnes prouinciales atque urbani mediam stipendiorum partem reip. remitterent, ea in annum unum prorogaretur. itaque primis anni diebus cum in Comitio Lauredanus, quiq; illi assident sex uiri, & quadraginta uirum magistri eam legem pronuntiauisent: Ioannes Antonius Minius, ciuis in dicendo satis audax, qui omne suam ætatem; erat enim iam senex; causis agendis in priuatorū patrocinio consumpserat, eiusmodi concionem habuit. Nō ignoro ciues magnam me rem, & multorum inuidiæ propositam suscepisse; qui sim contra Senatus præiudicia, contra magistratuum uoluntatem pro uestris commodis & uestra incolumitate libere, quæ sentio, dicturus. neque dubito, quin me plerique arroganter facere existiment; quòd ea, quæ patres conscripti iā pridem iusserunt, uosq; ipsi rata esse uoluistis, nunc patribus iterum iubentibus, ego unus, tanquam plus omnibus prouideam, improbaturus surrexerim. sed me præstat omnem inuidiæ aleā atque pericula subire; dum uos decipi, & reip. muneribus spoliari, quoad  
potero,



potero, non patiar. Legem hoc bello, quod cum rege Thracio gerimus, in Senatu latam, uestris sententiis sancitam, præteritis expletam mensibus prorogare patres decreuerunt: uti magistratus omnes, qui per nos creantur, mediam stipendii partem annum reipub. remittant. itaque Senatu approbante ad uos ueniunt; ut eam ratam & sanctam habeatis. quid est hoc aliud, quàm uelle, uos, qui liberos, qui uxores, qui domos familiasq; uestras, qui uos ipsos beneficio reip. magistratibus obeundis sustinetis; quando annum iam omnibus in difficultatibus confecistis, alterum nō habere annum, unde inopiam leuare, & uitam tolerare uestram queatis? An, quoniam diuitibus ea lege parum iri nocitum uident; reliquos, qui re angusta utuntur, non respiciunt? est ne id alteros tanquam se ipsum diligere: quo uno medius fidius præcepto omnis humana societas continetur? Ego uero ciues sic existimo: quod contra hostes nihil prospere gerimus; aduersa uero multa & misera singulis diebus nuntiantur; hoc ex fonte manare: quod ipsi inter nos non amamus; neque quisquam alteri cōsultum uult; nemo, qui opibus pollet, ei, qui debiliior est, prospicit. Dii profecto immortales, qui acta & cogitationes nostras perspiciunt, irati nobis infensiq; sunt: conatusq; nostros frustra suscipi, euanescereq; omnes sinunt: hostibus uirtutē, & consilia subministrant. Tria sunt omnino hac in urbe ciuium genera: unum locupletum atque potētium: aliud eorum, qui sunt dignitate opibusq; tenuissimis: mediæ inter hos fortunæ tertium. primum illud atque summum, propter potentiam in tributa sæpe nihil dat; propterea quod nemo principes uiros cogere audeat; qui plerunque in magistratibus sunt remq; p. administrant. a mediis, quæ imponuntur publice onera, multi magistratus exigunt, ab infimis plane uniuersi: nam ab iis minime resistitur. ita fit, ut, qui rei minus habent, plus in ærarium conferant; illi, qui omnia possident, nihil tribuant, nisi cum libet: tanquam reliqui seruiant; ipsi regnent atque imperent. quod si diuites, fisco quæ debent, etiam dependant: nihil sit necesse curarum, & laborum uestrorum obeundis magistratibus mercedem reip. condonari, ut in bellum pecunia suppeditet. ea summa omnis pro parte media tercentum auri libras nō exuperat: locupletum & potentium re-



liqua si ratio subducatur, tantundem decies aut plus etiam confici-  
cient. illa exigit, qui præpositi estis pecuniæ publicæ magistra-  
tus: neque uos fisco debentium auctoritas deterreat, ne quid face-  
re contra ipsorum uoluntatem audeatis. abunde uobis adcrit,  
quod quaeritur: neque tenuiorum, sed bonorum tamen ciuium  
sudorem, aut potius sanguinem exugere cogemini. quid autē?  
non ne ciues illud etiam uos impellere ad legem repudiandam po-  
test; quod multi magistratus, ut sit unde se, liberosq; suos alant,  
non tam iustitiam in iurisdictionibus agitare, quam seruire qua-  
stui, & studere lucro statuent; dū ea, quæ iniuria sibi erepta exi-  
stimabunt, quo quo modo sarciant? Quamobrem omnia passim  
erunt uenalia; neque immerito; quoniam ita Senatus, & ciuita-  
tis principes decreuerunt. animus mihi ciues eo anno tum, cum  
primo lex est lata, suadebat, ut eius lationi cōtradicerem. sed me  
Senatus auctoritas continuit; quod existimabam ea uestra incō-  
moda annum tantum duratura; neque legem tam iniquam iri-  
prorogatum uerebar. ita me meæ cogitationes fefellerunt. nunc  
eō res est perducta; ut in uestra manu atque sententiis tamen sit  
totius rei exitus. quod si uos legē iterum iusseritis: quid erit cau-  
sæ, quare non aut eam optimates singulis annis ferant, aut uos,  
quod secundo probauistis, tertio etiam & quarto sanciat? ita  
res in exēplum cesserit. uos, cum rumor belli aliquis paulum ex-  
citabitur, statim plectemini. ea semper erit magistratibus oppor-  
tuna erogandæ pecuniæ ratio: semper reip. beneficio spoliabi-  
mini; quod esse uestrum solidum, atque propriū debuerat. qua-  
re censeo ut legem reiiciatis; ne, uestra quæ sunt, ipsimet proicia-  
tis; ne ue ullis ab hominibus ludibrio uobis libentibus habeami-  
ni. Hæc cum esset Minius concionatus, magna perturbatio comi-  
tium tenuit, quoad, quis ei responsurus esset, sciri potuit Laure-  
dano Principe sua se è sella subleuāte: qui stās dicere sic est exor-  
sus. Valde me hodie ciues à mea de Ioanne Antonio Minio spe  
atque opinione deceptum fateor. qui, cum mihi heri esset dictū,  
contra legem, quam ferimus, uerba illum apud uos uelle facere:  
non credidi: neque enim persuadere mihi poteram, huiusce ciui-  
tatis hominem quatuor & sexaginta annos natum, qui aliquan-  
do rempub. attigisset, tam æquam, tam etiam necessariam roga-  
tionem,



tionem, quam Senatus ipse frequens probauisset, esse impugnatum. quanquam fuere qui dicerent, quoniam Minius ad senectutem sine ulla dignitate peruenerit, semel tantum anno superiore in magistratu adolescentulis mandari solito fuerit, id illum cogitauisse; si causam tenuiorum ciuium suscepisset, qui stipendio munerum reip. fraudari se magnopere indignantur, fore, ut fauorem sibi atque suffragia illorum ad magistratus adipiscendos conciliaret. quod quidem ego, ut reliqua, falsum esse facile putauimus. uos, qui melius hæc cognoscitis; quid sibi is hoc suscepto negotio uoluerit, uobiscum reputate. tu uero Mini solus ne es omnium, qui, quo impliciti bello duos iam annos uersamur; quantas in eo impensas fecerimus, quantas facere necesse sit; quibus in difficultatibus cogenda pecuniæ dies totos solliciti noctes insomnes conficiamus, ut hoc imperium ab hoste omnium acerrimo tueamur; nescias? remigum, militum præfectorum nauium nostrarum, quos innumeros alimus, stipendia immane auri pondus requirunt. in arcium, & oppidorum prædiis multum pecuniæ infumitur. naualia urbana tot classibus exhausta magni æris singulis mensibus indigent; ut naues, ut tormeta, ut reliqua, quæ bello usui sunt, nostris imperatoribus subministrent. regi Pannoniæ, ut cum nostris hostibus bellum gerat; mille auri libræ ternis curationibus sunt ex fœdere quotannis dependenda. his tot atque tantis impensis pecunia suppeditari qui potest? ciues enim nostri, tributis innumerabilibus persolutis, amplius, quod tribuât, non habent. prouinciales, noua pecunia imperata, agrisque suis præter morem censui addictis, conqueruntur: neque quicquam, nisi coacti, fortunisque suis diuenditis, in ærarium conferunt. uectigalia reip. portoriis propter bellum impeditis anguste redimuntur. mercatores nostri ad exterarum nationes, exteri ad nos mari commeare non permittuntur. itaque nisi nos, quorum maxime interest, quibus possumus rationibus reip. belli fluctibus iactatae operam ferimus: quis omnino erit reliquorum hominum, qui ferat? omnes enim nobis alieniores sunt, quam nos ipsi. numi autem nerui bellorum sunt: sine iis bellum gerere nulla natio potest. Nos quidem ciues, quos huic urbi atque imperio præesse uoluistis, reliquique magistratus, qui nobiscum una remp. administrant, hanc

Z



inuiti legem, magnoq; nostro cum dolore ad uos ferimus: propterea quod urbes nostras ab hostibus capi, dirui, teneri, regiones uastari, populos dissipari, ciues nostros aut interfici, aut in seruitutem abduci multo peius est, quam hanc munerum mercedis portionem pro sua quæque parte reip. remittere. quæ adhuc mala & acciderunt; & deinceps accidere necesse est; nisi bellum magno apparatu, magnis opibus gesserimus. opes autem hæ pecunia comparantur. Minius, qui uobis, ut legem repudietis, suadet; illa, suadet, ut perpetiamini; dum, ne pecunia comparari possit, nititur efficere. Ego uero huius sum animi, atque sententiæ, ut à fanorum & templorum aditis aurum atque argentum sacrum omnenumis cudendis auferamus; quibus bellum commodius administrari possit: potius quam ea, quæ commemorata sunt, perferamus, remq; pub. periclitari, atque hoc imperium proteri ab hoste impurissimo, deterrimoq; permittamus: idq; nos Diis ipsis libentissimis, quorum repleta spoliabuntur, facturos puto. uerum adhuc quidem ad id nos descendere nulla res cogit; modo uos hoc, quod multo est æquius, quodq; uobis facere nulla religio ne impeditis licet, quod ordo amplissimus probauit, uestris hodie sententiis, uestra in patria liberalitate pietateq; iubeatis. Nā quod Minius Deos nobis esse iratos commemorauit; mihi quidem dubium non est; quin, qui male, atque perperam agunt, ii Deorum sibi iram pariant. itaque præfecti nostri, qui improbe rempub. gesserunt, partim interierunt, partim exilio ignominiaq; multati Deorum numen suis infensum rebus, dignitatibus, rationibus habuerunt. uos, si, quæ decet, quæ tempus exigit, quæ status reip. turbulentus, quæ pecuniæ cogendæ difficultas in præsentia postulat, statueritis: nihil ab Diis immortalibus timetote: prospera uobis omnia ab illis, secundaq; aduenient. Quid, quod uos iniustitiæ Minius insimulat; quos lege iussa in magistratibus obeundis iurisdictiones uestras ad quæstum conuersuros putat? coniecturam scilicet de aliorum moribus à se ipse capiens, qui linguâ, atque ingenium, ex quo primū loqui cœpit, usque ad hos annos, atque senium in lucro, & quæstu semper habuerit, atque opes sibi amplas ea tantum ratione compararit. quasi nesciat, qui natura boni sunt, magistratibus initis in rebus difficilibus meliores porro



20  
porro fieri; qui prauis, & mali, eos à triumuiris, uel qui ad urbem  
sunt, uel quos querelis populorum cognoscendis in prouincias  
mittitis, ad urbana iudicia deduci: quibus à iudiciis improbe fa-  
ctorum pœnas luant. ita fit, ut aut suapte ingenio ciues duris in  
rebus afflictati tanquam in cote uirtutem subigant, & exacuant  
suam; aut metu iudiciorum à maleficiis nullo non tempore aut re-  
rum casu absterreantur. Ausus etiam tu quidem es Mini tria esse  
genera nostrorum ciuium dicere, locupletum, mediocrum, tenu-  
iorum: atque hæc inter se dissidere ostendisti, dum à diuitibus in-  
tributa nihil penditur, à reliquis onera omnia sufferuntur. regna-  
re etiã illos dixisti, hos seruire, atque in ea ciuitate, quæ, ex quo  
nata est, libera & sui iuris semper fuit, id te nō puduit in concione  
esse mentitum. hoc quidē, esse tria genera, nihil impedio. id enim  
omnibus in ciuitatibus accidere consueuit: neque aliter prope-  
modum se habere hominum conuentus ullus atque societas po-  
test. diuites uero nihil conferre, cæteros omnia, hoc falsum &  
iniuriosum est. nulli enim homini parcitur: omnes peræq; quod  
fisco debent, etiam soluunt: aut, si id per se non faciunt, ab iis, qui  
præsunt, facere coguntur. quære à fisci magistratibus rationes: sub-  
duci iube: reliqua ciuium inspice: nihil eorum reperiēs, quæ di-  
xisti. an, quod bona locupletum minus hastæ subiiciuntur, me-  
diorum autē, & tenuiorū quotidie; propterea tu diuites confer-  
re nihil existimas, reliquos omnino unos omnia? male tu quidē  
urbis nostræ mores, & rerum conditionem dispicis, aut te dispi-  
cere simulauisti. diuites, quia soluendo sunt, sua distrahi nō sinūt;  
sed in ærarium sponte conferunt. quod cum reliqui non faciūt;  
sæpe fit, ut eorum insulas, fundos, prædia magistratus ad licentes  
transferant. Sed quid illud tandem est, quod tu seruitutis & regni  
nomina in hanc remp. induxisti? alteramq; ciuium partem in al-  
terius inuidiam trahere his impuris uocibus excogitauisti? an,  
qui ab urbe condita uni atque iidem semper fuimus, nunc ut dis-  
sideamus inter nos, ut secessionēs facere incipiamus, tibi uni esse  
oprabile & conducibile existimas? id uis: id postulas: id efficere  
conaris. Vos appello magistri decemuirum, qui sedetis, cui anti-  
quitus magistratui ciues improbos coercendi omnis est potestas  
attributa. uos ab eo huius rei causam reposcite. bello, quod cum

Z ij



Liguribus quartum gessimus, Italis populis atque in reip. tem-  
peratione constitutis, ærario exinanito maiores nostri edixerunt,  
si quis reip. pecunia iuuisset, eum se ciuitate & iure comitiorū  
muneruros. itaque bello confecto eam ob causam triginta ho-  
mines ad reip. admiserunt. ii totidem familias in nobilitatem  
intulerunt: quæ nostro iure, nostris muneribus, nostro imperio  
deinceps sunt usæ. nobis hoc tempore bellum cum barbaris na-  
tionibus, cū gente à nostra uitæ ratione, à nostris moribus alienissi-  
ma, cum rege infestissimo ferocissimoq; gerētibus, uos huius reip.  
alumnos, ut patriæ laboranti succurratis, eius pecuniæ, qua una cū  
magistratibus ab ipsa rep. donamini, mediam partē eidem reip.  
pigebit restituere? illi suam ciuitatem, nobilitatem, iura, impe-  
ria in externos, propterea quod in ærarium contulissent, libenter  
transfuderunt: uos uestrorum stipendiorum partem uestræ pa-  
triæ, uestris aris, atque focis, uestris liberis cedere grauabimini?  
nam nunc quidem, ut uestri liberi ne seruiāt, est à uobis cautio,  
atque curatio adhibenda. quis hoc in animum, nisi huius urbis,  
horum templorum, huius comitii atque curiæ hostis & euersor,  
posset inducere? inuentus tamen est Minius; qui hoc uobis sua-  
dere sit conatus. sed illum sua mens, suus animus, sui mores pu-  
nient. uos autem ciues, uos inquam ciues; quos scio uestræ di-  
tionis atque imperii, quemadmodum semper estis participes, ita  
nunquam non amantes fuisse; ne definite, quod semel libentissi-  
me fecistis, legem iterum uelle iubere; iterum pro uestra in pa-  
triam charitate hoc, quicquid est incommodi, alacri animo an-  
num alterum sufferre, & perpeti; dum hæc reip. procella dece-  
dat; quæ longinqua esse, nisi me meus fallit animus, nō potest.  
confirmate uestris sententiis illud, quod eorum, qui ad guberna-  
cula reip. sunt positi, sententiis optimum esse factu uidetis. statui-  
te hoc iudicio; quàm cuiq; chara esse debeat suæ patriæ libertas;  
cum ipsi uestræ libertatis causa uestra uitæ præsidia reip. condo-  
netis. ostendite prouincialibus atque iis, qui uestris legibus pa-  
rent; quid ipsi facere debeant; quando uos, qui ceteros cogere  
potestis, communis omnium utilitatis causa leges uobis unis de-  
trimento fas imponitis. nemo erit hac in urbe, nemo in reliquis,  
ubi nomen Venetum uiget, qui non nos summis laudibus effe-  
rat,



rat, atque omnibus regendis populis & gentibus dignos putet; cum intelliget, nihil uos muneris aliis præcipere, quin prius alterum tantum, eoq; multo amplius, uobismet imperaueritis. Hac à Lauredano concione habita; ubi ille cōsedit, lex est ferri cœpta. erant omnino in comitio iudices mille quadringenti, quadraginta duo. ex iis mille octoginta octo legem probauerunt; trecenti quadraginta septem reiecerunt: quibus non liqueret, fuerunt septem. itaque magno consensu ciuitatis lege iussa, Lauredanum omnes laudare; bonum esse principem dicere; cui resp. cura esset. postridie autem eius diei Minius ob concionem seditiosam à decemuiris condemnatus est; ut in Arba Illyrici insula, quoad uiueret, exularet, triginta auri libris ei, quicumque illum extra insulam captum magistratibus tradidisset, ex eius bonis constitutis: eiq; rei bona sunt pignori addicta: ipsi, ut laqueo uitam finiret, pœna addita. Illis diebus ignominia notam, qua Pisaurus in triremium præfectos quinque usus fuerat, patres in foro promulgari uoluerunt. ea nota erat eiusmodi. Dum classẽ Gallicam Pisaurus consequi cuperet; Paulus Nanus, Georgius Triuifianus, Marcus Antonius Decanalis, Nicolaus Barbadicus è colonia Cretensi, Petrus Capitellus Apulus, eius missu ad Maleã profecti; quod Galli esse illis in locis dicebantur; in biremes Thracias septem inciderunt; quæ nauem onerariam hominum Cretensium à se captam remulco trahebant. ea re animaduersa biremes aggredi communi consilio statuerunt. itaque incitatis remigibus ad illas contenderunt. sed cum eis appropinquassent; timore impediti remiges inhibuerunt; se seq; turpiter à congressu dimicationeq; continuerunt. accidit autem paulo post; ut naues triremes aliquot è classe Gallica, quæ non longe aberat, idem conspicatæ biremes Thracias magno animo aggredereẽtur. quæ quidem res auxit illorum dedecus: quod eos reip. hostes, quos propter formidinem ipsi dimiserant, Galli, quorum minus intererat, uirtute essent atque animi præsentia consequuti. ob eam imbecillitatem atque formidinem Pisaurus annos quinque à præfecturis omnibus illos remouit; stipendiaq; ab iis emerita fisco addixit. Iisdem diebus Gabrielem Maurum, Andream Fosculum Senatus legatos creauit; qui Ferrariam profiscerentur Lucre-



tiæ Borgiæ Alexandri filiæ; quam pater Alfonso Ateftino Herculis filio in matrimonium sponderat; Roma ad illum uenienti, & ipsi, foceroq; eis de nuptiis reip. nomine gratulatum. E' Pannonia uero crebriores allatæ literæ, Turcas pluribus locis fusos à regis ducibus occidione, & præda ingenti facta, Senatui attulerunt. neque tamen ob eas res classis curam ulla ex parte Baiaseteres intermittebat. quam quidem curam cum magnopere ageretur; reficiq; naues ueteres suis ducibus mandauisset; atque id ei tardius negligentiusq; agi ab illis atque administrari uideretur: arcum sibi afferri & sagittas imperauit: quibus adductis stantem ante se illum ipsum ducē, qui priore apud se erat loco, indignabundus transfixit. restituerat idem rex paulo ante ad libertatem ciues Venetos: quos belli initio Byzantii in uincula coniectos in turri ad fretum seruandos miserat. ii se libris auri centum redeemerunt, quorum è numero Andreas Grittus id. Mart. ad urbē rediit: eiq; est uniuersa ciuitas gratulata. attulit is ab Admete Baiaseteris duce literas ad Senatum cum mandatis; ut, si bello, quod inter ipsos & Baiasetem uigebat, uellent finem imponere: mitterent Byzantium aliquem ad pacis conditiones tractandas: ei se adiutorem futurum. Interea Cæsarem Alexandri filium augendi regni cupiditas magnum in scelus, & prodicionem impulit. nam cum Guidi Vbaldi Metaurensium ducis regnum; quod unum ei deerat ad omnem Flaminiam obtinendam; propter mirificum populorum in illum amorem aggredi aperto bello non auderet; neque Venetos sibi permissuros, ut illum expelleret, arbitraretur; neque ullā haberet suscipiendi belli causam, Guido Vbaldo omnibus in patrem suum obsequiis, in se officiis beneuolentissimi coniunctissimiq; hominis plane functo: uelle se bellum Camertibus inferre simulauit; ut ad fines Vrbinatum, quā iter erat ei faciendum, sine Guidi Vbaldi suspicione tāquam aliō tendens cū exercitu accederet. atque, ut bono se in illum esse animo fidem ei maiorem faceret, & suis eum opibus exueret, ne tueri se se posset communior: à Guido Vbaldo, ut auxiliares ad id bellum copias cum tormentis muralibus ad se mitteret, pro amicitiae iure per legatos postulauit. iis impetratis, atque missis, cum ad fines regni uenisset; repente in illos hostiliter irrupit: & magna celeritate



tate adhibita, quod neminem obuium habebat, Vrbinum contendit: parumq; abfuit, quin Guidum ipsum Vbaldum caperet. sed is paucarum horarum beneficio in iumentis agricolarum, & ueste rustica, itineribus deuus, quod omnia nota loca per Cæsaris milites obsessa tenebantur, fugiens Rauennam se recepit: atque inde Mantuam est profectus: quā ad urbem paulo ante uxor eius Elisabeta Francisci Mantuanorum ducis soror pudicissima lectissimaq; se contulerat; cum officii causa Alexandri postulatu Lucretiæ Borgia ad maritum proficiscenti comes itineris fuisset. ea re permotis patribus, equites quingēti, pedites mille Rauennā sunt missi: ut cum iis copiis, quæ ibi erant, coniuncti, oppidi præsidium augerent; si quid à Cæsare consilii, cui fides haberi nulla poterat, contra remp. iniretur. Neque multo post Anna Candalla, natione Aquitana, Aloisii regis Gallorum propinqua, ad Vladislaum Pannoniæ regem, cui erat nuptui per legatos tradita, proficiscens Venetias uenit cum magno utriusque regis comitatu. ei fines reip. ingressæ sumptus est publice atque largiter factus. ad urbem ubi fuit; omnia in illam liberalitatis, & beniuolentiæ officia profuse collata: ut, cum exacto mense discederet, Lauredanus Principi dixerit; tum primum se reginam sibi ipsi uisam, cum apud illum fuit: postea uero quā in Pannonia regiam exercere dignitatem cœpit; amica & beniuola reip. omnibus in rebus semper fuerit. Interim Aloisius rex domo discesserat, ut in Italiam se conferret, Neapolitano bello, quod cum Hispaniæ regibus propter finium controuersiam gerebat, auxilia comparaturus. eo Mediolani sinibus appropinquante Senatus Bernardum Bembum patrem meū è prætura Veronensi, qua in prætura tunc erat, legatum misit; ut Aloisio reip. nomine saluere iussu de aduentu gratularetur, is regi ad Vegeuenum oppidum occurrit: estq; apud illum cōmoratus, dum is Mediolani fuit. sed, rege in Liguriam profecto ad auxilia in regnum Neapolitanum mari transmittenda, Veronam rediit. Dum hæc domi administratur, à Pisauo apud Chrysopolim, atque in sinu Thessallonico depositis militibus damna sunt plurima illata, prædæq; ingētes factæ: tū in Aegæo captæ naues onerariæ duodecim, biremes undecim. atque is ad Maleam cum uenisset, naues triremes Rhodiorū tres,



onerarias duas, regis Gallorum triremes quatuor ad se missas  
reperit. neque multo post Iacobus Pisaurus Alexandri legatus  
suas triremes cum Pisauri classe coniunxit. erat autem uniuersae  
classis nauium omnis generis numerus ad septuaginta. quibus  
cum nauibus de legatorum consilio ad insulam Leucadiam op-  
pugnandam se conuertit. eo cum appropinquaret, Pontificis le-  
gatum praemisit, qui per uada eo ab latere, quod ad orientem spe-  
ctat, oppidum aggrediretur. uadis autem ea parte insula maxi-  
me cingitur. is accelerans per diorictum in uada se se inferens,  
duodecim biremes, quae ibi stationem habebant, eaque maria per  
currentes Venetorum nauibus insensissimae diu fuerant, & tunc,  
ut aditu classem prohiberent, occurrebant, omnes fugauit, pau-  
loque post uacuas hominibus occupauit; cum ii se se raptim in li-  
tus eiecissent: quos oppidani fugientes receperunt. iis captis, quod  
illis in uadis erat a continenti ad oppidum uia aquis tecta, sic, ut  
equites commeari ea possent; ibi naues aliquot disposuit: quibus  
nauibus Thracum turmas equitum tres, qui per illam uiam, ut  
essent oppidanis auxilio, uicinis ex locis aduentabant, repulit: cum  
tamen antea munitionem pro tempore, quae transitum impediret,  
media in uia effecisset. ea Thracum munitione retardati, dum per  
rumpere conantur, tormētis se nauium uulnerandos praebuerunt:  
amissisque per pluribus, duce eorum equo deiecto, nulla parte mu-  
nitionis perrupta, unde uenerant redierunt. atque idem interea  
legatus suorum militum parte equitesque omnes, quos in nauibus  
eam ad rem habebat, cum primo aduentu in terram exposuisset, atque  
ad oppidum contendere iussisset: illi itinere, quod quidem erat  
passuum millium quatuor, celeriter confecto, circumuecti auda-  
cissime pugnantes, eo ipso die pro oppidum capiunt. Pisaurus  
praefectus, quem mari reliquam classem uentis non secundis, qui  
eo die flauerant, circumducere oportuit, postero die ad oppidum  
oppugnandum se se contulit; ac muros quater tormentis cepit.  
erant in oppido milites Thracum quingenti; qui se acerrime una  
cum oppidanis defendebant. ii cum magna tormentorum ui op-  
pugnatione non intermissa premerentur; septimo die deditionem  
facere uoluerunt. is fuit dies ad diem tertium Calendarum Se-  
ptembris. sed dum inter se ea de re consulunt, militibus irrumpen-  
tibus



93  
tibus oppidum capitur. ipsi atque oppidani captiui facti: præda  
omnis uiritim diuisa. hostes prima oppugnationis die Gabrie-  
lem Superatium triremis præfectum interfecerunt, capite pila fer-  
rea disiecto. eius frater Hieronymus, adolescens nullo reip. mu-  
nere antea functus, paucis post diebus, quam id est Venetias alla-  
tum, magno comitiorum fauore in Senatu adlectus est præteri-  
tis quamplurimis, qui & magistratus gesserant, & ætate longe  
præstabant. Patres ut primum ex Admetis literis in spem pacis ue-  
nerunt: propterea quod hyems suberat; Pisauro mandarunt, ut  
triremibus uiginti apud se retentis classem reliquam domum re-  
mitteret: atque ad regem Pannoniæ literas dederunt: quibus lite-  
ris, quid ab Admete habuissent, certiore illum fecerunt; uelleq;  
se suum hominem Byzantium mittere significauerunt; atque ab  
eo petierunt, ut & ipse suum hominem eodem mitteret; quo ma-  
iore cum dignitate pax æquioribusq; conditionibus tractari con-  
ficiq; posset. Vladislaus intellecta re patrum consilium probauit:  
facturumq;, quod uellent, de legato se recepit. illi Zachariam Fre-  
scum, Decemuirum scribam, ire Byzantiū iusserunt. Guidus Vbal-  
dus regno amisso ad Aloisium regem Galliæ Mediolanum se se  
conferens auxilia in Cæsarem postulat; ubi nihil in eo probi-  
tati, & innocentiae contra perfidiam, & crudelitatem esse præsidii  
cognouit; cum uxore Venetias uenit. patres eum lubentes exce-  
perunt; & domo pro illius dignitate publice tradita bono esse ani-  
mo iusserunt. qua ex domo paulo post; cum Metaurense, Cæsa-  
ris arcium præfectis, & militibus interfectis, oppidisq; aliquot  
receptis, eius imperio se subtraxissent; suum in regnum facile re-  
diit: atque in eo ab Vrsinæ gētis principibus adiutus, deuictis ho-  
stibus suam dignitatem aliquot menses obtinuit. ea rerum muta-  
tione plerique se populi reip. commendauerunt, orantes ut se in  
deditionem reciperet. Est in Ariminensium finibus mons excel-  
sus, duplici iugo, quā mare prospicit, præruptus: alia parte de-  
cliuitatem habet late in occasum patentē, uinetis & segetibus ube-  
rem. illis in iugis duæ arces sunt summa in crepidine: quibus op-  
pidum subiaceat, ciuitasq; montanorum hominum, qui remp. ad-  
ministrant, neque ulli regi seruiunt. crepidines Pinnae Marina-  
nae appellantur. ii & ipsi, ne ab Cæsare in seruitutē redigerentur, cū



magnopere timerent: Senatui eo tempore significauerunt, uel  
le se sub eius imperio esse: mitteret ad se aliquem reip. nomine:  
se illius dicto audientes futuros, imperataq; facturos. sed neque  
hos, nec cæteros, qui se reip. dedere cupiebant, patres recipien-  
dos censuerunt. Miserant inter hæc reges Hispaniæ ad Senatum  
Laurentium Suarem illum eundem, qui legatus eorū bello Gal-  
lico apud remp. fuerat. is clam itinere per Galliam confecto pau-  
cis ante Calend. Decembres diebus ad urbem uenit. atque illi  
auri libra singulis est mēsis in sumptum à Senatu constituta. in  
primis apud Lauredanum Principem & patres sermonibus Sua-  
res de Aloisio rege Gallorum questus, quòd fœderi cū suis inito  
regibus non sterisset; ut cui neque sua, neque aliena satis essent; ab  
eius amicitia patres auertere modis omnibus est conatus, illū affir-  
mans propterea Cæsaris rebus tanto studio fauisse, ut esset, qui  
reip. finibus immineret, neque quiescere illam sineret, gaudere  
implicitam esse bello Thracio ciuitatem. quam ad eos classem  
miserit; ad speciem, non ad ullam reip. frugem misisse. id euen-  
tu patuisse: quòd obfuerit potius, quàm ulli usui fuerit. Hispa-  
niæ regum uoluntatem omni tempore cum reip. uoluntate con-  
sensisse; quoniam utrique fidem, & pietatem colerent. si se ii fœ-  
deribus una firment: neminem nocere eis posse. hæc & his simi-  
lia de Suare non semel à patribus audita, tametsi uera esse pleraq;  
cognoscerent; illos tamē nō mouerunt, ut, quod ipsis cum Aloisio  
fœdus intercedebat, ulla ex parte uiolarent. tantum dicere; se  
se Hispaniæ regum fidem, atque uirtutem, & propēsum in remp.  
animum plurimi sane facere, semperq; facturos: cum Aloisio fœ-  
deris conditionibus se teneri: moleste ferre bellum inter ipsos  
exerceri potius, quàm uigere pacem: si quid possent ad reconci-  
liandam inter eos gratiam; de eo si admoneantur, se non defutu-  
ros, amicissimorumq; hominum officio in utrumque functuros.  
Cum Vladislao autem Pannoniæ rege, de legati ad Baiasetem mis-  
sione diem ex die ducente, propterea quòd pace cum illo à Sena-  
tu inita, nisi nouæ sponsiones intercederent, stipendiis reip. car-  
rendum ipsi erat; ne res tanta differretur, legati reip. pacti sunt;  
uti mille auri libræ, regi annis singulis ab Senatu bello Thracio  
dari solitæ, ad tercentum redigerentur, quoad Baiasetes uiueret,  
tribus



24

tribus item pensionibus persoluendas. Alexander cum uidisset Guidum Vbaldum Vrsinæ gentis studiis regnum suum recuperasse: orādo, territādo, magna pollicendo, eius familiæ principibus in suas traductis partes, fœdus cum illis percussit. simul ab Aloisio missis ad se auxiliis Cæsar, magnisq; copiis undiq; comparatis, Guidum Vbaldum; quem quidem sine spe, sine opibus destitutum amici deseruerant; iterum regno expulit: cum tamen ille munitissimum natura totius regni oppidum, misso ad id custodiendum Octauiano Fregosio, adolescente sororis suæ filio, cum militibus, & omnium rerum pro tempore copia, communitius factum obtineret. Vrbinatibus receptis ad Senogalliam oppugnandam Cæsar primis anni diebus rectā profectus, ubi ciuibus sine mora se deditibus oppido est potitus, Vrsinæ gentis princeps eos ipsos; cum quibus paulo ante fœdus percusserat, quiq; secum unā uenerant; omnes in uincula coniecit: eaq; de re Alexandrum patrem mira celeritate certiore fecit. ille statim Baptistā Vrsinū Cardinalem, qui fœderis auctor fuerat, magna apud suos auctoritate, nihil eiusmodi uerentem, ad se uocatum custodiæ tradidit: qua in custodia paucis post diebus est mortuus: coniectis ab Cæsare in uincula partim nocte proxima, reliquis in Senensium fines adductis, quō Cæsar cū exercitu contenderat, laqueo gula fracta. idem uitæ finis Venantio, & Octauiano adolescentulis, Camertium regis liberis, captis à Cæsare Pisauri datus. pater eorum regno amisso clam elapsus paulo post ad urbem uenit. ob eas Cæsaris actiones, qui cum Camertibus Ariminum etiam in suam ditionem redegerat, Senatus, uti suos fines magis communiret, Liuium Carracciolumq; cum equitibus, & militibus Rauennam misit. Guidus Vbaldus hostem fugiens cum se Pitilianum in Heturiam contulisset; diesq; complures ibi fuisset: Cæsare Pitilianum bello aggredi uelle dictitante, ut illum interciperet, magno cum periculo per Senarum & Florentinorum agrum in fines reip. atque ad urbem se recepit. cui à Senatu libra auri dono in sumptum singulis mensibus constituta. quoniam autem libido ea inter ciues creuerat, ut quamplurimi sacerdotia, quæ habere bonis artibus non poterant, Romæ coemerent; qua in urbe eius rei consuetudo facultasq; ab Alexandro instituta la-



te palamq; inualuerat: Decemuiui sanxerunt; si quis in posterum id faceret, eius bona fisco inferrentur, ipse ab urbe atque urbis finibus quādiu uiueret exul esset. Neque multo post Ioannes Michael ciuis Venetus Cardinalis; qui Pauli secundi Pont. Max. sororis filius fuerat; Romæ ueneno interiit: quod ei Alexander à præfecto Michaelis epularum dari iussit. causa interficiendi hominem fuit aurum atque argentum; quod is habere existimabatur: quarum omnino rerum inexplebilis Alexandri animum cupiditas ad omnem iniquitatem, incendebat; uti filio pecuniam exercitibus alendis suppeditaret; quo is Itatorum principum regna occupare celerius posset se iam sene. minister ueneni haud multo post, Iulio Pont. Maximo re per indicium enunciata, in uincula coniectus, quæstione habita sui sceleris pœnas persoluit. Baiafetes interim indutiis cum Sophi Armeniæ rege initis, cum quo sibi atrox bellum intercedebat, ad bellum Venetum solutior factus animos, quos deiecerat, sumpsit: deq; pace cum repub. nihil se facturum dixit; nisi Veneti Leucadiam sibi insulam restituerent. patres de eo per Admetis ad Andream Gritum literas perq; nuntios certiores facti; ne diutius eo bello contererentur, pacem cum Baiafete fecerunt; Leucadiamq; insulam, cuius oppidum magna impensa Pisaurus longe firmitus iam communitiusq; fecerat, Baiafeti restituendam curauerunt Pisauro domum reditione permissa. ea de pace uti Diis immortalibus gratiæ agerentur; atque auri libræ tres dono in sacerdotium collegiæ distribuerentur; Senatus censuit. & quoniam Baiafetes legatum suum una cum Zacharia domum redeunte ad urbem miserat, ut, quando ipse legato reip. iusiurandum dederat, fore de pace, uti pollicebatur, ita is dando item à Lauredano Principe iuriurando præsens adesset: Senatus Andream Gritum legauit, qui ad Baiafetem cum eodem legato reuerti properante proficisceretur. cui legato uestis aurea, & item serica cum ternis auri libris dono data. eadem est pax aliquot post menses à Baiafete cū Vladislao rege Pannoniæ inita. His rebus ita constitutis, ab Aloisio rege Galliæ missus ad Senatum legatus paucis ante Calendas Quintiles diebus postulauit; uti nouum suo cum rege patres fœdus sancirent. is fuit Ioannes Lascaris Byzātijs, græcis literis eruditus.



ditus . atque id ea de causa rex procurandum sibi , & contendendum statuerat , ut , quoniam Consalius Hispani dux exercitus in Brutiis suum exercitum interfecto duce fuderat , fugauerat , regnumq; Neapolitanum propè omne sub regum suorum imperio redegerat ; renouato fœdere Veneti cum Hispaniæ regibus bellum unâ facere tenerentur . atque ut ad eam rem patres animum inducerent , amplissimæ ab Aloisio conditiones proponebantur . quas omnes Senatus respuit , ueteri se fœdere contentum dictitâs . Alexander ueneno , quod furtim dari Adriano Cardinali familiari suo iusserat , cuius in hortis unâ cum Cæsare filio cœnabat , per ministri imprudentiam epoto , quinto decimo Calendas Septembris excessit è uita . Cæsar eodè haustu penè absumptus difficilem in morbum incidit . qua in re Deorum immortalium mens & uoluntas uisa est magnopere affuisse : cum ii , qui plurimos & Romanæ reip. principes , & clientes suos , ut eorum opibus , & thesauris potirentur , ueneno necauerant , & tunc suum hospitum atque alumnorum adiungi ad reliquos , necariq; mandauerant , eo ipso in ministerio semet pro illo interficerent . Illis diebus Benedictus Pisaurus classis præfectus , uir egregia uirtute , cū se ad reditum compararet , ualetudine impeditus Corcyræ interiiit . patres ob Alexandri mortem id , quod re euenit , existimantes fore , ut multa oppida malis artibus ab Cæsare capta eius imperium essent detrectatura ; præfectis aliquot Rauēnam missis copiarum , quæ ibi erant , numerum duplicauerunt . pauloq; post Decēuiri Chrystophorum Maurum , unum ex quinque uiris , qui res bellicas in Senatu procurant , legatum creauerunt , atque in Flaminiam contendere iusserunt ; ut , si quod ex Cæsaris oppidis sponte reip. se dederet , ab eo reciperetur . cumq; complura iam Romanorum principum castella pagi q; eiectionis aut interfectionis Cæsaris ministris ad priores dominos rediissent ; Pisaurum , Ariminum , Camerinum , Senogallia , etiam Populonia , cuius regem Cæsar expulerat , oppidumq; ceperat , idem factura dicerentur : Guidus Vbaldus , & ipse suum ad regnum recuperandum à popularibus accersitus , triginta auri libris à Senatu mutuo acceptis uiæ se dedit ; eoq; adueniens omnibus ab oppidis magna gratulatione est receptus . Cæsar , non tam quod esset morbo implicitus ,



quā propter Romanorum ciuium in se se odia uitæ suæ metuens,  
quicquid equitum, & militum habebat, in urbem introduxit. ea  
re accidit, quod accidere erat necesse, ut Cardinales, qui iā propē  
omnes conuenerant ad nouum Pont. legendū; ne facere id pos-  
sent, Cæsaris exercitus timore impedirentur. qua intellecta re Se-  
natus literas ad eos dedit; si ita opus esse ducerēt, se celeriter om-  
nes suas copias Romam missurū; quibus facilius Romanæ reip.  
maiestatem, & suam dignitatem tueri, & quæ ex usu essent, admi-  
nistrare libere ac sine metu possent. Antonius etiam Iustinianus  
legatus coram idem est pollicitus Senatus reip. q̄ nomine. quod  
quidem illis tam suspecto tempore, gratum ac peropportunum  
fuit. ea enim re permotus, ne in se remp. incitaret, Roma cum  
suis omnibus egressus copiis Cæsar Vaticanum sacro Senatu re-  
liquit. interim à Guido Vbaldo nuntius ad Senatum uenit; se se  
regnum & salutem suam illi acceptam referre; cupere cum equi-  
tibus grauioris armaturæ centum, leuioris, qui sagittis uterētur,  
centum, & quinquaginta, stipendia reip. facere: milites se habe-  
re paratissimos numero ad duo millia, quibus sine stipendio mē-  
sem eoq; amplius Senatus uti possit: rogare, ut in eius fidem reci-  
piatur. cognitis his postulatis, satis est ei omnibus in rebus ab Se-  
natu factum, atque auri libræ centum annuæ in stipendium con-  
stitutæ. Cardinalium collegium, Cæsaris abitu liberum factum,  
Cardinalem Senensem Pont. Max. creauit, qui se Pium tertium  
appellari uoluit. huic ante mensis exitum uitatæ tibiæ doloribus  
mortuo successit Iulius secundus Ligor: quem resp. Pontificem  
fieri maiorem in modum concupiuerat: eiq; rei omnem suā ope-  
ram adhibuerat. sed Pio uita fruente Iacobus Venerius Rauennæ  
præfectus, Cesenam ab eius oppidi ciuibz accersitus, qui se  
reip. dedere uolebant, cū militibus noctu se contulit, frustra, pro-  
pterea quod non ea, quæ inter ipsos conuenerat, sed nocte poste-  
ra eò uenit. illi autem cum se superiori nocte ad illum recipien-  
dum comparauissent, neque is se ostendisset; studium & diligen-  
tiam remiserunt, accidit autem ob eiusmodi moram, uti Cæsa-  
ris militibus res in suspicionem ueniret, qui ad portas & in muris  
stationes habuerunt. itaque Venerius infecta re Rauennam re-  
diit. paucis post diebus Petri Remiri Hispani, qui Fori Liuii arcē  
munitissimam



96

munitissimam Cæsari custodiebat, nuntius Rauennam ad lega-  
 tum uenit; si resp. eam arcem uelit, Remirum illam traditurum,  
 modo ei liceat, quæ in arce sit suppellex Cæsaris, Rauennam at-  
 que ad urbem asportare: tum ab Senatu præfecturâ habeat equi-  
 tum quinquaginta, totq; in urbe insulas, quibus ex insulis dua-  
 rum auri librarum fructus annuus ad se se redeat. ea intellecta re  
 Senatusconsultum factum est, legato licere præfecto arcis fidem  
 dare reip. nomine, fore quemadmodum uelle se ostendisset, ar-  
 cemq; ab eo accipere, atque ea de causa Forum Liuii accedere,  
 cum ea copia, quam ex usu esse reip. statuisset: ne ue quis eam re  
 enuntiaret, à senatoribus omnibus iusiurandum datum. deinde  
 Romani interregni diebus cum Pandulphum Malatestam, qui  
 Ariminum à Roberto patre traditum aliquot annos iniuste re-  
 gnans obtinuerat, & ab Cæsare eiectus oppido fuerat, eò cū co-  
 piis accedentem oppidani repulissent: Guidus Vbaldus per lega-  
 tum suum Senatui significauit, Pandulphum cupere, ut, quoniâ  
 oppidani adduci non poterant, ut ei se se dederent, reip. autem  
 imperium magnopere optarent, Senatus oppidum reciperet: spe-  
 rare, sibi ab rep. non de fore uitæ pro dignitate traducendæ facul-  
 tatem: itaque, si Senatus iubeat, ipsum eâ re curaturum; quo Ari-  
 minenses magnopere confiderent. quamobrem Senatus censuit  
 legato respondi oportere; si Guidus Vbaldus, uti Ariminū op-  
 pidum reip. se dederet, suo studio, & auctoritate, quam cum illa  
 ciuitate habeat, effecisset, eam rem Senatui gratam fore. postre-  
 mo cum Guidus Vbaldus aliquot pagos & castella ex Ariminen-  
 sium, & Cefenatum finibus ualde uel communita, uel propter  
 agrorum bonitatem opportuna ui expugnauisset, & Senatui signi-  
 ficauisset, ea se omnia reipub. traditurum, modo id se non nolle  
 ostendat: alterum Senatusconsultum factum est, ea recipi senatui  
 placere. tum Fauentinis ciuibus aliquot, qui Rauennam ad lega-  
 tum uenerant, reip. se se dedere cupientibus, idem uti legatus eis  
 ostenderet, imperatum. & quoniam Arimini, Fauetiæ, Foriq; Cor-  
 nelii arces munitissimæ singulatim à præfectis Cæsaris obtineban-  
 tur, quorum pars reip. eas uendere cupiebat: latum, uti de condi-  
 tionibus cum eorum nuntiis legatus ageret. Russium præterea in  
 Fauëtinorum, & Arcangelianum, ac Sauinianum in Ariminen-



sum finibus, pagi frumentarii, & magna uterque fertilitate, iteq;  
castellum Vrbinatibus finitimum summo in iugo, quod incolæ  
Montisflorem appellant, reipub. deduntur. etiam Fauentia ager  
propè uniuerfus unà cum arce oppidi egregia legato cum copiis  
accedente in fidem recipitur. quo ferè die allatū est, Iulium Pont.  
Max. esse factum. itaque in urbe omnes magnopere lætari, oppi-  
do egregio ad reipub. imperium accedente, & Iulio Pontifice, in  
quem Senatus largiter omnia sua studia atque officia contulisset,  
lecto. ipse uero Iulius, cum ad eum gratulatum Antonius legatus  
accessisset, hominem hilariter complexus omnia se reip. debere  
profiteri: nihil esse, quod de se Senatus polliceri sibi non posset.  
cūq; ab legato sermo de Cæsare institutus esset; propterea quòd  
nonnullis ab hominibus prædicabatur, illum ab Iulio folum ac  
defensum iri; legato, uti nihil eiusmodi uereretur, fidē fecit. illud  
etiam se dixit cupere, ut, quæ Cæsar possideret in Flaminia oppi-  
da, ea illi eriperentur. quæ quidem certe oratio gratissima ciuita-  
ti fuit. Inter hæc Pandulphus, nonnullorum factione inter eos ex-  
citata, ab Ariminensibus recipitur. Florentini, quòd ægre ferrent  
Fauentiam in reip. potestatem uenire, copias miserant, quæ ci-  
uium parti, qui secum sentiebant, auxilio essent, ut sibi potius,  
quàm reip. se dederent. ea pars milites, & agrestes homines in op-  
pidum introduxerat. ab iis reliqui perterrebantur, ne portas le-  
gato aperirent. itaque milites, quos Guidus Vbaldus Senatus  
pollicitus fuerat, legatus ab eo accersit: alios comparat, & dele-  
ctum habet. tormenta adduci imperat. equites mittit, qui Floren-  
tinorum copias in montibus morètur, & repellant. Dum hæc fo-  
ris administrantur, Senatus legatos creauit, qui Romam profici-  
scerentur Iulio Pont. Max. gratulatum ob propensam in illum  
reip. uoluntatem, octo: quod ante eam diem nunquam accide-  
rat, ut tot legati ad Pontificem non Venetum mitterentur. Flo-  
rentini, cum potiri Fauentia non possent, per Franciscum Sode-  
rinum ciuem suum Cardinalem egerunt, ut is suspectam Iulio  
remp. faceret: omnes eius oppidi fines, arcemq; oppidi iā in reip.  
potestate esse: oppidum etiam breui futurum: id illam, non tam  
ut ab Cæsare male parta extorqueantur, quàm ut sibi acquirat,  
contendere, & tantopere conari: quod semel Veneti ceperint,  
nunquam



nunquam eos reddere consueuisse : ipsum eam rem sero cognitu-  
rum; cum iam ii rerum domini eius permissu fuerint. de eo An-  
tonius legatus certior factus, ut Senatum purgaret, Iulium adiit,  
rogauitq; ne reip. calumniatoribus aures tribueret; quos non de-  
fore sciebat. cumq; quod uisum fuit in eam sententiam dixisset:  
Iulius neque se quicquam credidisse iis, qui maledictis reip. in-  
sectati essent, respondit; neque in posterum crediturum: scire, se  
amari à Veneta ciuitate, eiusq; rei permulta habere indicia: & ip-  
sum contra amore summo erga illam affici: gaudere etiam, cum  
quis se ob id non Ligurem, sed Venetum appelleret: quod quidem  
iam fieret ab iis, qui tantā ipsius & reip. coniunctionem, & inter  
ipsos beniuolentiam moleste admodum ferunt. sed quod ad Cæ-  
sar's regnum ditionemq; attinet: cupere se, ut quæ in Ro. reip.  
imperio ante illum erant oppida, eidem reip. restituantur. hoc  
sermone habito ab se legatum dimisit. Inter hæc Pandulphus ad  
urbem uenit. qui cum uereretur se se Ariminum propter ciuium  
inensam in se uoluntatem obtinere diutius nō posse, ad id, quod  
per Guidum Vbaldum paulo ante Senatui proposuerat, rediit, at-  
que Ariminum reip. certis conditionibus tradidit. itaque Domi-  
nicum Maripetrum legatum, qui oppidum, & Vincentium Va-  
lerium, qui arcem reciperet, patres Ariminum miserunt. Pan-  
dulpho posterisq; eius Citadella oppidū in Patuinorum sinibus,  
& paulo post ciuitas cum iure comitorū ipsi & Carolo fratri eius  
data. Pandulphus etiam in reip. militiā receptus; eiq; præfectura  
equitum attributa, uxori, & fratri Carolo quinque auri libræ an-  
nuæ utrique constitutæ: alteri ex liberis duobus sacerdotia libe-  
riora promissa, quot petierat. ipsi datæ dono in præsentia auri li-  
bræ centum. ea de re per Antonium legatum Senatus Iulium cer-  
tiores facit. qui in eo perseverat, ut uelle se ostendat, quæ fue-  
rint Ro. reip. oppida, ei restitui. itaque petere à Senatu, ut auxi-  
lio suo atque opibus ad ea recuperanda se se iuuet. miserat ante  
illos dies Senatus alterum Fauentiam legatum Nicolaum Fusca-  
renum, ad oppidi oppugnationē maiore studio & celeritate pro-  
curandam, lente adhuc administratam existimans. iusserat etiam,  
ut Nicolaus copiarum reip. præfectus cum iis Fauentiam contē-  
deret, is statim uix se dedit. sed antequam Rauennam perueni-



ret, muro tormentis percusso, legatisq; proponentibus se oppi-  
dum ad prædam militibus duros, si ciues deditionem differant;  
ante diem tertiumdecimum Calendarum Decembrium Fau-  
entia deditur. Venetias ubi de eo est allatum; Senatusconsultum  
fit, ne Iulii animus irritetur, nihil oppidorum Cæsaris recipi am-  
plius ab legatis oportere: satis in Arimino atque Fauentia reipub.  
factum. deinde legatorum alter iussus Ariminum se conferre ho-  
nestandi oppidi causa. Iisdem diebus Andreas Gritus, quem  
Senatus ad regem Thracium miserat, pacis conditionibus ali-  
quot in reip. utilitatem recognitis, ipsa recte firmata domum re-  
diit. at cum paulo post Roma Antonii legati literis patres intel-  
lexissent, multorum sermonibus confirmari Iulii permissu Cæsa-  
rem ad suum in Flaminia regnum propediem reuersurum: proxi-  
mo Senatusconsulto rescisso literæ sunt ad legatos ab Senatu da-  
tæ, ut, quicquid possent, de Cæsaris ditione reip. addere, cape-  
re; festinarent. ea re euenit, ut Meldulam in Ariminensi agro, &  
Tossinianum in Foro Corneliensi, pagos muris arcibusq; commu-  
nitos, missi ab legatis equites ad reip. imperium lubetissimos adie-  
cerint. Post hæc Angelus Episcopus Tiburtinus, qui Alexandri  
legatus aliquot annos apud remp. fuerat, eoq; mortuo Romam  
redierat; iterum missu Iulii Venetias uenit eodem legati nomine.  
is primo aduentus sui die saluere ab Iulio Lauredanum Principem  
& patres iussit humanissimis amantiisq; uerbis: eisq; gra-  
tias ingentes agere illū dixit, quod in se iuuando, ut Pont. Max.  
legeretur, multum operæ studiisq; contulissent: plurimumq; ex ea  
se re debere Senatui, libenter profiteri; neque unquam eius officii  
memoriam abiecturum: amare insuper sua sponte Venetam ci-  
uitatem, remq; p. optimis utentem & institutis, & legibus: itaque  
omnia ei omni tempore tributurum, quæ ex dignitate sua tribui  
amicissimis hominibus possint. hoc sermone habito, appellatis  
suo nomine patribus, quibus cum priore legatione assueuerat,  
discedit, mandata reliqua, quæ longioris essent moræ, in aliam se  
differre diem pronūtiāns. ea dies ubi uenit; secreto apud illos, De-  
cemuirum adhibitis magistris, proponit, uelle Iulium & petere,  
uti Ariminum & Fauentia, quæ interceperint, de Romana di-  
tione oppida, ea ipsi restituantur: rogare etiam, ut ad reliqua re-  
cuperanda



cuperanda eum iuuent: decreuisse enim, ne ulla Cæsari turricula, cui imperet, relinquatur, sed omnia eo redeant, unde recessere. patres questi, non esse hoc illud, quod ob suam in Iulium pietatem & studium ab eo expectarent, rem ad Senatum deferunt. Senatus censuit, legato respondi oportere: quod Ariminum & Fauentiam resp. ceperit, ea ab Cæsare homine importunissimo, crudelissimoq; cepisse, Iulio ipso, antequam Pontifex Maximus fieret, hortante, facto autem permittente atque assentiente: eaq; oppida, uti à Vicariis obtineri solita, remp. modo sua fecisse, reliqua non attigisse: quæ si uoluisset, non fuisse difficile capere, atque retinere: eorum duorum oppidorum nomine se uicariam Romanæ reip. uelle esse: uti priores domini fuissent. quid in eo Iulius amitteret? quare, ea sibi esse retinenda, statuisse. quod ad eum ad reliqua iuuandum attineret, suas omnes copias, atque opes polliceri: eis ille tanquam suis uteretur. hæc responsi lex. illud autem, hortatorem Iulium eius negotii fuisse, uerissima Senatus oratio fuit. nam cum apud Iulium Antonius legatus Pii Pontificis regno in cum sermonem esset ingressus, ut de Cæsaris iniustissima Flaminiae possessione quereretur; auctor reip. eius magnopere consilii Iulius fuerat. his de rebus saepe ultro citroq; datis ad legatum Romam literis, & acceptis, Iulio à sententia non recedente, affirmante interdum potius, quoniã sibi ad bellum cum rep. gerendum uires non suppeterent, se à Christianis regibus auxilia contra eam imploraturum, quos sciret Romanæ reipub. opis eorum egenti nunquam defuisse; Antonio autem legato ipsum illum ab eo nondum Pontifice habitum secum sermonem repente, atque, ut eius reminisceretur, ab illo postulante: cuius omnino rei Iulius satis idoneam afferre excusationem non poterat: tantum inquebat, quæ non Pontifex dixerit, ea se expendere nõ oportuisse: annus ad exitum labitur. itaque prima insequentis anni die Antonius oratione apposita & leni Iuliũ satis hilarẽ aggreffus familiariter petiit, ut, quoniã ea die clientibus atque amicis dari munera consueuissent, ipse dono reip. tam illi dedita, tam affecta atque amanti daret, ut Ariminum & Fauentiam eo libente obtineret, quo ipse uellet nomine. ad quæ subridens Iulius ita respondit, ageret ipse cum rep. ut Tossinianum, quod es-



set in Fori Cornelii finibus, postremo captum ante omnia resti-  
tueret: post id de Arimino atque Fauentia peteret: aliquid for-  
tasse impetraturum. Hoc Iulii sermone ad Senatum Antonii li-  
teris celeriter perlato, dum de eo patres consulunt, resq; alterca-  
tione magistratuum ex die in diem reiicitur, Angelus legatus li-  
teras Iulii patribus reddit: quibus literis omnem illis spem Iulius  
adimit, aliter inter se remq; p. posse conuenire, quam si ablata re-  
stituantur, id ni fecerint, Deos se & homines in auxilium uoca-  
turum, atque ad omnia descensurum minatur. tum uero patres  
magnopere turbati: idq; se ab Angelo magis, quam ab Iulio agno-  
scere; qui de Senatus in illum uoluntate per incōmode sæpe scri-  
pserit, cum moderatius atque sedatius agere debuisset; Iuliiq;  
animum, quem quidem cum iracundum per se, tum calumniis  
maliuolorum incitatum & succensum restingui bonis uerbis oportebat,  
digna atque indigna congerens malis persuasionibus inflā-  
mauisset. eoq; magis indignabantur, quod omnia, quæ in Se-  
natus secreto agitabantur, idem cognoscere modis omnibus nite-  
batur; dabatq; operam, ut ea quamprimum Iulius intelligeret;  
odiosasq; ad eum literas dabat. illud etiam patribus ad hanc mor-  
lestiam accedebat, quod Iulius suum hominē legatum ad Aloisium  
regem Galliarum miserat questum de reip. iniuriis, auxiliaq;  
contra illam postulatum. idemq; apud Maximilianum per ora-  
toris ipsius scribam Iacobum Bannisum Roma missum fieri  
procurariq; mādaauerat, scriptis ad eum literis acerbioribus ea de  
re, decimamq; fructuum ex sacerdotiis Germanicis, quam qui-  
dem Maximilianus ab eo magno studio petierat, ultro illi defe-  
rens, si se iuuerit. apud quem utrumque Senatus ab legatis reip.  
facti excusationem afferri iussit: se Ariminum & Fauentiam non  
ab Romanis Pontificibus, sed ab latrone omnium teterrimo auer-  
tisse; alterum, ne à Florentina ciuitate, sibi propter recentem Pisa-  
ni belli memoriam inimicissima, quæ eò suas copias miserat, in-  
terciperetur; alterum, permutatione oppidi cum eius regulo fa-  
cta in reip. finibus: ea oppida ante Cæsarem per Vicarios obti-  
neri consueuisse: si se illorum Vicarium fieri Senatus uelit, nihil  
nouum petere: id pro eius plurimis in rempub. Christianam meritis  
æquum esse ei tribui, quod sæpe aliis nihil merentibus sit datum:  
neminem



neminem in Flaminia Vicarium, neque ad eam ipsam reliquaq;  
 Romanæ dictionis oppida defendenda firmiorem, quàm Senatus  
 sit, neque qui maiori illi usui, si res exigat, possit esse, hac Iuliū  
 tempestate habiturum. quænam inuidia sit, quod temere cuili-  
 bet, ac sine ullo usu condonatur, id & præteritis reip. promeri-  
 tis, & spei futurorum, cum se occasio dederit, prouentuum & cō-  
 modorum pernegari? ipsum præterea Iulium suasorem Senatui  
 per legatum abripiendi ab Cæsare Flaminia extitisse: post id præ-  
 ter illud, cuius ipse hortator fuit, nihil noui accidisse: ut nō tam  
 Iulius habere causam, cur à sententia recedat, quàm quonam  
 modo reip. noceat, quærere ac meditari uideatur: petere itaque  
 remp. ab Aloisio quidem, ne fœderis religionem, quod ei cum  
 Senatu est, propter Iulium tam iniuste se efferētem uiolet: à Ma-  
 ximiliano autem, ut amicus reip. quæ finitima illi est, atque beni-  
 uola semper fuit, bona in causa malit esse, quàm Iulio, qui lon-  
 ge ab eius regno abest, in periniqua, si fides inter homines atque  
 constantia suum ius obtineant. qua accepta excusatione uterque  
 à se reip. causam apud Iulium defensum iri liberaliter pollicitus,  
 Senatum paulo quietiorem reddidit. Illis diebus, propterea quòd  
 Nicolao Vrsino, qui Rauēnæ erat reipub. copiarum præfecturæ  
 tempus explebatur, ob eius fidem atque constantiam, quòd à  
 compluribus ciuitatibus & regibus, ut ipsorum stipendia  
 faceret, magnis pollicitationibus inuitatus rempub.  
 deferere noluerat, per triennium imperatorium  
 ei nomen cum stipendio annuo auri libra-  
 rum quingentarum Senatus  
 dandum censuit.



PETRI BEMBI RERVM VENE-  
TARVM HISTORIAE  
LIBER VII.



**F**EDM ferè tempore, quòd Vincentius Naldius Fauentinus, magna in oppidi finibus gratia, omne studium, & diligentia adhibuisset, ut Fauentia in deditionem, potestatemq; reip. redigeretur; ei militiæ insignia cum veste aurea, auriq; libræ uiginti sunt à patribus dono datæ, tum quinque in annos singulos constitutæ pensionis nomine, immunitate omnium rerum, quam hæredes eius sequerentur, addita: primis quoque proximi ordines militum belli tempore promissi: eius etiam propinquis quatuor uictus annuus attributus. neque multo post eadem honestates, donaq; totidem, quot in Vincentium Senatus contulerat, in Dionysium item Naldium eius cõsobrinum sunt collata. Aestate uero inita cum Guidus Vbaldus Iulii suasu Franciscum Mariam, sororis suæ filium, cui fuerat pater Ioannes Iulii frater Senogalliam obtinens, adoptauisset: eam adoptionem Iulius, de collegii sententia, magno studio comprobauit. qua una quidem re suam in Venetos iracundiam iniustiore reddidit: cum uideri posset, quod illis iuris in Romanæ reip. oppida tam obstinate pernegaret, suis facile propinquis tribuisse. Maximilianus autem, suscepti paulo ante reip. apud Iulium patrocini plane iam immemor, duos legatos Venetias misit, qui Senatum hortarentur, uti Iulio Fauentiam atque Ariminum restitueret: eam in primis curam ad se spectare, suiq; esse muneris Romanæ reipub. Pontificisq; rerum procurationem: id si nolit, causam ad iudiciũ remittat: se curaturum, ut item ab Iulio remittatur: quòd si se arbitrum uelint eius disceptationis facere, se non recusaturum, & pro rei æquitate sententiam laturum. his legatis Lauredanus, consulto Senatu, cum omnes eius rei causas, quas quidem Maximiliano ciuitatis legati antea ostenderant, enumerauisset; unum modo respondit, reip. ius illis in oppidis, satis esse clarum atque notum



notum per se se : itaque nolle patres id in ambiguum uertere . eo responso accepto , legatorum alter Romam discessit , altero apud Senatū relicto , eiq; sumptus publice factus , quoad apud patres fuit . Iulius interim arcem Foroliuianam , auri libris centum quinquaginta , quas ab Cæsare acceperat , Remiro præfecto traditis , unaq; oppidum obtinuit ; cum antea Cefenam & Cornelium Forum iisdem propè artibus suæ potestatis fecisset . præfectus arcis Foroliuianæ cum Cæsaris suppellectili Venetias uenit . Post hæc inter Aloisium Gallorum regem , & Maximilianum fœdera sunt firmata , cum de eo per legatos diu multumq; disceptauissent . qui bus confectis Ioānem Lascarem Byzantium Aloisius iterum ad Senatum misit , qui diceret , hortari se se patres , ut aliquam cum Iulio inirent ad concordiam & consensionem uiam : qua inita unanimi omnes studio ea de bello Thracio cogitare possent , quæ iam pridem cogitanda atque agenda sunt : adderet & illud , sibi cum Maximiliano conuenisse , pacemq; & beniuolentiam inter ipsos esse constitutam ; non illam quidem , ut cuiuspiam nocerent , sed suarum utriusque rerum , & regnorum tuëdorum causa . patres , auri libra in sumptum mensibus singulis legato regio à quæstoribus dari iussa , nihil se fecisse reliqui dixerunt orando , pollicendo , uti Iulium placarent : descendisse enim etiam ad illud ; tamen si Alexander Fauentiam , & reliqua oppida Cæsari libera , immuniaq; dederit , uelle tamen se stipendiarios Romanæ reipub. fieri , Fauentiæ Ariminiq; nomine : legem ipse stipendiorum diceret nihil se recusaturos , auroq; Veneto recenter signato annis omnibus ea libenter persoluturos : neque quidquam tamen profecisse : cæterum latari se , duorum tantorum regum animos ab odio exercendo ad pacem & beniuolentiam esse conuersos : uerum , propterea quod in fœdere , quod reip. cum Aloisio intercedebat , caput unum erat eiusmodi , neutri sine alterius uoluntate fœdus ullum cum rege ullo facere licere ; scire patres cupere , cur de eo rex nihil antea Senatui significauisset . ad ea legatus cum aliquandiu siluisset , tandem se scire nihil respondit , nisi unum , ei fœderi tempus quatuor mensium esse præstitutum , quos uterque uelit , sibi socios , & fœderatos nominandi : itaque posse adhuc quidem regem ei fœderi inferere remp. qui legati tamen sermo



patrum animos , quibus quidem ea pax Senatu non appellato  
confecta suspicionem haud parua afferebat , nihil leniit. Post hac  
Decemviri certiores facti serui indicio , qui ab eo uapulauerat ,  
Hieronymum Tronum , qui bello Thracio Naupacti arcem , qua  
reip. nomine custodiebat , hostibus tradiderat , eaq; ob rem exul  
aliquot annos fuerat , id , quod fecerat de tradenda arce , pretio  
accepto fecisse : Tronum ab exilio domum redeuntem in uincu  
la coniecerunt ; pauloq; post quaestione habita e superiore curiae  
porticu , qua in foro est , inter rubri lapidis columnas recte suspen  
so carnifex gulam fregit. Atque ultimis ferè anni diebus Ioannes  
Pisaurum obtinès Mathei Teupoli filiam duxit uxorem , nuptiis  
in urbe per legatos institutis . tum litera ex Hispania ad Senatum  
uenerunt , Isabellam Reginam Ferdinandi uxorem magno ani  
mo , excellentiq; uirtute foeminam , e uita excessisse : cuiusq; generu  
Philippum Maximilianifilium , in Belgis regem , testamèti tabu  
lis permagna Hispaniae terrae parte auctum fuisse , quibus duabus  
de causis Vincentius Quirinus , uir in philosophiae studiis clarus ,  
ad Philippum legatus a Senatu lectus est , ut illi & de socrus mor  
te reip. molestiam ostenderet , & de regni accessione gratularetur.  
pauloq; post Hercules Ferrariensium dux item moriens Alphons  
o filio regnum reliquit . erat in celeberrima urbis regione ad Ri  
uum altum domus reip. perampla , qua antiquitus a Germanis  
mercatoribus incolae consueuerat . in eam illi cuiusq; modi res ,  
quas quidem uendere cuperent , aduectas suis ab oppidis infere  
bant , & ciuitati emendas proponebant : quasq; in urbe ipsi coe  
mebant , ut in Germaniam conueherent , eodem congregabant ,  
quoad essent deportandae . ea domus , ut erat mercium omnis ge  
neris plenissima , insequentis anni initio magna cum plurimoru  
honestorum hominum iactura conflagrauit . quam tamen domu  
illo ipso anno ciuitas a fundamentis , fornicibus inaedificatam , ne  
ignis nocere posset , magnificentiore multo forma , comodioreq;  
restituit . Eiusdem initio anni Bartholomæo Liuiano ; qui a rep.  
peracto stipendiorum tempore , patribus non permittentibus di  
scesserat , ut illatas suae in primis genti , reliquisq; Romanis prin  
cipibus ab Alexandro , atque ab Caesare caedes & uastitatem uin  
dicaret ; Hispaniaq; regum militiam fecerat ; iterum recipi postu  
lanti



lanti præfectura equitum, cum stipendio annuo, librarum auti-  
centum quinquaginta est à Senatu data. cumq; Cesenæ, Forili-  
uii, Foriq; Cornelii legati apud Iulium questi eissent, se à Venetis  
magna agri parte spoliatos angustis uti finibus, atque inopia mul-  
tarum rerum premi: Iulius per Guidum Vbaldum Antonio le-  
gato proposuit; si Senatus eos fines sibi restituat, de Fauentia, at-  
que Arimino se deinceps uerbum non facturum, rei; p. oppida  
illa in omne tempus uti retineat, permissurum. ea Guidi Vbal-  
dum oratione Antonii literis ad patres perlata, Senatus, ne cuiuspiam  
obstinatio uideri posset, Antonio rescripsit; si ei Iulius fidem fa-  
ciat, ita fore, uti Guidus Vbaldus ei dixit, se fines illos restitutu-  
rum, legatosq; quos creasset octo ad illum missurum; suumq; in  
eum studium, & obseruantiam præstaturum. quo responso ac-  
cepto, Iulius & Antonio de Arimino atque Fauentia liberali-  
ter est pollicitus, & magnam se ex eo uoluptatē cepisse apud suos  
familiares prætulit. Senatus de eo certior factus, oppidula de-  
cem numero cum eorum finibus uti Iulio restituerentur, censuit:  
in quibus Cesenæ portus, qui est in maris litore, Sauinianum,  
Tossinianum, Archangelianum fuere. iis Iulii internuntio, quē  
ad id in Flaminiam miserat, per legatos reip. restitutis Iulius rem ad  
collegium deduxit: laudatusq; ab omnibus, quod se ad concor-  
diam cum Senatu dedisset, magnum sui consilii fructum tulit.  
unus Franciscus Soderinus Cardinalis, cum & ipse Iulium uer-  
bis honorificis extulisset, addidit, eo se magis illū laudare, quod  
quemadmodum fines illos recuperauisset, ita etiam Ariminum  
ab eo atque Fauentiam breui recuperatum iri confidebat. lega-  
tio postea, de qua supra dictum est, Romam missa ab Iulio liben-  
tissimo recipitur. ii fuerunt Bernardus Bembus pater meus, Pau-  
lus Pisanus, Hieronymus Donatus, Nicolaus Foscarenus, An-  
dreas Venerius, Andreas Grittus, Leonardus Mocenicus, cu-  
ius pater Ioannes Venetorum dux fuerat, & Dominicus Triui-  
sanus templi Marci procurator. eius legationis Bernardus Bem-  
bus propter ætatem principem locū tenuit. Andreas Grittus &  
Nicolaus Foscarenus è sexuiris, qui principi assident, legationem  
inierunt. Antonio autem, cum diu Romæ in ea legatione fuis-  
set, rei; p. singulari suo studio atque prudentia magnopere satis-



fecisset, domum est reditio permiffa . Atque hæc uere medio eū, quem diximus, euentum habuerunt. ætate uero inita, Alfonsus Ateftinus, ut Lauredanum Principem, & patres regni fui initio falutaret; magno comitatu ad urbē uenit; honorificeq; acceptus, & auri libra diebus fingulis in fumptum à Senatu donatus, graui cum patribus beniuolentiæ fœdere amicitiaq; arctiore constituta domum rediit. patres sub hæc de aduentu in Italiam Maximiliani, qui Romam uelle ire dictitabat, ut imperii insignia à Pontifice Maximo acciperet, sæpe confulti, eius legatorū postulatis amice, & beneuole sunt polliciti. Decembri demum mense de confectis ab Aloisio Gallorum rege Ferdinandoq; inter se fœderibus cognouerunt. quæ omnino res fufceptam ab illis iam antea de Aloisii in fe fe animo fufpicionem facile auxit; propterea quod is nihil ante de ea quoque re Senatui significauiffet. Ferdināndus quidem per legatum fuum patribus oftendit: propter noua illa inita cum Gallorum rege fœdera nihil fe de uetere fua cum ipsis beniuolentia diminueret; quam non retinere modo, atque alere, fed augere etiā studiis atque officiis in dies fingulos cuperet: nullos euentus eam fibi mentem crepturos. anno in fequente, ob nō nullos mare Aegæum, atque Ionium, demum etiam Adriaticum nauigantibus infeftū reddentes pyratas, Senatus quamplurimas triremes non uno tempore armandas curauit: quibus à triremibus capti aliquot, latrociniorum pœnas reip. dederunt. Eo tempore Tunetis regis legatus ad Senatum miffus equos miræ pernicitatis more punico ephippiatos quatuor, aquilasq; aucupio idoneas totidem, & canes uenaticos patribus dono attulit, petens, ut naues longas ad mercatum eò mitterent: uelle enim regem fuum amicitiam cum rep. inftituere. is legatus liberaliter acceptus, donumq; cum muneribus remiffus, optimā in regem ciuitatis uoluntatem reportauit. etiam Norimbergēfes, ampla & florens atque in primis libera fuiq; iuris in Germania ciuitas, miffis ad urbem legatis exemplum Venetarum legum à patribus petiuerunt: uelleq; fe fe eis uti legibus oftenderunt. quod quidem illis Senatus frequens concessit. petente autem ab Senatu arroganter Baiafete rege, ut Alexium in Illyrico infulam bello Thracio captam fibi reftitueret, obftinatis eius atque affiduis poffulationibus patres



tres uicti, ne is pacem, quam cum illo fecerant, si reiiceretur, frangeret; ab Alexio incolis omnibus emigrare iussis, aliisq; in locis collocatis, rebus asportatis, arce diruta eam inanem atque uacuam importuno regi relinquendam censuerunt. erat paucis ante id Senatusconsultum diebus Marcus Antonius Sabellicus, qui res Venetas conscripsit, ipsa in urbe mortuus: laudaueratq; illum Egnatius. quoniam uero ciuibus Venetis, qui tunc in Aegypto mercaturam exercebant, multa incommoda rex Alexandrinus intulerat, auctis præter morem Indicarum mercium pretiis, ipsorum bonis ui direptis, aliquot in uincula coniectis; Senatusq; ea de re per legatos apud regem questus fuerat: regis legatus ad Senatum uenit eius controuersia dirimendæ, atque componendæ gratia, Tangauardinus homo Hispanus, qui multos annos Alexandria fuisset. ei est sumptus de mercatorum pecuniis equis portionibus æstimatis datus. è Gallia etiam ab rege literæ Iulii literas ad Senatum datas attulerunt; quibus literis, quoad Iulius uiueret, Ariminum & Fauentiam retinendi reip. facultas dabatur. eas literas Iulius ad regem miserat, ut per illum Senatui redderentur, quo maior auctoritas intercederet; quod intelligebat, illarum scripto multo minus se præstare, quàm id erat, quod pactus cum rep. fuisset, legatoq; ipse Veneto suamet oratione confirmauisset. id ubi patres de legato regio intellexerunt, magna eos indignatio tenuit, ingrato animo esse Iulium prædicantes, nullaq; constantia, qui tantis receptis finibus, tot ad se missis una legatione ciuibus, quot nemini unquam externo, tam insignibus in illum ciuitate functa officiis, tamen nunc conditionibus à se uno positis non stet, nisi tenuissima ex parte, atque eius quidem partis rege internuntio, ut illius auctoritate res, quemadmodum quidem uult, minore negotio transigatur. eas ob regis literas coacto biduum Senatu decernitur, literas Iulianas non esse accipendas. Ferdinandus interea rex classe Neapolim aduentabat, ut, quoniam ad Philippum generum omnis propè Hispaniæ nobilitas confluebat, atque ipsum pristina populorum gratia, dignitasq; apud eas nationes destituebant, id in regnum se conferret, cuius ille particeps non esset. eam ob ré patres Georgium Pisanum, Marcum Dandulum legatos creauerunt, qui Nea-



polim ad Ferdinandum proficiscerentur, de eius in Italiam aduē  
tu gratulatum. atque is neque dū Neapolim attigerat, cum Phi  
lippus in Hispania, quō socru mortua mari ē Belgio uenerat, pi  
tuita interiit. ita sunt magna incepta spesq; ingentes unā cum  
uita iuueni abruptæ. eā ob filii mortem Maximilianus pater suū  
in aliud tempus Romanum iter distulit: quiq; iam præmissi ab eo  
in alpibus Germani erant milites, domum reuocati redierunt. Ju  
lius autem, qui omnes suos conatus eō intenderat, ut oppidum  
Bononiam in suam ditionem, atque imperium reuocaret; cuius  
quidem oppidi regnum tametsi Romani iuris esset, à Ioanne ta  
men Bentiuolo obtinebatur; comparatis rebus omnibus, quæ ad  
bellum usui essent, Roma cum exercitu & collegio in Flaminia  
æstate iam confecta discesserat, ut illum oppido expelleret. quod  
omnino longe facilius, quā hominum opinio ferebat, propter  
ingens ciuitatis in illum odium adductis in fines oppidi, quas &  
ipse habebat, & ab rege Gallo acceperat, copiis mense octobri est  
asssecutus. ea illi de re ab Dominico Pisano legato, qui Antonio  
succefferat, reip. nomine gratulatio est facta: tametsi ipse quo  
que Iulius suum tabellarium cū literis ad Senatum miserat, quæ  
illum iis de rebus docerent. ultimis anni diebus, propterea quod  
sæpe fiebat, ut, qui impetrare magnam aut difficilem rem aliquā  
à magistratibus cuperent, regum, & Pontificum Maximorum  
legatis uterentur, qui eos principi patribusq; commendarent; in  
terdum etiam ipsorum regum principumq; ciuitatum ad urbem  
uenientium patrociniū nitebantur, quorum auctoritati patres  
propè negare nihil poterant: Senatusconsultum factum est: cui  
quid à patribus impetrare sit necesse, is neque uirum principem,  
neque legatum adhibeat, cuius commendatione apud eos niti  
possit, pœna pro genere hominum iis, qui Senatusconsultum  
neglexissent, constituta. Primis uero ineuntis anni diebus Petrus  
Barotius Patauinorum Episcopus moritur, uir politioribus lite  
ris & sacrarum ac multarum disciplinarum doctrina insignis, mo  
ribus, uitaq; sanctiore, quiq; subleuandis egestate pressis ciuibus  
sacerdotii sui fructus omnes largiebatur, ut unius illius liberali  
tate non parua oppidanorum pars uiueret. itaque mortuo neque  
numi neque suppellex pretiosa ulla inuenta, præter bibliothecā.  
cas



eas ob res sepulcrum ei marmoreum in templo Patauino facien-  
 dum publica pecunia, patres conscripti censuerunt. pauloq; post  
 cum ciues plurimi Ligures emigrare domo, atque urbem uelle  
 incolere se se patribus ostendissent, modo tuti publice fierent, si  
 quid in Venetos Ligur quispiam deliquisset, sua bona ea re non  
 teneri: Senatusconsultum factum est, quo eis ciuitas atque secu-  
 ritas est data, nauigatione mercaturæ causa in orientem excepta.  
 Sub idem tempus Aloisio Gallorum rege in Italiam properante,  
 ut Genuensium ciuitati, quæ ab eo defecerat, se seq; in libertatē  
 uindicauerat, bellum inferret; Dominicum Triuisanum, Pau-  
 lum Pisanum Patauinorum magistratum Senatus legatos ad re-  
 gem de aduentu gratulatum misit. ille autem recepta paucis die-  
 bus Genua Mediolanum se contulit, ibiq; eum legati conuene-  
 runt. sed cum in Galliam transalpinam rediens apud Astam co-  
 gnouisset Ferdinandum regem, qui Neapoli classe in Hispaniā  
 reuertebatur, exitinere Genuam appulisse, conuenireq; se cupe-  
 re: ei præsto ad Sauonem oppidum fuit; magnoq; illum honore  
 excipiens: cum unā, dies aliquot fuisset, Ferdinando abeunte ipse  
 in Galliam profectus est; legati domum reuerterunt. cum ob  
 Aloisii tam celerem in Italiam aduentum; cum illum, si inimico  
 esset in rep. animo, non longinquitas itineris, non reges inter-  
 positi, non denique alpes moraturæ uiderentur, quin, cum uellet,  
 in citeriorem Galliam paruo negotio traiceret; tum etiam quod  
 rumor increbuerat, Maximilianum in Italiam cogitare: ne resp.  
 ad eiusmodi casus imparatior offendi posset, Senatusconsultum  
 factum est; in Veronensium finibus eorum, qui arma ferre pos-  
 sent, certus agrestium hominum numerus conscriberetur, qui  
 rei militari assuefierent: iisq; immunitas reliquarum rerum dare-  
 tur, quo paratiores ad obeunda belli munera essent, & cum uo-  
 carentur ad signa, uestigio conuenirent. ea militum ex agris de-  
 inceps institutio ad reliquos reip. fines, ut est usus omnium rerū  
 magister, breui permanauit. itaque nunc quidem cuiusque oppi-  
 di uici, pagi; partem habent suorum, qui ei rei student, ut arma-  
 ti, paratiq; sint, nullo ut interposito temporis spatio ad bellum  
 prodire, rei; p. celerem nauare operam possint. hosq; omnes  
 uno nomine milites pro ordinibus appellauerunt: Rex post hæc



Alexandrinus controuersis, quas habebat, cum rep. sine facto, ad iustitiam & æquitatem se se dedit. itaque triremes ad mercatum eò remissæ cum magistratu Veneto, qui Alexandria morā traheret, cumq; legato regio, de quo supra dictum est; cui proficiscenti uestis aurea cum pretiosis pellibus, auriq; libræ decē sunt à Senatu dono data; comitatusq; eius omni indumenta honestiora tradita. Interim à Vincentio Quirino legato, quem ad Maximilianum patres miserant, acceptis sæpe literis significabatur; Maximilianum spreta, quam superiore anno fecerat cum rege Gallorum, pace, neglectisq; fœderibus, quibus illum non stitisse conquerebatur, de Germaniæ consilio statuisse, in Italiam cum exercitu accedere ad speciem, ut tuto Romam se conferret, re, ut Mediolani regno illum eiiceret. Senatus nouis equitatus & pedatus copiis munire remp. decreuit. itaque præfecti sunt equitū adlecti quāplures, in iis Vitellius Tifernas, & Guidus Vainus è Corneli Foro cum militibus sexcentis, equitibus quinquaginta ambo; Iacobusq; Siccus è Gallia Cisalpina, & Lucius Maluetius Bononiensis, cum turma equitum uterq; grauioris armaturæ centum. tum, ut milites numero ad decem millia conscriberentur, latum, qui sub tribunis, & centurionibus in castris uersarentur, quiq; per oppida præsidii causa disponderentur, ad quinque millia. equites etiam leuioris armaturæ tercentum quadraginta Nauplia & Zacyntho accersiti urbano in litore, quo appulerant, à magistratibus lustrati stipendio accepto se Taurisum contulerunt. his rebus confectis, Maximiliani legati tres ad urbem ueniunt postulatum: propterea quòd rex eorum iter haberet: nullum aliud; uti Romam, quò eundum illi erat, per fines reipub. regere exercituiq; regio itineris faciendi Senatus facultatem daret: recipere Maximilianum, fidemq; suam in eo interponere, se se sine maleficio, atque iniuria per eos fines iter facturum, exercitumq; ducturum. quòd si propter eam, quam haberet respub. cum rege Gallorum, amicitiam, Senatus id se minus recte posse facere existimet: monere patres Maximilianū, atque aperte profiteri, nullam esse in eo rege fidem, nullam constantiam: id se esse sæpenumero expertum: itaque rectius facturum Senatum, si nihil in illo sibi præsidii putet esse constitutum: se se patribus fœdera, quæ pepigerit,



pepigerit, uita sua diligentius seruaturum. ea re ad Senatum re-  
 lata, cum plures sententiæ dicerentur; essentq; non nulli ex magi-  
 stratibus & principibus ciuitatis, qui Maximiliano credi oportere  
 contenderent: uicit tamen ea sententia, quæ, legatis in hunc  
 modum uti responderetur, censuit: Si Maximilianus pacate si-  
 neq; exercitu uelit iter facere; reimp. ei, quod peteret, libentissi-  
 me concessuram; legatosq; missuram, qui illum exciperent, om-  
 nibusq; honoribus prosequerentur: sin cum exercitu proficiscatur;  
 à pace, quam cum rege Gallo habeat, non posse discedere Se-  
 natum sine perfidiæ crimine: itaque nihil ei permissurum. atque  
 his ipsis nondum ab urbe profectis legatis, Gallorum rex nouā  
 legationem ad Senatum misit, mentem ac uoluntatem reipub. si  
 Maximilianus ei bellū inferat, sciscitatum. magno enim timore  
 afficiebatur, propterea quod fama uulgauerat, Germaniæ po-  
 pulos Maximiliano ingentes copias subministraturos; ne ab eo  
 tanta in re tam unanimi illarum nationum consensu patres per-  
 territi deficerent, aliorum mores hominum, ut plerūque fit, suo-  
 rum morum modio, atque consuetudine metiens. Senatus autē  
 omnes reip. facultates legatis ad regem defendendum est pollici-  
 tus: quæq; Maximiliani legati à rep. petiissent, quod ad illa re-  
 sponsum habuissent, amico eis animo aperuit. Patres post hæc ue-  
 nientē ad urbem Nicolaum Vrsinum Imperatorem ab ipsis ac-  
 cerfitum, ut cum eo, & Liuiano, & Carraciolo, qui utrique ius-  
 su eorum uenerant, de bello consilium caperent, ei obuiam in  
 nauī Bucentauro profecti ciuitate circumuecta exceperunt: inse-  
 quentibusq; diebus, quibus in locis Maximiliano, quāq; ante diē  
 copiæ reip. essent opponendæ, unā cum his constituerunt: eosq;  
 è uestigio reuerti, & quam quisque partem reip. finium tuendam  
 suscepisset, ad eam illum contendere iusserunt. certiores enim fa-  
 cti tractari arma in Maximiliani finibus, militesq; pluribus in lo-  
 cis cogi, nihil sibi reliqui ad exercitum comparandum, copiasq;  
 partiendas fecerunt, ut in tempore occurri posset. Vbi Maxi-  
 lianus de legatis suis cognouit, nolle Senatum ei armato per fines  
 reip. iter dare; Vincentium Quirinum ab se dimisit. profectus  
 ille cum in primis reip. finibus subsedisset, ne iniussu patrum pro-  
 prius accederet; Senatu permittente domum rediit. patres tametsi



Decembri appetente mense multis uerisimile non fieret Maximilianum alpes esse cum exercitu traiecturum, tamē Georgio Emo legato ab Senatu declarato, qui in fines Veronēsiū cum copiis accederet, eo se ab latere celeriter munire decreuerunt: praesertim quod intelligebant, Germanorum militum certam iam manum aduētare, ut illis ex alpibus se demitteret. quae quidem manus neque dum munitis itineribus, & saltibus facile traiecit, sine ullo tamen reipub. maleficio, pacataq; in Mantuanorum se fines contulit. ii erant milites circiter mille ducenti. paucisq; post diebus cum nullo accepto in Italia stipendio domum redire statuis-  
sent; Emusq; interea legatus exercitu adducto itinera clausisset: ut reuerti eius uoluntate sibi liceret, ab eo petiuerunt. ille armis depositis iter facere iussit. sed cum iisdem in locis atque in Vicetiorum saltibus anno insequente inito Germani saepenumero se ostendissent, ut in fines reip. irrumperent: omnino neque in eo perfecerunt quicquā ipsi: neque à Venetis ulla est res paulo illustrior gesta: neque oppidum quodpiam nobilius captum, aut caedes aut fuga hostium memorabilior facta: tametsi Aloisius rex, qui saepe Senatum per legatos oratione magnifica confirmauerat, se se eum nunquam deserturum, ipsum etiam, si necesse sit, reip. auxilio uenturum, Triultium cum copiis in castra Veneta misisset; & Senatus Andreā Gritum legatum magna cum manu eodem accedere iussisset. nam cum duos uno tempore legatos Senatus creauisset, Gritum & Georgium Cornelium, ut alter in Rhetos, alter in Carnos proficisceretur: (inde enim etiam in reip. ditionem uelle perumpere Germanos literis nunciisq; afferebatur) iis uti sorte imperia partirentur, patres permiserunt. ita Gritto Rheti, Cornelio Carni prouincia obtigit. atque in Rhetis quidem hunc unum res euentum habuerunt, ut repressi, & repulsi saepe hostes ex reip. ditione atque imperio nullum sibi iter patefecerint, nihil omnino ceperint, amiserint autem potius ultimis belli diebus montanum oppidulum Agrestam. at in Carnis, quā nihilo secius Germani aditum in reip. fines tentauerant, Lianus, qui exercitui praerat, & Cornelius legatus, rem sane publicam nauiter atque feliciter gesserunt. nam cum mense Februarii rumor increbuisse, hostium non paruam coactam in Carnis ma-  
num



num eo ab latere bellum illaturam aduentare; Daniel Dandulus Feltriam à Senatu missus est rebus, quæ ex usu essent, procurandis, comineatuq; exercitui, qui eò uenturus erat, durissimo anni tempore locis impeditissimis subministrando. Gradiscas quoque castellum apud Sontium flumen arte atque opere communitum Iustinianus Maurocenus Senatu iubente iisdem cum mandatis est profectus. tum Cornelius & Liuianus Bassiano in alpium radicibus ad Medoaci ripam sito, quod ad oppidum multis è reip. finibus exercitum cgebant, iussi cum copiis ad Germanos repri-mendos contendere. interim repentino hostiũ aduentu, qui per deuia asperaq; alpium iuga, præcipitesq; decliuitates ferratis pedibus iter confecerant, Centurionem cum militibus sexaginta Clusæ pagi angustias seruantem profugisse, Cadorasq; oppidulum ad flumen Plauim, quod ab Clusa quinque millia passuum abest, una cum arce, & Petro Ghisio prætore in hostium uenisse potestatem nuntiatur. ea intellecta re in castris Liuianus celeritate adhibita cum duobus familiaribus ad uicina hostibus loca se se contulit speculatum, relicto Cornelio, qui cum copiis paratioribus diurnis nocturnisq; itineribus subsequeretur. in urbe Donatus Legius à Senatu lectus est, qui Ciuidale Carnicum contenderet, daretq; operam ne quid incommodi resp. eo in oppido acciperet. in Foroiulien-sibus autem Hieronymus Saornianus, de quo supra cõmemorauimus, uir egregia fide atq; uirtute, princepsq; ciuitatis, primo paucis cum equitibus è sua familia ad eos fines est profectus, quibus in finibus hostes impressionem fecerant; magnaq; celeriter auxilia reip. conuentura confirmans, earum regionum incolas labentes iam, ad imperataq; Maximiliani facienda pronos, in officio continuit. deinde coactis hominum duobus millibus quingentis, equitatu etiam addito, iter impeditissimum faciebat, ut contra hostes cum legato exercituq; reip. illa cum manu se coniungeret. Dum hæc agitentur, Lucas Renaldius Maximiliani legatus ad Senatum uenit illud idem postulat, de quo antea sæpe rex egerat, iter Romam per fines reip. repetens: regem suum propterea uelle armatum incedere, quod se tutum ab suis hostibus aliter fore non confidebat: reipub. nihil ab eo nocitum iri, omnibus illum modis confirmaturum, uel Se



natus obsides ei daret, nociturum esse illi neminem: hoc si præstet, sine armis regem iturum. Ad hæc Lauredanus respondit: scire regem, quam propensa semper fuerit reipub. erga Federicum imperatorem patrem suum seq; ipsum uoluntas: quo magis indignum esse, bellum ab eo inferri nõ unis reipub. sinibus, prædas abigi, castella expugnari. de eo se maximopere conqueri, deosq; testes adhibere, non esse ita de rege meritam remp. sed rem se ad Senatum relaturum, deq; eius sententia respõsurum. nam quod à Cornelio literæ uenerant, confidere Liuianum, propeq; recipere, hostes sibi pœnas cito daturos; patres respondendi Maximiliani legato tempus interponere uolebant, dum à Carnis aliquid confecti afferretur. legato autem socii sunt atque custodes dati, ne quis cum alloqui posset, cui patres id non permisissent. Liuianus adductis ad se militibus mille octingentis, quorum erat dux Petrus Montius, uir magna uirtute; equitibusq; leuis armaturæ ex Epiro propè ducentis, quibus præerant Palæologus & Busichius; tum ex iis, qui sagittis utebantur, alteris ferè totidem; grauiorisq; armaturæ ex ipsius & reliquorum turmis paulo plus ducentis; Saorniani literis ac nuntiis de locorum situ, de hostium numero, deq; belli rationibus admonitus, qui quidem iam aduentabat, atque ab altera montis parte in trium pontiũ loco Germanos obseruare, eisq; occurrere statuerat; prima luce hostes aggredi constituit. is erat Martii Calendarum dies. sed propterea quod nix ea nocte plurima ceciderat, prælium in aliam reiectum est diem: quod quidem secundissimum postridie fuit. nam cum Germani, redeundi domum itineribus præseptis ad se ueniri certiores facti, ne intercluderentur, Venetos aggredi uiamq; ferro sibi ipsi aperire statuissent, atque in editiorem proximæ uallis partem cum impedimentis, & tormentis se collegissent numero ad duo millia quingenti, ut è loco superiore in Venetos subeuntes impetum facerent: (erant autem è Maximiliani comitatu, quâplurimis centurionibus uiris fortibus interiectis) ipse acie instructa per niues rectâ progressus prælium audacissime commisit: eosq; primo fortiter pugnantes, post impedimentis exutos, tormentisq; abreptis, desperatis rebus non magnopere resistentes concidit, præter illos, qui proiectis armis pacem suppliciter petiuerunt. pauci



pauci fuga in montes elapsi, ab Epirotis equitibus eūdem casum subierunt; capitaq; sunt eorum in castra relata, pro quibus singulis Liuianus pecuniam pollicitus interfectoꝝ fuerat. ex Venetis desiderati sunt sanè pauci. nocte ea quæ secuta est, exercitui ad quietem data, Liuianus ad Germanos, qui arcem Cadorarum custodiebant, amplius sexaginta misit, imperans uti arcem traderent. ii trium dierum spatium ad eam rem sibi dari petiuerunt. Liuianus eorum postulatione reiecta ad arcē expugnandam est profectus. quam cum diem totum omni missilium genere, tormentisq; in aduerso iugo positis continenter oppugnauiſſet; magnāq; propugnatorum partem interfecisset, muro etiam propugnaculi subrupto: reliqui postridie deditiōem fecerunt. in ea oppugnatione Carolus Malatesta adolescens, saxo ab arce percussus, cum nonnullis uiris fortibus interiit. captiui, qui arcem tradiderant, unā cum prioribus dedititiis, omnes quingenti armis cæterisq; rebus exuti Liuiani permissu domum redierunt. Harum rerum primis in urbe nuntiis acceptis, idem est responsum legato Maximiliani à Senatu datum, quod superioribus legatis patres antea dederant: neque quicquam cum illo de cæde Germanorum communicatum. ac, ne quid ei redeunti ab armatis in Rhetico noceretur, comites sunt ducesq; itineris per fines reip. attributi. Vbi ex literis Cornelii legati de prælio, deq; arcis expugnatione singula ordine ciuitas intellexit; Liuianiq; & consilium, & celeritas, & uirtus laudari uocibus omnium cæpit: patres, ut & illius animū alacriorem in posterum ad belli munia redderent, honorum insignibus, & magnitudine præmiorum excitatum, & reliquorum uoluntates accenderent ad bene de rep. promerendum, cum uiderent fortes industriosq; uiros ab ea fieri plurimi; præfecturā omnium reip. copiarum Liuiano detulerunt. ea est amplissima post imperatoris nomen dignitas, quæ pro eorum meritis ab Senatu militaribus uiris tribui consueuit. auctusq; est equitū illius numerus, qui erat sexcentorum, ad integrum mille. auctum quoque stipendium ab auri libris centum quinquaginta ad tercentenas libras, tum decem in præsentia dono datæ cum iis tormentis bellicis, quæ hostes è Germania secum attulerant, quæq; ipse ob rei bene gestæ memoriam à patribus sibi dari cupere in sermonibus



cum legato habitis ostenderat: Caroli autem Malatestæ uxori ac duobus liberis infantibus illa ipsa pensio annua, qua is uiuens à rep. donatus fruebatur, in uictum tradita. deinde cum patribus nunciatum esset, à Maximiliano copias in Carnis comparari, tū incursiones in reip. ditionem à Goritianis fieri, quod est oppidū in monte ultra Sontium flumen situm: Senatusconsultum factū est, ut milites ter mille celeriter conscriberentur, atque ad legatum mitterentur. ceterum quod erant plerique magistratus, qui bellum inferri Maximiliano censebant oportere, atque in eius fines exercitum introduci uolebant, Dominicus Maurocenus templi Marci procurator, uir re atque cognomine sapiens, ætate ualde proclinata, erat enim annos natus nonaginta, patres monere, ac rogare cœpit, ne id fieri permitterent: Germaniæ ciuitates, quæ liberae suiq; iuris essent, ægre ferre à Maximiliano arma contra rep. exerceri, cum pace frui possit: eas easdem, si ei bellum inferatur, moleste id laturas, neque passuras sui regis nomē dignitatemq; conuelli ac proteri: non magnas esse ab illo iniurias in reip. illatas, de iis tamen deorum inuortalium benigntate pœnas ipsum reip. dedisse, omnem illam in Carnis manum concisam deletamq; esse, Cadoras Clusamq; recepta, in Rhetis nihil amissum, neque ullam contumeliam acceptam: quod si eo contenti, inquit, erimus, magnum nos fructum continentiae laturos, Germaniæ totius beniuolentiam: quæ quidem certe Germania com meatibus asportandis, mercibusq; recipiendis, & rerum plurimarum communicatione ita est coniuncta nobiscum & con sociata, ut magni inde prouentus in reip. portorii nomine, magnæ priuatim utilitates in omne genus ciuium inferantur. laudabile profecto esse hostes bello superare, propagare imperii fines: multo autē laudabilius seipso continere ac uincere, iustitiæ, moderationis, grauitatis opinionem apud omnes homines auxisse lateq; promouisse. bellorum euentus à fortuna plerunque administrari, quæ fluxa atque incerta sit: prudentiæ consilia stabilem habere exitum, semperq; plus proficere constantia & maturitate, quā illa impetu usum ex se se præbuerint. Hæc cum senex sapiens dixisset, ardor ille magistratuum ab bellum gerendum parumper restinctus est. itaque nihil latum, nisi uti ea de re patres amplius consulerentur,



consulerentur. Alfonsus post hæc Ferrariensium dux ad urbem familiariter se contulit patribus purgatum, quod suspectus eis fuerat literas nuntiosq; ad Maximilianum misisse societatem ineundi, seq; cum illo coniungendi causa, confirmans nihil se unquam eiusmodi cogitavisse; cupere autem & statuisse, una cum rep. omnem fortunam experiri; neque ullo tempore à Senatus auctoritate uelle recedere. Patres eam orationem auribus liberrimis acceperunt: collaudatumq;, atque ut omnia summæ benivolentiæ officia à Senatu expectaret, confirmatum, domum remiserunt. Interim nulla in Rhetico belli cessatione à Maximiliano fieri cognita, in Carnis milites non unis in locis cogi rumore nuntiisq; afferentibus, Senatus suam in illum lenitatem frustra adhibitam sentiens, pridie nonarum Aprilium constituit; uti bellum omnibus à partibus Maximiliani finibus inferretur. itaque non legatis modo Gritto & Cornelio id Senatusconsultum celeriter est missum: sed omnino etiam Hieronymo Contareno, qui cum classe aliquot triremium legatus in Istris tunc erat, literæ sunt à Senatu datæ; uti maritima Maximiliani oppida, quæ uellet, aggredi capereq; conaretur: se alias paucis diebus triremes ad illum missurum. Senatusconsulto ad Cornelium perlato, uoluntateq; ciuitatis Liuiano reliquisq; principibus declarata, magnum iis studiū, magna omni exercitui alacritas innata est belligerendi. quam ob rem tormentis muralibus adductis, quod oppidum Cormonse citra Sontium flumen natura atque arte communitum, monti enim impositum muro præalto cingebatur, opportunum hostibus receptum dabat, omnibus ad id copiis accesserunt; magnaq; ui aggressi, deiecta muri parte, celeriter cepērunt. quod cum diriperetur, Cornelius mulieres omnes uno in templo compulsa ab iniuria militum defendit: suppellectilemq; sacra ipsi ab adytis abreptam fanis, & sacerdotibus restituit. inde ad arcem expugnadam eodem impetu cum perrexissent, ac tormētis quaterre cœpissent; à propugnatoribus deditio est facta. ea intellecta re tria se castella sponte legato dediderunt. Portus autem Naonis ciuitas legatos de deditioe ad Senatū misit. eos legatos liberali oratione patres prosequuti ad Cornelium reiecerunt, ut cū illo agerent, cui ea omnia mandauerat Senatus. Cor-



nelius, cum ad illum legati uenissent, oppidum in fidem deditio-  
nemque accepit. eodem tempore Lucas Renaldius à Maximiliano  
ad urbem remissus cum tabellis regis manu subscriptis patres  
adiit: quibus in tabellis certas Maximilianus indutiarum condi-  
tiones reip. proponebat. quarum erat una, ut annuas secum in-  
dutias Senatus faceret, quo tempore de suis cum Gallorum rege  
controuersis in cōmuni Germaniæ concilio disceptari & cogno-  
sci posset. eas patres indutias legato se se paratos esse facere di-  
xerunt, dum eadem indutiarum conditione fœderati reip. inclu-  
dantur: neque enim sine iis quicquam posse conficere Senatum.  
Renaldius his cum mandatis tātum discesserat, cum, maioribus  
comitiis haberi cœptis, literæ nuntiiq; à Cornelio uenerunt, qui  
dicerent: posteaquam ponte, quem hostes resciderant, in Son-  
tio flumine celeriter confecto, exercituq; traducto, Goritianos  
duabus maximis uno die impressionibus Liuianus oppugna-  
uisset, qua in oppugnatione centum milites amisisset, uelletq;  
postero die acrius uehementiusq; idem facere, oppidanos perter-  
ritos se se ei dedidisse. eæ literæ, antequā suffragia inirentur, co-  
mitiis recitatae sunt: magnaq; ab iis gratulatio patribus est facta.  
erat in oppido arx, quam milites ducenti custodiebant. ii cum  
pulvere ad tormenta exercenda carerent, neque se arcem tueri  
posse sine iis confiderent; pro eis armamentis reliquoq; commea-  
tu libras auri quadraginta sibi datum iri fide accepta, quadriduo  
intermisso arcem tradiderunt. ante quos quidem dies Belgradū  
facta deditione legati præfectum introduxit; itemq; Vipaum, ad-  
modum elegans & ipsum oppidulum; quod abest ab Goritia  
millia passuum uiginti lapidas uersus. Contarenus quatuor trire-  
mibus Tergestinos magno animo aggressus, quarum erant duæ  
medii inter bellicas generis atque eas triremes quibus ad merca-  
turam ciuitas utitur, quas Nothas appellabant; muros tormen-  
tis deiicere instituit, qua parte mari oppidum alluitur. ea tormen-  
ta eiusmodi tum erant, ut ex ære tota confecta pedes uicenos bi-  
nos in longitudinem protenderentur; acclinataq; in priore nauis  
parte sic, ut cauda malo proxima ore proram contingerent, pilæ  
ferream librarum centum, si nihil impediret, bis mille atque octin-  
gentorum passuum spatium impellebant: itaque muris uicina  
uehementi



uehementi eos impetu concutiebant. id tormenti genus basiliū appellabatur: neque sustineri propter pondus, nisi à magnis triremibus, aut à nothis poterat: duasq; in partes diuisum, ut tractari facilius posset, collectione inter se mutua circūuolutum ita introrsus conglutinabatur, ut esse unum, & continens uideretur, nihilq; aeris per spiras admitteret. ea instituta oppugnatione Duinum maritimum castellum deditur: quatuorq; triremes eiusdē, quo priores, generis missā à patribus Contareni classem duplicauerunt: Senatusq; ad Cornelium scripsit, si ei è repub. esse uideretur, cum exercitu ad Tergeste oppugnādum accederet. Cornelius ea de re Liuium consuluit: ille Contareni conatus terrestribus adiuuandos esse copiis magnopere existimans, cum tormentis muralibus, quæ mari deportanda curauerat, celeriter eò uenit; atque ad Contarenum primum omnium nauicula perlatus, belli consiliis cum illo communicatis, ad muros oppidi omnibus à terræ partibus demoliendos rediit. Inter hæc, propterea quod Aloisius Galliarum rex ualde se cupere ostenderat, ut in eodē, quod secum & cum rep. fœdus intercedebat, Ferdinandus rex Hispaniæ particeps esset; nouaq; cum illo societas, iisdem tamen legibus, institueretur: res agitari cœpta hanc difficultatem habuit, ut, quoniam Senatu longum atque impeditum uidebatur id, quod in priore fœdere erat, se nullam pacis conditionem, quæ plerunque in paruis temporum momentis existeret, posse à suis hostibus accipere, nisi prius, dum eant in Hispaniam tabellarii, dūq; redeant expectarit, caput illud patres ita refici censebant oportere, uti qui pacem facere uellet, sociorum modo nomina infereret fœderi scribendo; ne multorum dierum itinere literis mitteredis, & responsis præstolandis occasionem pacis amitteret. uerū tamen, ut id regum uoluntate fieret, tempus intermitteri placuit, dū id sciri posset. itaque fœderis confectio in alium reiecta est diē. Contareni classe aucta, ad quem etiam naues duas tectas patres miserant, quæ muris se subiicere auderent; iis ab eo latere oppidi maiore multo impetu percussis, ædificiisq; nonnullis intra urbē dirutis; Liuius parte altera perforatis deiectisq; oppidi mœnibus tormentorum impulsione non intermissa, Tergestinos ad deditionem compulerunt. itaque pridie Non. Maias unā cum ar-



ce oppidum receptum est nulla conditione interposita, nisi ut militibus, qui oppidum atque arcem custodierant, recedere armatis liceret. oppidani, ne diriperentur, libris auri centum quinquaginta exercitui persolvendis se suaque omnia redemerunt, Liuiano & legatis procurantibus, quibus erat oppidum nobile diripi permolesum. eius rei literarum letitia & gratulatione ciuitatem impleuerunt. Liuianus, Cornelius, Contarenus omnium ordinum studiis certatim laudati, quod tantam rem tam celeriter confecissent, magnam sunt ex eo uirtutis, atque industriae gloriam consequuti. atque iis statim literae à Senatu datae sunt, in eam cogitationem incumberent, ut Pisinum, Flumenque, Maximiliani oppida, sub reipublicae imperium redigerentur. quorum alterum mediterraneum est, abestque à litore millia passuum XVI. multoque maximam inter Istros habet auctoritatem: Flumen ad mare positum plurimarum rerum copiam subministrat, estque illis gentibus & regionibus opportunissimum. praetor etiam Tergestinis declaratus Franciscus Capellus; arcis praefectus, Aloisius Zanes; Vipao, qui utrumque munus exerceret, Marcus Antonius Erizus; qui Duino, Nicolaus Balbus; qui Cormonsi, Troianus Bonus; paulo post ad magistratus obeundos in prouinciam abierunt; cum antea Dominicum Gritum, qui arcem custodiret, Senatus Goritiam misisset. nam oppido Iustinianus Maurocenus à legato datus praerant. Senatus consulto accepto cum Pisinum, quod est in monte tribus à partibus ualde praecipiti situm, Contarenus classarios suos, & Liuiani equitatus peditatusque magnam partem cum tormentis adduceret: castello Treuisa, quod est in uia quinque millia passuum à Pisisno, seque magno animo ad defensionem comparauerat, uicaciter, atque direpto, omnes celeriter ad Pisinenses oppugnandos contenderunt: tormentisque prima uesperis positae eam muri partem, quae una ex quatuor adiri poterat, uelle delicere coeperunt. id cum mane postero die acrius continentiusque fecissent; ac portae turrim prope aperuissent: oppidani una salutis conditione impetrata deditionem fecerunt. in eius oppidi finibus castella erant decem septem: quorum sexdecim sub reipublicae ditionem sunt redacta. at cum Vipaum indiligentius custoditum hostes recuperauissent; praefectumque cepissent: Vipenses postea, missis eo militibus,



tibus ; iterum capti ac direpti sunt . præsidio Pifinensibus relicto Contarenus ad Fanatici sinus insulas se contulit ; atque ex Apforro Crespa Vegio reliquisq; plus mille armatis hominibus naues longas conscendere iussis ad Flumen oppugnandum rediit : cūq; mille passus ab oppido abesset , qui oppidanos uti se dedērēt postularēt misit : si se cingi ab exercitu sinerent , quem postridie affuturum confirmabat , non fore liberam se dedendi potestatem . id cum illi magnopere timerent , pacti ne quid ex suis rebus amitterent , eo die Contarenum intromiserunt . ea confecta re , quod erat oppidum mediterraneum illis in finibus nō postremæ apud Istros auctoritatis Postoina , Cornelius & Liuianus eō exercitum conuerterunt , atque ad uicinos ei oppido pagos equites lenis armaturæ plus ducentos præmiserunt . illi præda passim abacta nullis è Postoina exire ausis , cuius ad muros incurfionem fecerant , in uico se se proximo receperunt . ibi cum noctu armis positis sine uigiliis quieti se dedissent , hostes Postoina silentio emissi equites circiter centum quinquaginta , quorum erant Duces Bernardinus Rainicher oppidi præfectus , & Chrystophorus Friapanes homo ferox acerq; eos inopinātes aggressi partim interfecerunt , partim ceperunt : paucos in fugam coniectos noctis umbra occuluit . ea re nūtiata Liuianus maiore hostium numerū ueritus unā cum legato Goritiā exercitum reduxit . hostibus eo successu elatis , castellisq; omnibus , quæ circum se amiserant , nisi ad se redirent , bellum & direptionē denuntiantibus , magnus est ab iis concursus ad legatum factus , orantibus uti se tueretur , neque diripi , propterea quod se reip. dedidissent , sineret . quam ob rem nō paruo armatorum hominum numero in Foroiuliensibus celeriter imperato , atque ad se adducto , Cornelius ad Postoinam oppugnandam est profectus . eo itinere nondum confecto , iidem illi hostes Postoina egressi , ad Premium municipium , quod est in Tergestinorum finibus , animati , armatiq; id ut caperent , atque diriperent , accesserunt . quod cum se magno animo defenderet ; forte fortuna ignis tormentorum puluere succenso omnem locum , atque arcē , qua ex arce propugnabatur , ita corripuit , itaq; fœdauit , ut Ludouicus Contarenus præfectus , Hieronymusq; Saornianus , qui omnibus illis in rebus totoq; bello egregiam



operam reip. nauauerat, Premiumq; tunc propè unus defendebat; ne comburerentur, aut fumo necarentur, se se hostibus dediderint. legato post hæc & Liuiano Postoinam cum pleno exercitu accedentibus, tormētisq; positis, ubi ea murum quaterere cœperunt; Rainicher præfectus, ne diriperetur, se atque oppidum tradidit. cui statim comites dati, qui illum abeuntem in tuto fierent. Dum hæc in Istris geruntur; Pauli Lictestenii suasu, prudentis in primis hominis, & recti, ac temperati uiri, qui magna erat apud Maximilianum regem gratia, atque ab eo impetrauerat, ut se ad pacem cum rep. conuerteret, Tridentinorum Episcopus Senatum per literas certiore facit, cupere Maximilianum indutias cum rep. facere. quod si nunc eadem est ei mens, quæ paulo antea fuit; mittat aliquem, qui cum ipse regis nomine agere, quæ tractanda erunt, possit. Senatus ea intellecta re Zachariam Contarenum legauit, qui eò dandis indutiis proficisceretur. Contarenus cum in Rhetos uenisset, cū Episcopo, tribusq; uiris principibus, quibus omnino quatuor eam rem mandauerat Maximiliani iussu Lictestenius, in regis, & reip. finium loco medio colloquutus, causam satis quidem perplexam, atque difficilem Gritti legati consiliis explicuit, ut uellent illi trium annorum indutias cum rep. facere cūq; eius fœderatis Galliæ Hispaniæq; regibus, atque iis, qui in Italia socii aut ipsius, aut illorum regum essent. nam cum transalpinis uti facerent, adduci nullo modo potuerunt. id cum Senatus cognouisset; adhibitis regum legatis quæsiuit, num id illis caput placeret. quibus annuentibus, facultate sic conficiendi per literas celeriter ei missa Contarenus octauo Idus Iunias indutiis triennialibus cum rege factis scribendo affuit reip. nomine. quod quidem gratissimum Senatui fuit: qui pacem, quàm bellum, & onerum uacationem dari ciuibus, quàm ab iis tributa exigere quotidie, malebat. tum illud etiam uerebatur, ne, si Maximiliani oppida capi, ac diripi sentiens frenum Germania momordisset, tam forti nationi, tantæq; multitudini resisti ab se se, & illarum gentium ferocissimarum bellum resp. defendere, sustinereq; non posset. Erant in Rhetico exercitu Ioannes Iacobus Triultius, ut supra dictum est, & Giufredus Carolus consiliariorum Mediolanensium magister, quem præfectus regius Mediolano



110

Mediolano miserat rogatus ab Senatu, ut aliquem regis sui nomine in Rhetis uellet conficiendis indutiis adesse. uterque eas in dutias fieri, nisi prius ea de re ab rege literæ uenissent, noluerat, atque in eo perseverauerat. itaque fœderi scribendo neuter eorum affuit. Triultius postridie eius diei cum suo comitatu Mediolanum abiit. ei Grittus legatus per omnes reip. fines patrum iussu comes fuit, Nonis autem Iuniis, qui dies postridie quàm indutiæ firmarentur fuit; cum Aloisius rex in fœdere, cum Ferdinando rege, cumq; rep. sanciendo id pertinaciter caput inferi uoluerit: se non admonito nullâ omnino pacem fieri posse: uti societas ea lege firmaretur, fœdusq; conficeretur, Senatus tandem censuit. pauloq; post, quoniam indutiis in Rhetico firmatis, Postoinam in Istris oppidum Cornelius legatus ceperat; uti oppidum Postoina Maximiliano restitueretur, idem Senatus petentibus Germanis iussit: interim milites equitesq; e Rhetis, & Carnis in hiberna sunt deducti; oppidaq; capta præfidiis communita; muri eorum, quos tormenta deiecerant, atque arces in meliorem multo formâ uti reficerentur, cura præfectis tradita. quorum omnium ratione habita, oppidorum fines cētum millia passuum in longitudinem patere, Cornelius legatus in Senatu dixit. post quem redeuntem ad urbem Liuianum in Bucentauro naui Lauredanus & patres exceperunt. pauloq; post & Portus Naonis oppidum, & ius comitiorum ei posterisq; eius sunt ob remp. bene gestam dono data. Cornelius etiam illum lautioribus in epulis cum principibus ciuitatis, & fœminarum nobilissimarum choro diem unū domi suæ habuit. Cognitis Aloisius rex indutiis uehementer perturbatus questusq; est cum legato reip. Antonio Condolmerio, non se id ab ea meruisse, ut responso ab se non expectato ullas cum Maximiliano Senatus indutias faceret: nihil ad se, in Italia fœderatos aut amicos illis indutiis esse inclusos, pertinere: unum Menapiorum ducem Maximiliani potentia non obiici se tantummodo uoluissē: id ereptum sibi esse ab rep. à qua iuuari in primis debuerit: sibi tamen auri libras esse paratas decies millies: iis illi auxilio se futurum; neque passurū, ut fœderatorum suorum iniuria opprimi ab ullo possit. ea oratione iracundia suæ impetu apud legatum pronuntiata, cum se id



fecisse pœnituisset, ad tranquillitatem se conuersum postea simul  
lauit, mitioresq; sermones habuit, præsertim cum Antonius le-  
gatus reip. factum excusauisset: Senatum id respexisse, ne Ma-  
ximilianus indutiarum tempore Mediolani res perturbare, atque  
ei molestiam id ob regnum inferre posset: neque cum illo remp.  
ulla alia, nisi ltalarum rerum causa, esse coniunctam, quid enim  
ei cum transalpinis? sed qui iam antea non amico in rempub.  
animo esset, eiusq; secundis rebus magnopere inuideret, facile  
eam ob rem successus clam ad malas cogitationes se se dedit: ta-  
meti suo chyrographo se indutias comprobaturum Antonio le-  
gato confirmauisset. Iisdē ferē diebus, quibus ea intellecta sunt,  
Hieronymi Donati, Petri Marcelli magistratuum Creten-  
sium literis patres cognouerūt tātos terrāmōtus ea in insula fuis-  
se, ut magna ædium & fanorum pars corruerit: ipsorum domos  
in oppido Candia, tum reliquorum propē omnes, quas modo  
tremor solo non æquauerit, ea uitia fecisse, ut lapsuræ iam iamq;  
uideantur: mortuos sub ruinis ad eam diem esse repertos circi-  
ter quadringentos, in quibus sint ex coloniæ nobilitate non pau-  
ci: arcem in Lyctiis deiectam esse: omnes patresfamilias cū uxor-  
ibus & liberis sub dio degere, eius rei periculo perterritos. Huic  
ingenti malo reip. illud etiam est incommodum adiectum, quod  
Contarenus cognomine Camalis, triremium & ipse reip. præfe-  
ctus, dum è Corcyra domum reuerteretur, duabus ex sua classe  
nauib, quarum in una erat ipse, tempestate disiectis, atque in Pi-  
ceni elisis litore, unā cū XL. hominibus periit. itemq; Carratius,  
militum reip. præfectus, homo impiger egregiaq; uirtute, in agro  
Veronensi equo insidens ab homine ciue suo, de quo nihil uere-  
batur, interfectus est gladio renibus infixō. de sicario, quem  
Mantuanorum dux suis in finibus captum magistratui Veronē-  
sium tradiderat, pœna sumpta. is, dum ea de re quæstio habere-  
tur, se propterea Carratium occidisse, quod sibi olim male dixe-  
rit, magistratui confirmauit. tanta est homini in hominem tamq;  
diuturna paruula sæpe de re suscepta iracūdiæ uis & indignatio.  
Sub hac ætatis exitu, quoniā magistratibus comitiis maioribus  
creandis leges iubent, ut ii, quibus id sorte munus obtigerit, ut  
nomen alicuius ciuis ad honores publicos suffragiis prouehendi  
palām



palam edèrent, optimum quēque ciuem renuntient, ac nonnulli, diuites ex ciuibus qui essent, non nihil donarent eis, qui illos ad suffragia legissent, quo prouiores ad eos in posterum renuntiandos fierent: legem decemuiuri tulerunt: qui ciui cuiquam, qui eum ad suffragia legisset, uti magistratus crearetur, pecuniā aut quid aliud ob eam rem dederit, donauerit, qua in insula decemuiuris placebit, exul esto: eo relicto loco captus, fœdiore in urbis carcere uitam producito, ac relinquito: eam pœnam minorem, nisi omnibus ad unum suffragiis, collegium ne facito: qui facere uolet, ei decem auri libræ mulcta esto. Paucisq; post diebus Maximiliani regis consiliarius Ioannes Raublerius, nullo comitatu, secreto ad urbem uenit, Zachariamq; Contarenum adiit, seq; ad illum ab rege missum ostendit, petens, ut, quemadmodum is indutiis conficiendis paulo ante operam dedisset, ita nunc eadē opera uellet efficere, ut aliqua pacis tractatio regem inter, atque remp. iniretur. Contarenus, quæ secum regius interpretes communicauisset, Senatui exposuit. Senatus Paulum Pisanum legit, qui, quæ Raublerius afferret, ab eo Senatus nomine cognosceret. nā Contarenus re exposita Cremonam prætor statim abierat. cum itaque Raublerius cum Pisano ageret, confirmauit uelle regem pacem cum Rep. facere: utq; ea fieret, multis rationibus conatus est suadere. ei Pisanus ostendit, salua fide reipub. cui cum Aloisio rege firma pax esset, id confici non posse: contraq; suadebat eam concordiam, pacemq; ineundam esse, quæ Christianis omnibus communis esset. denique cum Raublerius sibi à patribus responderi peteret, Senatus paucis respondit, illum quidem libenti lætoq; animo exceptum fuisse, tum regis sui causa, quem resp. unice diligeret, atque obseruaret, quemadmodum etiā cunctos illius maiores amauerat, colueratq; , tum ob proprias hominis uirtutes, uerum longe magis ob eam rem, ob quam in primis missus fuerat, ut scilicet de pace, concordiaq; ageretur, quam resp. magis cæteris omnibus rebus semper coluerat, atque hoc tempore multo libentius amplecteretur, si modo omni ex parte ea firma, perpetuaq; constitueretur: id quod facile euenire posse sperabat: nanque exploratum ei erat, Aloisii, itemq; Ferdinandi, Galliar, Hispaniarumq; regum, sibi sociorum animos pronos ad



pacem esse: quamobrem eum hortari, ut regi suo huiusmodi  
pacem persuaderet, quæ Christianis rebus securitatem dignita-  
temq; esset allatura, regi uero ludem, & gloriam sempiternam:  
tempus maxime ad id opportunum esse: ad eam pacem tractan-  
dam omni opera studioq; remp. paratam esse, modo compertum  
sit illam communi regum omnium consensu probari: tunc uero  
constituere, qua ratione, quo uel loco, aut quibus arbitris ea tractā-  
da sit, haud magnum negotium futurum. hunc Raublerii aduen-  
tum responsumq; eidem redditum mādatum fuit Condulmerio  
reip. legato ut Aloisio regi declararet, eademq; cum Albione Fer-  
dinandi apud regem legato communicaret: quæ omnia etiam  
utriusque regis legatis Venetiis agentibus initio declarata fue-  
rant. censuit enim Senatus se legibus amicitiae, fœderisq;, quod cū  
iis regibus percusserat, teneri, ut ea faceret. illa quoque ratio huc  
accedebat, ut scilicet regum animos ad tuendam pacem magis  
firmos Senatus redderet. Interim, è Flaminia Petrus Landus Fauē-  
tiae magistratus Senatui significauit, Franciscum Mariam Metau-  
rensiū ducem Iulii Pontificis Max. copias proximis in finibus  
coegisse lustrandi exercitum, ut aiebat, causa: itemq; Florenti-  
nos mandauisse; uti sub eorum ditione quilibet paterfamilias,  
aut omnino quæq; domus hominē unum armatum legato ipso-  
rum mitteret certum ad locum, ubi essent milites recēsendi: ne-  
que, cur id fieret, proponebatur: itaque darent patres operam, ut  
Fauentia communitior fieret, ne quid incommodi resp. si quid  
Iulius contra eam moliatur, accipiat. patres iis acceptis nuntiis  
pecuniam ad milites legendos Petro Lando celeriter mittēdam,  
Lactantiumq; Bergomatem, qui se Carnico Istricoq; bello for-  
titer, atque amanter gesserat, omnibus militibus, quos ibi esse  
resp. iuberet, præponendum censuerunt. equites quoque utrius-  
que armaturæ non pauci cum præfectis Fauentiā ē uestigio con-  
tendere sunt iussi. non me piget inter hæc eiusdem temporis rem  
dignam propter nouitatem, quæ legentibus nota sit, scribere. na-  
uis Gallica dum in oceano iter non longe à Britannia faceret, na-  
uiculā ex mediis abscissis uiminibus arborumq; libro solido con-  
tectis ædificatam cepit: in qua homines erant septem mediocri  
statura, colore subobsuro, lato, & patente uultu, cicatriceq;  
una



una uiolacea signato . hi uestem habebant è piscium corio , maculis cam uariantibus . coronam è culmo pictam septem quasi auriculis intexam gerebant . carne uescebantur cruda , sanguinèq; uti nos uinum bibebant . eorum sermo intelligi non poterat . ex iis sex inortem obierunt : unus adolescens in Aulercos , ubi rex erat , uiuus est perductus . Aloisius rex , cupidus imperii sui fines in Italia propagare ; intelligensq; id se consequi non posse , nisi prius sibi Maximilianum adiungeret ; quo cum dissidebat ; neque , quibus illum artibus multis infensum ueteribus recentibusq; iniuriis sibi amicum facere posset , omnia cogitans reperiebat : iis rebus ab legato cognitis , quæ patres à Raublerio acceperant ; ratusq; eam optimam esse occasionem Maximiliani animum sibi conciliandi , ad eum legatos misit , qui , ut illum in remp. accenderent , ei declararent , se quidem ab legato reip. edoctum fuisse omnibus de rebus , quas Raublerius ad eam attulisset , omniaq; consilia sibi patefacta : ex quibus Maximilianus , quantum huiuscemodi hominibus credendum esset , qui illum tam aperte despicerent , ac , quo erga eum animo iidem essent , facile cognoscere posset . totumq; hoc factum rex ex animi sui libidine composuit , auxitq; . neque ipsum cogitatio fefellit . nam ubi ea Maximilianus ab rege excepit , iis omnibus fidem plane adhibens , perinde ac si uera fuissent , magnopere exarsit , atque animum , quem in remp. beneuolum ad eam diem semper habuerat , his rebus commotus ad Aloisium transtulit . id cum Aloisius cognouisset ; magnis illum pollicitationibus , atque illecebris quotidie captum fouens , agere cum Iulio Pont. Max. & cum Ferdinando rege cœpit , quos quidem oppidorum , quæ resp. ex eorum ditione in Flaminia , atque Apulia obtinebat , recuperandorum cupiditate alterum magnopere teneri sciebat , alterum pro animi sui motu , ac propensione duci uehementer existimabat ( nam Ferdinandus ipse nullam eius rei ostensionem fecerat ) uti secum & cum Maximiliano contra Venetos fœdere inito bellum sumerent . quanquam sunt , qui affirmant , agitatum de eo ab Aloisio multo antea cum utroque fuisset , & cum Ferdinando quidem eo maxime tēpore , quo ei Neapoli classe in Hispaniam redeunti Aloisius in Liguria obuiam se obtulit , diesq; aliquot cum illo fuit . utcunque autem illud ceci-



derit . ea re ab neutro repudiata , Alberto Pio , homine uafro , calli-  
doq; , & qui Carpis oppido circumpadano eiectus , quod heredi-  
tario iure ad se spectare dictitabat , ad Aloisium regem auxilii pe-  
tendi causa se contulerat , Gallicas partes fouente , ac magnope-  
re adnitente , propterea quod , si res ad exitum perduceretur , se se  
domum reditum confidebat ; inter eos omnes fœdus est per-  
cussum ultimis octobris diebus apud Cameracum Belgarum op-  
pidum : quo in oppido Margarita Maximiliani filia , quam Ca-  
rolus Gallorum rex repudiauerat , cælebs eas nationes regebat ,  
eiq; rei omne studium adhibuerat . tamen non paruum etiam  
operam in eo nauauerat Georgius Ambosius Cardinalis Roto-  
magenfis Aloisii legatus : qui , quod Romæ comitiis Pontificali-  
bus Alexandri sexti morte præteritus eam repulsam reipub. ac-  
ceptam referebat , eximio erat in illam odio : & Nicolaus Frisius ,  
homo Germanus , Italis imbutus moribus , Maximiliano per fa-  
miliaris : qui ad utrosque non semel uentitauerat cum mandatis ;  
fœderiq; demum feriendo affuit Maximiliani nomine . fœderis  
lex præter cætera fuit ; uti omnes uno tempore reipub. bellum  
inferrent : quo si Veneti bello uicti essent ; quæ ab iis ultra Vero-  
næ urbis fines ditione tenebantur , Gallorum regi cederent : Ve-  
rona , quæq; ab ea usque ad mare Adriaticum pertingunt , Maxi-  
miliano : Flaminia oppida , quæ reip. tunc essent , Iulius , Apulia  
Ferdinandus obtineret . tanta uero fuit Gallorum regis cura , ne  
quid eorum , quæ in concilio statuissent , enuntiaretur ; ut diu ni-  
hil certi resciri potuerit ; Aloisiusq; ipse Antonio reip. legato ab  
eo societatis iure quærenti ecquodnam Cameraci fœdus per-  
cussisset , affirmans dixerit , se amicum reipub. esse , neque quic-  
quam fieri contra illius dignitatem permisisset ; Antoniusq; Se-  
natui scripserit , nihil omnino actum , quod reipub. nocere pos-  
set , fidem sibi regem suam non semel interposuisse . erat Me-  
diolani reipub. nomine Ioannes Iacobus Caroldius Senatus  
scriba : cui fidem regii ministri sæpe fecerant , dum in concilium  
ab legatis iretur , deq; ea re sermo frequens esset , regem omnino  
nunquam ab rep. dissenfurum , omnibusq; rebus charius reipub.  
amicitiam semper habiturum : scire enim eam coniunctionem  
magno sibi & usui , & ornamento esse . is , quod Giusefredum Ca-  
rolum ,



solum de quo supra commemorauimus, confecto statim fœde-  
 re inter, suos gloriantem dixisse intellexerat, se se breui sui ciuis  
 mortem cumulate uindicaturum, deq; iis, qui eum interfecissent,  
 pœnas sumpturum, Carminiolâ Venetorum imperatorem auo-  
 rum nostrorum memoria publice ab iis ob prodicionem capite  
 mulctatum eo inuolucro uerborum designantem: utrique enim  
 eadem tellus patria fuit: id, quod erat ratus, Senatui primus om-  
 nium per literas denuntiauit, eo ab fœdere sibi cauere; habere se,  
 contra remp. fuisse ictum, indicia. sed confecto, ut dictum est, fœ-  
 dere, Iulius tamen cupidine ferebatur Arimino Fauentiaq; po-  
 tiundi; quia tamen & Gallorum regem magnæ per se potentia  
 multo maiorem suo permissu fieri nolebat, & cum illam natione,  
 tum Germaniæ populos in possessionem Italiæ uenire, optimaq;  
 eius partis atque populosissimæ dominos fieri sibi reliquisq; Italis  
 detrimentosum existimabat futurum, ut ab illis Venetos oppri-  
 mi sineret, adduci propè non poterat. itaque cum uideret ab Alo-  
 isio exercitum reliquaq; ad bellum idonea per hiemem magno stu-  
 dio comparari, ut primo pabuli tempore alpes traiceret; seq; ab  
 eo per legatos perq; literas sollicitari animaduerneret, ut suas &  
 ipse copias paratas haberet ad reip. fines eodem tempore à Fla-  
 minia latere infestandos atque in eius ditionem irrumpendum,  
 ne sui colligendi aut omnino resistendi reipub. facultas daretur:  
 Constantino Cominato Epirotæ non postremæ apud Maximilia-  
 num auctoritatis, qui Romæ tunc erat, quoq; ipse familiarissi-  
 me utebatur, mandauit, ut in occulto Ioânem Baduarium reip.  
 apud se legatum alloqueretur: quæq; ab eo dici uellet, ei osten-  
 dit. Constantinus, qui à Gallis regno pulsus, quod quidè aliquot  
 ante annis uxorio nomine in Salassis obtinuerat, magno illos  
 odio prosequabatur, adhibita diligentia noctu amotis arbitris le-  
 gatum alloquitur, atque omnia Aloisii regis consilia ei aperit,  
 quæq; reipub. impendeant proponit. addit, si Senatus Ariminum  
 atque Fauentiam restituere Iulio uelit; propterea quòd is reipub.  
 uastitatem non æquo animo ferat, confidere se se ab eo impetra-  
 turum, ut unâ cum Maximiliano à Gallis desciscat; deq; operâ  
 ne quid ab illis reip. noceri possit. legatus Constantino collauda-  
 to, quòd tanta secum de re sermonem habuerit; nihil sibi spei



esse reliquum dixit posse se ad id perducere Senatum: sed quæ ab eo cognouerit, uti ad Decemuirum magistros quamcelerrime perferantur, securaturum pollicetur. Decemuiro, qui iam de fœderis conditionibus aliunde cognouerant, neque oppida illa ab se dimittere ullam ob causam in animum induxerāt; nihil omnino ad legatum, qui ad eos literas dederat, iis de rebus rescripserunt; sed ad Maximilianū, de quo porro ad eos afferebatur posse illum adhuc quidem ab amicitia Aloisii regis abstrahi (nondum enim eam rem ob uetus erga illum odium, plurimasq; odii causas in eius animo coaluisse) Ioannem Petrū Stellā Senatus scribam, qui alias ad Maximilianum uentitauerat, eratq; illi admodum familiaris, secreto miserunt, ut illum quibuscunque posset modis Senatu reconciliaret. is cū ob nimium conficiendæ rei studiū immatura festinatione se apud Maximiliani familiares partefecisset sic, ut eius aduentus Aloisii regis legatis, qui apud Maximilianum erant, celari non potuerit; nulli reip. usus fuit. Leonardus quoque Vicetinus, ex nobili Portorum gente, uir & clari in bonarum artium disciplina nominis, & reipub. amantissimus, magnis itineribus summa hieme ad amicos suos Maximiliani familiares, qui se ei obtulerant, à Senatu missus, ut per illos regis animum leniret, nihil profuit. Decemuiro enim certas pacis conditiones, quæ ab illis proponebantur, quod ex reipub. dignitate non essent, re inter ipsos agitata respuerunt. Quin etiam illud accidit. nam quod erant Romæ duo reip. legati, Ioānes, de quo dixi, Baduarius homo lenissimis omnino moribus, & Georgius Pisanus morosi admodum ingenii; cum Iulio Cætum cellas petente Pisanus in comitatu fuit, Baduario Romæ ob ualitudinem relictō. ibi cum Iulium tranquillo mari nauicula exhilaratum, quæ una ille re magnopere delectabatur, Pisanus de eo ipso reipub. in Flaminia negotio alloqueretur: quin tu, inquit Iulius, non cū Senatu tuo agis, ut is aliquem ex suis ciuibus mihi proponat, cui ego Ariminum, Fauentiamq; dem Romanæ reip. nomine obtinenda; stipendiariumq; illum meum faciam. ita & habebitis re uos à me oppida illa, & ego ad speciem non amifero. ad quæ quidem Iulii sermonem Pisanus respondisse dicitur: non conluisse remp. quempiam ex sua ciuitate regem facere, tumq; nihil de ea



de ea re ad Senatum scripsit: neque quicquam cum collega pos-  
 stea communicauit suo. ita siue casu, siue fortuna, siue deorum  
 immortalium uoluntate, qui remp. florentem opibus, egregiam  
 & illustrem fama, pollentem auctoritate, in finitimorum regum  
 inuidiam adduxerint; ut ex aduersis eius rebus animos hominū  
 erudirent, quæ ciuitas quodq; imperium annos plus mille octo-  
 ginta semper creuerit, posse id unius diei spatio uehemēter con-  
 teri, ac debilitari. Patres pacis spe deposita ad bellum propulsan-  
 dum ingenti animo se conuerterunt. itaque uti equites grauioris  
 armaturæ supplerentur numero ad decem millia, leuioris ad tria  
 millia quingenti, quorum essent ab Epiro duo millia, militesq;  
 ad millia tresdecim conscriberentur, Senatus statim iussit. tum  
 ut ei quoque rei prospiceretur, si quid reges mari molirentur, na-  
 ues triremes quindecim, quarum essent nothæ quatuor, ut in  
 urbe Creta; insula armarentur, classi; reliquæ coniungerentur,  
 latum. missus quoque ab Decemuiris ad regem britanniæ, An-  
 dreas Baduarius, qui multos annos ea in insula fuerat, linguāq;  
 illam callebat, ut eum reip. amicum faceret. interim & Lascaris  
 Gallorum regis legatus, patribus ualere iussis ab urbe in Galliam  
 discessit ultimis Ianuarii diebus: & Antonio legato reip. uti do-  
 mum reuerteretur, regii in Gallia interpretes edixerunt; cum ei  
 prius torque aureum dono regis nomine attulissent. Antonius  
 autem non egere se inimici regis muneribus pronuntians, torque  
 repudiato uix se dedit. Carolus etiam Mediolano dimissus cū  
 Triulcium discedens salutauisset: ille uero, pudet me, inquit, Ca-  
 roldi huius belli, quod parari uideo. nam iniustū est. nulla enim  
 in re uiolatam a uobis Gallorum socieatē possumus dicere.  
 nam quod rex de indutiis queritur, id quidem nihil est: Senatus  
 enim illi ob res modo Italas tenebatur: reliquis in rebus erat li-  
 ber. paucis autem post diebus cum parum esse superioribus Se-  
 natuconsultis prouisum exercitu comparando patribus uidere-  
 tur, additum ad illa est; uti equitum leuis armaturæ mille, mili-  
 tum quina millia aduenarum nationum scriberetur, sagittarii; q;  
 è Creta insula mille, ex Acrocerauniis alteri mille cuiusque mo-  
 di armorum accerferetur. quodq; Genuæ atque prouintiæ por-  
 tubus naues innumerarum amphorarum quatuor, triremesq;



non paucas armari ab rege patres intellexerunt : naues triremes  
duodecim , quarum essent nothæ duæ , prioribus addendas cen-  
suerunt . latum etiam , ut Cremonæ arx ad sustinendos hostium  
impetus longe munitior fieret . itaque mille operæ ei rei à magi-  
stratibus addictæ opus ante inceptum bellum perfecerunt . reli-  
qua etiam eorum finium oppida castellaq; , quibus id usui esset ,  
communitiora fieri , magna cura , atque impendio cæpta sunt .  
ea dum Nicolaus imperator inuiferet ; Bergomumq; adire , quod  
postremum erat , die dicta statuisset : re per exploratores Medio-  
lani præfecto nuntiata , noctu eius equites ducenti cum militibus  
totidem , quos singuli singulos suis in equis imposuerat , Abdua  
flumine traiecto , se in sylvas abdiderunt , ut imperatorem , qui  
nihil eiusmodi ueritus cum paucis itineri se dederat , de uia inter-  
ciperent . quorum de insidiis cum esset Bergomum per agrico-  
las earum regionum magistratibus nuntiatum : tabellarii nunti-  
citatis ad imperatorem equis missi ab iis , paruo illi spatio ex ho-  
stium manibus erepto salutis , & incolumitati fuerunt . his rebus  
foris administratis , domi claro ac sereno die urbanis in nauali-  
bus , dum puluerè ad tormenta exercenda confectum in arculas li-  
gneas operæ infarciunt , ictu mallei fauilla emicuit . ea ingentem  
eius pulueris acruum comprehendit : disiectisq; immuni cum  
fragore , ac tonitru , terræq; motu eius conclauis , in quo asseruaba-  
tur , parietibus , & tecto , ut lateres , tegulas , asseres , tigna q; ipsa lō-  
go per aera tractu uolantia ignis uis atque impetus in diuersa tur-  
lerit ; fumo , & caligine urbem totam puncto temporis integens  
ciuitatem perterrefecit : Senatusq; , qui habebatur , miraculo ex-  
territus in forum frequens descendit . eo igni & cadentibus pas-  
sim iis , quæ sublime ierant , fragmentis ex fabrum collegio quā-  
plurimi , magisterq; ipse fabrum , & honesti homines aliquot in-  
terierunt : habitaq; pro ostento res fuit . Regis sub hæc Ferdinan-  
di legatus patres adiit : regem suum eo se fœdere , quod ictum  
Cameraci esset , uno modo capite , quo sit bellum Thracibus in-  
ferendum , cum Aloisio rege coniunxisse : uelle enim , quod cum  
rep. fœdus habeat , in eo amantissime permanere : cupere autem ,  
propterea quod fiat certior ab Aloisio arma in rep. parari , sci-  
re à patribus , quænam sit eius rei causa : demum , quicquid aut  
opibus,



opibus, aut beniuolentia ualeat, id omni reip. polliceri. eiusmo-  
 diq; item sermonem ipse in Hispania rex cum reip. legato Fran-  
 cisco Cornelio habuit, ut Senatus ea, quæ multis auctoribus a-  
 liunde cognouisset, de Ferdinandi ab se alienatione, falsa esse  
 crederet. ita sunt prona hominum ad fallendum ingenia, non  
 quorumlibet modo, sed regū quoque. Vbi patres de insidiis im-  
 peratori factis in agro Bergomati ab Gallis equitibus intellexe-  
 runt; ea re belli factum initium rati, duos ad id legatos legerunt,  
 illos ipsos, qui paulo ante bellum Rheticum Carnicumq; admi-  
 nistrauerant, Andream Gritum, Georgium Cornelium. atque  
 is, antequam proficisceretur, maioribus comitiis templi Marci  
 procurator lectus est Domínici Mauroceni, qui mortem obierat,  
 de quo supra commemorauimus, loco. erat Cornelius annorū  
 quinquagintaquinque. neque post Franciscum Foscarum, qui  
 dux Venetorum fuerat, quenquam minorem natu illum magi-  
 stratum esse adeptum constabat. adeo uni senectuti eo creando  
 ferè semper honos fuit. præfectus quoque à Senatu lectus est Epi-  
 rotis equitibus Iustinianus Maurocenus: quæque ad eam diem  
 in nobilitatem aditum nunquā habuerat, Vicentio Valerio tor-  
 mentorum cura tradita. Proficiscentibus autem ab urbe legatis,  
 quæstor est exercitui Paulus Nanus declaratus. quoniam uero  
 magistratus regii edictum Mediolani proposuerant, ut cum eius  
 urbis ciues, tum uero etiam Ligures, aut omnino Galli, qui in  
 ditione reip. eo temporis moram traherent, uiginti dierum spa-  
 tio domum reuerteretur; id qui non fecisset, mors ei pœna esset,  
 eiusq; bona publicarentur; qua ex re fiebat, ut per plurimi, qui  
 uel mercaturam faciebant, uel plebeias artes exercebant, domici-  
 liaq; in urbe habebant, emigrare cogerentur: legem contra pa-  
 tres iusserunt; qui ea de causa urbem reliquisset, qui ue illum na-  
 uicula euexisset, aut comes itineris fuisset, eius bona fisco inferre-  
 tur, aliquandoq; captus annum in carcere teterrimo conficeret. ea  
 pœna proposita, omnes, quibus quidem aut insulæ, aut fundi,  
 aut omnino res aliqua familiaris esset, emigrare ueriti restite-  
 runt. iis rebus bellicisq; apparatus, & Maximiliani cum Aloisio  
 rege noua ex fœdere coniunctione, Germani mercatores, qui  
 in urbe erant, permoti concilio coacto à patribus petierunt, uti



se tutos, si quid reip. ab suo rege accidat, uelint esse. quod quidē illis patres libentissimi concesserunt: amplissimaq; iis facultas est omnia, uti consueuerant, in tota reip. ditione liberrime agendi tradita. Comitibus deinde maioribus præfectus est classis Angelus Triusanus declaratus, iussusq; à Senatu quamprimum conscendere. nam præter eas naues, quæ à Gallorum rege armabantur, Ferdinandum quoque regem parare classem, quā in Siciliam & Tarentum mitteret, reip. apud illum legatus ad Senatum scripserat. tamen si eius legatus patribus fidem faceret, Africanarum rerum causa eas opes comparari: nihil omnino esse, quod eo ab rege sibi uerendum existimarent, qui esset reip. amantissimus. caeres, & quod Iulius exercitum & ipse in Flaminia ex Etruria, & Umbria, & Piceno cogeant; & Galli magna manu alpes iam traiecerant; longe maiore autem unā cum rege in dies traiecturi dicebantur; & Maximilianum omnes homines idem per se facturum existimabant: misceri enim & tractari arma ex Germania rumor attulerat: Senatum sollicitum fecerat, quoniam pacto unus tot tantorumq; hostium impetus terra mariq; sustineret: præsertim cum Iulius Roma, suisq; omnibus ab oppidis, & finibus maris ullam ad reip. stipendia uenire non permitteret edictis durioribus interpositis: ut, quæ ex parte plurimi se duces reip. obtulerant, multumq; copiarum secum adducturos se receperant, resq; p. magno eos usus, sibi futuros confidebat, ab ea illā parte spes omnis, atque opinio destituerit. quæ cū ita se haberent; præstare patribus uisum est; uti ad Senatum de restituenda Iulio Fauentia referretur, si forte illū eo munere auertere ab incepto possent. uerum Georgio Emo rem uehementer refellente nihil latuit. Legatis Brixiam Cremonamq; profectis templi Marci altera procuratio, quo in magistratu Marcus Antonius Maurocenus mortem obierat, Andreæ Gritto comitiis maioribus est delata, ut eo munere ad bene de rep. promerendum rebus tam dubiis accenderetur, Andrea Venerio ciue prudente, publiciq; iuris reuerente octo suffragiis præterito: qui eo anno patribus auctor fuerat, uti, Aloisii regis societate, suspecta illa quidem ac plane dubia, repudiata, cum Maximiliano, magnopere id efflagitante, se coniungerent. Petrum interim Landum Fauentiæ magistratu decedentem



decedentem in Flaminia legatum Senatus iussit esse. is Ariminū profectus detecta prodicione ab Iulio instituta, qua eius militibus noctu oppidi portam tradi conuenerat, de proditore pœnas sumpsit. Miserant ad Heluetios superioribus diebus patres Hieronymum Saornianū societatis instituendæ causa. atque is quatuor eorum pagis persuaserat uti se cum rep. coniungeret: fidēq; ab iis acceperat, si per decennium ducentæ quinquaginta auri libræ annis singulis à Senatu eis dentur, se cum rep. futuros, atque in Galliam transalpinam è uestigio contra regem erupturos. ea intellecta re, uti ita fieret, à Senatu lex est lata. duo sub hæc nuntii Venerias allati magno timore pro belli initio ciuitatem affecerunt. quorum alter, Franciscum Mantuanorum principē Casale municipium in Padi fluminis ripa sibi finitimum collecto equitatu, & peditatu repentino impetu cepisse, patres certiores faciebat: ab altero Gallorum magnas copias Abdua traiecto Treuium oppidū aggressas, cū illis obuiā, qui in oppido erāt, equites, & milites exissent, omnem illam manum fudisse, ex militibus non paruum numerum interfecisse; Paulum Memium prætorē, & Iustinianum Maurocenum unā cum filio, præfectosq; tres captiuos fecisse, atque oppidanos ad deditionem cōpulisse, confirmabatur. equites tamen Epirotas ducentos, quibus Maurocenus præerat, reliquis fuis, fugatisq; conglobatos per mediam hostium aciem se se incolumes in tutum recepisse, neque eos lacessere ex hostibus ausum quenquam fuisse, idem nuntius adiecerat. regis etiam Gallorum præco ad urbem uenit, ut bellum reip. indiceret. ab eo patres, semotis aliis, ne ciuitas re noua permoueretur, se adiri uoluerunt. itaq; porta deuia in uestibulo curiæ admissus ueste liliis aureis intertexta se se induit: tum curiā ingressus ante patrum subsellium stans, Bellum, inquit, Lauredane Venerorū dux, cæteri q; huius urbis ciues, Ludouicus Gallorum rex indicare me uobis iussit tanquam insidis hominibus, Pontificisq; Max. & reliquorum regum oppida per uim perq; iniuriam capta possidentibus, omniumq; omnia dolo malo sub uestram ditio- nem rapere, atque redigere festinantibus. ipse ad uos armatus ea repetiturus uenit. ad hæc Lauredanus patrum medius sua in sella sedens ita respondit: res hæc p. Galle, quam adiisti, nihil iniuste



possidet : nam iure agit , neque fidem cuiquam fallit . quam certe  
fidem nisi ualde plus iusto regi ipsi seruauissemus tuo ; ille uero  
ubi pedem in suo poneret , in Italia non haberet . sed præstat nos  
uel cum periculo esse , qui semper fuimus , dum Aloisius æque ar  
rogantia , atque perfidia polleat . bellum , quod denuntias , pro  
pulsaturi cum diuissimortalibus sumus : quos ille uindices habi  
urus est , aut hic , aut apud manes rupti per scelus fœderis . Hoc  
responso accepto est dimissus : ac , ne quis eum uiolaret , quos iti  
neris comites à reip. magistratibus adueniens habuerat , iidem  
sunt reducere atque in regis sinibus sistere illū iussi . Brixiani , ubi  
de captis oppidis , & præfectis nuntiatum est , concilio ciuitatis  
coactō milites sex mille sua pecunia legere decreuerunt , atque ad  
legatos mittere . cuiusq; unus ex iis Aloisius Auogarius , sexcentos  
milites se celeriter cōfecturum , magistratibus est pollicitus , eosq;  
sine ullo reip. impendio menses quatuor in exercitu habiturum .  
quod quidem Brixianæ ciuitatis factum plenum fidei , atque be  
nivolentiæ postea Veronēses æmulati quinquaginta auri libras  
exigi ab se se , atque in milites ad exercitum mittendos stipendii  
nomine distribui concilio coactō statuerunt . Galli eo successu  
cohortati inter se Carauagium capere aggressi , ubi oppidanos  
quiq; oppidum custodiebāt milites apertis exire ad prælium por  
tis magno cum clamore ingentiq; tubarum sono è propinquo ui  
derunt : ueste atque argento temere ubi confederant , relicto se  
se fugæ mandauerunt . domi autem patribus pecunia in bellum  
eroganda sollicitis , præter tributa alia de hoc quoque Senatus  
consultum factum est , & quidem solito fieri superioribus in bel  
lis altero tanto grauius , uti à magistratibus urbanis sex mensium  
stipendia integra reip. remittantur : reliquorū uero compēdiorū ,  
quæ omnino ex iurisdictione ipsa uel ex portoriis fraudatis , uel  
quacunque alia ex re ad eos redeunt , media pars in ærarium in  
feratur , quadraginta uiralibus iudiciis exceptis , quibus unis  
media stipendiorum pars maneat , propterea quod aliunde nihil  
lucratur : magistratus autem prouinciales , & arcium præfecti , in  
tra sinum Phanaticum qui sunt , mediam stipendiorū partem reip.  
remittant , reliquis in rebus eadem , qua urbani , lege teneantur .  
horum autem magistratuum urbanorum , & prouincialium om  
nium



nium iuris interpretes, & scribæ, ministriq; mediam & ipsi cum stipendiorum partem, tum compendiorum tribuant reip. Veronæ, Brixia, Bergomi, Cremæ, Cremonæq; atque Flaminia magistratibus ite exceptis, & iis, qui ultra sinum Phanaticum sunt missi, qui omnes quartam modo partem earum utrarumque rerum conferant: satis enim magna alteris incommoda bellum esse ipsum allaturum, alteris iter longum & impeditum iam attulisse; ne aliis etiam oneribus ferendis æque, ac cæteri, affligerentur. eam legem, uti dictum est, cum Senatus iussisset, maiora quoque comitia tri-duo post habita pari studio iusserunt. latum est etiam, uti exules illatæ fortuito mortis causa, qui una cum quatuor bello idoneis hominibus militiam reip. menses quatuor sua pecunia fecerint, ab exilio reuocentur. legatus deinde Bergomatibus est datus Marinus Georgius, Ariminensibus Aloisius Armerius, qui eis in oppidis administrando bello præsent. interim cum à Petro Lando patres certiores facti essent, ab Iulianis copiis incursiones in reip. fines fieri, abigiq; prædas, & agrestes homines uulgo interfici, uel captos in uinculis adduci: eadē est in Iulii finibus patrandi exercitui reip. à Senatu facultas tradita: Laurentiusq; Sagredus præfectus classis in Flaminia, Piceniq; litoribus suis cū nauius Ariminum contendere est iussus, cumq; hostium numerus in Cremonæ finibus Abduæq; ripis uehementer augetetur; castellaq; ad eos, & pagi aliquot defecissent: uti naues aliæ aduerso Padi flumine in Galliam mitterentur, aliæ in lacu Benaco armarentur, lex est lata: præfectiq; alteri classi Sebastianus Maurus, alteri Zacharias Lauredanus dati. Gaspar etiam Seuerinas, qui Cesenæ erat, seq; reip. obtulerat, & Antonellus Neapolitanus cum turmis equitum ad reip. militiam sunt conscripti. atque hic quidem, quod erat plane diues, confectis in urbe testamenti tabulis templi Marcii procuratores ex asse sibi hæredes instituit, atque ad bellum profectus est. Leonardus etiam Pratus, è Lupis Apulia oppido, ex societate Rhodiorum militum, se ad remp. contulit, homo & gentis nobilitate, & rei militaris sciētia clarus: cui paulo post, ut uirtuti eius honos haberetur, equites leuis armaturæ centum quinquaginta, reliquorumq; omnium eiusdem modi equitum præfecturam Senatus tradidit, is quoque Leonardus, cum ad ur-



81  
bem quinquaginta auri libras domo secum attulisset: patribus dixit, tanto se auro in praesentia non egere: decemque ex ea summa suos in usus retentis libris, reliquas quadraginta eis obtulit, atque à curia in diuersorium abiens statim misit. tam prona in alieno homine, atque aduena liberalitas cum beniuolentia in reip. extitit. Venienti autem ad urbem Hannibali Bentiuolo, patribusque pollicenti, si fauore suo uelint, opibusque sibi praesto esse, breui se unà cum fratribus, & suorum factione Bononiā ab Iulio auersurum, magnamque illi plagam, quā nihil timeat, inuicturum: Senatusconsulto sunt omnia, uti petierat, permissa: literaeque ad praefectos in Flaminiam datae, rem omni studio iuuarent: atque ipsi equites quingenti, Hermeti fratri eius milites sunt bis mille cum pecunia pro re, quam parabant, traditi. equiti etiam Vulpio è Corneli foro, ob seditiones ciuitate eiecto, equitum grauis armaturae turma data; Herculi; Tiberto Cefenae item exuli milites quingenti, spe nouandarum rerum suo in oppido ab utroque; quibus reuocatus motibus Iulius, suisque rebus timens ab incepto bello desisteret. inter haec binas auri libras sacris uirginibus patres dono dari à quaestoribus curauerunt, ut preces diis immortalibus tam duro tempore pro rep. facerent: perque omnia urbis templa sacerdotes à Pontifice iussi numina, quorum sub tutela Venerum imperium est, uotis supplicibus, & solenni ritu placare. uerum enim uero cum belli facies quotidie formidolosior fieret; eoque Gallia transalpina operae fabri; magno numero Mediolanum, Laudemque Pompeii aduenissent; pontesque tres diuersis locis in Abdua flumine ab hostibus instituerentur; regemque ipsum multo maxima cum manu paucis diebus affuturum, fama, nuntiique uulgauissent; atque à Flaminiae latere Iulii exercitus modo Ariminum, modo Fauentiam inuasurus magnopere urgeret; ob ingētes autem tot tamque praesentibus in rebus factas impensas pecunia reip. deficeret; quod profecto malum omnium maximum plerisque uidebatur: coacto Senatu Lauredanus dux auri libras decem mutuo se daturum reip. pollicitus, ciues reliquos, quibus non deesse facultatem sciebat, idem pro se quisque uti faceret, est cohortatus. itaque eo die posteroque plurimae auri librae mutuo in ararium collatae eo metu ciuitatem liberauerunt. Tauriso deinde



inde reliquisq; ditionis Venetæ locis urbe excepta restitutus est ab exilio Iacobus Collatus: cuius exilij damnatus ob necem patris fuit: dum is in exercitu reip. quemadmodum quidem patribus se obtulerat facturum, cum turma equitum centum menses quatuor sua pecunia militiam faciat. erat tunc in sermone ciuitatis haud modico Fauentia: quo in oppido detecta proditio fuerat Francisci Brixiani equitum turmæ præfecti, deq; eo pœna sumpta: oppidi enim portam noctu Iulianis se militibus aperiturum cum eorum interprete pepigerat: atque insigne Iulianum cum quercu aurea, & coronis, quod in muris mane poneret, ab eo traditum domi suæ custodiebat. illi autem, patefacta re, in Fauentia se fines intulerunt; ut oppidum montanum Brisigelim, cui ciuitas propter optimum genus militum ex eo educi solitum magnopere confidebat, expugnarent. iamq; Tartarum Centurionem reip. qui Brisigelim cum tribus cohortibus præsidij causa se cōferebat, insidijs positis interceperat: pauloq; post cum oppidum tormentis cinxissent, eo sunt potiti, prætorē, quæq; cum eo erat copia, & Ioanne Paulo Manfronio equitum præfecto magna uirtute, qui tuendi oppidi causa eò cum paucis equitibus per medios hostes se se inferens uenerat, in arcem se recipientibus. quos tamen omnes multis oppugnatos prælijs, arce etiam deiecta, captiuos fecerunt: & Fauentia frustra tentata in Rauennæ fines ad Russium oppidulum oppugnandum se contulerunt. eas ob res ciuitate perturbata cum lentius tributa exigerentur: Senatus censuit, ut, qui iure comitiorum præditi die sibi præstituta in ærarium non intulissent, eorum nomina comitiis maioribus recitarentur; ut ab uniuerſa ciuitate cognosci posset, qui ciues non amantes patriæ essent: quod si ob eam contumeliam alia præstituta die non inferrent; tum uero à Senatu atque à collegiis secretioribus demum ab omnibus reip. muneribus arceantur; eorum loco alii subrogentur; ipsi ad ferenda suffragia ne admittantur. hæc tum fuit nobilitati pœna multiplex constituta: plebi uero id unum, ut in ærarium non inferens, à publicis & ipsa muneribus amoueat: quæ cum plurima quidem sunt, tum certe etiam perutilia, ut magna pars ciuium ea se re alat perliberaliter. eam legem maiora comitia primum habita comprobauerunt, acerbitate tē-



porum ciuium animos frangente , ut , quod alias non tulissent ,  
neque unquam latum antea meminissent : tum quidem non per-  
ferrent modo impositum patienter , sed ipsi quoque sibi met im-  
ponerent perferendum. Lege lata Bergamo literæ uenerunt: ho-  
stes in oppidi finibus Medelaci castellum magna ui oppugnati  
cepisse : omnes qui in eo erant interfecisse : non mulieribus , non  
infantibus pepercisse: ut ciuitas perterrefacta tuendi oppidi auxi-  
lium à legatis petat . interim magna ex parte collecto ab impera-  
tore , Liuianoq; reip. in Gallia exercitu , ad quem quidem equi-  
tes Epirotæ per plures modo allati se contulerant , magnaq; ui  
optimorum tormetorum à Valerio adducta ; cum de Abdua flu-  
mine transeundo sententiæ ab iis , atque ab legatis , & reliquis præ-  
fectis dicerentur ; Liuianus autem magnopere transitum proba-  
ret: multum enim , si transeant , posse ipsos proficere nondum col-  
lectis hostibus , rege non præse , populis adhuc in ambiguo  
utram sequi partem præstet , constitutis : audacia & celeritate plur-  
ima confici ; cum sua hostibus consilia impediuntur , ipsis animi  
augeantur : sed reliquis eam rem non probantibus , quod fines  
reip. hostibus direptioni , si & ipsi Abduam transissent , essent relin-  
quendi : Liuianus ad legatos conuersus , Agite , inquit , si cunctari  
hic uolumus , scribite ad Senatum , decies millies auri libras pa-  
ratis habeat , quibus producere bellum possit . qua de contentio-  
ne Senatus certior ab legatis factus , petentibus ut quid fieri malit  
imperet , literas ad illos dat , eam se re imperatori Liuianoq; per-  
mittere , qui rebus omnibus intersint : & moram se & flumi-  
nis traiectionem ita probaturos , uti ipsum alterutrum è reip. com-  
modo susceperint . interim Iulius , qui Vrsinæ gentis duces , ne ad  
reip. militiam accederent , partim minis , uti supra demonstratum  
est , edictisq; terruerat , partim per filiam suam Felicem , quæ Ioan-  
ni Iordano eius familiæ principi nupserat , precibus & fœmineis  
consilijs ab itinere instituto reuocauerat ; stipendiaq; sibi ab reip.  
legatis Romæ curata ne restituerent , interdixerat data eis uenia ut  
re illa retinendi , fideiq; præstandæ religione sublata : præter quod  
exercitum in fines reip. introduxisset , ad illud etiam pertinaciter  
descendit , ut Lauredano principi , Senatuiq; omni Veneto , & ciui-  
bus singulis aqua , & igni interdiceret ; eiusq; rei literas omnibus  
hominibus



hominibus uulgandas proponeret maledictorum, & execrationum plenas; nisi die præstituta, non Fauentiam modo atque Ariminum, sed Rauennam quoque, Ceruiamq; sibi tradiderint: quæ quidem oppida centum ferme annos in reip. imperio fuerant: neque ullus ea Pontifex Max. in dubium reuocauerat, quin iure à rep. possiderentur. Qua intellecta re, ne plebs eiusmodi literis, plus quàm tempora & reip. difficultates postularent, permoueretur, Senatus cauit, ne reciperentur, ne uic, qui afferrent, admitterentur. appellauit etiam de eo futurum concilium missis Romam affixisq; in templorum foribus publicæ expostulationis literis: missis etiam Pannoniam ad Thomam Cardinalem Strigoniensem: nam ei propter Patriarchatum Constantinopolitanum, cui præerat, unâ cum tribus Episcopis concilium cogendi ius potestasq; antiquitus erat attributa. Has ob res & belli Gallici pericula supplicatio decreta est; auriq; tantundem, uti paulo ante, sacris uirginibus publice datum placandi Deum causa. Patres interea certiores facti edictum Neapoli propositum fuisse, ne quis ad reip. stipendia se conferret, cogi uero exercitum à Pro rege, qui cum in Apuliam ad reip. oppida expugnanda cõtenderet; expectari autem ab eo Roma milites quingentos; quos Legatus apud Iulium Regius in urbe conscripserit: reliqua omnia esse iam parata, ut uiuâ se se det: adhibito legato apud se item regio ea, quæ non ambiguis auctoribus intellexerant, exposuerunt: questiq; sunt, non esse hoc illud, quod sæpe reip. sit pollicitus, ille uero confidenter pernegare: rogareq; patres, ne quid eiusmodi crederent: agi à pro rege illa omnia muniendi regni causa, propter Gallorum in Italiam aduentum, non autem ut reip. bellum inferat, suis cum regibus fœdere atque beniuolentia coniunctissimæ. quæ tametsi patres, quorsum dicerentur, haud obscure cognoscerent: dissimulanda tamen sibi esse statuerunt, dum de belli exitu cum rege Galliæ sciri posset. at cum aliquando de Abdua flumine non transeundo, nisi prius quæ oppida & castella Galli iam ceperant, ab ipsis expugnarentur, ne post se hostes relinquerent, inter duces Venetos conuenisset: aliquot ex iis paruo negotio castellis receptis Treuium se cum exercitu contulerunt: quod oppidum equites, militesq; ex optimo Gallorum genere bis mille custodiebant: muroq;



tormentis celeriter deiecto hostes ad deditionem compulerunt, nulla conditione interposita, nisi ut iis, equis detractis, rebusque reliquis abreptis, cæteris sacramento ab ipsis dato eo se anno bellum reip. non facturos, abeundi facultas permetteretur: duces captiui tam diu essent, quoad eorum, quos ex Venetis eo in oppido Galli cepissent, cum his permutatio fieret, ab ea oppugnatione uti Venetos repellerent, Galli magno numero uicinis ex locis coacti ad eorum quidem castra uenerant: manus autem conficere non sunt ausi: ut penè in eorum conspectu oppidum captum sit: quod quidem Liuiani permissu statim direptum atque incensum est. qua in direptione mulieres uirginesque propè omnes à militibus uim passæ, ac uiolatæ oppidi casum inhonestiorè rediderunt. eo negotio confecto Hispaniæ regum legatus Lauredanus patresque gratulatum adiit, scire se affirmans suos reges magnam ex eo uoluptatè percepturos. pauloque post Mantuani ducis equites quatercenti, milites sexcenti Alexio duce ad castellum Casaboldum, quod abest ab Asula oppido in Brixianorum finibus millia passuum quatuor, cum tormentis, id ut caperent, improuisi accesserunt. pagani, qui in eo erant, armis captis fortiter se defendere cœperunt: simul ad Federicum Contarenum à Decem uiris legatum Asulanis præse iussu miserunt, auxilium imploratum. Federicus confestim quingentibus militibus, quos habebat fortes uires, ut eò contenderent, petentibusque opem ferrent, imperauit. ii celeriter itinere confecto prælium cum Mantuanis commiserunt, eorumque partem interfecerunt, partem ceperunt: reliquis in fugam, coniectis tormentisque abductis, nullo ex suis desiderato, uulneratis perpaucis læti Asulam ad Federicum reuerterunt. ea clades Mantuæ nuntiata magnos luctus excitauit. erant enim in ea manu honesti ciues permulti: quorum pars maior interierant. Veneti, quod Treuio capto oppidum militibus diripiendum tradiderant, haud leuem ex ea re iacturam fecerunt. plurimi enim milites Tribunis & Centurionibus relictis cum præda uulgo domum profugerunt: ut magna illos perturbatio tenuerit. eo incommodo ad regem ab exploratoribus perlato, qui Mediolanum Calendis Maii uenerat, pauloque antea ex oppidi, & suorum deditione grauiter commotus, quò utiliter belli consilia uerteret,



teret, non reperiebat; omnibus suis coactis copiis Cassianum uenit, ut, cum uellet, flumen traiceret. habebat autem lectissimorum equitum millia quindecim, quibus duces clari nominis praeerant; militum triginta. eorum pars Heluetii, Vascones reliqui erant. ad hæc omnem ferè totius Galliae nobilitatem sibi stipendiariam secum ducebat. postremo quicumque in Gallia citeriore aut princeps suae ciuitatis, aut ampla familia natus, aut magnis opibus, aut omnino aliquo apud suos loco esset, eos omnes nominatim euocauerat. quæ duæ quidem res ad reliquum equitatum adiectæ, & numerum, & robur, & certe faciem, ac splendorem exercitus maiorem in modum adaugebant. Venetus erat exercitus equitum grauiorum millium sex, leuiorum quatuor, militum trium & triginta. tametsi neque dum omnino omnes nostræ in castra copiae uenerant. nam & Lucius Bononiensis, & Leonardus Apulius præfectus leuiorum equitum reip. suis cum turmis, qui quidam erant Brixiae à magistratibus retenti, ut eos fines tuerentur, in quos Mantuanorum dux inuasurus putabatur, & equites Epirotæ per plures, tum demum appulsis ad urbana litora nauibus egressi, & milites non pauci, quos Brixianorum ciuitas cogebar, expectabatur. aberat etiam ex legatis Cornelius: qui paulo antea calculo & urinæ uitio uitæ suæ diffidens Brixiam se contulerat. erat autem is exercitus, qui conuenerat, ita florens etiam sine iis, ita instructus, & animo, ut uidebatur, paratus ad decertandum cum ut remp. defenderet, tum uero etiam, ut quam Italiae partem Galli occupauerant, in libertatem uindicaret (id enim propè palam profitebantur, eiusmodiq; uoces eorum creberrime ab hostibus exaudiebantur) ut nullo tempore aut meliores, paucis equitum ductoribus exceptis, aut omnino ampliores copias respublice suis in exercitibus habuerit. & nisi duces illis defuissent: nihil omnino uidebatur eorum aut claram uictoriam, aut pacem honorificam fuisse interpellaturum. constat enim, Aloisium regem, ubi is propè se hostium exercitum habuit, atque ex captiuis & numerum & alacritatem copiarum ad pugnandum cognouit, suis ducibus dixisse, nunquam se tantas Venetorum opes atque copias existimauisse: haud sibi tum sui exercitus uictoriam satis exploratam esse: fœdus secum Maximiliano reliquisq; regibus ad Ve-



netos eodem tempore opprimendos fecisse: decreuisse, si ita illis uideatur, non decertare, atque ad legatos Venetos mittere, qui nuntiet: posteaquam reliqui fœderati nihil in commune conferant, ut se ad bellum iuuent; uelle sibi remp. amicam esse, cumq; ea fœdus renouare potius, quàm congregari: uerum ab suis ducebus suatum, ut ea de re prolixius sibi esse cogitandum statueret: loco esse propter flumen eiusmodi, ut elici inuitus ad pugnandum non possit: semper Venetos eum nuntium libenti animo accepturos: rem in alium diem distulisse. hæc ab illis, qui concilio interfuerant, patres postea cognouerunt. Cassianum est oppidum in Abduæ fluminis ripa loco paulo editiore: pontemq; habet ante portam ad fluminis traiectionem plane cōmodum. trans flumen locus est ad semicirculi propè formam, quamuis magnarum copiarum capax. eum omnem locum aqua fluminis in altitudinem pedum sex, in latitudinem circiter uiginti, à superiore parte deriuata, inq; flumen rediens claudit cōmunitq; arboribus etiam impedita, ut introspecti non facile possit. Cassiani rex biduo confecto, cuius bidui tempore Mantuanorum dux ab eo accersitus cū equitibus quingentis ad illū uenerat, flumen magno silentio exercitum traiecit, atque in eo, quem diximus, loco castra posuit. inter quæ & nostrorum castra planities tria passuum millia patebat. in ea planitie parua utrinq; ab equitibus prælia fiebant. quibus in rebus ob Epirotarum celeritatem atque uirtutem Galli, quàm Veneti, sæpius interficiebantur, & capiebantur, aut omnino repellebantur. uerum, propterea quòd Galli tormentis in Cassiani arce positis illam planitiem longe lateq; uerberabant, nostri non modo ad hostium castra propius accedere prohibebantur, sed neque, num rex flumen traiecisset, plane cognouerant. his ita constitutis rebus regi nuntiatur Reuolutam oppidum suis ab castris abesse millia passuum paulo plus trium: in eo esse hostium milites ad tercentum: perfacile capi posse, si eò celeriter se conferat. itaq; de media nocte castris cum exercitu egressus se se itineri secundū flumen dedit. Liuianus, qui neque dum etiam sciebat, Gallos Abduam traiecisse, ab exploratoribus certior factus, ex tumultu strepituq; carrorum, quem exaudierant, Gallos loco se mouisse, atque iter secundum flumē facere; cum equitibus leuissimis quatercentis



tercentis sub lucem castris est profectus, ut, quid hostes agerent, cognosceret, & si citra flumen essent, moraretur, dum reliquus exercitus accederet. caligo uero ita densa eo mane campis incubuit, ut Liuianus, qui citatus ferebatur, temere in Gallorum incideret agmen, eosque tum demum & Gallos esse, & flumen transisse cognosceret. sed illos lacessere tantis in tenebris non ausus, propere ad Reuolutanos, quò regem iturum suspicabatur, misit, qui diceret, si ad se hostes accederent, parumper sustineret, se se omni cum exercitu confestim affuturum, auxiliumque eis allaturum. his datis mandatis ad imperatorem recurrit: motisque statim castris, aciebusque dispositis, ad Reuolutanos, si fieri posset, tuendos exercitui dux fuit. sed ea in re quòd moram interposuerat, nulli usui cum fuisset: Galli enim confecto interim itinere, tormentisque ad muros positos paruo temporis spatio deditione municipium ceperant: nostri castra quingentos prope hostes passus suo loco posuerunt: ibique diem alterum uterque exercitus continuit. postero die autem, qui dies fuit pridie Nonas Maias, rex, ut Pandinum municipium item caperet, bene mane secundum flumen acie disposita iter facere cepit ea spe, ut, si Cremonæ appropinquare, ad oppidique muros se ostendere cum exercitu posset, non nihil confideret se se oppidum, ciuibustradentibus, quorum uoluntates antea cognouerat, in suam potestatem redacturum. qua in re sua illum spes atque opinio fefellisset, si Veneri se continuissent, neque praelium commisissent. erant enim loco editiore, ac ferè medio regionum earum: quo ex loco omnibus eorum oppidis, ne quid aggredi contra reip. uoluntatem auderent, una tanti exercitus fama facile prospiciebatur, quamcunque se in partem rex incitauisset. quem si, ut facillimum factu erat, paucos modo dies elusissent; propterea quòd laborare com meatu ceperat; qui ad eius exercitum, Abdua flumine interposito, tunc Epirotis equitibus omnia diripientibus, atque in castra reip. trahentibus: magna difficultate afferebatur: ipsa necessitas flumen iterum traicere, Laudemque Pompeii aut Mediolanum nulla re confecta illum reueri coegisset. quem rerum exitum metuens Triulcius, homo iam senex, atque in rebus bellicis exercitatus, regi auctor fuerat, ne Abduam exercitum traduceret. cumque nihil profuisset

h



set, Galliꝑ; transire flumen iam inciperent: inter suos uideo in-  
 quit hodie Triultius Venetos Italiae dominos nobis imperium  
 tradentibus fore. Alia ex parte imperator senex & ipse, multaꝑ;  
 rerum experientia in bellis eruditus, eundem res euentum habitu-  
 ras tum existimans, modis omnibus, ut à pugna se abstineret, Li-  
 uianum, quem ardere cōmittendi praelii studio cognouerat, hor-  
 tabatur: Gallos inopia coactos sua sponte breui se in suos fines  
 recepturos: confectum bellum, & uictoriam sine sanguine par-  
 tam dictitans. itaq; cum esset nuntiatum, hostes loco se mouisse;  
 Liuianusꝑ; eorum se consilia sua celeritate anteuenturum impe-  
 ratori recepisset; petiissetꝑ; ab eo, ut, cum ipse ad illum mitteret,  
 cum reliquo exercitu subsequi maturaret: minime, inquit impe-  
 rator, me accersieris, nisi tam longinquis hostibus, ut congredi  
 non possint. hoc unum mi fili, ne ue te animi magni tui confiden-  
 tia ulterius, quàm oportet, prouehat, etiam atque etiam abs te  
 peto. si enim gladiis reconditis uincimus, quid nos attinet belli  
 fortunam periclitari? hæc imperator idcirco dixerat, quòd non  
 multum equitatu confidebat: quo in equitatu nōnullos esse præ-  
 fectos, qui Gallicis partibus occulte fauerent, non obscure co-  
 gnouerat: eosꝑ; pugnam detrectaturos, si esset confligendum,  
 maiorem in modum uerebatur. tum Gallorum naturam eiusmo-  
 di esse sciebat, ut primo impetu sustineri ægre possent; multaꝑ;  
 recentes conficerent, quæ spatio interposito non essent præstatu-  
 ri: fieri enim illis omnia in dies duriora, ac difficiliora, quòd  
 moram ferre nequeant. sed profecto longe aliter res, quàm ipse  
 existimauerat, cecidit, propter Liuiani cum eo disceptationum,  
 atque inuidiæ suscepta pridem semina: qui non superiorem mo-  
 do sibi illum esse, sed ne exæquari quidem imperio ac dignitate  
 patiebatur, sumptis ab iis rebus animis, quas anno superiore in  
 Carnis, atque in Istris gesserat. itaq; spreto prudentiore consilio  
 Liuianus, tum longissime abiisse hostes confirmans, imperato-  
 rem ad insequendum incendit: non cunctando; neque sedendo  
 reip. consuli, quæ se suaꝑ; omnia ipsorum fidei commiserit: fru-  
 stra tantum confectum exercitum, tantos thesauros insumptos,  
 si ante ipsorum oculos imperii municipia nullo defendente ca-  
 piuntur: suum hoc esse dedecus, non reip. His uocibus impulsus  
 Nicolaus



Nicolaus castra moueri, & signa tolli imperat, suoq; loco relicto in'demissiores, atque impeditiores campos exercitum instructum producit. quatuor nostrorum erant acies equitum militumq; numero ferè pares: quæ ita iam processerant, ut prior ab extrema, cui Liuianus præerat, tria millia passuum abesset. rex de eo certior factus, cum esset inter utrosq; fossa ab incolis ad deriuandas aquas confecta in longum porrecta terræ spatium, alta, lataq; ut traici ab alterutris sine magno discrimine non posset: ad extremam eius partē agmen sistit, atque ab itinere continet eò usque, ut tres nostrorum acies suum exercitum prætergressas sciret esse. tum agmen & tormenta retorqueri, atque in ultimam nostrorū aciem impetum fieri imperat: aciemq; pleniorē suam, cui magnopere confidebat, in impeditos atque inopinantes immittit. Veneti primum omnium frequentes ab Gallis missas tormentorum pilas exceperunt: interfectisq; non paucis, in quibus fuere legati comites aliquot, qui ante ipsum disiecti eius modo sanguine os non resperferunt. ut temporis exiguitas patiebatur, conuersi quantum poterant pugnaverunt. sed quoderat magna eorum pars ex proordinibus, neque multum rei militaris usum habebat; facile omnes interfecti fugatiq; sunt. erant autem numero ad millia quatuor. apud hos ea in acie cum esset Petrus Montius, de quo supra dictum est, cum militibus, qui sub eo merebant, mille, is hostium impetum excipiens, cum fortissime, & quantum humana uis poterat, pugnauisset, magnumq; hostium numerum interfecisset, reliqui fessi uulneribus iam cederent, sub missis ab rege multis optimorum militibus millibus, qui præliū restituerunt, cum octingentis suorum in media hostium acie cōfossus occubuit. erant apud illum Saccocius Spoletinus cum septingentis militibus, Citolusq; Perusinus cum ferè totidem, uiri & ipsi magna excellentiq; uirtute. horum alter interfectus est: Citolus multis uulneribus acceptis in hostium potestatem uenit. ex reliquis, ea in acie qui erant, militibus perpauci Gallorum impressionem paulisper sustinuerunt. Liuianus pugnae initio, prælium commissum conspicatus, alio ab latere cum sua turma in hostes se iniecit: atque ab ipsis, equo defesso, ut in recentē se inferret, cū desiluisset, uulnere sub oculis accepto captus est.



captiꝑ; , qui cum illo prælium inierant , fortes uiri , & claro loco  
nati sane plurimi . apud quos Francus Burgius equitum sagitta-  
riorum turmæ præfectus acriter pugnās occubuit . reliquus equi-  
tatus cum præfectorum prodicione , tum timore pugnandi nulli  
omnino reip. usui fuit: neque ulla ex tribus aciebus, quæ anteces-  
serant , pugnāti quartæ auxilium attulit . ita paruo temporis spa-  
tio Galli , quos quidem magna hostium exercitus formidine affe-  
ctos paulo ante ualde pœnituerat bellum reip. intulisse , quosti-  
muerant , in fugam coniecerunt: nemo enim ex omni reip.  
copia, fufis fugatisꝑ; iis, se continuit: ingentiꝑ; optimo-  
rum tormentorum ui, quam Vincentius Vale-  
rius præfectus ministriꝑ; incustoditam  
mediis in campis fugientes prædæ  
hostium reliquerant ,  
sunt potiti .



123

PETRI BEMBI RERVM VENE-  
TARVM HISTORIAE  
LIBER VIII.



**V**BI nuntii, literæq; de ea re ad Senatum uenire, tantus repente dolor omnes tenuit, nunquam ut alias patres maiorem animo agritudinem contraxisse ciuitas meminerit: fereq; omnes tam inexpectatum reip. casum grauius dolebant. nam ex Liuiani literis, qui eos bono animo esse iusserat, & lata, prosperaq; multa non semel fuerat pollicitus, uictoriam de Gallis propè certa spe animo conceperant: quam si essent consecuti, neque Iulium, qui in ipsos noua interdicti forma usus fuerat, neque omnino quenquam timuissent. nunc se uictos, exercitumq; reipub. fustum, & profligatum esse, grauiissime ferebant: & reflantem patriæ fortunam, & difficultates, in quas incidere posset resp. animo uoluebant. quanquam aliis super alias acceptis literis, neq; Imperatorem, neque legatos cum multo maiore exercitus parte prælio interfuisse cognouissent. tamen quod eisdem quoque literis admonebantur, omnium mentes timore prosternatas iacere, peditesq; in primis, qui retineri non poterant, quin uulgo dilaberentur, seq; à signis subtraherent: difficile omnino uidebatur reip. oppida uel à uictore rege, uel à Iulio posse defendere. erat in templi Marci procuratorum collegio Paulus Barbus, ciuis sane prudens, diuq; multa cum laude in rep. uersatus. is, quod erat senio confectus, à publicis muneribus abstinens domi suæ aliquot se menses continuerat. huic Lauredanus princeps misit, qui cladem exercitus nuntiaret, & Senatum cogi diceret, ipsumq; adesse, si posset, hortaretur. quod ubi senex audiuit, uestem Senatoriam poposcit; atque ita in curiam membris tementibus se se trahens, orationem, quam tempora poscebant, habuit, uenisse in Senatum se se corpore infirmo, nullis uiribus, ut eam sententiam diceret, quâ præsens rerum status pateretur: quod enim quæque esse, qui in tanta tam repente offusa urbi caligine possit, quid fieri



expediat, recte dispicere? grauem esse reip. casum, illius opes fra-  
ctas debilitatasq; esse: exterorum auxilia unde peti possint, non  
uideri: uerum, esse Deos immortales, quos ruptis fœderibus ho-  
stes uiolauerunt; eosq; neque arma hominū uereri, neque posse  
decipi ab iis, qui nos in necessitudine ac fide illorum requiescen-  
tes, plurimisq; nostris maximis atque perpetuis beniuolentiæ  
officiis constantiaq; fretos prodiderunt: eos tanti sceleris uindi-  
ces futuros, rei; pub. auxilium laturos, se confidere. hæc ille cū  
dixisset; ad ea, quæ essent procuranda atque statuenda, orationē  
conuertit. quod idem multi magistratus fecerunt. pluribus igitur  
dictis sententiis, ut in tā dubiis rebus cuiq; aliquid fore ului  
succurrebat; primum omnium pecunia legatis, qui se ex fuga  
apud Brixiam receperant, ad exercitum instaurandum decreta  
est. nam Cornelius ex morbo paulisper recreatus, dum in castra  
se referret, clade audita unā cum fugientibus eō redierat. tamen si  
eis ē stipendio ante prælium exercitui dato non minimum pecu-  
niæ supererat. deinde ad Dominicum Grimanum, & Marcum  
Cornelium Georgii legati filium; qui utrique in Cardinalium  
collegio Romæ tunc erant; datæ literæ; uti Iulio ea, quæ ipsemet  
petierat edicto suo, ex reip. ditione oppida intra eos, quos præsti-  
tuerat, dies iri ei traditum Senatus nomine pollicerentur: roga-  
rent, ne remp. conteri à barbaris exercitibus permetteret: quam si  
unam pessundabunt; tutum illum reliquosq; deinceps Romanos  
Pontifices ipsa in urbe non futuros: id quā sæpe alias experta  
Roma sit, nescire porro neminem: decere ipsum, qui in Italiæ  
præclara parte natus cœlum hauserit, reliquos Italos tueri potius,  
quā exterarum nationum plusq; nimio per se appetentium ui-  
res opesq;, quibus uastitatem Italiæ inferant, augere. latum etiā,  
ut Antonius Iustinianus; qui Cremam legatus à Senatu lectus  
proficiscebatur; ad Maximilianum recta contenderet; & cū illo,  
si posset, pacem quantum uis duris conditionibus faceret: Ter-  
gesteq; oppidum, & Portum Naonis, reliquaq; municipia, quæ  
resp. ex eius ditione superiore anno ceperat, Senatum ei paratum  
esse restituere, ac quæ oppida ex Romanorum imperatorū ditione  
in Carnis, & Gallia, & Venetia resp. possideret, ea se omnia illi  
tanquā accepta relaturum nuntiaret: nisi enim ab altero eorū ali-  
quid



quid auxilii afferatur aduersus Gallorum audaciam, atque impetum, nullum satis firmum obicem futurum esse uerebantur. Deum lecti legati ad exercitum duo priorum legatorum loco Georgius Emus, Paulus Capellus, legationibus renuntiatis propter alios magistratus, quos obibant, ex quibus magistratibus ad alia munera inuitos euocari non licebat, magnam Senatus, magnam totius ciuitatis inuidiam subierunt. neque eorum loco quisquā subiectus postea fuit; quod iam de priorum legatorum diligentia, quæ Senatus uellet, nuntiarentur. rogatio tantum in X uirum collegio lata, ne cui deinceps ulli ullam ob causam aduersis reip. rebus cuiquam sibi delato muneri reiiciendi facultas sit. lecti post hæc legati duo Petrus Duodus, Chrystophorus Maurus; quorum qui plura suffragia tulisset, Brixia, Verona alter præesset. horum prior clare Senatu audiente pronuntiavit; se id uehementer cupisse, ut suam reipub. tam tristi eius tempore nauare operam posset; quando lætiora non dabantur: itaq; legationem libentissime obiturum. Maurus autem ante Lauredani subselliū progressus patribus dixit, post Deum immortalem suam se uitā reip. deuouisse: ea, uti uellet, uteretur: læto se illam animo patriæ, à qua acceperit, redditurum. quorum oratio ab omnibus laudata, multorum Senatorum patriæ charitate implente dulcedine animos, lacrymas elicuit. atque ii statim profecti sunt. Dionisio autem Naldio, qui prælio interfuerat, cuiusq; centuriones militesq; per plures & capti à Gallis & interfecti fuerant, ipse fortiter pugnans repulsis hostibus se receperat, omnium reip. militum præfectura est à Senatu tradita. Auxere patrum dolorem inter hæc è Flaminia nuntii: Ioannem Græcum, hominem impigrū, & spectata fide, equitum sagittariorum turmæ præfectum, cum ea, quæ Rauennæ erat, manu hostes aggressum, ut eos ab obsidio ne Russii auerteret; quod abest municipium ab Rauenna passuū millia XV. diuq; ab Iulianis oppugnabatur; equi lapsu captum fuisse; eoq; ab hostibus ad murum oppidi producto Russianos unā cum prætore se se illis dedisse: eorum exercitum iam iamq; ad Rauennam oppugnandam affuturum. eiusmodiq; nuntiis alii è Rhetis nuntii succedere, qui dicerent, manus illis in locis & Maximiliani finibus cogi: tormenta Tridentum afferri: comnea-



tus comportari : certam esse famam, bellum inferri à Maximilia-  
no reip. ex Carnis item & Tergeste patres certiores fiebant, mili-  
tes ad octo millia in alpibus propè conscriptos esse; qui reipub.  
ditionem aggrediantur. ex castris quoque ab legatis literæ affere-  
bantur, regem Carauagio esse potitum; Iacobumq; Siccum eius  
oppidi municipem, equitum reip. præfectum, eò cum suo equita-  
tu contendisse, regi q; sponte se atque illos tradidisse: nullum ui-  
cinorum municipiorum exercitum Gallorum expectare: omnes  
illas regiones in timore magno esse: Brixianos, qui antea & fidè,  
& audaciam reip. præstabant, timere suis rebus & diffidere cœ-  
pisse, quòd scirent prætores suos uxores, & liberos, & suppellecti-  
lem domesticam ad urbem misisse: quæ res uehementer repre-  
hendebatur: itaq; se se in difficultate plurima uersari rerum om-  
nium. milites enim uel imperia recusare, uel accepto largiter sti-  
pendio tamen perfugere: tormenta eis deesse, quibus oppidum  
tueri possint, si rex eò ueniat: quamobrem uereri, ne Veronam  
se recipere cogantur. Sed quod ad Carauagianos attinet; eam re  
postea intellectum est ita cecidisse. nam quòd oppidani, ne diri-  
perentur, statuerant regem, qui cum exercitu aderat, recipi ab  
ipsis oportere: Ludouicus Michael arcis oppidi præfectus, qui  
se celeriter & militibus & comæatu communierat, prætor in  
arcem recepto se ab Gallis magno animo defendebat. Galli cum  
triduum tormentis innumerabilibus arcem continenter uerbera-  
uissent; neque multum profecissent: accidit, ut ignis in cellam,  
qua tormentorum puluis asseruabatur, temere illatus omnem il-  
lam defendendæ arcis facultatem præfecto puncto tēporis ademe-  
rit. qua re milites perterriti se atque arcem & præfectum & præ-  
torem regi dederunt: ipsisq; est ea tantum conditione interpo-  
sita salus data. ciues autem ii Veneti duo iussi se ad mortem com-  
parare, à sacerdote Frâciscino precibus regi suppliciter adhibitis,  
(nam ei cum rege in Gallia familiaritas interceserat) uitam mo-  
do non amiserunt; atque in Galliam captiui missi sunt, in custo-  
diaq; diu habiti. Patuini cum uiderent remp. omnibus à parti-  
bus premi; concilio ciuitatis conuocato rogationem tulerunt, ut  
quingentæ auri libræ confestim exigenterentur, atque ad urbē mit-  
terentur; omniaq; se facturos ad eam iuuandam, quæ imperaren-  
tur,



tur, quæ ue ipsi per se cognoscerent profectura, legati statim legendi patribus renuntiarent. quæ res sane grata illis fuit; nõ tam quidem, quod ea magnopere leuarentur, quam propterea, quod exemplo aliis ciuitatibus esse poterant amanter se in remp. gerendi. at cum ad urbem uenisset Gasparis Seuerinatis scriba; exposuissetq; patribus, magna illum difficultate propter Iulii edictum ad uicinos Cremonæ oppidi fines se se unum in ueste pastoralis contulisse: nam suos equites secum adducere nequaquã potuisset: quæsissetq; quid illum facere patres uellent: responderunt; uti, quantum posset, ipsorum ad exercitum suum aduentum maturaret: statutum enim sibi esse, Liuiani equites ei tradere. ille uero sprete reip. conditione ad regem Galliæ postea se contulit rogatum, uti se Maximiliano commendaret; peteretq; ab illo, ut in Citadellæ principatum, quem pater suus obtinuerat, se restitueret: scire enim, nihil illi Maximilianum negaturum. Ferrariæ uero prodominus Aloisius Mula patribus significauit, clade exercitus reip. cognita, magnæ uoluptatis signa ciues illos misisse; plebemq; omnem uocibus procacioribus & tympanorum sonis lætam atque hilarem per oppidum cucurrisse: Alfonsum autem ducem, quem ipse adierit, nolle se tutum sua in urbe præstare; propterea quod dicat incitatæ plebis studia non posse contineri: itaque illi, ut discederet, suasisse: redire postea posse, cū belliferuor, & interdicti Iuliani acerbitas atque iniuria resederit. quibus rebus cognitis, Mula Senatusconsulto reuocatus medio e magistratu decedens domum rediit. Iamq; regi omnibus ferè populis se deditibus; quod à reip. copiis nullum eis præsidium afferebatur; Senatus iussit, uti milites ad decem millia, quo celerius fieri posset, conscriberentur; quorum tribuni centurionesq; partim à magistratibus in ciuitate, reliqui in castris legerentur: equites ad tria millia utriusque armaturæ conficerentur. ea postea res quod nullum propè habitura exitum in tanta rerum omnium perturbatione uidebatur: nam neque in urbe, qui uellent dare nomina, reperiiebantur: imperatoris autem & legatorum iussa uulgo despiciebantur: pleraque omnia priuatim administrabantur: patres ueriti breui fore, ut omnis Italiæ continentis pars, quam tenerent ipsi, à rep. deficeret: ad urbem tuendam, & comeatibus



classibusq; muniendā animum adiecerunt . confirmavit hoc eorū  
consilium cum Brixianorum ciuitas; quæ copias reip. intra oppi-  
dum recipere noluerat, quòd diceret nolle se ab exercitibus con-  
teri; satis sibi ipsos præsidio futuros: tum quòd intelligebant clas-  
sem à Ferdinando rege in Sicilia Calabrisq; esse comparatam,  
qua ab classe frumenti ad urbem conuectiones facile prohiberi  
posse uidebant, nisi resp. maiores ad resistendum opes obiecisset.  
itaq; latum, ut classi supplemētum adderetur; ut essent omnes ad  
triremes quinquaginta . ab annonæ quoque magistratu edicta  
sunt proposita; quibus frumenta facilius omnibus à locis ad urbē  
comportarentur. literaq; ad Cyprios data, ut, quātum maximum  
possent, frumenti numerum nauibus imponerent: nauesq; per  
plures ad eos missæ; ne nauigiorum indigentia conuectiones tar-  
darentur: imperatumq; , ut quæ ab insula naues sale onustæ iam  
soluissent, ubicunque essent, eius salis iacturam facerent, & in Cy-  
prum reuerterentur, frumentoq; complerentur . missæ etiam in  
Epirum cum mercatoribus, pretiaq; iis, qui adduxissent, amplio-  
ra lege facta. latum etiam, ut, quæ leges prohiberent, ne aduen-  
rum nauibus frumenta reliqui; commeatus Venetias afferren-  
tur, quo ciuium naues maiora lucra facerent; eæ leges abrogaren-  
tur, dum de bello decernatur, liceretq; quibuscunque hominibus  
suis cum nauibus commeatuum causa ad urbem sine anchora-  
rio accedere . Iisdem diebus Ferdinandi legatus patribus expo-  
suit, regis se literis in Hispaniam reuocari . qua de re coacto Se-  
natu lex est lata auertendi ab inferendo reip. bello eius regis cau-  
sa; ut legato Lauredanus princeps diceret; Senatui placere; quæ  
haberet in Apulia resp. oppida, regi oblatum iri: patres missu-  
ros, qui ea, cum uolet rex, eius ministris tradat. his cum manda-  
tis legatus postero die abiit. Alfonsi etiam legatus salutatis patri-  
bus domum rediit. his permoti rebus patres, & quòd exercitu  
redintegrando omnia eos deficiebāt; neque multum in Nicolao  
imperatore spei repositum diminutis eius copiis ad remp. tuen-  
dam habebant; rogationem iusserunt; ut certus homo ad Prospe-  
rum Columnam mitteretur: is in finibus regni Neapolitani tunc  
erat: qui ei nuntiaret; si reip. uelit præsto esse; Senatui ei nomē  
imperatorium cum stipendio auri librarum sexcentarum singu-  
lis



annis daturum: modo is equites mille ducentos secum adducat. rogare, uti & conditionē acciperet, & profectiōē, quātum posset, maturaret. Interim rex à Brixianis intra mœnia recipitur: arcibusq; duabus, quas ij dolo à præfectis interceperāt, suos ministros præficit. Sebastianus Iustinianus prætor, quod in oppidanos magna continentia & moderatione usus fuerat, cum unā cum reliquis magistratibus captiuus factus esset, publica ciuitatis cōmendatione à Rege libertati restitutus Gallorum comitatu in castra ad Legatos sese contulit. Cremenenses quidem cum oppidum haberent munitissimum, iam ante hos omnes Sonzini Benzonii eorum municipis turmæq; equitum reip. præfecti suasu in Gallorū partes transferant. nam cum in clade exercitus Grittus legatus, qui eō se recipere cogitauerat, Benzonium Cremam præcurrere iussisset, ciuitatiq; nuntiare bono animo ut esset; se iam iamq; affuturum, eiq; præsidio futurum: ille ad ciues suos aduolans, uti portas legato clauderent, neq; illum neq; quenquam Venetum intromitterent, oratione sua dedecoris perfidiæq; plena: & auctoritate, qua pollebat, perfecit. quibus intellectis rebus Imperator Legatiq; Pischeriæ, municipio in Mintii fluminis ripa, ubi è Benaco exit, posito, equitibus leuis armaturæ trecētis militibus nongentis ex itinere præsidio relictis Veronā se recipiunt; castrisq; in campo, qui appellatur Martius, ad muros oppidi positis rerum exitum expectare cōstituunt. omnes equitū ad quina millia milites mille quingentos redacti. nam quod rex edictum uulgauerat, omnes ex Gallia, quam ipse ceperat, qui reipub. militiam facerent, nisi ad suam quisque patriam X dierum spatio rediissent, eorum se bona publicaturum, atq; ipsos hostium loco habiturum: præter cætera plurimi eam ob rem etiam Legatis permittentibus discesserant. eorum aduentu sollicita ciuitas, ut plebs ad exercitum iuuandum pronior fieret, portorium frumento molédo exigi uetuit, quoad bellum esset confectum. Ad id ut Senatus uolūtas accederet, cum eadem ciuitas per Legatos petiisset: patres in eius gratiam portorium in omne tempus sustulerūt. Iisdem diebus templorum aliquot urbanorum sacerdotes edicti Iuliani metu, quo ijs omnibus aqua & igni interdicebatur, nisi è ditione reipub. recederent; atque in primis Georgiani; quorum est celeberr-



rimum in insula è regione comitij fanum ; cum suppellectili aurea argenteaq; Ferrariam, atq; in Mantuanum agrum profugerunt : ut urbs eo genere hominum penè destitueretur , ciuitasq; in primis rei diuinæ assueta magnam ex eo molestiā caperet . Antonii etiam Iustiniani literæ ex alpibus datæ Senatum certiores fecerunt , Tridenti Episcopum se audire noluisse ; quòd diceret, ab aqua & igni interdictorum sermonem atq; aditum esse defugiendum . itaque paucis post diebus cum nihil impetrare potuisset ; Senatus permissu domum redijt . Miserant in Flaminiam patres Ioannem Iacobum Carolium ; uti Rauēnam urbem, & Ceruiam, & Ariminum, & Fauentiæ arcem (nam oppidani se dederant ) reliquaq; Venetæ ditionis in Flaminia municipia abductis tormentis, receptisq; ijs , quos bello captiuos hostes fecerant, Senatus auctoritate Iulij ministris traderet . Ij cum fide scripto data se se & tormenta asportari permissuros , & captiuis libertatem donaturos , & præter hæc , quod erat primum atque maximum, uti è uestigio interdictum antiquaretur , curaturos , oppida ipsa recepissent : in nullo eorum , quæ pepigerant , perstiterunt , retentis tormentis , & captiuis Romam missis non ijs modo , qui bello capti fuerant ; sed illis quoque , qui præfecti oppidorum atque arcium illa ipsa pacate tradiderāt , ciuib; Venetis undecim ; quos in ipso negotio circumuentos in uincula coniecerant ; & interdicto non rescisso . ea Iulij fides , ea pietas in supplices fuit , atque omnino in illos eosdem , qui paulo antea Romæ , ut is Pontifex Maxi. fieret , omnes suas opes , omnem auctoritatem , gratiam , studia publice contulissent . Non absimili iniuriā Alfonso Ferrariensium dux Rodigianos apud Padum flumen positos ; quod oppidum bello Ferrariensi Veneti ceperant , atque ex pacis fœdere postea tenuerant ; parua manu eo adducta in ditionē recepit . qua intellecta re , Antonio Bragadeno prætori ; qui se in oppidi arcem intulerat ; patres per literas mandauerunt , ut tormentis abductis arcem duq; reliqua eius regionis municipia Alfonso restitueret . sed is , antequam ex ad eum literæ perferrentur , captus ab hostibus unā cū arce , Ferrariamq; perductus , paucis post mensibus in custodia interiit . Itemq; ad Sebastianum Maurum , qui cum decem & septem nauibus in Athesim missus fuerat , lite-



ræ sunt à Senatu datæ, ut in tutum se reciperet. is cum ab agrico-  
 lis in reditu ab utraque ripa omni telorum genere premeretur; ac  
 propter siccitates contractiore aqua minus se subducere celeriter  
 posset; eiectis aliquot in flumen tormētis grauioribus, incitatisq;  
 remigibus Bebiā rediit. At in superiore Padi fluminis ripa Cre-  
 monenses Gallis equitibus & militibus in oppidū admissis se se  
 regi tradiderunt. eoq; biduo nuntius ad Senatum uenit, Pische-  
 riam municipium rege oppugnante captū: milites oppidanosq;  
 ad unum cæsos: Andream Ripam arcis præfectum reſte ad arbo-  
 rem exanimatum fuiſſe. ea re audita Zacharias Lauredanus in  
 Benaco præfectus; ſimul quòd omnia eius lacus municipia par-  
 tim ad regem, partim ad Maximilianum deficiebant; trireme &  
 bireme, quibus præerat, incenſis unà cum ſuis omnib; hoſtibus  
 aduentantibus ſe ſubripuit. Patres ob hæc perſpecta difficultate,  
 quidquam in Gallia atque in Rhetis oppidorum retinendi; le-  
 gatis mandarunt, ut in agrum Patauinum exercitum reducerent:  
 Veronenſibusq; permiſerunt; ſi Maximilianus ad eos mitteret,  
 qui uti ſe dederent poſtularet; ne recuſarent. Cumq; Tauriſani tu-  
 multu ciuitatis & plebis excitato, plerisq; non idem ſentientibus,  
 per legatos, quid ſe uellent patres facere, à Senatu petiſſent: id  
 unum quod còducere ſibi ipſi exiſtimarent, legatis reſponderūt.  
 ſcripſere etiam ad ſuos in Carnis atque Iſtris magiſtratus; ut quæ  
 oppida ſuperiore anno è Maximiliani ditione reſpub. ceperat,  
 ea omnia, armamentiſ; com meatibusq; publicis abductis, regiis  
 petentibus miniſtris reſtituerent. poſtremo; quòd ab ea cogita-  
 tione non longiſſime aberant, ut urbi quoque ipſi timendum pu-  
 tarent, docti à præſentibus rebus, quantam reip. diuturnitas & in-  
 crementum in ſe unos omnium regum inuidiã atque odium con-  
 citauifſet: X uiri duodecim legerunt ciues dignitate præditos,  
 qui uada urbana atque littora adhibitis eius rei peritis homini-  
 bus diligenter inſpicerent; ut aditus, ſi qui eſſent apertiores, ca-  
 ſtellis munirentur. Tum auctus operarum publicarum numerus:  
 ſuſſumq; ut omnes inſulas & domos uicorum magiſtri perlustra-  
 rent: quantaq; eſſet in urbe aduenarum multitudo, quanta armo-  
 rum priuatim ab his comparatio, cognoscerent. edictumq; pœ-  
 na capitis propoſitum, ne quis armatus incederet. uigiliãq; no-



ctu uicatim & præfecti cū militibus dispositi; ne quis temere tumultus exoriri posset. etiam lex lata; ut triremes octo urbis præsidio armarentur. missusq; multo maximus frumenti numerus ab annonæ magistratu ad molas farinarias in Taurisanos fines domi molitus adseruandus: ne si cæ ab hostibus molæ interceptæ rentur, ciuitas farina inopia laboraret. molæq; aliquot, quas naues sustinebant, è Pado Athesiq; ad urbem perductæ: cogitarūq; ut molæ aliæ, quas uertere uentus quiret, in suburbanis insulis fabricarentur: puteiq; per plures in portus littore foderentur; ut, si à fluminibus aqua propter hostes circumfusos peti non posset; iis puteis ciuitas uteretur. missi etiam publice lecti ciues ad arborum in Medoaci ripis cædendam, atque ad urbem deuehendam: ut materia ciuibus ad munitiones in propugnatione suppeteret; & hostibus ad oppugnandam, uel obsidendam urbem deficeret. Dum hæc domi administrantur; Vicetini cum intellexissent Veronæ se urbem Maximiliano dedisse; omniaq; in alpiibus castella, & municipia eius ciuitatis præiudicium secuta idem fecisse: neque à Senatu impedirentur; quo minus consilium pro tempore & pro necessitate caperent: ad Leonardum Trissinum ciuem suum; quem Veneti exulem fecerant; quiq; à Maximiliano præmissus in eorum fines se intulerat; miserunt; se paratos esse dedicationem facere. cumq; is ad oppidum paucis cum militibus accessisset; certis conditionibus interpositis se se regi dediderunt. Patauini autem; quorum erant nonnulli ciues, qui rebus nouis magnopere studebant; coactis inter se priuatim conciliis eidem se regi dedere statuerunt. itaque magistratibus primum quidem nolle se exercitum, qui aduentabat, intra mœnia recipere denuntiauerunt: portasq; ipsi eiectionis, qui in statione erant, tenuerunt. deinde, ut abirent domum, neque plebis impetum expectarent, eos monuerunt. postremo agrestes homines armatos in oppidum introduxerunt; ut illi Senatu primo iubente, post etiam nolente discedere cogerentur. quamobrem patrum iussu exercitus Pataviū prætergressus, & ponte in Medoaco decem millia passuum supra eum locum, ubi munitione ad naues transportandas à maris aqua flumen discluditur, nauibus imposito traductus atque ad Mestre municipium progressus ibi castris positus substitit. Patauini ad



Leonardum Trissinum missis interpretibus ei Patauium cum honesto comitatu uenienti se tradiderunt, imperataq; fecerunt. Interea cum Roma literæ ab Grimano, & Cornelio patribus significauissent: nisi nouam legationem ad Iulium misissent, nihil spei esse illum à sua in remp. pertinacia recessurum: Senatus sex legatos creauit ex principibus ciuitatis Dominicū Triuisanum, Leonardum Mocenicum, Paulum Pisanum, Hieronymum Donatum, Paulum Capellum, Aloisium Maripetrum; qui Romam proficiscerentur; ab Iulioq; peterent, ut ea, quæ reipub. polliciti eius ministri fuerant, repræsentaret. quibus de rebus nonnulli ex ciuib. dolore affecti in eos, qui Senatum regebant, uoces plenas querelarum priuatim iaciebant, fortasse non percipientes huiusmodi decreta bonis rationibus facta esse, ac ne populi, qui Reipu. parerent, eorumq; urbes, & regiones hostium prædæ exposita essent, quorum uiribus impetuiq; eo tempore cedere è re omnium esse uidebatur: lætioresq; fortunam expectandam: ea flante, recipi tunc posse, quæ uitandarum populationum causa defereretur, quemadmodum Diis bene fauentibus euenisse postea compertum est. hi igitur, qui non satis probe rem intelligerent, querelas graues, amarasq; aduersus eos, qui ciuitatem regebant, spargere, non adeo timide rempub. administrari oportuisse, non tot egregia oppida tradi hostibus ita facile debuisse: neque enim maiores nostros tantis impensis, tot exercitibus, tantis suis laboribus, & sanguine, tot annorum longinquitate ea imperio adiecisse, ut paucis post diebus sponte amitterentur: errare qui mitiores futuros hostes crederent, propterea quòd Resp. tam facilis in illos fuerit, ut quæ nulla certa cum spe, maximisq; sumptibus bello agere statuerant, pacate ab iis propeq; nictu oculi sint confecta: augeri potius ea re eorum audaciam, quòd debilio rem multo ad resistendum armis Rempubicam offenderint, quàm putarant: itaque inuitari eos iam, alliciq; tanta confecti belli celeritate ad maiora appetenda; id effectum esse huiusmodi decretis formidine plenis, ut uereri amplius, & peiora præteritis timere nunc cogantur. quòd si regi Gallorum propter exercitum uictorem cedendum fuit: quanquam si maiorum pristina uirtus in uiuētium ciuium animis resedisset, nō is tam propitios habuisset.



set sanè Deos : quid attinuit , uel Maximiliano nullos exercitus  
contra Rempub. mittenti tot oppida ultro dedisse : uel Iulii exer-  
citum , antequam ille pactis stetisset , reip. oppida in Flaminia , fir-  
mata munitionibus , propugnatoribusq; , recepisse : nunc etiam  
legatos esse ad illum Romam mittendos , ut & ab rep. suppliciter  
adiri se permittat , & interdictum abrogare uelit . hæc , & his simi-  
lia cum iactarentur , una Mathei Prioli sententia , quam in Sena-  
tu dixerat , à prudentioribus repetebatur , atque iis opponebatur .  
ea erat eiusmodi . quemadmodum gubernatores boni atque in-  
dustrii solent ; qui cum uim tempestatis ferre nequeunt , naufra-  
giisq; periculum propter mercium , quas in naui habent , pondus  
grauitatemq; imminet , iacturam partis earum faciunt , ut , naui è  
fluctibus emergente , ipsam reliquasq; res , & uitâ unâ suam tuean-  
tur : sic in reip. turbulentis his temporibus fuisse faciendum ; ut ,  
quando eius exercitu fortunæ magis turbine quàm telis hominû  
disiecto , populi municipiaq; omnia , quibus præsidia mitti non po-  
terant , arma hostium timerent , dederent ipsi per se patres , trade-  
rentq; illis ea , quæ captui essent propiora atq; opportuniora ; ut ea  
re illorû cursum atque impetû sisterent , potius quàm frustra suas  
uires iam infractas opposcentes , tamen illa ipsa unâ cum libertate  
imperii amitteret . inter hos sermones & querelas legati a Foro iu-  
liensibus ad Senatum uenerunt auxilium rogatum , quo se tueri ,  
si quid hostes molirètur , & bellum propulsare possent : uelle enim  
omnes à reip. imperio non recedere . ad quos Epirotarum equi-  
tum turmam militesq; ab exercitu legati patrum iussu statim mi-  
serunt . idem Iustinopolitanis postulantis milites trecenti sunt  
ad eos missi , equitesq; centum quinquaginta , qui illis diebus ab  
Epiro uenerant . Reque exercitui ad Mestre municipium data , li-  
bras auri septingentas à Quæstoribus urbanis Senatus legatis cu-  
rari iussit : utq; ii recognito copiarû omnium numero , stipendioq;  
eis dato , quas esse idoneas ad bellum gerendum , & uirtute ac fi-  
de præditas cognoscerent , eas omnes retinerent , reliquas dimit-  
terent , imperauit . triremes quoque uti quatuor in Illyrico ar-  
marentur ; cura est à magistratibus adhibita , Crepsa uidelicet ,  
Aschriuio , Iadera , Pharo . itaque & naues uacuas cum arma-  
mentis , & stipendiû , & præfecti eò ab urbe missi . atin naualibus  
nulla



nulla cessatio fiebat. materia undiq; conuecta importabatur. trire-  
 mes nouæ biremesq; instituebantur: ueteres reficiebantur: nau-  
 gia humiliora uiginti tormentis per uada ferēdis ædificabantur:  
 cratesq; ex malis nauium contexebantur: scaphæ cum festucis ad  
 palos in æstuariis figendos, qui munitiones sustinerent, accelera-  
 bantur: ipsa ex ære fusili tormenta magno numero, armamenta  
 omnis generis, tela omnia parabantur: fabri, qui suppetere, ex  
 urbis officinis priuatisq; naualibus accersebātur: etiam machina-  
 tiones ad molas frumentarias uertendas inchoatæ plurimæ perfici-  
 ebantur. in his agendis ab omnibus diligenter administraba-  
 tur: ut ne festis quidem diebus quicquam eorum intermitterent.  
 Bassiano Maximiliani interpretibus tradito, Scala in alpibus ca-  
 stellum, quod Federicus Michael præfectus timore animi incu-  
 stoditum reliquerat, Regis insignia sustulit. quod ubi Feltrini co-  
 gnouerunt: prætorum ipsorum Federico Mauroceno item profe-  
 cto, ne diriperentur, idem fecerunt. Senatus certior factus Tau-  
 risanorum ciuitatem præter paucos, qui Maximiliani partes se-  
 quebantur; in officio cum rep. uelle esse; literas ad eos dedit; qui-  
 bus literis immunitas omnium rerum annos quindecim ciuitati  
 dabatur; portoriumq; frumento molendo remouebatur. iis re-  
 bus cognitis ciues plebsq; omnis in primis magna uoluptate affe-  
 cti ad propugnandum summo se studio confirmauerunt. quam  
 eorum uoluntatem Petrus Duodus legatus; quem Senatus Vero-  
 na Vicetiaq; abeuntem eò miserat; magnopere auxit, tabulis, in  
 quibus fisci rationes & ciuium reliqua erant scripta, publice abo-  
 litis, atque in foro plebe aspectante igni absumptis. pauloq; post  
 milites quingenti ab exercitu Senatus iussu ad eos præsidio missi,  
 cupidissimis omnibus in oppidum recepti sunt. quod autem etiā  
 Ciuidale Belunianum Maximiliano nolle se tradere perseuera-  
 bat; cumq; rep. omnes casus experiri statuerat: Senatus consul-  
 tum factum est; uti Epirotæ equites ducenti Paulo Contareno  
 præfecto Ciuidale mitterentur. non tanta in rep. cuius stipen-  
 dia faciebat, uirtute ac fide Pandulfus Malatesta est usus: qui non  
 salutatis legatis Cittadellam profectus in partes Maximiliani se  
 setranstulit. Alfonsus autem Ferrariensium dux Ateste municipio,  
 à quo antiquitus originem ducebat, quodq; abest Patauio



passuum millia quindecim; in suam potestatem redacto, omnibus probris rempub. afficere est aggressus, eius insignibus è foro aliisque locis fœde abreptis, & fundis domibusque Venetorum civium sub hasta positis. idem tamen haud ita multo post; quod ab Gal-  
lis suo ipse regno timuisset; eiusque rei suspicio sermonesque non in-  
fimorum hominum in vulgus emanauerant: quas sui milites do-  
mos Venetorum civium Rodigii atque Ateste diripuerant, atque  
diruerant; eæ uti publice restituerentur, imperavit: literasque à  
domesticis suis dari ad amicos, quos in urbe habebant, voluit:  
quibus literis certiores eos facerent; Alphonsum ducem, quæ in  
Venetos hostiliter egisset, timore Gallorum coactum atque inuitum  
fecisse: animo autem esse in remp. uti semper fuerit, amico; de-  
aduersis eius rebus molestiam capere: quod sciret, detrimenta  
reip. in uniuersam esse Italiam atque in omnes bonos breui reca-  
sura. Miserat ad regem Galliarum Senatus unum ex iis, qui captiui  
ab exercitu reip. Caruagio recuperato facti, Venetiasque perdu-  
cti fuerant; ut cum rege ageret; ut, si uellet suos omnes dimitti,  
unum Liuium restitueret. is ab rege tum redierat cum manda-  
tis eiusmodi; ut certos ciues Venetos, & Tribunos, ac præfectos  
ex captiuorum, quos habebat, numero pro suis se dimissurum  
rex diceret; de Liuiano nullam se conditionem accepturum con-  
firmaret. aiebat is etiam, in eo, quem secum rex habuerat, sermo-  
ne regem sibi dixisse, singularem in prælio Venetorum militum  
fuisse uirtutem: quam si equites præstitissent; pelli se, atque supe-  
rari paruo negotio potuisse: aut etiam, si à pugna Veneti paucos se  
dies continuissent, futurum fuisse, ut ipse non sine ignominia  
Mediolanum recederet: magno enim timore multo maximam sui  
exercitus partem perculsam à dimicatione abhorruisse. Citolus  
quoque Perusinus tribunus militum ab iis, qui cum in pugna  
multis uulneribus penè confectum ceperant, numis traditis di-  
missus secundo Padi flumine ad urbem uenit. quem quidem pa-  
tres omni studio curari mandauerunt: neque dum enim uulne-  
ra coaluerant. huius de prælio sermo apud Lauredanum habitus  
cum sermone Galli congruebat: Gallos pugnae initio fugam se se  
dare decreuisse: idque futurum sine dubio fuisse, non modo si Ve-  
neti equites, uti debuerant, depugnaissent; sed omnino etiam,  
si se



si se loco non mouissent: eorum temere fuga cœpta fieri, hostes e-  
tentos se confirmauisse; atque ita non tam ulla sua uirtute, quàm  
ingenti equitatus Veneti formidine atque perfidia uicisse. at Se-  
natus ea, quam supra commemorauimus, de captiuis accepta  
conditione, quos habebat ex Gallis, regi restituit: atq; ille, quos  
pollicitus fuerat, ex Venetis missos fecit: in quibus Naldius,  
Braccius, Vitellius fuerant. patres interea cum statuissent reipu.  
exercitum esse omni cura atq; impensa retinendum; & quòd eius  
missis ad Taurisanos, & Belunienfes præsidis decreuerat, esse re-  
ponendum: centurionibus non paucis; qui post prælium è Gal-  
lia, quiq; post restituta Iulio oppida è Flaminia redierant; uti no-  
uos milites conscriberent, mandauerunt. uerum enimuero, pro-  
pterea quòd magna ciuium parte in tributa non conferente pecu-  
nia eos deficiebat; X uirum decreto decem ciues lecti sunt; qui  
exigendæ pecuniæ omni cum potestate atque imperio præessent:  
eosq; qui maiori eorum parti soluendo esse latis suffragiis cen-  
ferentur, modis omnibus cogerent ad stipem conferendam: in re-  
liquos mitius quidem agerent; aliquid omnino tamen etiam ab  
iis consequerentur. atque ii peracto magistratu, qui quidem esset  
annuus; quo tempore Senatoriam dignitatem exercere eis lice-  
ret; annum alterum in Senatu essent. eaq; re pecuniæ postea exi-  
gendæ ratio patribus aliquanto faciliior atque explicatior fuit. Ro-  
gauerant illis diebus demississime Antonii Grimani exulis liberi  
Bernardum Bembum patrem meum, Marinum Iustinianum,  
Aloisium Gradonicum triumuiros ex aduocatis reip. uellent ob  
reliqua totius patris sui uitæ in remp. officia & studia eum ciuita-  
ti aliquando tandem restituere: ut, qui esset iam conclamata sene-  
ctute, in patria saltem sepeliri sua posset. quam quidem rem ad-  
iuuabant Dominici Cardinalis adhibitæ Iulio pro repu. assiduæ  
diligentissimæq; preces: tamen adhuc quidem propter naturæ  
illius illiberalitatem atque inclemetiam parum profuissent. tum  
perturbatis atq; adeo tãtopere inclinatis ciuitatis rebus ad lenita-  
tem dari se se, profecto æquissimū magistratibus uidebatur. itaq;  
triumuiris legem maioribus comitiis ferentibus ante diem deci-  
mum quintum calendarum Quintilium Antonius ab exilio fre-  
quētib; sententiis reuocatus, reiq; pup. restitutus paucos post dies



Roma, ubi aliquot annos fuerat, domum rediit: cum illum patres etiam nunc absentem in VI uirum, qui remp. in Senatu procurant, collegium pluribus quàm ceteros suffragiis adoptauissent. de legatis à Senatu lectis, qui ad se uenirent, & nuntium Iulius lato animo accepisse præ se tulit: & literas de ea re ad Aloisium, & Maximilianum statim dedit: quibus literis eos certiores faciebat, uelle se remp. in eam, quæ ante bellum secum intercedebat, necessitudinē beniuolentiamq; recipere. id autem ea de causa scire eos uoluit; ne quid amplius contra illam cogitarent; sibi ipse suisq; rebus, si ii remp. oppressissent, posse idem accidere nō temere existimans. quod si id minus erat extimescendum: omnino se coactum iri imperata eorum facere, subactis deletisq; Venetis, pro explorato ducebat. Senatui autem per Dominicum & Marcum Cardinales significauit; ubi legati Romam uenissent, se interdictum remoturum. quam ob rem à Senatu iussi sunt naues triremes quamprimum conscendere, Anconamq; proficisci, ut Flaminiam euitarent, quam respu. turpiter amiserat. At apud Mestre Cornelius legatus certior factus in Taurisanis ciuibuscum se non nullos, qui tum quoque nouis rebus studerent; eò cum quingētis equitibus Epirotis profectus duodecim eorum in uincula coniectos ad X. uirum collegium misit: munireq; oppidum instituit. pauloq; post ex tribus legatis, qui erant in exercitu, Gritto, Cornelio, Mauro, Cornelius à Senatu reuocatus domum rediit. Concupiuerat Aloisius rex Maximilianum regem alloqui; ut illum in remp. accenderet. ualde enim deliberatum ei erat, quidquid esset reliqui ex reipub. ditione in continente, urbemq; ipsam, si res procederet, capere. id autem sine Maximiliani uoluntate quibus posset modis, quibus artibus consequi, non uidebat. itaq; ut hoc illi persuadere coram posset; suum interpretem Cardinalem Rotomagensē Tridentum ad illum misit; qui ab eo peteret, ut de magnis utriusque rebus colloqui secum uellet. tempus & locum ipse diceret: se, qua die, quoq; loco uellet congređi, ad illum uenturum. Maximilianus; qui neque hominem amaret, & maiorem ac potentiorē nollet fieri; satisq; haberet, quæ resp. superiore anno ditionis suæ oppida ceperat, sibi restitui, & se præter hæc Verona, Vicetia, Patauio esse potitum: cum, quam



quam ob rem colloquium peteretur, haud dubie cognosceret; fidei quibusdam abeundi causis, colloquio euitato interius in regnum se recepit: perq; suum legatum questus apud Aloisium est, pagos non nullos & municipia in Veronæ finibus, quæ ad se spectarent, illum occupauisse. quibus intellectis rebus Aloisius, Pischeria, quam munire cœperat, discedens in Brixianos fines rediit. Cremonæ interim arx militum, qui in ea erant, scelere atque perfidia Gallis deditur, Aloisio Mula, Zacharia Contarino urbis pratoribus, Sebastiano Maripetro quæstore, qui in eâ se receperant; Marco Lauredano, Andrea Dandulo arcis præfidei in prædam hostibus traditis, Mediolanumq; abductis. quæ sanè res magno dolori ciuitati fuit. nemo enim uerebatur, quin omnem Gallorum impetum & obsidionem, si modo uiri essent, quamdiutissime sustinere potuissent. ea capta rex Cremonam se contulit. Illis diebus quod uenerant Bassianum milites è Germania quatuor mille: id autem est oppidum in Medoaci ripa sub alpium iugis; abestq; Patauio passuum millia uiginti quatuor: Maurus legatus cum parte exercitus in Taurisanos fines profectus ea loca tutiora, & quietiora reddidit. Aloisius Cremonæ dies paucos moratus, cum ibi Triultium oppidi præsidio reliquisset; Galeatium Palauicinum Brixiam, Antonium Mariam eius fratrem Bergomum, Palitiæ principem Cremam mississet; Mediolanum redijt. Iulius Aloisio profecto, exercituq; eius prope dimisso, nihil iam grauius ab illo metuens, neque Maximilianum per se se magnum quidquam atq; arduum contra remp. ausurum existimans; per Dominicum Grimanum suadere Senatui cœpit, ut Taurisum, & Forum Iulij; quæ duo quidem oppida ex fœdere, quod is cum Aloisio percusserat, ad illum spectarent; pacate ac lubentes ei traderent, potiusquam bello atque inuiti paulo post amitteret tamen. id an propterea sit aggressus, quod cuperet nihil reip. reliqui in continenti esse, ne uires ad illa recuperanda, quæ ipse ex eius ditione in Flaminia ceperat, redintegrare posset; an ut Italiæ cladibus ea re finis imponeretur, quo facilius bellum in Thracas, perdū illud quidem cogitatum, atque adeo sermonibus agitatū, unanimi omnium regum consensu opibusq; sumi posset; quod unum præ se ferebat: quia nobis nihil liquet, in ambiguo



relinquimus . sed omnino patribus molestissima ea Iulii suasio  
fuit: qui sæpius iam, qua uia eorum oppidorum, quæ Maximili-  
ano se dediderant, recuperari aliquod posset; quã ut ex iis, quæ  
haberent in continente reliqua, quicquam ei traderent, cogita-  
bant . itaque legatis; qui Anconam classe appulsa iter Romam  
pedibus faciebant; scripserunt: darent operam, cum ad urbem  
essent, mandataq; reip. confecissent; ut ab ea cogitatione Iulium  
abducerent. Ioannes interim Baduarius, Georgius Pisanus; qui  
legati Romæ fuerant; domum redierunt . patres cum ab Gritto  
intellexissent, propter Maximiliani milites, qui Bassianum uene-  
rant, aliosq; permultos, qui pluribus in alpium municipiis ciui-  
tatibusq; cogebantur; atque ipsum in primis Maximilianum;  
quem cum exercitu Feltriæ appropinquare nuntii uenerant; tur-  
tius futurum, si copiæ reipu. Taurisum ducerentur: ita uti fieret,  
censuerunt. præmissiq; Taurisum sunt uirtute & fide præditi ac pro-  
bati patribus uiri è plebe tres cum suis quisque militibus; qui tri-  
bus oppidi portis præessent; easq; ad omnes casus custodirét. Ad  
Castellum nouum autem; quod est in alpibus supra Taurisanos  
fines in regione Querio appellata, natura & artificio communi-  
tum; milites Germani cum uenissent, & tormentis murum quat-  
tere cœpissent; atq; Andreas Rimundius præfectus, qui eum locum  
sibi tuendum à Senatu sumpserat, turpiter se fugæ mandauisset;  
castello sunt potiti. Maximilianus Feltriam uenit . ea re ad Mau-  
rum legatum per ciues Patauinos amicos reip. confestim delata;  
qui illi magnum esse Germanorum militum cum rege numerum  
significauerant; Maurus nocte intempesta omni cum ea manu,  
quam habebat, ad imperatorem, qui Mestre non dum abierat, se  
recepit: castellumq; Fracum, quo in municipio erat Maurus, regi  
se è uestigio tradidit. his interiectis diebus dato ab omnibus iure  
iurando se in fide atque officio cum repu. futuros, exercitus Mes-  
tre eductus, Taurisumq; perductus est. quò tubicen Maximilia-  
ni uenerat, petens ut regi se oppidani traderét; nisi diripi atque in-  
terfici mallent. ei consulto Senatu ab legatis est respõsum datum;  
uelle se oppidum tueri reip. atque in eo ciues omnes consensisse:  
neque dirptionis aut mortis metu absterri posse, ne fidem præ-  
stent, quam semel pepigerunt: uirtuti nullã uim fieri: nullum in-  
cui



cuti timorem iis, qui honeste occumbere, quàm turpiter uiuere satius atq; prius putant. iisdem legatis deinde certioribus factis hostium copias ad Citadellam conuenire: ut in illas impetum faceret, Gritius Tauriso cum Leonardo Apulo cumq; Epirotis equitibus ad uicina ei municipio loca se se contulit. Andreas interim Fuscus; qui Byzantii reip. negotia procurabat; patres facit per literas certiores; clade reip. cognita Regem Thracium sibi ostendisse, magnam se ex ea re molestiam accepisse: questum etiam apud illum fuisse, quòd non secum de hostium consiliis apparatusq; communicarit, atq; auxilium in tempore petierit: quod quoniam factum non sit; suas nunc opes terra mariq; amico se animo atque beniuolo reipub. polliceri: petere, ut id quamprimum Lauredano principi significet. uix eæ literæ in Senatu recitatae sunt; cum ab legatis Roma item literæ perferuntur: in quibus erat scriptum: ubi ipsi ad urbem appropinquauissent; misisse Iulium, qui diceret, uelle se eos Romam noctu ingredi sine ulla obuiam itione ciuitatis; neque ei sacra ministrari, quoad se conuenerint: ipsum autem Iulium statim se Hostiam contulisse, ut illi interim in contemptu & squallore diutius manerent: cum autem is ad urbem aliquot post dies rediisset; uno ex legatis Hieronymo Donato ad se uocato ostendisse; placere sibi, uti fœderis, quod Cameraci percussus sit, capita omnia impleantur: si Taurisum Forumq; Iulii resp. Maximiliano tradiderit: si iuri, quod in Ferrariæ urbis dominatu, quodq; in sinu Adriatico habeat, portorii ab omnibus, qui eo mari nauigent, Venetiis soluendi renuntiarit: si sacerdotia non modo prouincialia, sed etiam urbana Pontificibus max. remiserit, ipsa nullam eorum partem tributis exigendis interceperit: si se in ipsum deliquisse falsa fuerit; eiusq; rei ueniam subiectissime petierit: tum se interdictum remoturum: eorum si quid facere Senatus recusat; suas se copias Maximiliano traditurum; regemq; Galliæ idem facturum; ut is remp. opprimat. adiunxisse autem eam rem totam eiusdem regis Galliæ magnopere legatos: qui ab Iulio diligentissime petierant; ne ad se legatos Venetos admitteret; ne ue interdictum aboleret, aut remp. subleuari pateretur: ita enim illum reliquis Italis principibus, & regū cæterorum omnium animis & cupiditatibus ar-



bitratu suo moderaturum, si reip. non frenum modo, sed etiam  
iunctura inieciſſet. his recitatis literis nullus ordo in Senatu fuit,  
qui non Iulium omnibus probris, & maledictis fuerit proſecu-  
tus: nemo, qui non ſe ipſe magnopere damnauerit, quod legem  
de legatis ad illum mittendis ſuo ſuffragio comprobarit: ea lege  
ſex ciuitatis principes reliquis ciuibus, qui captiui contra fas, con-  
tra pactiones, contra fidem datam Romæ ſint, adiectos in reip.  
ludibrium, Iulij iracundiæ traditos: itaque omnes magiſtratus ira  
indignationeque ardere: reliquos fremere, atque in illos inuehi: ne  
minem proſecto ſcire iam, quid agi, quid tentari oporteat. unus  
Laurentius Lauredanus, Leonardi principis filius, clara uoce, cur  
non, inquit, ad regem Thracium, qui nobis ſe ſe obtulit, lega-  
tos ſtatim mittimus auxilium contra iſtum non Pontificem max.  
ſed carnificem omni crudelitate præditum imploratum? Hac à ple-  
riſque ſententia probata, nonnullis mitius & temperatius agendum  
ſtatuentibus, neque ſine conſiliorum reperto, iuſſis patribus ea  
in re diligenter cogitare quid præſtaret, Senatus dimittitur. at in  
Carnis oppido Sacilio ab hoſtibus, qui primo id impetu cepe-  
rant, ciuitate eos expellente recuperato, Ioannes Vitturius ciuis  
egregia uirtute à patribus ſtatim præſidio cum militibus & equiti-  
bus eſt illò miſſus. ab Gritto etiam legato Franciſcus Beraldius  
Patauinus equitum reipub. centum quinquaginta præfectus, qui  
ad hoſtes perſeuerat, aliique item præfecti equitum tres, quorum  
erat unus Buſichii Epirotæ fratris filius, capti ad urbem in cuſto-  
dia perducuntur. nam cum Epirotæ propè trecenti ab legato præ-  
miſſi hoſtibus, qui Cittadella exierant, appropinquauiſſent: fuga  
ſimulata in apertos ante uillam Cornelianam campos & planitiæ  
eos pertraxerunt, tum repente conuerſis equis, impetuque in illos  
facto, quinquaginta ex iis interfecerunt: ſexaginta captiuos fece-  
runt. duces reliqui Mercurius Bua, Ranerius Saxeta, Pandulſus  
Malateſta fugere perſeuerantes ſe in tutum receperunt. his rebus  
agitatis, propterea quod ab amicis reip. patres cognouerant, Ma-  
ximilianum cupere; ut Senatus ciuem aliquem ad ſe mitteret, qui  
cum agere de cūmunibus utriusque rebus poſſet: Aloſium Mo-  
cenicum, unum ex quinque uiris Senatu regendo legerunt, qui ad  
illum proficiſceretur. literæ quoque ad eos, qui creandi Roma-  
norum



norum imperatorem ius habent; tum ad liberas Germaniæ ciuitates data sunt: quibus literis Senatus petebat; ne Maximilianum fruire contra rempub. quæ in illum tam liberalis fuisset, ulterius permitterent. neque tamen propter hæc intermittebant patres in eam cogitationem incumbere; ut Patauium, quod planè oppidum ante oculos esset ciuitatis, improuiso magis & repentino incursu, quàm aperto bello recuperarent. accendebat eorum animos illorum magnopere auaritia, qui Patauium regebant: quòd nulli Venetorum ciuium, qui in eo agro fundos possessionesq; habebant, qui quidem erant plurimi, fructus suos euehendi facultas ab iis permittebatur. sed ipsi eos inter se pro libidine distrahebant. multa in oppido insulæ, domusq; quas iure & more maiorum priuatim Veneti ab oppidanis emerant, aut ipsi ædificauerant, ab illis direptæ possidebantur. multa prædia uillæq; alienissimis hominibus uulgo donabantur. itaque patres antequam ad alia descenderent, Franciscum Capellum, quem quidem uirum Leonardus Trissinus, de quo supra commemorauimus, quòd in legatione Gallica aliquot ante annos in eius comitatu adolescens fuerat, locumq; apud illum penè filii obtinuerat, magno cultu prosequabatur; Patauium miserunt ad speciem; ut legatus ad Maximilianum proficisceretur; re, ut Leonardum conueniret, eiq; polliceretur; si Patauium reip. restituat, exilii se legem rescissuros: tum ei liberis, posterisq; ius ciuitatem, & eius comitiorum, & Cittadellam municipium, quod Pandulfus Malatesta prodicione amiserat, cumq; iis præfecturam ipsi equitum ducentorum rep. dono daturam. Capellus Patauium subuectus, dum oppidum ingreditur, cognitus ab iis, qui portam custodiebant, ab oppidanisq; retentus alloqui Trissinum secreto non potuit. cumq; se apud eos legationis iure defendere; suffragiis egerunt, num illum interficere, quòd Patauium furtim uenisset; an domum remittere deberent, quòd legati munere fungeretur. octo erant ex nobilitate ciues, octo ex plebe, qui suffragium ferebant. septem ex iis Capellum condénauerunt, nouem absoluerunt. ita in magno uitæ periculo à fortuna uersatus, tantuloq; discrimine sententiarum ab eadem seruatus, multis ab ciuibus pro eius dignitate ac nomine ad oppidi portam, qua uenerat, flumenq; perductus con-



scendit, ad urbemq; rediit. patres eo consilio depulsi ad aliam  
se cogitationem conuerterunt. nam quod erant eo in oppido ci-  
ues duo Centurionis reip. fratres; quibus ambobus cum portæ  
oppidi præfecto summa necessitudo intercedebat: petiit ab iis  
per occultos internuntios Centurio; darent operam, ut ea porta  
legato reipub. aperiretur. re complures dies agitata cum demum  
inter ipsos conuenisset: Aloisius Molinus Quinque uir Senatu  
regendo patribus proposuit, tantas hostium iniurias ulterius non  
esse perferendas: sperare se se atque confidere; si Patauium exer-  
citus de improviso mittatur; ciuibus iis portam tradentibus, qui  
se reipub. obtulerunt, oppidum capi facile posse: neque enim sa-  
tis esse communitum: itaque ad Gritum legatum scribi oportere;  
ut eam rem quamprimum suscipiat. ad ea Lauredanus prin-  
ceps, uideri sibi periculosum, respondit, Aloisio rege Galliarum rei-  
p. neruis ac sanguini magnopere imminente; Iulio Pont. max.  
ad ciuitatis perniciem atque interitum omnia moliente; Maximi-  
liano mediis in imperii finibus uisceribusq; crassante; Ferdinan-  
do Hispaniarum rege, quasi quarto scriptis tabulis hærede, in pos-  
sessiones reip. se inferente; Patauium uelle recipere: quam qui-  
dem paulo ante urbem unam cum aliis plerisque oppidis & municipiis,  
ut huius belli tempestatem à suo capite auerteret, Senatus  
Maximiliano, tanquam de manu, tradidit: ualde enim se time-  
re, id si fit, ne hostes reip. qui ea Senatus liberalitate uicti nihil  
ultra propè cogitant, magnam redintegrandi belli causam se ha-  
bere statuentes iterum in remp. uniuersi conuertantur; neque Pa-  
tauium modo breui recipiant; sed reliquam imperii partem, quæ  
in continente est, etiam suam faciant: nam uires ad eos repellen-  
dos reip. suppeditaturas, neminem tam stultum esse, qui sperare  
audeat: neq; esse credendum; qui pares illis integri non fuerint,  
fractos ac debilitatos superiores fore: ciuium priuatim iacturam,  
qui fructus suorum prædiorum in agro Patauino amittant, tantam  
non esse; ut remp. periclitari malint; si amantes patriæ sint: quod  
si alia mens eorum est; non esse in ciuium habendos loco; qui rem-  
p. sua potiore charioremq; non habeant: maiores ipsorum  
opes suas maritimis auxisse rebus, atque imperium longe lateq;  
ea tantum ratione promouisse: si ad illum unum maris exercen-  
di



di morem atque consuetudinem redeundum sit; bene cum ipsis fortunam agere, omnes recte sentientes existimaturos: quod quæ artes imperio constituendo profuerunt; eisdem etiam usquequæque uel crescat propageturq; artibus imperium, uel optime tutissimèq; retineatur: cum ea ita se habeant; tamen Taurisum Forumq; Iulii adhuc quidem in reip. ditione contineri: ea ne amittantur, magis prouidendum ipsis esse, quàm ut aliquid acquiratur: id autem facile fieri moderatione; si iis contenti sint: neminem enim iam reipu. magnopere inuidere illam partem. quod si Patauium receperint; uerendum in primis esse: dicat ne, an sileat? sed non silebit, quæ præuisa omnibus multumq; cogitata debent esse: ne, cū fines in continente reliquos amiserint, urbs quoque ipsa parens alrixq; ciuitatis, de qua paulo ante ipsi nō obscure timuerint, in hostium suorum potestatem, quod Dii omen obruant, redigatur: sæpe enim accidisse; ut qui nimia pertinacia in iis, quibus carerent, appetendis rebus essent, etiam earum, quas habebant, quibusq; pacate frui poterant, amissione plecterentur, suæq; eos intemperantiæ uehementer pœniteret. Hac oratione ab Lauredano habita, pleriq; magistratus in eius facile sententiam abierunt. pauci cum Molino, rei bene gerendæ occasionem non esse amittendam, perseverauerunt. non nulli tam dubia in re, quid probarent & eligerent, prope ipsimet se nescire fatebantur. itaq; magna inter eos altercatione orta, cū finis rei nullus reperiretur; Molinus ad Senatum conuersus eiusmodi orationem habuit: Non tam se quidem ea re angī, ac dolore confici, quod hoc tempore fortuna, quæ plerunq; res humanas administrat, plures potentioresq; quàm unquam antea hostes in rempublicam armauerit: fato enim id, necessitateq; accidisse, itaque moderate esse ferendum: quàm propterea quod ipsa sibi respublica desit, quodq; ex iis, qui eam regunt, non nulli sint, qui dum immodico terrore opprimuntur, plus detrimenti ciuitati important, quàm ij, qui ei bellum intulerunt. quid autem se potissimum commemorare, ac conqueri? quatuor ne Flaminia oppida communita Iulii ducibus aperire portas iussa interdicto non rescisso? ciues ne per plures eorum, atque arcium præfectos proditos, atq; abductos in seruitutem? sex ne legatos principes ciuitatis ultro Romam missos



in dedecus Reipublicæ? an uero Apuliæ optimam, fertilissimâq;  
partem Ferdinando, antequam de ea uerbum faceret, condona  
tam? an Vicetiam, atque Patavium, præclaras, nobilissimasq; ur  
bes, Maximiliano non petenti, nihil armorum paranti traditas, &  
inculcatas? nam quod Taurisum retentum sit, id uirtute factum,  
atque constantia eius oppidi ciuium; qui soli fermè, & destitu  
ti, ob eorum tamen in Rempub. studium manere in fide, atque  
officio uoluerunt. ego uero, inquit, o patres, qui tantopere formi  
datis, ad uos nunc tantum orationem me conuertere operæ pre  
tium est. maris quidem artes, atque studia deferenda nobis esse  
non existimo, sed omni studio, diligentiaq; percolenda, dum ne  
id imperium, quod in continente maiores nostri suis laboribus,  
suo nobis sanguine pepererunt, nostrorum animorum debilitate  
amittamus, quod quidem certe malum semel nostro uitio si con  
tractum est, an nunc etiam à nobis, cum ex parte corrigi potest,  
negligatur? ac obloquendi occasio hac ratione omnibus homini  
bus facile præstetur; non tam fortunæ ui, atq; impetu nos, quam  
nostra ipsorum imbecillitate uictos esse? at etiam additis, ciuium  
priuatim damna tanti non esse, ut ea de causa Respublica in peri  
culum adducatur. quod si unà cum priuatis rebus salua esse po  
test publica, non ne ad id multo iustius accendimini, quam si rei  
quidem publicæ saluti esse ualeamus, priuatæ nequeamus? præ  
fertim cum priuatæ nostrorum ciuium opes maxime ad rempu.  
pertineant, quæ suorum ciuium pecunia maxima ex parte bella re  
gere, & sustinere consuevit. atq; hoc eo libentius dico, quod nul  
la mihi prædia in Patauino agro sunt, ne quisquam meis me com  
modis ductum existimet ad legem ferendam, ut Patavium reci  
piatur. Res me publica impellit, quæ mihi est mea uita carior: ad  
quam unam cum meorum ciuium commoda, atque utilitates ad  
iungantur, quid est, quod aut me, aut quenquam ciuem bonum,  
atque industrium detertere à suo suffragio probanda lege debeat?  
superest pars illa plena formidinis: ut negotio capefscendo de  
sistamus: ne, si ea re hostes nostros irritauerimus, illi inter se ad  
reliqua nostræ ditionis adorienda iterum parati, atq; animati con  
ueniant: quasi aut facillimum eis sit, tantos exercitus comparare,  
atque cogere; aut ex regia dignitate uideatur esse, Aloisium, qui  
suum



suum in regnum se recipit, statim in Italiã recurrere, ut Maximilianus præsto sit: aut ignoremus Ferdinandũ nostris potitum oppidis, ne unum quidem numum ulterius in bellum insumpturum; aut Maximilianus abundare thesauris consueuerit ad copias contrahendas, qui duorum mensium spatio pauculas cohortes propè nudas ad Veronam, Vicetiam, Patauium tuendum uix, ægreq; miserit; aut Iulius, quo demissius atque abiectius cum illo agimus, eò non maiores sumat in nos spiritus, duriores seq; atque implacabiliorem multo præbeat. quòd si intelliget Patauium receptum, nobisq; pristinam inesse uirtutem, ac uim sentiet: non despiciet tam arroganter eos, quos obesse sibi posse aliquando uerebitur. at etiam ueremini, hæc ne urbs parens nostra in hostium nostrorum potestatem redigatur. quid, uos quæso, interest, urbs ne ipsa in potestate sit hostium, an eius incolæ, ac ciues quiq; illam regimus omnia, quæ hostes nostri uelint, atque optent, statuamus? optabile illis est Patauium nõ recipi, ut eo ipsi oppido unà cum reliquis pacate frui possint. optabile etiam est ut Taurisum, Iuliiq; forum, tractumq; hunc Venetiæ, qui nobis reliquus est ipsis, ut alia multa tam præclara dedimus, etiam tradamus. uos eis morem gerere uultis. hoc ne hæc urbem seruire nõ est? hoc non est eam suorum hostium esse factam? non est libertatem reipub. quæ unà cum huius urbis parietibus semper creuit, quam maiores nostri nobis integram, atque intactam reliquerunt, prorsus, atque omnino perdidisse? Si maiores iidem nostri ab ea cœli regione, in qua beatissimi sempiternam uitam agunt, hic existant, atq; ad uos conuersi eiusmodi sermonem habeant: nos urbem uobis dedimus cum liberam, tum eo situ, & natura loci, ut nisi ipsi uobis desitis, nemo cogere uos possit: cur quæ hostes uestri optant, facere didicistis homines maxime omnium, qui hodie sub cœlo degunt, liberi? cur imperium pulcherrimum, quod uobis constituimus, tam formidolose regitis? cur Patauium male ab hostibus custoditum, quod penè uestris sub oculis est, uosq; appellat, atque obtestatur, non recipitis? quid illis obsecro respondetis? primum scilicet, uni uos seruissse tempori; quodq; tempus postularit, id fecisse. iam istud uobis omnes concedimus: tempori enim hostium perpulchre inferuitum est: de hac urbe



autem timere uos , ne amittatur , dicere non audebitis : neq; opi-  
nor tam timide in Senatu locuti essetis , nedum etiam apud illos  
iplos maiores uestros optimos , fortissimosq; uiros , qui sciunt ur-  
bem hanc capi non posse , eiusmodi proferre quicquam audeatis :  
reposcent enim statim uos , repetentq; à uobis parta grauib; uer-  
bis : quodq; tam pusillo animo fueritis , conquerentur , qui , ne  
hoc imperii domicilium uestris ab hostibus tueri possent , perti-  
mueritis . sed de eo plura me dicere minime necesse esse arbitror :  
urbs enim pro se ipsa satis loquitur ; quæ obsessa uadis undiq; , ne-  
que à iustis classibus , neque à terrestribus exercitibus adiri se per-  
mittit . itaque ad uos omnes reuertar patres : tota enim hæc ue-  
stra causa est . nam propterea quod imperio retinendo timidiore  
nos , quàm par erat , præstitimus , æquum est nunc in recuperan-  
do acres , atque fortes esse , ut eam infamiam , quam formidine  
contraximus , animi robore , atque præstantia deleamus . Alois-  
ium regem copiis dimissis Galliam ulteriorem petere , certiores fa-  
cti sumus . Maximiliano quàm prompta sint , quæ in bellum re-  
quiruntur , sanè cognoscimus . Iulius in alios quàm sit largus ,  
quàm munificus , satis , superq; exploratum nobis est . quàm hinc  
longe absit Ferdinandus , etiam uidemus . qui tamen ipsi si uelint ,  
si festinent bellum nobis facere : ut Pataviū recuperent , æstas  
abierit : ita hyemis beneficio res in annum alterū differetur . quid  
uultis amplius ? quam occasionem aptiorem , opportuniorem à  
diis immortalibus postulatis ? quod tempus ad hanc rem paratius ,  
atque accommodatius esse potest ? quanquam quæ simultates ,  
odiiq; semina in illorum regum animis iamdudum insita radices  
altas habent , quæ fortunæ , ac rerum humanarum uices sunt , spe-  
randum nobis est ; neque illos amplius conuenturos , & nos bre-  
ui magnam reliquorum oppidorum partem facile recuperatu-  
ros . ita enim cum his ciuitatibus , ac populis , quos à nobis habue-  
runt , hostes se nostri gerunt , nihil ut malint iam , quàm illorum  
iugum suis à ceruicibus excutere , nostramq; in se beneuolentiam ,  
indulgentiamq; requirant est . autem prudentiæ uestre patres , hæc ,  
si deorum beneficia sunt , qui nobis ea , quæ fœderatorum nostro-  
rum scelere , perfidiaq; amisimus , reddere statuerint , siue tempo-  
ris , quod illorum dominatum in satietatem , atque inuidiam sub-  
iectorum



iectorum populorum uerterit, planè nō despicere: semel, aut iterū  
 homines, ad regendū imperium natos, maximis in rebus timide  
 lapsos esse, humanum fortasse sit, ueniaq; non indignum: usque  
 quaq; autem sine causa eosdem illos omnia uereri, neque dignū  
 uenia est, nec excusatione: ad interitum enim tendit qui id agit.  
 satis obdormiimus Reipublicæ: satis longos dies in pauore, iner-  
 tiaq; iacuimus: expergiscamur iam, timoremq; hunc nostrum,  
 nocturnum, atque umbratilem, aliquando tandem exuamus. co-  
 pias, quantis opus est, habemus proximas atq; paratissimas. agre-  
 stes homines uniuersi nobis fauent; nos expectant; morari con-  
 queruntur. oppidani etiā accersunt nos; rogantq; ne sui obliuiscamur;  
 ne ue se barbaros perpeti dominos addiscere seruitutis lon-  
 ginitate cogamus. Patauū uero ipsum eiusmodi est; ut, si rece-  
 ptū semel sit, amitti amplius propè non possit: cū & custodire ipsi  
 illud municipium, tanquam domum suam quilibet, ob propin-  
 quitatem facillime queamus; & ob reip. utilitates, quas ex eo per-  
 cipere consueuit, & facti laudem atque gloriam maxime debea-  
 mus; & propter priuata ciuium commoda, fructuumq; copiam,  
 & uillarum amœnitates, magis ut uelimus, adducamur honestis-  
 sime. unum Patres moneo: ut ne tempus ullum rei gerendæ in-  
 terponatur: ne, si parumper distulerimus, hostes se interim mu-  
 niant; atque ab iis conatus nostri omnes retundantur. nihil est in  
 bello celeritate conducibilius, nihil omnino uictoriarum efficiē-  
 tius. ea & qui utuntur alacriores facit; quòd in hostes imparato-  
 rum impetum se facturos uident: & hostes ipsos imbelles reddit;  
 propterea quòd sæpe imprudentes nec opinantes offenduntur;  
 ut arma capiendi, seq; defendendi tempus facultatemq; non ha-  
 beant. postremum est; ut Deos omnes orem, teq; in primis Mar-  
 ce urbis huius parens & conseruator: cuius templum inauratum  
 atque augustum ante curiam maiores nostri antiquitus ædificaue-  
 runt, omniq; pietate semper coluerunt, quodq; nunc persancte  
 ipsi adimus atque incolimus quotidie: ut, si ipsi hanc mihi men-  
 tem dederunt, ut legem ad uos ferrem Patauium recipi è rep. esse:  
 neque enim aliunde recta hominibus consilia, quàm à Diis im-  
 mortalibus ueniunt: & uoseam Patres conscripti uestris suffra-  
 giis hoc uesperī sanciat: & ipsi mihi, & uobis, ac ciuitati, & reipu.



totum negotium faustum, felix, fortunatum uelint esse. Hac oratione habita; cum non nulli magistratus ad Molini se sententiā adiunxissent; lex est perlata, ut ad Patauium recipiendum Gritus legatus è uestigio contenderet: datumq; omnibus iusiurandū, nequid eius quis enuntiaret. De ea re perlatis statim ad Gritum Senatus literis, ille cum equitibus mille, militibus item mille Tauriso profectus medio itinere ad Nouale municipium se cōtinuit. eodemq; die X uiri cimbas suas cū armatis hominibus ad omnia itinera diligenter custodiēda miserunt; ne quis Patauium eius rei nuntius ab urbe mitti posset; postero die autē; qui fuit dies decimus sextus Calēdarum sextilis: noctu reliquo itinere confecto, legatus ante lucem propē oppidū substitit. interim carri aliquot frumento imposito, quos legatus ad id pręparauerat, cum bubulcis ante portam se contulerunt: atque, ut sibi aperiretur, paulisper expectauerunt. apertis portis, quę ad priorem Medoaci fluminis alueum sunt; quo tum alueo naues permeabant; ac demisso ponte, & carris in transmissu cōmorantibus; legati pedites leuissimi adueniunt; portamq; capiunt. pauloq; post legatus cum reliquo agmine in oppidum irrumpit: profectusq; ad interiorem oppidi portam; qua murus item alter postremo longe altior atque solidior unā cum altero Medoaci alueo tanquam circino circumductus urbem reliquam tuebatur; ea refracta ad forum omnes magno cum clamore ac tubarum sono recta contendunt. quibus obuiam progressa gens Parmēsis: id erat fratrum illorum ac Centurionis familię nomen; quę se ad hoc ea nocte comparauerat: armata cum legato læta atq; hilaris se coniunxit. eo tumultu excitus Brunorus Saregius Veronensis, clara gente natus; qui stipendia Maximiliani faciebat, eoq; biduo Patauium uenerat; cum turma equitum ducentorum Venetos, qui forum iam omnesq; uias atque aditus obsederant, repellere aggressus amissis perplurimis ex suis abiis capitur. Germani quoque milites, ad prætorium qui erant, cum præfectis regiis eodem accurrerunt. sed commisso prælio repulsi se in arcem oppidi fugientes intulerunt. oppidani magna pars se legato, qui eorum prætor summa cum laude paulo antea fuerat, gratulantes dediderunt. ita paruo temporis spatio Patauium recipitur eo ipso die, quo primo captum fuerat,



fuerat anni ab urbe condita nongentesimi octogesimi secundi: cum binos & quadragenos dies in Maximiliani partibus fuisset. miserant ea nocte X. uiri magnam armatorum hominum manum cum ex plebe urbana, & naualibus; quorum omnes prope operas eduxerunt unà cum eorum præfecto Nicolao Pascali-  
co, qui eas regeret; tum ex suburbanis municipiis, Torcellio, Maiorbio, Buriano, Muriano euocatam suis cum nauiculis: ut Medoaco flumine superato Patauium legato auxilium ferentes mane accederent. ii celeritate adhibita, turri etiam, quæ instrata pago flumini adiacet, expugnata: is abest pagus à Patauio millia passuum quinque: à qua remulco subuehi Germanis militibus, qui in ea erant, lapides & tela conicientibus non permittebantur; progressi, in oppidumq; recepti unà cum legati militibus ludæorum fœneratorum domos ualde quidem plenas, quarum erat magnus numerus, uniuerfas spoliauerunt. à quibus digressi non nullas etiam eorum ciuium, qui reipu. aduersissimi fuerant, uitæ inquilinorum parcentes diripuerunt. uerum edicto legati proposito, ut prædandi finis fieret; & luminibus singulis in domibus è fenestris tota nocte ardere iussis; ne tenebræ licentiam peccandi adderent; stationibusq; in foro atque ad portas dispositis; ipso etiam legato cum militibus oppidum perambulante; non tamen quorundam Venetorum ciuium, qui spe prædæ priuati Patauium uenerant, audacia comprimi potuit, quin cum armatis direptiones exercerent, atque in legati milites, à quibus prohibebantur, impetum facerēt. ea de re ab legato ad Decemuiros datis literis, quod statuere ipse in ciues Venetos non auderet; Hieronymum Quirinum magistrum suum, Marinum Maurocenum triumuirum ex aduocatis reipub. X uiri Patauium celeriter miserunt. hi retentis nonnullis atque in uincula coniectis tumultum sedauerunt. proximo uero die tormentis ad arcem oppidi positis, & magna circumfusa armatorum multitudine, demum parte propugnaculi deiecta, dum de deditiōe hostes agunt, milites superatis per ruinas muris arcem capiunt: in qua captiui facti Leonardus Trissinus præfectus uulnere in capite accepto, & Manfredus Facinus, uir egregia uirtute; qui complura stipendia, multisq; in exercitibus reipub. magna cum laude meruerat:

m



& Germani uiri fortes & claro loco nati sex, ciuesq; Pataviui tres:  
iiq; omnes patrum iussu sunt ad urbem missi, Facino excepto:  
quem Gritus legatus cum magnopere diligeret; liberali-  
ter appellatum castigatumq; quod cum tot annos rei  
pub. militiam fecisset, tam duro eius tempo-  
re in hostium numero esse uoluisset,  
nullo accepto incommodo  
statim dimiserat.



138

PETRI BEMBI RERVM VENE-  
TARVM HISTORIAE  
LIBER IX.



**P**ATAVIO recepto, Monsilice, Ateste, ple-  
raque alia agri Patauini municipia paruo ne-  
gotio ad remp. redierunt. Maximilianus, qui  
Marosticæ tunc erat, (id est municipium in pri-  
mis alpium iugis; abestq; Patauio millia pas-  
suum uiginti quatuor) ueritus ne interciperetur,  
è uestigio Tridentum abiit. Senatus sex  
ex plebe homines fide præditos à patribus legendos censuit; qui  
sex Patauini portas custodirent cum triginta militibus quilibet.  
et quòd magnum rusticorum hominum studium in rempub. ex-  
titerat; eos immunes annos quinque iussit esse, fisci reliquis etiam  
remissis. Dum hæc decernerentur; à Maximiliano literæ ad Se-  
natum uenerunt, pridie quàm Patauium reciperetur datæ: qui-  
bus literis rex petebat, ut Aloisium Mocenicum ad se Marosticæ  
patres mitterent. Aloisius patrum iussu postero die Taurisum  
profectus: quòd rumor attulerat, Maximilianum suos se in fines  
recepisse; præmisso tabellario, qui, ubi rex esset, quoq; se ueni-  
re uellet, fiscitaretur; alteris regis literis certior factus est, nolle  
amplius Maximilianum cum eo colloqui. itaque Taurisi pau-  
cos moratus dies, à Senatu reuocatus domum rediit. Gaspar etiã  
Seuerinas; de quo supra dictum est; ab incolis in oppidum Ci-  
tadellam introductus, dum se ad Maximilianum Pandulfus Ma-  
latesta contulisset, missis ad urbem internuntiis Senatui se obtu-  
lit: neque tamen est receptus ob leuitatem atque inconstantiam;  
qua nimia usus fuerat. Serrauallium interea, Castellumq; Fracum  
recipiuntur, pulsus ab altero non sine cæde prope quingentis Maxi-  
miliani militibus, in altero omnibus ad unum interfectis. erant  
autem ex Hispania milites centum quinquaginta. & sunt oppida  
Patauio in septentriones uersus. à meridie fere autem Monta-  
nianum in Patauini finibus, & Lemniacum; quod est ad Atesim  
flumen in agro Veronensi; eiectionis hostibus reipu. insignia sustule



runt, equitatusq; ab Alfonso Ferraria emissus; ut eius oppidis præ  
 sidio esset; à militibus reip. & agricolarum manu disiectus inter-  
 fectusq; est eorum duce capto, ad urbemq; missus. Lemniacum pe-  
 tente ciuitate per legatos ab imperio Veronensium, in quo erat,  
 liberum à Senatu factum est: permissumq; iis, ut à magistratibus  
 ab urbe ad se mittendis regerentur. Prætor quoque, qui ius Pa-  
 tauinis diceret, comitiis maioribus creatus est Petrus Balbus ci-  
 uis prudentia moderationeq; insignis: qui haud multo antea il-  
 lum ipsum magistratum obierat. Iulius Pont. max. cognitis ma-  
 gna cum molestia reipu. prosperis rebus, Dominico Grimano,  
 Hieronymo Donato ad se uocatis animi agritudinem dissimulans  
 ostendit cupere se, ut Taurisum forumq; Iulii resp. ne amitteret:  
 seq; eius rei auctorem apud Maximilianum fore pollicetur: atq;  
 ad sacra legatos reliquos, qui domi detinebantur, admitti impe-  
 rat. actum quidem ex Pannonia Guidotii Senatus scribæ, qui  
 reipub. negotia procurabat, literis patres certiores facti sunt; Alo-  
 sium regem Galliarum, Iuliumq; Pont. max. omni studio apud Panno-  
 niæ regem egisse; ut is reipub. bellum inferret: per facile esse, pro-  
 pterea quod reipub. omnes suas opes amisisset, essetq; ad extremum  
 redacta casum, eius oppidis omnibus, quæ in Istris atq; in Illyri-  
 co essent, illum potiri: regem tamen aures eorum hortationi-  
 bus non adhibuisse; neque quicquam contra rep. aggredi aut  
 statuere uoluisse. Interim, quod Maximiliani copiæ augebantur;  
 eratq; Vicietæ eius præfectus Cōstantinus Cominatus, de quo su-  
 perioribus libris sermonem habuimus; qui manus cogere dice-  
 batur: Senatus iussit; ut Citolus & Lactantius suorum militum  
 numerum & ipsi augerent: ut essent utriusque ad octingentos. Lu-  
 tioq; Maluetio Bononiensi equitum cataphractorum centum præ-  
 fecto auctus numerus ad CL. cum liberali stipendio. auctusq; Me-  
 leagro Foroliuiensi, Tadeoq; Vulpio Forocorneliensi; qui se aman-  
 ter fortiterq; gesserant. Alexandro Bigolino autem uni ex Pata-  
 uinis ciuibus; qui in Citadella obsidenda hostibusq; uexandis cū  
 agricolarum manu egregiam operam nauauerat, uti equites leuis  
 armaturæ centum, milites ducentos conficeret, cura data; & sti-  
 pendium à Senatu missum. Lancilloto etiam Soncinio patri libe-  
 risq; sex Patauinis item ciuibus, qui in partibus reipu. constantis-  
 sime



sine semper fuerant, fundi aliquot eorum, qui à rep. defecerant,  
 dono permissi. tum Saccardo uni ex iis equitum cataphractorum  
 centum, & eorum, qui sagittis uterentur, uiginti præfectura tra-  
 dita. et quoniam cum Prospero Columna confici nihil potuit:  
 Populæ dominum, qui in Brutiis tunc erat, cum equitibus cata-  
 phractis trecentenis Senatus cōduxit libris auri uicenis & trecen-  
 tenis annuis. qui tamen postea, Ferdinando rege id ei nō permit-  
 tente, domi se continuit. Centuriones etiam & præfecti equitum;  
 qui ad urbem se conferebant, ut stipendia reip. facerent; per plu-  
 res à Senatu sunt recepti: iussiq; ut se quamprimum cohortibus  
 turmisq; confirmarent; Patauiumq; proficisceretur. Inter hæc Ci-  
 uidale Belunianū ad remp. rediit. id cum Feltrini cognouissent;  
 & ipsi sponte idem fecerunt. quod quidem etiam in Noricis ali-  
 quot populi ciuitatesq; imitatae se ad remp. pari studio retulerunt.  
 at Maurus legatus; qui, ut Citadellam interciperet, eò cum co-  
 piis properauerat; req; frustra dies aliquot tentata, quòd oppi-  
 dum à magna Hispanorum militum manu defendebatur, Tauri-  
 sum redierat; præsidio ad oppidum tuendum relicto cum Imper-  
 ratore & reliquo exercitu Senatus iussu se Patauium cōtulit. Ma-  
 gnæ enim manus hostium pluribus in locis ad eam urbem obsi-  
 dendam comparabantur: Maximilianumq; ipsum eò breui uen-  
 turum fama uulgauerat. eas ob res pedites quatuor mille ex ple-  
 be urbana sunt conscripti; quos Patauium patres mitterent. ex  
 Patauii ciues permulti, quorum fides atque animus suspectus  
 erat patribus, ad urbem nominatim euocati: iussiq; inde, quoad  
 de bello decernatur, non recedere. idem post dies aliquot de  
 Taurisanis ciuibus non nullis imperatum. Hieronymusq; Saor-  
 nianus, qui iam antea patrum missu ad Heluetios profectus eos  
 ad remp. iunandum propè armauerat; sed clade exercitus nuntia-  
 ta impetrare ab illis nihil postea potuit; quiq; tum ad urbem redie-  
 rat: in Carnos patriamq; suam à Senatu missus est; ut illis in fini-  
 bus legatis reip. præsto esset. ad quos etiam equitatum patres mi-  
 serant: quòd hostes eo quoq; ab latere impetum facturi diceban-  
 tur. Atq; ii paucis post diebus ad Ciuidale Carnicum oppugnand-  
 um sunt profecti. tribusq; præliis frustra oppidum aggressi, Ioan-  
 nem Paulum Gradenicum in Foroiuliensibus legatum, qui eò



uenerat, ut ab obsidendo municipio illos auerteret, uulnere illa  
to repulerunt, Tiberto è Purliliarum principibus equitum leuis  
armaturæ ducentorum præfecto, bene merito de rep. homine, &  
Camillo Malfaeto Patauino totidem militum Centurione cum  
plerisque uiris fortibus interfectis; è uestigioq; abierunt. nam dum  
ii ab oppido digressi in Gradonicum impetum faciunt; oppidani  
egressi hostium tormenta clauis ferreis confixerant; ut eis uti eo  
tempore non possent. quibus abeuntibus Portunaonenses ad Gra  
donicum miserunt; seq; reip. reddiderunt. ex Benaci autem ripa  
uallibusq; homines quingenti sponte, ut reipu. opem ferrent, se  
Patauium intulerunt. quos Grittus legatus liberaliter appellatos,  
stipendioq; dato Taurisum, cuius agrum hostes depopulabatur,  
earum regionum auxilio statim misit. quò etiam Maurus legatus  
cum equitibus mille ea de causa redierat. Maximiliani uero ma  
nus, pluribus ex finibus coactæ, fugatis in alpihus reip. copiis pri  
mo Castellum nouum, deinde Feltriã recuperauerunt: prædaq;  
ingenti facta atq; abducta oppidum incêderunt. eo incendio tur  
ris portæ oppidi imminens concidit: qua in turri carmen solido  
in lapide legebatur antiquitate mira præditum. is lapis igne ab  
sumptus haud paruo ciuitatis desiderio interiit. carmen erat  
cuiusmodi.

Feltria perpetuo niuium damnata rigori,

Forte mihi posthac non adeunda, uale.

Supra carmen Iulii Cæsaris nomen erat inscriptum. Cretensis  
ubi de Gallorum uictoria deq; defectione oppidorum est allatū:  
magno ex ea re mœrore affecti domi se uniuersi plures dies con  
tinuerunt: scriptisq; ad illos à præfecto classis literis, uti uellent  
ad Cyprum insulam firmandam, ne quis eam uicinorum regum  
aggredi audeat, tam afflictis reipu. rebus præsto esse; ex se se li  
bras auri centum sexaginta ad triremes, gripos, reliquasq; naues  
armandas, atque in Cyprum celeriter mittendas curauerunt. In  
ter has iactationes alternosq; fluctus reip. Franciscus Mantuano  
rum dux à Maximiliani ducibus stipendio Veronæ accepto; quod  
quidem illi à ciuitate nullo more perq; uim exegerant; cum equi  
tibus sexcentis octauo Iduum Sextilium se se Mantuã referebat.  
ea de re Grittus legatus ab amicis reipu. antea certior factus Lu  
cium



cium Bononiensem cum equitibus sexcentis, ex quibus erat Epi-  
 rota ducenti, & Citolum Perusinum cum militibus octingentis  
 transuerso itinere Lemniacum præmisit. qui eò eiusdem diei sole  
 abeunte cum uenissent: missis, qui uias custodirent; ne quis ad  
 Franciscum nuncius afferretur; ante solis ortum se interius in fi-  
 nes Veronensium ad pagum, quo in pago erat dux, magnis itine-  
 ribus contéderunt: impetuq; facto illum seminudum; ut se repen-  
 te expergefactus domo eiecerat, atq; in milii segetem abdiderat;  
 agricolarum indicio repertum ceperunt unà cum suo comitatu  
 omni, interfectis iis, qui se defendere institerunt; & equorum  
 peregrinorum magno numero, & maiore stipendii parte ad li-  
 bras auri octoginta, argentiq; in mensam affabre cælati graui pon-  
 dere: statimq; cum præda captiuisq; reliquis Patauium adduxe-  
 runt. præda inter omnes diuisa. ipse Venetias perductus, atque  
 in Comitii turricula custoditus, haud minimæ ciuitati lætitiæ ex-  
 inopinato fuit. neque multo post Hieronymo Pompeio Vero-  
 nensi; qui cū equitibus leuioribus stipendia reip. faciebat; quod  
 is à fratribus, qui Veronæ erant, de Mantuanorum ducis abitu  
 cognouerat, legatoq; indicauerat; equites grauis armaturæ à Se-  
 natu additi. agricolisq; qui illum latitantem reipub. militibus  
 ostendissent, immunitas pensioq; annua, quas posteri eorum se-  
 querentur, dono data. ipsi ueste liberaliter induti: auriq; libra iti-  
 neri domum inter eos diuisa. Deinde cum Pompeius ipse ad ur-  
 bem uenisset: uti ei fratribusq; eius quinq; auri libræ sex singulis  
 annis curarentur; castellumq; Lasium, cuius in finibus prædia eo-  
 rum erant, dono eis daretur; X uiri sanxerunt. Marco etiam Ari-  
 minensi Centurioni reip. Lemniaci qui erat; ad eamq; rem confi-  
 ciendam & studio & diligentia usus fuerat; duæ auri libræ pensio-  
 nis nomine annis item singulis, quoad uiueret, cōstitutæ: auctusq;  
 militum numerus ad alteros totidem. latum etiam, ut ei Centu-  
 rioni ciui Patauino; cuius fratres legato oppidi portam aperue-  
 rant; ex eorum bonis, qui hostes reip. fuissent, prouentus annuus  
 attribueretur; quo se liberaliter familiamq; suā aleret. idem mu-  
 nus ex Taurisanorum reip. hostium bonis, domusq; percommo-  
 da in oppido, atque immunitas onerum omnium, quam posteri  
 eius sequerentur, Marco Pelliciaro ciui Taurisano, cuius uirtu



te ac fide ciuitas in officio erga remp. se continuerat; utq; ipse in  
suæ ciuitatis Senatum extra ordinem legeretur; datum. atque ad  
hæc Senatus consulta illud quoque patribus frequentissimis est  
additum; cuiuscunque rebus atque fortunis damnum aliquod ab  
hostibus aut illatum iam sit, aut deinceps inferatur; remp. spon-  
dere, ac polliceri, se se ei bello confecto æquis factis æstimationi  
bus omne detrimentum sarcituram. cuius rei edictum publice  
Patauii propositum ubi est ab hominibus auditum; Senatusq; in  
suosea pietas & liberalitas cognita: tantus subito ciues plebemq;  
omnem atque ipsum etiam exercitum beneuolentiæ in remp. sen-  
sus atque lætitiæ tenuit; ut magna alacritas oppidi defendēdi om-  
nium sit animis innata; omnesq; ad omnia pericula subeūda mul-  
to audientiores & paratiores fierent. Maximiliani copiæ, reliquis  
municipiis eo ab latere captis, ad Vicū Aggeris profectæ; qui ab  
est Patauio uicus duo millia passuum, à Medoacoq; flumine inter-  
secatur; pontem, qui in uico est, occupauerunt; atque ex iis non  
nulli equites usque ad oppidi portam cucurrerunt; repulsiq; sunt  
à reipu. militibus; qui in porta stationem habebant. est ad Medoa-  
cum sex mille ab oppido passus; quā flumen diuiditur; parsq; flu-  
minis altera recto cursu Venetias uersus, altera pars Patauium  
circum interq; uecta ambæ ad Stratam uicum se coniungunt, atq;  
in unum redeunt; arx antiquitus instituta: ne repentinis hostes in  
ursionibus illam fluminis partem, quæ Patauium tendit, deriuare  
in alteram possent. quod quidem nō difficile factum est, nisi arx im-  
pediat: propterea quod ea fluminis pars, quod multo breuiorem  
cursum habet, trabibus in flumine infixis, ac mole lapidea inter  
trabes excitata retinetur; quoad per triū fermè cubitorum rimam  
peruiam quæ uisa est aquæ pars delabatur; reliqua sustineatur  
ad Patauium irrigandum. ea si moles non sit; omnis fluminis uis  
in breuiorem alueum, qui demissior est, se se fundat: neq; pars  
aquæ ulla Patauium perueniat. is locus pagusq; Limen appella-  
tur. ad arcem itaq; liminis capiendam omnis hostium exercitus,  
ad quem iam Maximilianus uenerat, paucos se post dies contu-  
lit, erant in arce milites CL. ii; quod arx satis communita non  
esset; dum, quid agant, consulunt; hostes intromissi eos propè om-  
nes interfecerunt. arce capta Maximiliani milites mercede pro-  
posita



posita molem interfcindere aggressi cum partem eius deiecissent; flumenq; pro ea portione auerteretur; constaretq; omnibus, si pergerent deicere, totum flumen ea descensurum: Maximilianus operas ab incepto reuocauit; imperauitq; ne quis molem ulterius deiceret. neque tamen quisquam scire potuit, quam ob rem Maximilianus id iussisset. ita ea fluminis pars, quæ Patauium defluebat, nunquam postea defluere uniuersa desiit. cæterum cum uidissent Bachilionem etiam flumen, quod in agro Vicetino ortū habet, quinque millia à Patauio passuum ad pagum, qui Longare appellatur, diuidi; eiusq; partem Ateste, partem Patauium deferri: uti hæc quoque pars Ateste deflueret, eam intercipere sunt conati: ne qua Veneti eius fluminis aqua ad Patauium tuendum uti possent. sed ab equitibus reip. sæpe uexati, sæpe commeatibus interceptis, sæpe captis non gregalibus modo ex ipsis magno numero, sed præfectis quoque; incepto destiterunt. inter captos Manfredus Facinus fuit: qui spreto iureiurando, quod legato Gritto dederat, iterum cum hostibus se coniunxit. ei est ob periuirium Patauii laqueogula fracta. hostes post hæc, quod erat eo fere ab latere municipium Monsilice; quod abest Patauio decem millia passuum; monti præcelso adiacens; in cuius summo uertice est arx; quæ muro ab utraque parte ducto cum oppido coniungitur: cum Ateste, quod nemo defendebat, antea cepissent; se Monsilice contulerunt: oppidumq; magno impetu aggressi ceperunt singulari Hispanorum militum uirtute; qui ad arcem per montis crepidines repserant; elusis reipu. qui in ea erant, militibus præfectisq; arcem posse capi non uerentibus. ii enim cum ad priorem eius partem, quā tormentis antea perforauerant, se ostendissent; per posterioris angulū, qui nudus à propugnatoribus relictus fuerat, pauci se in murum improuisi intulerunt; deq; muro in arcem deiecerunt. ad quas reliqui conuolantes perterritis omnibus magna cæde facta arcem tenuerunt: oppidumq; diripuerunt: Danielemq; Maurum, & Petrum Gradonicum; quorum alter Atestinis prætor fuerat; captoq; municipiū fugiens Monsilice se intulerat; alter ibi magistratus erat; captiuos fecerunt. eo successu fretus Beraldus Patauinus, qui stipendia Maximiliani faciebat, Montanianum municipium cum militibus accedens,



uti se dederent, oppidanos est hortatus. ii uelle se imperata face-  
re simulantes Beraldium cum iis, quos uisum est, equitibus intro-  
miserunt; portæq; rete ferreo repente demisso ipsum uulneraue-  
runt; captiuumq; cum plerisq; fecerunt: reliquos interfecerunt.  
Galassium quoque Pium in Patauinis montibus cum sua equi-  
tum turma & Maximiliani militibus iter facientem agrestes ho-  
mines congressi occiderunt. equites XX. & milites LX. capti-  
ui facti. Nicolao imperatori, quod eius stipendiorum cum repa-  
renouandorum tempus appeteba, teadem est in annum potestas  
dilata: decemq; auri libræ singulis mensibus in uictum a Senatu  
constitutæ. Maximilianus, qui tormenta graui are permulta ad  
muros Patauinos uerberandos domo ad se comportari imperaue-  
rat: dum ea per alpes magna difficultate conuehuntur; modo ad  
hanc, modo ad illam suburbani agri partem exercitum circumu-  
lit; ne frustra tempus terere uideretur; uel etiam, ut plerique cre-  
diderunt, ne cognoscere Veneti possent, quo ab latere ille quate-  
re oppidum uellet: ut, dum omnia latera omnesq; muri partes mu-  
nitionibus firmandas sibi esse intelligunt; pro oppidi magnitudi-  
ne neminem unam diligenter muniant. ea res, quod flumina om-  
nibus a regionibus agrum intersecant, pontesq; sæpe erant reficiē-  
di; magnam difficultatem atque moram afferebat. simul equites  
Epirotæ; quorum erat cum magnus in oppido numerus, tum uir-  
tus atque industria singularis; improuisis incursionibus neq; die  
neque nocte ullam hostibus quietem relinquebant: quotidieq;  
cum præda cumq; captiuis in oppidum reuertebantur. unum fuit  
magno usui, quod plurima eo tempore ad Maximilianum auxi-  
lia conuenerunt. nam & Aloisius rex duce homine impigro, qui  
Palitiæ principatum obtinebat; & Iulius Pont. Max. & Alfonso  
Ferrariensium dux magnos equitatus & peditatus ad illum mise-  
runt. his præerant ab Iulio Ludouicus Picus; qui bello Mirandu-  
lam fratris oppidum occupauerat: ab Alfonso Hippolitus eius  
frater; qui erat in Cardinalium collegio; magna animi ostenta-  
tione uir, magna sui confidentia, bellicarum rerum non ignarus.  
uenerant eodem præter hos omnes fere Itali aliarumq; nationum  
principes suis expulsi regnis cum ea copia, quam cogere maiore  
potuerunt: præfecti Centurionesq; cum turmis cumq; militibus  
sua



sua etiam sponte plerique . ex Germania uero Galliaq; Maximilianus ingentes copias adduxerat cum ex omnibus prope regionibus, tum uero ex Sequanis optimum & plenissimum equitatum: ut uniuersum eius exercitum octogies millies hominum numerū supergressum opinio tenuerit. ad quem quidem Veneti sustinendum nihil non curæ diligentiaq; iam pridem adhibuerant. nam et sat magnam bonorum militum manum ad se confluentium, & equitatum utriusque armaturæ, quanto opus erat, Patauium intulerunt; eisq; tribunos & præfectos fortissimos lectissimosq; homines dederunt: & omnes fere naualium urbanorū operas, quas antea oppido recuperando eorum magistratus Patauium subueherat, iterum eò redire uoluerunt, permanereq; , quoad oppidū defendi opus esset. præter hos sagittariorum è plebe urbana, atque ab Epiro Græciaq; plurimis cohortibus euocatis dato stipendio idem uti facerent mandauerunt: ut essent milites omnes numero ad millia quatuordecim; equites cataphracti ad sexcentos; Epirotæ ad septingentos; qui sagittis uterentur, ad quingentos. ex nobilitate quoque primarii adolescentes permulti reipu. hortatu se in oppidum inferre non dubitauerunt cum suo armatorum comitatu singuli: ut plerique Senatorum & magistratuum liberi ea obsidione, quos oportuit, militiæ labores & ærumnas forti animo pertulerint. Lauredanus quidem dux princepsq; ciuitatis duos ibi filios & ipse in armis habuit. quos per plures item ex nobilitate ciues comitati haud paruum clietium militumq; numerum secum adduxerunt. ad priores etiam legatos Gritum Maurumq; tertium legatum Ioannem Paulum Gradonicum, cui ex uulnere ad Ciuidale Belunianum in uitæ periculum adducto Frāciscus Capellus legatus successerat, patres addiderunt; qui labores & uigilias inter se partirentur. postremo tormenta omnis generis, arma omnia, uectium, ligonum, reliquiq; ad terram fodiendā instrumenti uim ingentem; cumq; iis frumenti magnum numerum, cæterosq; abunde commeatus ad inopiam leuandam Patauium importari curauerunt. quibus rebus omnibus accessit, ut, quoniam agrestes homines, quod essent reip. amantissimi, passim ab hostibus diripiebantur, uulgoq; in uinculis atque in omni supplicio detinebantur, ut plerique uitam cruciatibus amitterent; non paruus



eorum numerus, ut tuti esse possent, se in oppidum intulerit: qui munitionibus instituendis magno reip. usui ad celeritatem fuit. illa quoque non postrema patres cura cogitatioq; tenuit: propterea quod existimabant ea bina flumina; quæ Patauium inferuntur, de quibus supra dictum est; esse hostes primo quoque tempore auersuros: ne tanta hominum multitudo farina deficeretur; uti molæ frumentariæ, quas iumenta uerterent, omnibus in oppidi regionibus & uicis ædificarentur. nam plurimæ, antiquitus in oppido quæ erant, aqua subtracta ulli esse usui non poterant. demum, quod omni ab oppidi latere omnesq; ad portas erant pro oppida in agrum porrecta longo pleraque tractu longisq; uis, quorû partem Patauii Veneti; ciues animi causa magno sumptu exædificauerant; cum sacris ædibus ac fanis ea pro oppida, ne hosti receptacula munitionesq; præberent, legati dirui mandauerant. sed ea res parua erat ex parte confecta: cum Maximilianus singula oppidi latera quinque fluminum alueis transmissis circumuectus, urbis situ undique perspecto uno in loco omnes suas copias continere, ut à captiuis cognitum est, oppidumq; aggredi collectis uiribus statuerat. quod ubi patres intellexerunt: alios decem ex nobilitate ciues Patauium miserunt, qui cum obæratibus & clientibus suis fide præstantibus ad omnia obeunda munera legatis præsto essent. iis oppidum ingressis ratio inita est, qui numerus nobilium ad obsidionem sustinendam se Patauium intulerit: ii fuerunt centum septuaginta sex: quiq; item ex plebe optimorum ciuium: sed is exiguus fuit. iidem patres, quod ægerrime ferebatur ab Alfonso Hippolytum fratrem magna cum manu ad Maximilianum auxilio missum; omnemq; ei commeatum ab illius finibus, omnes ad tormenta exercenda res Ferraria subministratas; triremes quinque à Tergestinis, quos obsidebant, euocatas, atque è naualibus nauigiola perplura educta, atque adornata famosam Clodianam progredi iusserunt: ut Pado subuecti in Alfonso fines impetum facerent. progressis, quoniâ Maximilianum omnem suam copiam, omnes opes, Patauium ut caperet, breui explicaturum constabat: Senatus ad earum præfectum Hieronymum Contarenum misit; ut Patauium legatis auxilio cum classiariis cōtenderet. atque is statim nauiculas conscendens, flumenq; Medoacum



doacum, ubi in mare influit, ingressus, eo festinanter superato armatos homines quingentos; ex quibus erant sagittarii Cretenses plerique; ex sua classe in oppidum intulit. Iisdem diebus Petrus Pascalicus à Senatu lectus est, qui ad regem Pannoniæ in fœdere, quo cum rep. plures annos fuerat, continendum profisceretur. ualde enim illum & Iulius, & Aloisius, uti supra demonstrauimus, & cum iis unà Maximilianus per internuntios, perq; literas hortabantur atque obtestabantur; ut bellum inferret reip. in Foroiulienfibus autem, & in Carnis ab hostibus, qui Goritia reliquisq; Maximiliani ex finibus earum regionum coacti reipub. ditionem inuaserant, nihil est cessatum: pluraq; oppida & castella cum incursionibus & uicorum incendiis, tum castris & tormentis positis sunt ab iis tentata: non nulla capta & diruta: molestiq; sæpe nuntii ad urbem in Patavinum bellum suspensam & occupatam præfectorum & legatorum literis allati graues tumultus, & querelas excitauerunt. quibus in rebus præclara Hieronymi Saorniani uir tus fuit: qui suorum clientium & agrestium ac montanorum hominum manu omnes fere hostium impressiones atque impetus audacissime sustinuit. itaque postea pridie calendarum Octobrium; quo die antiqua consuetudine ciues sexaginta maioribus comitiis creantur, qui annum in Senatu sint; eum is honorem est adeptus, atque ita quidem adeptus, ut omnes ciues principesq; ciuitatis suffragiorum numero uicerit. quæ res antea nunquam acciderat: ut cuius maiores domicilium extra urbem semper habuissent, ipse in urbem suis modo temporibus ac per occasiones uentitaret, in Senatum legeretur. ut autem pluribus etiam suffragiis, quàm ullus alius, eam rem consequeretur: id uero magno pere mirum omnibus atque inauditum fuit. sed eam ipsam comitiorum & ciuitatis in illum beneuolentiâ paulo post ea res etiâ auxit; quod is Castellû Nouum, egregium in Carnis municipiû, peropportune ab hostibus custoditum magno animo aggressus, tormentis celeriter prolatis muroq; uerberato ad deditionem nulla neque rerum neque salutis conditione interposita compulit. Erat Foriulii æger Franciscus Capellus legatus: neque exercere se poterat. quod ubi patres cognouerunt; Aloisium Delphinum ei legatum c uestigio submiserunt. aucta uero paulo post suspi-



cione Patauio magnopere communito Maximilianum suas co-  
pias ad Taurisum obsidendum uelle conuertere: patres Aloisium Mocenicum magna cum potestate legatum eò miserunt: oppidumq; rebus omnibus munire decreuerunt. quod cū esset difficilior, exhausta & pecunia & militibus & plebe ad bellū idonea ciuitate: magnam ea res perturbationē afferebat. quam tamen subleuabat, patres certiores esse factos, aquā Silis fluminis, quod non longe ab oppido multis fontibus largiter ex terra exit, posse munitionibus adeo sustineri; ut quingentos eoq; amplius circa oppidū passus maiori ex parte ager sub aqua redigatur; ne hostibus ad murū accedendi facultas sit: easq; munitiones propè confectas esse. Maximilianus autē, siue id nunquā in animū induxerit: siue desperarit posse ad exitum perducī: exercitus sui partem ad eam agri Patauini regionem, quæ ad Fossam Clodiā mareq; pertingit, fertilissimam scilicet pecorisq; plenissimam; quod sua illorū reliquarum regionum homines armenta contulerāt; prædatum misit. qua ex re tanta agrestium multitudo cum coniugibus ac liberis, cūq; ea, quam subito abripere secumq; ferre suppellectilem potuerunt, missis ad eos publice nauiculis fuga se in urbem contulit: loca ut publica omnia porticusq; ac fana & priuatæ domus plurimæ ea turba complerentur. iis Senatus reip. pecunia comitum dari iussit; quoad hostium discessu liberum illis reuerti domum fuit. post hæc ad Medoaci munitionem, quæ cimbæ ad urbem transmittuntur, omnesq; ad illud uadum urbanorum latus hostes plurimas incursiones multis & illatis & acceptis detrimentis cum fecissent: castra quàm proxime potuerunt ad muros Patauios à Septentrionibus posuerunt, & tormentis oppidū quater uerberareq; cœperunt. tamen à militibus reip. haud parua cum clade repulsi sæpe fuerint. Maximilianus ipse in templo Cartusiano; quod templum oppidani non diruerant; medio ferre castrorum spatio confedit. erat ab ea regione portæ oppidi proxima turris terrea muro coniuncta, sed in agrū exporrecta, quantum eius spatium in latitudinem patebat, pedes propè quatercentum: quam magna celeritate ac diligentia imperator legatiq; excitari mandauerant: ut esset toti ei lateri contra hostium exercitum munitio ad eorum impetum repellendos: ad eamq; conficiendam



dam non agrestes modo homines militesq; reip. operam nauauerant; sed ciues etiam ex nobilitate Veneti, atque ipsius Lauretani Principis liberi suis terram manibus conuexerant. ei turri Citolus Perusinus cum militibus mille præpositus Gallos atq; Germanos ex hostium copiis aditum incursionibus aggressibusq; tentantes sæpe reiecerat. quod ægre passus Maximilianus, Hispanis militibus ad se uocatis, magnis propositis præmiis eos incendit; ut aggredi capereq; munitionem uellent. erant autem milites ii ex omni numero uirtutis opinione facile principes. qui re magno animo suscepta quinque signis ad munitionem se audacissime contulerunt. reliquæ copię in armis non longe ab illis se continebant eius rei finem opperientes; si negotium ab Hispanis perficeretur, se se in oppidum confestim illaturæ. Citolus suos silentio adhibito intra munitionem uersari iubet: resq; ad ignem celeriter comprehendendum idoneas in uallo disposuit: atque in illos, qui scalis positos nemine repellente omnibus à partibus se in munitionem inferebant, ubi constitere, ignem succendit: à quo plurimi correpti sunt. reliquos acerrime inuadit: omnesq; interficit, deiecitq; simul tormentis in proximos emissis eos fugæ dat; ut se ad Maximilianum magna clade accepta retulerint. etiam Lactantius egredi ausus usque ad hostium munitiones accessit: cædēq; facta, & tormētis hostium confixis, puluereq; ad ea exercenda partim succenso partim abducto, nullo ex suis desiderato, in oppidum rediit. is euentus rerum certam propè spem inclusis attulit, nihil regem in ea obsidione profecturum. at legati, quod stipē, quam darent exercitui, plures dies caruerant: nam propter hostium excursiones suspectaq; omnibus à regionibus itinera nihil afferri poterat: missis tandem ad Senatum internuntiis, quo id pacto fieret, constituerunt. itaque Senatus aurum in stipendia ad Medoaci hostium, quod est ad Fossam Clodiam quinque milia passuum, in decemuirum nauiculis misit. ibi equites Epirotæ ex oppido noctu emissi trecenti eam stipē acceperunt, atque inter se ita diuiserunt, ut, qui uelocioribus equis uterentur, eorum quisque eius pecuniæ partē ferret: ut, si hostes in reditu eos adorerentur, reliqui prælium committerent, impetumq; sustinerent; ii se fuga hostibus eriperent, atque in oppidum contendere per-



seuerarent. Epirotas autem equites Lutius Bononiensis cū equi-  
tibus grauioris armaturæ ducentis paucis est post horis subsequen-  
tus; ut cum illis reuertentibus se coniungeret. atque ut hostes, si  
se adorirentur, eluderet: duos magnopere ualentes mulos saccu-  
lis arenæ plenis ad speciem atque similitudinē pecuniæ dorso im-  
positis medio in agmine secum duxit, qui quidem muli magno  
ei usui fuerunt. hostes enim per exploratores de ea equitum reip.  
profectione certiores facti, medio fere in itinere ingenti equitatu  
circunfuso ita se undiq; in nostros redeuntes intulerunt: ut iis,  
qui stipendium ferebant, facultas fugiendi non daretur; sed om-  
nes peræq; se se defendere, manusq; conferere cogerentur. uerum  
enimvero ubi illos in mulis sacculos hostes medio in prælio uide-  
runt: eam illam esse prædam, quā petebant, rati, magna se pars  
ad eos capiendos conuertit; ut reliquis minus negotii ad se defen-  
dendos relinqueretur. Epirotæ autem; qui cum mulis erant, ne-  
que numos ferebant; ut hostes longissime ab reliquis abduceret,  
quemadmodum Lutius initio constituerat; fugæ se sinistrorsum  
per campos unā cum illis raptim dederunt. quos quidem hostes  
plura passuum millia consequuti, tanta celeritate uti tamen non  
potuerunt, ut eos assequerentur: quoad emissus oppido ab lega-  
tis id futurum opinantibus equitatus recentissimus saluti atque  
præsidio illis fuit. Lutius ea de re atque consilio magnam ab lega-  
tis atque ab omnibus laudem, optimum sui laboris fructum, cu-  
lit. milites deinde Hispani L. X. ex Maximiliani exercitu perfu-  
gæ in oppidum à legatis recepti sunt: stipendiumq; eis datum. die-  
bus autem insequentibus non semel eam, de qua supra dictum est,  
turrim Maximiliani milites omnium gentium aggressi, præter  
quam quod Citolum uulnerauerunt, eundem reliquis in rebus  
euentum habuerunt, quem Hispani ante habuerant. & murus  
oppidi eo ab latere diu multumq; uerberatus, tamen longissimo  
spatio conciderat, tamen & hostibus ipsa eiusmodi ruina ascen-  
sum impediebat, & oppidani eodem tempore intra murum fos-  
sam & uallum efficiebant: quibus rebus muro ipso longe tutior  
ab iis defendendi se se ratio institutioq; comparabatur. uni tamē  
tormentorū generi adhiberi remedium non potuit, ne urbi no-  
ceret. quod quidem erat eiusmodi, ut pilam lapideam se sequi per-  
dis



dis crassitudine in sublime ad fastigii speciem magno cœli tractu propelleret. ea intra oppidum pila ex alto cadens domorum tecta contignationesq; perforabat, lateq; uastabat cum eorum, qui suberant, interitu; ruina mq; inopinantibus afferebat. sæpius tamen accidit, ut in uias atque in fora & aperta ædium eæ pilæ, quæ in tecta cœtusq; hominum deciderent. quas ad res omnes Maximilianus illud etiam addidit, ut literas sagittis alligatas intra oppidum mitteret: quibus literis oppidanos hortabatur, ut à rep. deficerent; plurima eis atque ingentia pollicitus, si ita fecissent. sed cum ea quoque re nihil proficeret; singulis autem diebus plurimi ex eius exercitu uel tormentis interficerentur, uel ab Epirotis equitibus caperentur; commeatusq; interciperentur; timeret etiam, propterea quod perpetua serenitate usus fuerat, si pluiæ, ut plerunq; accidit, cum per diu cœlum siccum fuit, magnis tempestatibus deciderent, fore, ut relinquere tormenta Patauii decedens cogeretur, quæ reportari impeditis itineribus non possent; ita fuit breui tempore imbribus cadentibus luto sæ omnes circa oppidum uiæ: ad diem sextum Nonarum octobrium sublati castris Medoacum ad Vicum Aggeris traiecit; pontemq; rescidit, deinde itinere lentissimo Vicetiam se contulit; atque à ciuitate honorificentissime receptus, manere tamen in oppido noluit. at Alfonsi copiæ cum domum uersus cum impedimentis iter facerent: equites leuissimi Patauii emissi impressione in eos ad castellum Bouolentiam, quod abest Patauii passuum millia duodecim, cædeq; facta, milites ex iis centum equites sexaginta centurionemq; ipsum, qui castellum custodiebat, & præfectum equitum captiuos fecerunt. Alfonsi frater uix ægreq; fuga se hostibus eripuit. castelloq; capto, magno frumenti numero, magno multarum rerum commeatu, tormentisq; triginta cum iumentis curribusq; sunt potiti. iisq; Patauium adductis frumentum omne, ut esset agrestibus hominibus inopiæ leuamen, ibidem dereliquerunt. Ioannes Græcus ab Iulio dimissus uulnere leuissimo accepto eam rem confecerat. Hippolytus Montanianum, ut eo in loco reliquum euentum rerum operiretur, se contulit. Discessu in urbe Maximiliani cognito ob agrestium in rep. fidem Senatus iussit; ut annum totum nemo ex iis, qui deberet, à creditoribus



ad soluendum cogi posset. agrestesq; in urbe qui erant, triduo reuerti domum iussi. hostibus progressis animaduersum est eos sub terra tabernacula habuisse; ut tormentorum ex oppido uerberationes euitarent: cuniculosq; per plures, ut occulte muro appropinquarent, effecisse. tellus ipsa odore tetro infecta, sanguinem necemq; redolens, cadaueraq; omnibus in locis iacentia horridum spectaculum halitumq; toto ab eo oppidi latere ac regione multos dies præbuerunt. Senatus ubi cognouit templum Cartusianum, cuius diruendi facultatem legati non habuerant, magno usui Maximiliano fuisse; firmæq; ei munitionis & castelli instar præbuisse: arborumq; magnam uim sæpe hostes reip. militibus occultauisse; sæpe à tormentorum ictibus defendisse: legem sciuit; ut à portis mœnibusq; mille & quingentos circa Patauium passus quoquo uersus ædificia omnia eorum domini solo æquarent: arboresq; cuiusq; generis succiderent: lateres, tegulas, marmora, ferramenta, materiã aridam uiridemq; quò uellent, asportarent: qui id intra dies præstitutos non fecisset; illius eiusmodi fisco omnia cessura. maxime enim uoluit; ea ut planities spatiumq; ab omni re, quæ umbrã faceret, essetq; solida ac resistens, nudum uacuumq; permaneret: ne Patauium ullo cum hostium cōmodo aut præsidio amplius obsideri posset. eaq; postea lex ad hoc usque tempus sancta inuiolataq; semper fuit. eodem tempore, quod hostes in Liburnis reip. fines longe lateq; uastabant; Rasumq; municipium ceperat: rogatio est in Senatu lata; ut Aloysius Delphinus in Foroiulienfibus legatus cum Epirotis equitibus & manu reliqua eò celeriter contenderet. interim Angelus Triuisianus ab Illyrico ad Istros classem triremium quindecim, cui præerat, à Senatu iussus contulit. Flumenq; municipiũ; quod superiore anno captum resp. Maximiliano restituerat; audacissime aggressus, interfectis repulsisq; propugnatoribus, & scalis ad murum positus paucarum horarum spatio cepit. milites remigesq; illati cæde facta oppidum diripuerunt. qua in direptione cum uidissent reip. insignia, quæ in foro posita fuerant, fæde diruta delataq; ab oppidanis fuisse: indignatione perciti oppidum incenderunt. idem de arce, cuius præfectus eodem se die dedit, animorum ad ulciscendum ardore neque dum sedato fecerunt. Isdē diebus



diebus cum ad urbem Hieronymus Saornianus uenisset, in Senatu cum reliquis, qui eo munere fungebantur, affuit: nam (ut supra diximus) senator suffragiis declaratus fuerat. accidit autē, ut eo ipso tempore cum magistratum à Senatu creari necesse esset, qui magistratus rationes, tabulasq; militares conficit, quibus in tabulis nomina eorum, qui stipendia reip. faciunt, continentur; exercitibusq; conscribendis, aut omnino recensendis, probat, reiicitq; quos uult; quem Collateralem appellant Veneti: creaturq; perpetuus: quas ob res magna est is apud exercitum auctoritate, magnoq; apud remp. in honore, & nomine. cum magistratum cum legere patres uellent; omnia fere Senatorum suffragia Saornianum renuntiauerunt, hominis honori, dignitatiq; fauentium: qui Senatui parens ad exercitum munere obeundo Pataviu[m] est profectus. At in Tergestinorū finibus noctu manus hostium; quæ prædatum oppido exierat; interfecta est à reip. militibus, & capta. pauci sylvarum & noctis auxilio se occultauerunt; cladisq; nuntium oppidanis attulerunt. cognita interim cum Maximiliani mora medio inter Vicetiam Veronamq; itinere, tum Hippolyti ad Montanianum oppidum cum suis copiis sessione; legati Lemniaco ueriti; quod inter utrosque fere erat; milites, quos oportuit, eò miserunt; oppidumq; munierunt. id Hippolytus intelligens linguam non continuit: questusq; est graui addito ad querelam maledicto; eius rei, quam se breui posse consequi confidebat, euentum sibi è manibus ereptum fuisse. ea hominis in remp. maledicentia Senatus cognita, Alfonsiq; studium obsidendo Patauio adhibitum repetens, ad illam cogitationem rediit; ut utriusque plena odii facta atque consilia quāprimum uindicanda omnibus sibi esse modis statueret. itaq; literæ secreto ad Angelum præfectum classis datæ: Fossam Clodiā classem celeriter adduceret: atque uti nauigia minora Pado flumine subuehenda in naualibus confestim ædificarentur, præfectis eorum imperatum, ad simulationem Tergestinis obsidendis. utq; is sermo in uulgus efferretur; ne cognito reip. consilio suos fines Alfonsus præmuniret; patres curauerunt. tametsi Angelus; propterea quod ad Rasmus recuperandum Delphinus legatus & Franciscus Pascalicus equitum Epirotarum præfectus cum suorum manu & clas-



siariis eo se tempore conferebant; quod quidem paulo post primo impetu ceperunt; tardior ad eam rem fuit. Maximilianus missis ad Gasparem Seuerinatem; quem Vicetiae oppidi praesidio reliquerat; militibus Germanis tribus millibus, Veronam adiit. pauloq; post, cum paucis equitibus se Tridentum contulit: ad quem uxor eius eodem uenerat. de ea re Senatus per exploratores certior factus, simul reip. amicorum literis admonitus, Vicetinos ob Maximiliani praefectorum quotidianas direptiones; quas quidem propterea, quod nulla eis ab rege stipendia persoluebantur, in oppidanos exercebant; ita esse animatos, ut, si ad eos exercitus reip. mittatur, fore, ut eum in oppidum recipiant: pluribus biduo dictis sententiis, uti legati ad Vicetiam recuperanda omni cum exercitu proficiscerentur, tandem censuit. quodq; ad eas res, quae parabantur, magno auri pondere respu. indigebat: legem sciuit; quam postea maiora comitia probauerunt; uti magistratus omnes sine ulla stipe rei; p. impensa sex a Calend. Nouembribus menses obirentur. nam tributa quidem exigi amplius propè non poterant, excussa prorsus iam tot in aeternum collationibus, tot priuatim dispendiis ciuitate. constabat enim subductis rationibus undecies millies in id bellum auri libras remp. insumpsisse: multumq; per se se ciuium plurimos obsidione Patauina sustinenda, multum suorum fructuum direptionibus, & propinquorum, quos captiuos hostes fecerant, redèptionibus amisisse. Imperator legatiq; Senatus uoluntate intellecta, recensito exercitu, qui erat, praeter equites, militum octo millium, Citolo, qui ex uulnere nondum conualuerat, & Lutio & Ioanne Græco oppidi praesidio relictis, Patauio exierunt; atque ad Camisanum Vicum in Vicetinis finibus castra posuerunt. cum quibus Tauriso profectus Petrus Marcellus legatus milites mille, equites Epirotas centum quinquaginta, copiasq; alias coniunxerat. postero die omnes ad eam oppidi portam, qua Patauium aditur, se ostendunt: & quod murus eo ab latere uetustate dirutus propè intermittebat; fossæ aqua, quæ pluuiis creuerat, magna difficultate superata, paucis Germanis defendentibus Naldius cum suis militibus se in prooppidum iniecit: Gasparemq; Seuerinatem; qui, ut Venetos repelleret, cum turma equitum eo properauerat; praelio commisso,



commisso, dissectis primo impetu quamplurimis militibus, interfectis perpaucis tandem in oppidum repulit. Naldiiq; peregre-  
 gia ea in re uirtus fuit. alio ab latere Lactantius muro tormen-  
 tis perforato, atque immissis per foramina militibus magnum ti-  
 morem Germanis propugnantibus iniecerat. quæ quidem præ-  
 lia nox diremit. & nisi diem totum ingentes pluuiæ uias omnes  
 fœdauissent, fossas oppleuissent; difficilioremq; militibus pu-  
 gnandi rationem, & murum uerberandi tormētariis effecissent:  
 urbs eo die capi facile poterat. Naldius tamen & Lactantius cum  
 suis cohortibus ab iis, ubi pugnauerant, locis eam noctem non  
 discesserunt: portasq; oppidi atque fossas obsiderunt. erat unus  
 intus ciuis Guidus nomine, qui, dū ea sic ageretur, magno reip.  
 amore incensus tribus cum liberis aliquotq; amicis suis prooppi-  
 di portam, quæ Berga appellatur, cepit: missoq; ad Venetos, qui  
 rem significaret, pollicereturq; eis se portam illam traditurum,  
 armatus ut eos exciperet expectabat. legati equites Epirotas quin-  
 quaginta eo miserunt; qui rē cognoscerent, ad seq; reuerterentur.  
 Guidus ē summa turri uisis equitibus, magna uoce appellare eos  
 cœpit; ualuasq; aperuit. illi se intromiserunt: paulumq; progressi  
 milites Germanos offenderunt, qui facto in eos impetu extra op-  
 pidum, quā uenerant, uniuersos repulerunt. portaq; capta; cum  
 Guidus reliquiq; de superiore loco se defenderent; neque Ger-  
 mani expugnare illos possent; dato ab eis iureiurando nihil sibi  
 nocituros Germanos; se se eis dediderunt. statimq; omnes ad unū  
 contra fidei religionem partim ab illis interfecti sunt: partim se ē  
 turri præcipitauerunt, atque ita interierunt. ea nocte à Germanis  
 concilio ciuitatis coacto; cum illi nihil præsidii ab animi fortitu-  
 dine peterent; timore autem propè omnia trepidationeq; admi-  
 nistrarentur; eorum uoluntate legati tres ē ciuitate ad Imp. & le-  
 gatos missi oppidum se reip. tradituros pacti sunt, ea conditione  
 interposita; ut, quibus antea legibus sub reipu. imperio Vicetini  
 fuissent, eisdem etiam deinceps uterentur: Maximilianiq; mili-  
 tibus nullum ab exercitu detrimentum inferretur: liberumq; illis  
 esset suis cum rebus proficisci. his firmatis conditionibus Hiero-  
 nymus Saornianus præfectiq; aliquot cum parte exercitus tempe-  
 ratiore mane in oppidum recepti sunt. reliquus exercitus est in-



gredi prohibitus; ne urbem nobilem opulentamq; diriperet. hostes eodē die Germani milites quatuor mille quadringenti, optime armis instructi, ipsi & ætate & corporibus spectari maxime & timeri digni, & nisi animus eorum ducibus defuisset, ad eam urbem tuendam præclare idonei, equitesq; L X. cum tormentis & impedimentis & magno fœminarum & calorum numero abierunt; Gasparq; Seuerinas cum equitibus paucis, atque ii cū Veronam petere uellent; Bassianum iter facere sunt iussi. postremi equites Iuliani C X X. qui unā cum reliquis imperata Maximiliani faciebant; oppido egressi Ferrariam profecti sunt, quibus emissis omnibus imperator & legati se in oppidum intulerunt: quos ciuitas incredibili lætitia excepit: ut propē ab interitu erepti esse omnes uiderentur. Senatus iis de rebus certior factus, cum legati ad eum scripsissent imperatori esse in animo ad Montanarum reliquaq; eo ab latere municipia, quæ ab hostibus tenebantur, exercitum ducere; eo consilio improbato literas ad eos dedit: uictoriæ ipsorum ad magnas res conficiendas cursum leuioribus iis occupationibus non esse interpellandum: nec fortunæ reip. afflanti, & præsto ei esse properanti, moram afferri oportere: itaq; ad Veronam recipiendam statim contenderent: fore enim, si eo celeriter se conferrent; ut hostes imparati offendantur; ciuitasq; & amico per se in reip. animo, & hostium durissimis imperiis læcessita, oppido non communito, primo aggressu se se dedat, uti Vicetina fecerit. atque ut exemplo eius reliquæ ciuitates optimæ de rep. spem caperent; Vicetiæ atque agri eius finiumq; incolis quinque annos omnium rerum atque onerum leuatio est permiffa: utq; ii, qui debent, annum ad soluendum cogi nequeant, ei legi additum. Aloisio etiam Porto, c Vicetina nobilitate fortis ac præstantis animi adolescenti, ob eius in reip. studium ad equos leuis armaturæ, quos ei Senatus antea dederat, alteri totidē sunt ab eodem Senatu additi. etiam, ut legati edictum proponerent: si ciues, qui in hostium partibus fuissent, intra dies X V. Vicetiā redierint, ueniam illis à Senatu datum iri, præter paucos, quorum nomina recitata sunt: patres sanxerunt. Chrystophoroq; Mauro legato, ne Vicetia; reliquis tribus, ne ab exercitu discederent, mandauerunt. Interim Angelus præfectus classis, qui Fossam Clodiam



Clodiam triremes duodecim adduxerat tribus in Istria relictis, Senatus permissu ad urbem uenit: patresq; monuit: Pado flumine classem subuehi sine magno periculo non posse, munitionibus in ripa, ut ferebatur, ab Alfonso institutis; aqua propter siccitates exigua; nullo exercitu, qui à terra classi presidio sit: prestare autem, eas omnes, quas haberent, copias Veronam magna cum rei bene gerendæ spe ac tuto mitti, quam incerto euentu earum ullâ partem in Ferrariæ finibus periclitari. esse Pisaurum, esse Anconam: quæ ipse oppida; si Senatus uelit, posse capere non diffidat: habere enim se ab eorum nonnullis ciuibus internuntios, qui totum munus ciuitates concitandi, rei q; p. se dededi sibi deposcât; modo ipse classem reip. ad illa oppida ex inopinato afferat. esse Fanum, Senogalliamq;: quas diripere atque incendere nullum negotium sit. quod si à Romanæ reip. municipiis abstinendum sibi esse patres statuunt: posse se in Apuliam paucis horis ex Illyrico traicere: ibi materiam sibi non defore; neque etiam fortunam Diis uolentibus defuturam reip. iniurias à Ferdinando rege illatas ulciscendi. hoc sermone apud decemuirum magistros habito Angelus ad classem rediit. decemuires paulo post reliquis repudiatis rebus classis in Alfonsi fines profectiōē differri è rep. esse, legem iusserunt. alia deinde lex ab eisdem decemuiris iussa: ut eorum Taurisanorum & Patauinorum & Vicetianorum ciuium; qui hostes reip. fuissent; bonorum possessiones reip. nomine caperentur. duumuiresq; ad eam rem Ioannes Cornelius, Antonius Condolmerius; qui ambo ex quinqueuiris Senatu regendo erant; lecti: quibus binæ centesimæ ex iis, quæ fisco addixissent, cederent. classis itineri mora à decemuiris adhibita senatoribus sermonem dedit, querentibus, tot Alfonsi contra rempublicam odii scelerumq; facta non uindicari: frustra triremes classemq; ex Istris euocatam, frustra classem alterâ biremium & parui uorum nauigiorum ad Padum Atesimq; flumina facilius enauiganda iam esse comparatam: tantum pecuniæ temere impensum, si decemuires profectiōem impediunt, quibus illi uocibus permoti rem senatui permiserunt. Senatus pluribus dictis sententiis litteras ad magistratus Patauinos dedit: Fossam Clodiam ad præfectum classis milites quingentos statim mitterent. Angeloq; man-



dauit ; ut iis in naues receptis militibus hostio Carbonaria Padū  
ingrederetur : prædas abigeret : regiones , quas posset , ab utraq;  
ripa popularetur . posteroq; die in foro edictum publice proposi-  
tum , qui uellent ad diripiendos Ferrarienses suis priuatim nau-  
bus cimbisq; proficisci , per remp. licere ; dum præfecto classis di-  
cto audientes sint : quam quisque prædam faceret , suam fore . ea  
re magnus plebis numerus suis in nauigiolis se ad classē contu-  
lit . Dum hæc administrantur ; imperator legatiq; Veronam cum  
exercitu uadentes Suauium , municipium in plano ad primam al-  
pium decliuitatem ita positum , ut arx in iugo sit , præmisso equi-  
tatu & Gradonico legato receperunt interfectis hostium militi-  
bus non paucis ; qui à Maximiliani præfectis Verona , ut in arcē  
se inferrent , mittebantur . cumq; Veronæ appropinquarent ; equi-  
tatum præmiserunt ; ut ad portas se ostenderet ; si quis in oppido  
tumultus per amicos reip. fieret . iis ad portas peregrinitatibus , ne-  
mine se commouente , equites Sequani centum egressi , prælio le-  
uissimo cōmisso se in oppidum receperunt . ex quibus captus unus  
legatis renuntiavit esse in oppido militum tria millia , atque ex iis  
Hispanos plurimos , equitum alteros totidem ; ex quibus erant  
Galli quingenti ; quos amissa Vicetia præfecti regii Brixia euoca-  
uerant . quibus rebus cognitis imperator ueritus , ne , si eius copia  
oppido circumfunderetur , aliquod incommodum acciperet ;  
substitit ; neque ausus est ulterius progredi . quod quidem impe-  
ratoris consiliū ab Gritto & Marcello legatis atque ab Lutio , qui  
adeos Patauio uenerat , probabatur : tametsi Gradonicus legatus  
& Naldius audendum & conandum esse dicerent ; oppidumq;  
obsideri , & muros uerberari oportere contenderent . inter quos  
cum minus conuenire potuisset : scriptis ab legatis ad Senatum  
de ea controuersia literis , quid ab eo iuberetur , expectare con-  
stituerunt . Senatus legatis respondit : imperatori se totam rē per-  
mittere : confidere se se , quod è repub. sit , illum facturum . atque  
interim , quoniam ab Lemniaco milites equitesq; reip. cum agre-  
stium manu ab ea regione , quæ trans Atesim est , ad Veronæ mu-  
ros iussu imperatoris se conferebant : ipse quoque suo ab latere  
partem exercitus ad oppidum misit : ut hostes duobus à lateribus  
peti se intelligerent ; ciuitasq; ea re magis magisq; permoueretur .  
acciditq; ,



acciditq; , ut utrique sæpius cum hostibus congressi non paucos  
 ex iis caperent , plures etiam interficerent , præliisq; secundissimis  
 se reciperent . neque tamen is , qui futurus putabatur , oppida-  
 norum motus fuit : neque ciuitas parte ab ulla deditiois uocem  
 aut indicium protulit . eas obres relicto ad Suauium præsidio Epi-  
 rotis adiectis equitibus , qui quotidie ad Veronæ portas currerēt,  
 & pabuli , cuius magnopere hostes indigebant , copiam eis fieri  
 prohiberent ; imperator ad Montanianum recipiendum cum re-  
 liquo exercitu profectus , qui oppidum reipub. nomine peterent,  
 mane adueniens præmisit . præfectus Alfonso tueri se illud uel-  
 le cum respondisset : tormentis statim positis muri partem Vene-  
 ti celeriter deiecerunt . qua re oppidani permoti deditioem fa-  
 cere uolentes , modo ipsi militesq; suis cum rebus tuti ab exercitu  
 essent , recepti non sunt . itaque postridie direptionem atque in-  
 teritum ueriti , se se nulla conditione interposita dediderunt . erant  
 in oppido Alfonsi milites equitesq; septingenti : qui omnes armis  
 equis exuti sunt . Augustinus Villa præfectus in custodia habitus ;  
 ut cum eo Federici Vendramini ; qui propinquus legato Gritto  
 erat ; atque in municipio eorum finium Abatia , cui præerat , pau-  
 lo antea captus Ferrariæ custodiebatur ; permutatio fieret . poste-  
 ro die Ateftini ad remp. redierunt . quos Rodigienses cum ple-  
 risque earum regionum municipiis imitati idem fecerunt . Mon-  
 filice dein , missis eò Patauinis è uicinatibus agrestium hominum  
 aliquot millibus ; qui paruo equitum militumq; interiecto nume-  
 ro magni exercitus speciem præbuerunt ; atque oppidanis , qui  
 illos in acie adeuntes de superiore loco prospectabant , ea re per-  
 territis ; se reipub. dedit . in alpium quoque iugis Marosticani,  
 finitimiq; his in plano positi Bassianenses Germanis eiectionis mili-  
 tibus , tum maxime campestris Citadellani missis ad præfectos  
 Patauinos internuntiis rei se p. lubentissimi dediderunt . eorum  
 finium pagis octo ; propterea quòd præstanti studio in rempub.  
 fuissent ; eadem munus leuatio , quam Senatus Vicetinis de-  
 derat , atque securitas tradita . laxior etiam custodiæ conditio  
 Leonardo Trissino , Brunoro , Saregio , reliquisq; Maximiliani  
 præfectis , in urbe captiui qui erāt , ob regias literas ad Senatū scrip-  
 ptas est à decemuiris permisa . Angelus interim classis præfectus



subuectis Pado nauibus utranque fluminis ripam proximaq; ripis loca populabatur. prædæ undiq; abigebantur. quæ asportari minus poterant, corrumpebantur. ædificia uillæq; quarum magna erat & peregregia illis in finibus copia; quoquo uersus incendebantur, quod ubi senatui est allatum; literas ad Angelum dedit: ædificia incendi non oportere: quas uellet, atque unde uellet, prædas ageret: à uillis atque tectis comburendis abstineret. Inges autem uastitas iam illata eas literas inutiliores reddidit. In urbe Patauina ciuibus, qui erant in custodia, quatuor, Alberto Trapolino, Bertucio Bagarotio, Iacobo Leoni, Ludouico Comiti; propterea quod in sexdecemuirum collegium à sua ciuitate adlecti, nullo unquam laceffiti maleficio, nulla iniuria pellesti hostiliter se in remp. gesserant; Calendis est Decēbris in foro decemuirum lege laqueo gula fracta, & bona fisco addicta. quæ quidem res, quod fere semper in urbium, & regnorum conuersionibus fieri consueuit, ut plerique in nouorum dominorū gratiam se prioribus dominis aduersarios præbeant, à multis habitum est aliquanto acerbior, & ab huiusmodi temporibus aliena: nāq; multi eius supplicii exemplo fortasse perterriti, ad reip. nomen, atque ad deditionem effecti sunt duriores. Ioannes Franciscus Mussatius item Patauinus eadem lege decemuirum condemnatus est; ut in Creta insula, quoad uiueret, exularet. qui tamen quadriennio post ab exilio reuocatus est, patriæq; redditus. Angelus cum ad eum uicem; quod abest Ferraria quinque millia passuum; ad quem naues, quæ à uadis Venetis ueniunt, appellantur; superato flumine classem adduxisset: hostes magna cum manu obuiam progressi duas ab aggeribus triremes; quarum erat una, qua ipse uehebatur; tormētis perforauerunt; remigesq; aliquot interfecerunt. qua necessitate adductus præfectus; quod hostibus noceri propè non poterat: nam ripæ agger ad fluminis incrementa antiquitus institutus eos tuebatur; ne uulnerari è nauibus sagittarum aut fistularum & tormentorum iactu possent: ad Vicum Poleseliam in ea Padi ripa situm, quæ Rodigium spectat, rediēs munitionem in altera fluminis ripa celeriter excitauit: qua hostes, si aduentarent, repellerentur; neu classi nocerent. uix effecta munitione hostes, ut eam caperent, se non semel circumfuderunt.



150

derunt. postremo eam firmioribus copiis adorti; cum propè in aggeremmunitionis uersarentur; Hercules Cantelmius, Sigismundi Neapolitani claro loco nati filius, magnæ spei adolescens, cum se audacissime in propugnantes incitauisset: equi lapsu humi fusus à remigibus interfectus est. cuius in oculis amicæ manu scriptæ sunt repertæ literæ: quibus illa multis precibus ab adolescente petebat; ne cum Venetis prælio contenderet. eoq; die Gradonicus legatus ab exercitu cum equitibus & militibus octingentis Senatus iussu classi auxilio ad alteram fluminis se ripam contulit. Ciuidale interim Carnicum in alpibus, Feltriæq; arx, dein Scalamunicipium natura & artificio communitum, itineri, quo Germania magnopere aditur, adiacens, à reip. copiis est capta. erant in eius arce milites Germani octoginta. neque enim fere plures capere locus exiguus poterat: qui se fortissime defendebant: in quos cum à reip. militibus tormenta exerceretur: pilæ, quas emitterent, ipsos defecerunt. eamq; ob rem differri oppugnationem necessitas cogebat. atque unus ex agrestibus, qui aderant, desiderari pilas sentiens, ad præfectos accurrens, ego uobis, inquit, oportune pilas dabo: ad proximumq; ei loco tumultum eos duxit: quo à tumultu pilæ ferreæ triginta tegebantur; quas hostes abscondiderant, haud facile dictum est, quantum in bello fortuna possit. nam ut casus tulit; ut is agrestis, qui sciret eas ibi pilas esse, illo temporis puncto eodem uenerit; quæq; dicerentur, audierit: ita casu magno factum est; ut pilæ hostium tormentis reip. ita conuenirent; ut ad id confectæ uiderentur: infartæq; iis, & eiaculatæ perfecerint; ut arx eo die caperetur cum Germanorum omnium interitu, præter eorum præfectum: qui ad urbem uiuus est perductus. quæ quidem paulo post senatus arcem magnis munitio- nibus tutiorem reddidit. atque est eodem in itinere ter mille passus ante Scalam mons saxeus præcelsus maximeq; directus ad perpendiculum uiæ imminens: in cuius superiore parte ipso in saxo specus cum perennis aquæ fonte natura factum homines cōcinnauerunt: arcemq; paruam ex eo effecerunt. ea omnino arx adiri pedibus non potest. fune autem demisso cum lignea sedecula singuli homines rota desuper uertente attolluntur: ac quicquid aliarum rerum inferendum est, eodem uno subleuatur, atq;



in arcem importatur modo. ei arcis inter montem flumenq; quod  
arctam atque angustam uallem dirimit, subest ea, de qua dixi,  
perexigua sane uia: qua commeare iis, qui in arce sunt, inuitis  
licet nulli: propterea quod saxi modo ab ea deuolutis quoslibet  
obruui, atque interfici nullum negotium est. ea quoque arx, quam  
Couolum appellant, eorum deditio, qui illam custodiebant,  
ad temp. rediit. in lstris etiam præda celebris ab Epirotis est equi  
tibus & cædes hostium facta. Germanis autem, qui urbem inco  
lebant, à Senatu petentibus; ut, quoniam Maximilianus permise  
rat; ut, qui uellent ex eius ditione urbem adire mercaturæ cau  
sa, eis liceret; patres item concederent, eos tuto uenire posse: fi  
des est ei reipublicæ interposita: itineraq; quæ toto bello clausa  
fuerant; patefieri cæpta sunt cupidissimis omnibus. Marcus An  
tonius Contarenus cognomine Camalis, quem senatus paruina  
uigiolis præfecerat, patrum iussu ab Angeli classe profectus Cy  
maclium inter duo Padi hostia Vatreum & Caprariam, oppidū  
magnopere piscatorium, diripuit: ædificiaq; plurima incendit:  
quæ Alfonso non parua clades fuit: quod ex eius oppidi septis  
calamo reticulato uadis triginta millia in circuitu passuum eo ip  
so fere tempore ingēs uis pisciū biduo triduo ue maxime pluuio ca  
pta, & sale iniecto reposita, magnis redimi pretiis portoriisq; cō  
fueuit. Angelus cum nauibus triremibus ad latitudinem fluminis  
dispositis pontem inieciisset; quo Gradonici equites transportarē  
tur ad incursiones exercendas, hostesq; qui munitionem copiis  
omnibus aggressi sæpe fuerant, sustinendos: postea, ne triremes  
impedirentur, quo minus ad gerendum bellum presto essent, eū  
dem minoribus in nauibus pontē imposuit: traiectoq; leuissimo  
equitatu omnem illam oram fuga terroreque impleuit: quoad ho  
stes missis ab Iulio Ferrariam equitibus Ludouico Pio præfecto,  
quem Verona euocauerat; atque ab Aloissi regis ministris Bri  
xia item equitibus & militibus quamplurimis, exercitum duo  
decim millium armatorum confecerunt. ac Ludouicus quidem  
una cum Hippolyto ad classem ripamq; fluminis audacissime  
se inferens interfectus est, capite media cum galea pila ferrea ca  
pi in eum cadente perfracto. deinde, quod hostes in munitione  
capienda frustrabantur: Alfonsus infra eum locum duo millia  
passuum



passuum munitionem & ipse in ripa facere instituit; quæ in reditu impedire classem posset tormentisq; deprimere. quod ubi Senatus est allatum: literas ad Angelum dedit: si ei uideretur, classem reduceret; ne confecta hostium munitione periclitaretur: id unum in primis curaret; ut classem, quam à ciuitate accepisset, saluam sospitemq; reip. restitueret. ad quas ille literas ita rescripsit: si classem reduxisset, fore; ut omnem illam oram, quæ cis Padum est, hostium exercitui diripiendam relinqueret: itaq; id se tum facturum, cum illa munita esse loca cognouisset. eodémq; tempore, quod ad patres uenerat Bulfardus Germanus; qui ad urbem uentitare consueuerat; ad speciem, ut eis se offerret ad pacem inter regem remq; p. tractandam; re, à Maximiliano eius rei cupidissimo clam missus: decem uiri legatos duos creauerunt; qui cum Bulfardo ad regem statim profiscerentur; Ioannem Cornelium quinquenarium Senatu regendo, Aloisium Mocenicum; qui Feltriæ atque in alpibus legatus tunc erat. egerant autem cum rege ciuitates Germaniæ liberæ; ut pacem cum rep. faceret: quarum quidem fere omnium municipes non pauci in urbe mercaturam exercere consueuerant; ægreq; ea re carebant. Paulus quoque Licesteniensis, cuius erat multo maxima apud regem auctoritas, uti antea demonstrauimus, pacis ei auctor semper fuerat. uxor insuper regia idem cupere maximopere uidebatur. præter hæc Enricus Britanniæ rex ab Iulio & Aloisio & Maximiliano per literas diligentissime scriptas petierat; ne cum Veneta ciuitate bellum exercerent: quæ si nusquam existeret; construi tamen omnibus ab hominibus ad publicam orbis terrarum utilitatem atque ornamentum profecto debuisset. idem quoque multo etiã accuratius legatus regis, Romæ qui erat, ad Iulium detulerat. quibus rebus cognitis spes Senatum tenuit, breui fore, ut sibi cū Maximiliano conueniret. atque illis quidem diebus Baldassari Scipioni Senensi; qui Liuiano propter uirtutem maxime charus fuerat; equitum grauis armaturæ L: præfectura est à Senatu tradita. Bonifacioq; Sonzinio; qui se amanter pro repu. Patauino bello gesserat; auri libra anni singulis immunitasq; rerum omniū ei liberisq; posterisq; eius; tum ut ipse liberiq; extra ordinem in Senatum legerentur; dono datum. Padus interim aucto Galli-



cis repentinis imbribus flumine, ut summas plane ripas adæqua-  
ret; pontem, qui minoribus erat nauibus impositus, aquarum  
uiolentia disiecit. Angelus, traiectu ne careret, triremes, uti an-  
tea fecerat, contra cursum fluminis iterum firmavit; quæ pontem  
sustinerent. hostes autem, ubi uiderunt fluminis incremento tri-  
remes alte sublatas pulcherrime tormentorum pilis obici: pri-  
ma nocte magna cum manu Ferraria egressi ad ripam contende-  
runt: tormentisq; plurimis adductis naues impeditas uerberare  
exaggere ictibus creberrimis cœperunt: neque prius destiterunt;  
quâ classe penè uniuersa perforata & disiecta Angelus, qui som-  
no expergefactus suo se lectulo eiecerat, cum signo aureo, ne ho-  
stes eo potirentur, publicisq; literis; tum ductores reliqui cymbis  
nauium excepti fuga salutem peterent. remiges se flumini omni-  
bus è nauibus dederunt: aduersamq; ad ripam delati magna pars  
ad Gradonicum se receperunt. una triremis primo aduentu per-  
remos, qui aggerem contingebant, ab hostibus ad ripam attra-  
cta cum hominibus non paucis est capta. ipsi omnes interfecti.  
altera succensa est. ex omni classe triremes duæ nauigiaq; minora  
aliquot secundo se flumine demiserunt; ad finesq; reip. nullo ac-  
cepto detrimento redierunt. tres depressæ interierunt. munitio-  
ne cum plurimorum remigum & militum interitu hostes potiti.  
triemes nouem Ferrariam sunt perductæ. Ea clade patres cogni-  
ta è uestigio literas dederunt cum ad Gradonicum legatum: si ho-  
stes Padum traicerent, interiorum Atesis fluminis ripam inter-  
scinderet, ne Rodigium possent accedere; ipse se in tutum cum  
iis, quas haberet, copiis reciperet: tû ad legatos Gritum & Mar-  
cellum; qui erant in exercitu ad municipium Leonicænorum; ut  
aliquid copiarum auxilio ad Gradonicum mitterent; quo se fa-  
cilis finesq; illos ab hostibus uictoribus tueri posset. Scripsere  
etiam ad Fossæ Clodiæ magistratum: cymbas iuberet Padum in-  
gredi; quæ fugientes reciperent; & si qui se in syluas aut paludes  
abdidissent, perquisitos repertosq; subleuarent. Datæ insuper ad  
Ioannem Maurum literæ; qui in Istris cum triremibus, quas ap-  
pellant nothas, tribus, legitimis duabus relictus fuerat; ut ad Pa-  
di hostia contenderet; cumq; Marco Antonio Contareno, qui  
triemem suam nauigiolaq; non pauca incolumia conseruaret, se  
coniungeret.



coniungeret. Senatu postea eodem die coacto ad classem redin-  
tegrandam multoq; ampliore instituentam, latum; ut in Cre-  
ta triremes octo, Corcyrae duae, in Dalmatis sex, in urbe quatuor-  
decim confestim armarentur; atque ex his duarum remiges po-  
stridie, aliarum duarum perendie conscriberentur. Angelus in-  
ter haec ad urbem rediit: clademq; illam non tam uere ac explora-  
te, quam ut ipsi minus dedecoris afferebat, patribus exposuit.  
quem tamen eius sermonem pleriq; ex earum, quae perierant, tri-  
remium praefectis ad urbem & ipsi redeuntes audacter refellerunt.  
probraq; omnia in illum iaci coepta: nihil in eo consilii, nihil pru-  
dentiae, nihil omnino prouidentiae; crudelitatis, auaritiae, arrogan-  
tiae plurimum semper fuisse: triremes ponte implicari minime  
omnium debuisse: si paulum supra eum, in quo erat, locum ri-  
pae, aggerem deiecisset; flumen ipsum, quod tam alte creuerat,  
suamet illuione & munitione & classem tutam ab hostibus pun-  
cto temporis redditurum, regionemq; illam pulcherrimam & fer-  
tilissimam longe lateq; uastaturum & foedaturum fuisse. quae na-  
autem aptior atque facilius reip. morem gerendi occasio dari eia  
fortuna potuisset, quam quod est illi ea fluminis tam uasti ma-  
gnitudine exuperantiaq; subministratum? ita illum, quae e repu-  
non erant, effecisse: quae usui & dignitati magnopere fuissent;  
quae securitatem classi attulissent; quae hostium cogitationes & co-  
natus omnes frustra uissent; praetermisse: unum modo magna  
semper diligentia curauisse; ut cymbas praeda onustas singulis die-  
bus domum mitteret. his cum uocibus penè omnium, qui in ea  
classe fuerant, & cladi superfuerant, Angelus palam accusaretur:  
Senatus frequens rogationem iussit; uti de ea re triumui-  
ri ex aduocatis reip. quaerent: quod reperissent, intra dies XV.  
ad Senatum referrent, atque is ea poena, quam Senatus proba-  
uisset, plecteretur; atque ut proximis comitiis praefectus classis  
eius loco legeretur, etiam perlatus. lectusq; est Antonius Tro-  
nus templi Marcii procurator: quo praefecturam respuente, quod  
non esset rebus maritimis assuetus, comitia Petrum Balbum Pa-  
tauii magistratum sublegerunt. qui quidem Balbus antequam  
Patauius decederet, hominem ex plebe, qui filia pro concubina  
utebatur; ipsamq; filiam, scelere per indicium delato, comprehen-



di iussit : fassosq; securi ambos percussit , igne patris cadaueri etiā  
supposito. Ad hæc, ut aliquando Iulii iracundiæ finis fieret , Sena-  
tus sæpe consultus , sæpe amplius consuli iussus tandem censuit;  
ut legati reipub. Romæ qui erant , tabulis ab Iulio traditis , qui-  
bus indignissimæ conditiones reip. imponebantur , scribendo ad-  
essent , ut iuri scilicet , quod in sinu Adriatico antiquitus respub.  
obtinuerat , ab omnibus , qui eo mari nauigent , exigendi , pro  
eorum tantum nauigiis , qui Romani Pontificis imperio subes-  
sent , & eo mari nauigarent , quodq; in Ferrariæ dominatu , quā  
aliquando in suam potestatem redegisset , permultos annos habue-  
rat , quodq; ullo nūquam tempore in Flaminia oppidis ei fuisset ,  
reip. nomine cederent : eamq; contra rem Romanam fecisse fa-  
terentur ; ueniamq; suppliciter peterent . ea res quod ui fiebat , Se-  
natui nulla libere decernendi potestate relicta , tot regibus hosti-  
bus , tot reipu. oppidis bello captis , retentis ab Iulio in urbe sex  
legatis summa dignitate & nobilitate ciuibus , tum illis , qui è Fla-  
minia in uinculis ad illum sunt perducti , ipsius interdicto , cui  
tamen iam pridem paruerant satisq; fecerant , etiam nunc urgen-  
te : minus molesta patribus fuit ; minusq; ei rei , ne fieret , obstite-  
runt ; illud animis atque sermonibus diu multumq; repetētibus ;  
ui atque iniuria coactis ab hominibus quod sit , pro infecto habe-  
ri consueuisse : itaq; & naturæ , & gentium , & ciuili iure , & legi-  
bus omnium populorum esse constitutum . unū autem se se con-  
sequi , ut Iulius inimicum in rempub. animum deponeret ,  
neque amplius eius hostibus auxilio uellet esse : quod  
quidem se facturum pollicebatur : magno sibi  
adiumento ad reliquum bellum conficien-  
dum fore arbitrabantur . atque his  
rebus agitatis , annus finem  
habuit .



153

PETRI BEMBI RERVM VENETARVM HISTORIAE  
LIBER X.



ANNO insequente inito hostes Verona egressi; ut in pagos plerosque, qui exercitum reip. receperant, rebusq; omnibus inuierant, iracundiam exercerent suam; atque inde pabuli copiam aliquam in oppidum importarent: cum quinque millia passuum processissent; ad aquæ Martinianæ pontem substiterunt: ut nostris, qui re per exploratores cognita ad illos repellendos contēdebāt, fluminis transitum impedirent. erat autem præmissus ad eam re ab Imperatore legatisq; Leonardus Apulus cum expeditis militibus & equitibus quamplurimis. is ubi pugna ante pontem magno animo commissa tamen traicere hostibus, ut se priores in ponte constipauerant, angustias defendentibus se non posse uidit: equites Epirotas triginta ad superiorem fluminis partē longo circuitu, ne ab hostibus conspicerentur, cum reliquis mandatis misit. illi itinere celeriter confecto, repertis in primo colle uadis flumen transierunt. eodemq; & circuitu & celeritate usi, magno clamore sublato repente in hostes à tergo impetum fecerunt. qui noua re perturbati; cum reliquum adesse exercitum crederent, & prælio ancipiti sibi esse decertandum existimarent; atque ii, qui à fronte nostros sustinebant, sibi ueriti sæpe respicerent, pugnamq; interim remitterent; nostri ardentius instarent: relicto ponte omnes se in fugam coniecerunt. ea in fuga per plures interfecti sunt: capti equites cataphracti L. ex leuioribus circiter ducenti, præfectiq; clari nominis sex, ad urbēq; missi, & signa quatuor relata. Saornianus post hæc ad urbem rediit: magistratuq; repudiato aliis in rebus maiori se reip. fore usui est pollicitus. Erat tum in urbe Philippus Vladislai regis Pannoniæ legatus: qui à rep. superiorum pensionum reliqua sibi dari postulabat. ei Senatus, quod pecunia propter quotidianos belli sumptus dependi minus posset, excusatione interposita, gemmas, purpuram, te-



lasq; ceteras sericas, laneasq; pro summa librarum auri trecenta  
rum dari iussit. pauloq; post eodem legato petente ad reliquas res  
quadraginta sunt auri libræ numero additæ: ipsi libræ quatuor  
dono curatæ. ad Enricum etiam Britannia regem adolescentem  
Senatus legatum creauit Franciscum Capellum, honoris illius &  
beniuolentiæ institutæ causa. Hatriani, quod est oppidum inter  
Padi hostia: prædæ nomine ab Angelo præfecto classis sub reip.  
imperium redacti, cum ab Alfonso ut ad se redirent, sollicitaren-  
tur: legatos ad urbem miserunt, uelle se ab repub. non recedere.  
itaque & qui sibi ius diceret reip. nomine, & armatas naues, qui-  
bus se defendere ab Alfonsi contumeliis possent, suppliciter pe-  
tere. Quãobrem Senatusconsultum factum est, Hatrianos de-  
fendi oportere, senatui uideri. igitur & prætor eis datus Leonar-  
dus Bembus, & naues armatæ decem ad eos missæ: quibus præ-  
sidiis postea usi in fide, atque officio permanserunt: tametsi Alfon-  
sus antequam auxilia conuenirent, illos, pagosq; aliquot demissio-  
res in Padi ripa, Venetisq; finibus male habuerit. at hostes iterum  
Verona egressi, multosq; uicos depopulati, interfectis propè in-  
colis omnibus, partem suorum, quos nostri obuiam progressi  
aut occiderant, aut captiuos fecerant, amiserunt. Tertio autem  
ob pabuli inopiam idem ausi multo maiore accepta clade, Alexio  
tamen Bua turma Epirotarum præfecto, ob equi lassitudinem ab  
ipsis capto se in oppidum receperunt, quibus in rebus omnibus  
imperatoris maxime studium uigilantiq; extitit. itaque febricu-  
la tentatus accersitis Patauio medicis, tamen conualescere non po-  
tuit: crescenteq; ui morbi cum se breui moriturum cognosceret;  
adhibitis legatis exercitum Lucio Bononiensi commendauit, at-  
que ipsum, & præfectos reliquos grauissimis amantissimisq; uer-  
bis monuit; ut suam fidem & beniuolentiam reip. præstarét: quæ  
si perierit; uirtus omnis Italorum animorum, resq; ipsa militaris,  
quam adhuc quidem ipsi uni sustinuissent, unà cum illa perierit.  
Quis enim inquit uos alet, prouehet, ad exercitus regendos uo-  
cabit; hac terrarum parte in regum barbarorum potestatem reda-  
cta? hæc atque his plura cum dixisset, paulo post mortem obiit  
apud Leonice nos septem & sexaginta annos natus; molestaq; ea  
magnopere ciuitati exercituiq; mors fuit. cadauer ad urbem de-  
latum



latum funere amplissimo & concelebratissimo atrata ciuitas extu-  
lit. imperatore mortuo, Ianes Fregosius Ligur eius equitibus re-  
gendis præficitur : quibus tamen etiam uiuo illo præesse consue-  
uerat. Leonardusq; Apulus ob uirtutem, atque in reip. studium  
stipendio à Senatu auctus est, duobusq; fratris eius liberis pensio-  
nes annuæ dono datæ : eamq; profecto legem sententiis omnibus  
patres conscripti probauerunt : ut non modo nulla reiecerit ; sed  
etiam ne una quidem, cui non liqueret, in oculis resederit : quæ  
res penè pro miraculo est habita. fuit quidem certe singulare, ac  
peregregium omnium ordinum, totiusq; ciuitatis in Leonardum  
studii atque beniuolentiæ indicium. Vbaldus deinde Gallorum  
internuntius Mediolano ad urbem uenit, pollicitusq; est præfe-  
ctorum regionum nomine : si Gallos, qui essent in custodia ur-  
bana, Senatus restituat : ipsos ciues quosque Venetos unà cū præ-  
fectis reip. qui Mediolani custodirentur, missos facturos. itaque  
quatuordecim Gallis Vbaldo traditis, Brixiamq; missis, ipsi Iusti-  
nianum Maurocenum, Aloisium Bonum, Petrum Gradonicū,  
Franciscum Memmiū, ciuesq; alios, quos habebant, hominesq;  
militares tres Vincentium Naldium, & Vitellium, & Braccium  
libertati restituerunt. atque ut scribendo sapius ad Maximiliani  
exercitum, qui Veronæ erat, redeatur. Hispani ex eo milites, ho-  
minum scilicet natura, & moribus multo callidius ac sapientius  
Gallis, atque Germanis hominibus genus, cum uiderent Vene-  
tos castris ponendis oppido propiores esse factos : nam à Leoni-  
canis aliquot passuum millia Veronam uersus se contulerant. si-  
mul eos breui ad murum atque portas accessuros, urbemq; obse-  
suros uererentur : ut quid quæq; domus, atque familia uoluntatis  
in reip. haberet, si possent fallendo cognoscerent : nocte intem-  
pesta per oppidum, cum magno armorum sonitu incitati, cucurre-  
runt ; nomenq; Marcium, quod est insigne reip. sæpe in cursu con-  
clamauerunt. quo exaudito à plerisq; illos esse Venetos, creden-  
tibus, qui se in oppidum intulissent, eadem nominis acclamatio-  
ne est responsum datum ; salutatioq; ueluti mutua facta. illi eas  
domos, unde uoces ueniebant, atramento signauerunt ; posteroq;  
die repetitis notis omnes ad unam diripuerunt. quibus rebus con-  
sequeuti sunt : ut & reliquis amicis reip. timor iniiceretur, ne quid



ultra facere aut dicere auderent, & ipsi præda illa pro stipendio, quod non persoluebatur, ad se sustinendos uterentur. erant in urbana perliberali custodia, uti supra demonstratum est, cum Patavii, tum in Istriis capti Germani regis præfecti sex: salutabanturque quotidie ab amicis & familiaribus suis propè ut liberi. corum quinque noctu, custodibus in cœna occupatis, tenui perrupto muro ad aquam se nullo strepitu contulerunt: cymbaque ad biremem clam à suis comparatam uesti in ea Tergeste perfugerunt. uni ut fugeret persuaderi non potuit: ne fidem, quã unã cum reliquis reip. dederat se non abiturum, falleret. Post hæc triumviri; quorum erat è collegio Bernardus Bëbus pater meus; confecta quaestione Angelum Triuifanum; qui classem turpiter amiserat; ad totius ciuitatis iudicium maiora comitia detulerunt, ea lege per ipsa comitia prius rescissa; quam Senatus, ut ad se referrent, iussit: tabellisque eorum recitatis; qui permulti contra eum testimonium dixerant; causaque dies aliquot agitata, condemnare tamen illum primis sententiis non potuerunt: propterea quod ab reliquis ciuibus; qui eo bello improbe remp. gesserant; qui quidem erant plerique; atque ab eorum propinquis & necessariis magno opere laboratum est, ne condemnaretur, ueritis, si ille pœnas dedisset, ne ad ipsos etiam eiusmodi iudicia descenderent. quæ sanè res bonis omnibus magnam molestiam attulit: quod Angelo absoluto nihil amplius in rep. seuerè, nihil omnino ex dignitate posse agi propè constaret. postremo uero cum triumvirum actionibus diligentioribus, tum eiusmodi bonorum querelis permota concio triënum ab urbe urbisque finibus esse Angelum exulem iussit. at ne classi redintegrandæ; quam in rem patres incubuerant; milites aut remiges deessent: lex est in Senatu lata: ut exules maritimis ab oppidis atque insulis reip. ob homicidium qui essent facti; si pace cum mortui propinquis inita menses sex in classe reip. sua impensa operam nauauerint, aut ad id uicariū dederint, restituerentur, exceptis iis, qui hominem constituto occidissent. Alfonsus uero classis reip. clade non contentus copias, quas confecerat, traiecto Pado ad fines Rodigianos uexandos ac depopulandos misit. ex copiæ in pago Alfonsi finium postremo se se uallo munierunt, & paruo præsidio ad uallum relicto instructæ;



155

structæ; ut, quod intenderant, etiam perficerent; progrediebantur. Gradonicus Legatus, Rodigii qui erat, ea de re ab exploratoribus certior factus, ante lucem cum equitatu, & peditatu oppido egressus Epirotas aliquot præmisit; qui hostes uelle aggredi simularent; lenteq; reuerrentes eò traherent, ut æquo loco præliū committi posset. hostes Epirotis uisis in eos impetum fecerunt. illi, ut erat eis imperatum, paulatim recedentes in nostri agminis conspectum eos perduxerunt. legatus cohortatus suos pugnae signum dedit. neque hostes sibi defuerunt. concursus est ab utrisque ita acriter; ut pugna diu anceps, atque ambigua fuerit. tandem hostes fessi repelluntur: seq; ad pagum munitionesq; suas recipiunt. nostri hostium regressu incitatiores facti cum aliquandiu ante uallum pugnauissent; munitionem perfregerunt; eosq; in fugam omnibus a partibus dederunt. quos Epirotæ confectati plerosque interfecerunt: equites utriusque armaturæ circiter nonaginta cum eorum præfecto captiuos fecerunt. capti quoque sunt eodem tempore in Veronensium finibus Sequani equites non sanè pauci: cum tamen illi etiam Epirotas duodecim nos temere à reliquis digressos quodam in pago dormientes item cepissent. captusq; paulo post una cum uiginti ex eius turma præfectus equitum Gallorum Clea; qui Maximiliani auxilio Veronam uenerat: ad urbemq; missus. Iulius autem Pont. Max. ubi à rep. omnibus suis postulatis satis esse factum cognouit: Legatis; qui quidem erant quinque: nam Pisanus paulo ante morbo implicitus mortem obierat: ad sacra, quæ se præsentē fiebant, atque ad pedis osculum admissis magna populi Romani frequentia interdictum abrogauit: deq; eo literas ad omnes reges dedit. quibus rebus cognitis supplicatio à patribus est indicta: gratiaq; diis immortalibus omnibus in templis acta. paucisq; post diebus Hieronymo Donato apud Iulium manere iusso, qui legationem exerceret; cæteri legati pedibus Anconam profecti, reliquo itinere in longis nauibus, quas patres ad eos subleuandos eò miserant, confecto domum redierunt. diebusq; æque post paucis ciues ii Veneti; qui belli initio in Flaminia contra fidem datam capti, atque in Romanos fines perducti eo tum loci custodiebantur; ab Iulio sunt dimissi. dimissi quoque ab Ioanne Iacobo



Triultio, liberalitatis in remp. nomine, ciues item Veneti tres; qui  
tribus Galliae municipiis praefuerant, Mediolaniq; in custodia il-  
los menses totos fuerant, Ioannes Grimanus, Alexander Geor-  
gius, Philippus Calbus: atque usque in urbem ab eius ministro  
perducti. Aloisius Mocenicus, Ioannes Cornelius legati ad pa-  
cem cum Maximiliano tractandam missi, uti superiore libro de-  
monstratum est, atque in alpes profecti, regiis internuntiis, qui  
adeos uenerant, reipub. datis muneribus. ea erant uini Cretici  
pretiosioris, cerae albæ ad tenebras expellendas; fructuum in  
Aegypto conditorum ad regias epulas omnis propè generis non  
parua copia: sermonem cum iis complures dies habuerunt, non  
unisq; in locis una fuerunt. neque tamè pax iniri potuit; cum illi  
omnia, quæ in Maximiliani potestate proxime fuerant, à Sena-  
tu peteret. Senatus nihil eorum, quæ ante bellum obtinebat, uel-  
let amittere: dependere quidem Maximiliano aliquam pecuniæ  
uim se obligasset: si de reliquis fœderis capitibus, quæ propone-  
bantur, conuenire inter ipsos potuisset: sed obstinatione, duriti-  
eq; ambarum partium factum est, ut infectis rebus ab utrisq; do-  
mum discederetur. ita ea multorum dierum tractatio & mora,  
quæ suspensos atque sollicitos patrum animos habuerat; postre-  
mo ad nihilum rediit. Interim, quod Lauretanus, qui est pagus  
in Padi fluminis deriuatione, Alfonsi copiae incenderant, Sena-  
tusconsultum factum est, ut eius pagi homines Fossam Clodiam  
ad incolendum se reciperet; atque ab oppidanis rebus omnibus  
iuiaretur: quasq; antea onerum & tributorum immunitates do-  
mi obtinebant, eisdem immunitatibus eis frui Fossæ quoque Clo-  
diæ liceret. itemq; alterum; uti Belunienses, & Pagenses annum  
unum immunes essent, neque ad soluendum creditoribus cogi  
possent. idem Senatus cum uideret multo maximam esse in urbe  
copiam eorum ex plebe ciuium, qui aliquo reip. munere funge-  
rentur: quo in munere aut stipendii mēstrui, aut quotidiani qua-  
stus nomine lucrum facerent: ut ii quoque aliquid, neque id ta-  
men sine compendio tam angusta pecuniæ publicæ procuratione  
in ararium conferrent, rogationem iussit: qui è plebe ciuis mu-  
nus perpetuum à rep. obtineret: si decuplum stipis annuæ, aut si  
ea non sit, lucri summam, de qua apud magistratū constet, reip.  
intra



intra dies quindecim curauerit : id omnino munus ipso mortuo  
 aut filius , aut nepos , aut frater eius sequatur : aut is , quencunque  
 sibi ipse eius muneris hæredem instituerit . quibus autem sua sint  
 ad tempus munera : iis octuplam stipem ærario inferentibus ea  
 uiuis munera eripi non possint , illis exceptis muneribus , quæ à  
 Senatus , templiq; Marcii procuratorum scribis , & ministris obire-  
 tur . ea tamen octupli summa liberalitate patrum paulo post lege  
 ad quincuplum rediit . ab Decemuiris quoque , ut etiam nobili-  
 tas sui æris aliquantum sponte reip. tribueret : alia est rogatio pau-  
 lo post iussa , qui è nobilitate ciuis triginta annos natus libras auri  
 uicenas mutuo reip. dedisset : quemq; ciuem maior pars Decem-  
 uirum probauisset , ei ciui annum in Senatu esse , adempta suffra-  
 gii ferendi potestate licere . huius autē mutui Decemuiui eā esse  
 conditionem uoluerunt : ut pars pecuniæ media in ærarium no-  
 uissimum ei , qui dedisset , accepta referretur . altera parte media ,  
 si quid is onerum , tributorum uel nomine in posterum publice de-  
 biturus esset ; ex eo tantundem potestas ei fieret dissoluendi . pau-  
 loq; post , ne horum ciuium numerus denos excederet ; iidē De-  
 cemuiui sanxerunt . Dum hæc domi administrantur : consilio Ve-  
 ronam per insidias capiendi ab legatis cōplures dies agitato , cer-  
 torum oppidi ciuium suasu ; qui per suos interpretes clam ad Si-  
 gismundum Caballum necessarium suum egregium , atque aman-  
 tem reipu. ciuem : qui se pro patria exercebat , belliq; munera &  
 præfecturas obibat , Patauium missos , res quemadmodum per-  
 fici posset , eis ostenderant : ambo prima nocte ad pagum Marti-  
 nianum exercitum adduxerunt , quingentosq; milites ex omni co-  
 pia lectos ad arcem , quæ ab ea oppidi parte cum mœnibus erat  
 coniuncta , non nimis communitam miserunt : qua fore in urbē  
 traiectū cognouerant . illi per duas propugnaculi intromissi por-  
 tas : eas Benedictus Peregrinus multa arte , diligentiaq; , ferreis ad-  
 eam rem confectis Vicetiæ malleis , uectibusq; aperuerat , ad mu-  
 rum oppidi scalas , quas secum attulerant , posuerunt ; ut eo supe-  
 rato ad portam , ad quam conuenerant , accederent ; interfectisq;  
 custodibus , atque apertis ualuis exercitum admitterent . Eæ scalæ  
 cum essent breuiiores , quam muri altitudo requirebat : ad eius-  
 modi eius rei subsidium comparandum ; ut alteram alteri alliga-



rent, atque ita longiores eas facerent; se dederunt. in eo dū sunt: signa in oppido ei loco proxima casu concinere cœperunt. illi ueriti aduētum ipsorum militibus Germanis tribus millibus palam factum esse, qui eam oppidi partem custodiebant, relictis scalis extra propugnacula celeriter se, quā uenerant, receperunt: deinde ad exercitum; qui non longe aberat, ut se in oppidum inferret; re infecta magno cum dolore omnium atque molestia redierunt. hostium præfecti haud ita multo post de plerisque ciuibus; quos fuisse eius rei conscios non tam quidem reperissent, quam essent suspicati; grauiores pœnas sumpserunt. peregrinus una cum nostris militibus oppido fugiens ad legatos se contulerat. cui Senatus ob facti audaciam atque in rep. studium pensionē annuam, quam posterius eius sequerentur, paulo post dono contulit. eadem in illorum, quos hostes interfecerant, liberos reip. pietas extitit. erat domi lex decemuiralis: nemo ut ciuis; cuius aut filius aut frater aut fratris filius sacerdotium haberet; cum de rebus, quæ ad Pont. Max. atque ad rep. pertinerent, ageretur; in Senatu esse posset. quam quidem legem eo consilio patres iusserant: ne; qui suo compendio propter sacerdotiorum adipiscendorum cupiditatem in consulendo duci poterat, ut plus Romanis rebus, quam suæ ciuitati faueret; ei aut sententiam dicere, aut suffragium ferre in Senatu liceret. eam tum legem decemuires antiquari uoluerunt. non enim arbitrabantur quenquam esse ciuē posse; qui tam duris reip. temporibus alieniori uoluntate suæ patriæ commoda, quam Pont. Max. à quo tā insignite læsus esset, in Senatu administraret. itaque & Antonius Grimanus & Georgius Cornelius, reliquique sacerdotum propinqui, cum ad Senatum ex literis Roma ab Donato missis est relatum, deinceps affuerunt. quæ quidem literæ magnam in Iulio ambiguitatē consiliorum, magnamque uoluntatis hæsitacionem ostendebant. modo enim de rep. honorificentissime amicissimeque loquebatur; seque ei adiutorem ad ea recuperanda, quæ in Rhetis Galliaque amiserat, fore pollicebatur. Gallorum modo regem se uereri ostendebat: quem quidem propediem in Italiam rediturum pro explorato ducebat. A Maximiliano quoque suum legatum prope amplius non admitti, inimicumque sibi illum ex amico esse factum, quod



quod interdictum in répu. se nolente rescidisset, conquerebatur. casq; ob res uti resp. quibus posset conditionibus cum Maximiliano pacem faceret, ienatui erat auctor: præsertim posteaquam inter Aloisium & Enricum Britannia regem; qui dissidere putabantur; quod quidem certe diffidiū animorumq; disunctio morari Aloisium & retinere, ne itineri se se daret, una omnino poterat; fœdus esse ictum & concelebratum cognouit. itaque interdum neque cui confideret; neque quò conuerteret cogitationes suas; neque quem susciperet tuendum; neque quid omnino aut faceret, aut plane diceret, reperiebat. quibus rebus cognitis Senatus, cui quidem omnia penè deficiebant, Iulium tamen per legatum est hortatus, bono animo ut esset: non facturum, quæ ab eo iactabantur, Aloisium: cuius omnes planè populi ab alpium tractu & bello in Italia gerendo magnopere abhorrent: Maximilianum quidem & pecuniæ inopia, & aliena Germanarum ciuitatum à bello contra rep. uoluntate, & aliarum rerum implicationibus perfacile ad pacis cogitationem descensurum: Enricum uero, cur nocere Venetis cogitet, nullam habere porro causam: cuius & maritimæ ciuitates necessitudinem quasi quandam antiquitus cum nostris hominibus institutā colant, plurimiq; faciant; & portoria à nauibus reip. quæ mercaturæ causa eò uentitant, etiam augeantur: se se autem & exercitum non spernendum iam habere; & classē satis magnam propediem habituros: casq; omnes opes non illi minus, quàm reip. præsto, cum uellet, futuras: quamobrem confideret; cum tam bonam causam suscepisset, ut rep. scelere perfidorum hominum proditam ac uiolatam tueretur; Deos profecto immortales, quorum ipse in terris maiestatem obtineret, sibi non defuturos. cuiusmodi cum literis labantem Iulii animum atque consilia Senatus confirmauisset: legem sciuit: ut quingenti armaturæ grauioris equites, militū quatuor millia celeriter conficerentur; atque ad eas, quas haberet, copias adderentur. id autem non tam iussit spe, quam aleret, ut res ad exitum perducī posset: (nam neque unde is tum numerus accerferetur, ei constabat: neque pecunia in stipendium planè suppetebat) quàm ut eius rei fermo nuntiiq; ad Iuliū allati deiectas illius cogitationes & timoris plenas erigerent; exercitumq; reip.



quem quidem & Veronæ recuperandæ difficultate, & Gallicarum rerum fama; quas rumor latius atque inflatus attulerat; tardior ac suspiciosior factum sciebat; literæ de eo ad legatos datæ ad pristinam belli gerendi alacritatē studiumq; reuocarent. quod sanè accidit. Epirotæ enim equites ubi de augendo exercitu nuntium acceperunt; Atesi flumine trajecto hostium equites centum captiuos fecerunt: milites alteros totidem nemine suorum desiderato interfecerunt. aliæ deinde literæ ad Donatum datæ: ut; quoniam is ad Senatum scripserat, Iulio placere, ut bello, quod resp. cum Alfonso exercebat, finis imponeretur: ei diceret; Senatum de eo id, quod uellet, esse facturum. quo responso accepto Iulius suum hominem Ferrariam misit eius rei causa: neque tamen Alfonso persuasit, uti bello desisteret. nam quoniam exploratum ei erat, Aloisium regem ad Lemniacum oppidum, quod à Maximiliano libris auri CL. emerat, capiendum omnes suas quamprimum copias missurum; quo capto ipse quoque Rodigium posse capere spem non ambiguam fouebat: arma deponere noluit. Senatus autem pluribus & literis & nuntiis certior factus Aloisii præfectos magnis equitatus & peditatus copiis coactis in fines reip. impetum breui facturos: Lemniaco ueritus præter milites sexcentos sub egregiis centurionibus, ciues etiam Venetos è nobilitate quatuor cum militibus quinquaginta è plebe urbana singulos, commeatumq; omnis generis, & res ad tormēta exercenda ignemq; in fossis atque aggeribus ex inopinato excitandum idoneas, & sagittarum magnum numerum cōmisit. Vanissa præterea ex Dalmatis homo fortis cum turma lectissimorum equitum octoginta, maiore quàm consueuerat stipendio, ab Senatu accersitus eodem se contulit. ad Gradonicum quoque legatū auxilia ab exercitu submissa: ne, si Alfonso ad Rodigianos oppugnandos, dum reliquis exercitus à Gallis alios reip. fines tueretur, suas copias adduceret, imparatior offendi posset. classi decimum paucarum triremium, quæ erat Fossæ Clodiæ, naues breuiore permultæ urbanis è suburbiis eductæ atque adornatæ uti adderentur, quæ in Alfonso fines se inferret, eiusq; copias distineret; latum, ad Vitellium uero; quem captiuum permutatione facta, uti supra demonstratum est, Galli restituerant; Capinumq; eius



eius propinquum, Pauli illius, quem Florentini Pisano bello imperatorē habuerant, securi; percusserant, filiū; quibus utrisque Senatus præfecturam equitum grauioris armaturæ C L. paulo antea dederat; atque illi eos equites in Tifernatibus municipibus suis iam confecerant; mari Fossam Clodiam deportandos, naues in Flaminiam missæ: quibusq; etiam milites quingentos ipso rum in finibus quamprimum conscribendi ad exercitumq; adduci, cura tradita. eandem antea curam Citolo patres dederāt; ut è Perusiæ finibus mille octingentos milites educeret. isq; iam numerus aduentare dicebatur. turmis insuper in exercitu reipu. plerisque redintegrandis, quæ quidē erant magnopere diminutæ; stipendium à quæstoribus curatum. pensioq; annua; quam Senatus ultra stipendiorum nomen Citolo dederat, ut ea, quoad uiueret, frueretur; etiam aucta. quas ad res atque sumptus quo fisci debitoribus facilius solutio fieret: Senatus iusserat: ut qui ex iis aurum aut argentum cœlatum; quod plerisque sibi cōparant, aut à maioribus comparatum domi habent; ad Duumuiros numis cudendis intra dies XXV. attulissent; id eis aurum argentum uē cum lucro partis decimæ acceptum referretur; qui Duūuiri neque aurum neque argentum dedissent; neque pecuniam numeratam curauissent; eorum bona, etiā si fidei cōmissa essent, uendi per magistratus oportere, iis exceptis bonis, quæ dotium nomine mulieribus deberentur. easq; uenditiones ratas & firmas haberi oportere, neque ullis posse legibus infirmari, Senatusconsulto additum. pauloq; post: quod patribus constabat ciues plerosque ex iis, quibus ampla res esset, adduci tamen non posse, ut in ærarium conferrent; quod nulla suæ patriæ charitate, nullo reip. amore tenerentur: Decemuiro suis ministris mandauerunt, ut illos prius ea de re admonitos, si post dies octo nihil contulissent; captos in carcerem contruderent: quod si se occultaissent, ab eorum domibus rem familiarem abriperent, magistratibusq; traderent distrahendam. quæ duæ quidem res uti publice iuberentur; ante id tempus nunquam acciderat. Vicetina quidem ciuitas, reip. difficultatibus permota, sponte sua uicenas auri libras dono in ærarium contulit. quoniam autem & legati non semel ad Senatum scripserant, egere imperatoris reip. exercitum: sine



eo, qui summæ rei præsit, omnes indiligentiores & dissolutiores  
quotidie fieri, & ipsi per se patres singulis horis ea de re admo-  
nabantur: sæpe cum essent inter se magistratus colloquuti; magna  
eos ambiguitas hæsitatioq; diu tenuit. nã quod ex præfectis reip.  
plures parem ferè honoris locum obtinebant; existimabant pa-  
tres, in potiore adipiscendo loco alterum sibi præferri neminem  
eorum satis æquo animo laturum. Tum illud accedebat; quòd  
ipsimet patres, quis nam illorum esset reliquis antefendus, non  
dispiciebant. de externis cum quærent; plerique in eam senten-  
tiam conueniebant; ut Franciscus Mantuanorum princeps, quæ  
habebant in custodia, ei muneri maxime omnium esse præficien-  
dus uideretur: quod profecto munus & alias apud ipsos gessisset,  
& nunc eo libentius eoq; diligentius ab illo suscipi atque admini-  
strari oporteret; quòd ex ipso carcere atque custodia ad tam am-  
plam dignitatem atque imperium patrum munere ac liberalitate  
uocaretur. uerum propterea quòd annis etiam superioribus ad il-  
lud ipsum munus à Senatu reuocatus, uti tum à nobis demonstra-  
tum est, stipendio etiam accepto à rep. defecerat; atque ad Maxi-  
miliani militiam auctore & consuasore Ludouico Sfortia uxoris  
suæ sororis uiro se contulerat: idcirco, nisi senatui satisficeret se fi-  
dem reip. præstaturum, omnes unà magistratus committendum  
ei esse non putabant. id ut sciri ab eo posset; Lauredanus patresq;  
eum ad se se cum honesto senatorum comitatu è custodia uenire  
uoluerunt: amicissimeq; appellato suam ei mentem aperuerunt;  
Senatusq; consultum ea de re factum ostenderunt. ad quem ille  
sermonem inopinata lætitia commotus atque illachrymans, ma-  
gnas patribus gratias cum egisset; confirmauit filium se suum Fe-  
dericum natu maiorem suæ fidei obsidem reip. daturum: uxoriq;  
scripturum, ut eum ad legatos è uestigio mitteret. quod cum pa-  
tribus probaretur; Ludouicum Firmium familiarem suum cum  
mandatis ad uxorem misit. illa uero parere uiro noluit, neque fi-  
liũ ab se dimittere. Alfonsi enim soror Gallicis rebus magnope-  
re fauebat: quibus fore impedimento, si uir imperium à rep. ob-  
latum accepisset, pro explorato ducebat. ita ea res exitum non  
habuit. quamobrem cum patres iterum de eo eligendo, qui exer-  
citus præficeret, consulerentur; magistratusq; nonnulli Lucio, non  
nulli



nulli Gritto legato imperium deferrent : neutra lege suffragiis  
 probata Senatus est dimissus. quod ubi Grittus rescivit : patribus  
 literas dedit : non esse è repu. se , qui non magnum in re militari  
 usum haberet , tot fortibus & claris bello uiris , qui in eius exerci-  
 tu essent , præfici : neque id eos æquo animo laturus : itaque alia  
 omnia cogitarent : se se nolle imperium cū inuidiosum , tum suis  
 maius uiribus accipere . Vanissa interim ; quē Lemniacum pro-  
 fectum dixeramus ; cum suis equitibus aliisq; per paucis , qui sagit-  
 tis utebantur , mane prædatum oppido egressus in Veronæ fini-  
 bus hostium Gallorum equites grauis armaturæ plus centum , le-  
 uioris non plurimos , milites quatercentum nactus , manum cum  
 illis conferuit . id dum fit ; hostes unum ex eius famulis captum  
 nullo more iugulauerunt . quod Vanissa ubi uidit ; suos cohori-  
 tatus , uti eam necem uindicarent , ita acriter pugnauit , itaq; eum  
 sui acriter pugnantes imitari studuerunt ; ut paruo temporis spa-  
 tio globum hostium uniuersum dissecerint ; ex iis ceperint plus  
 ducentos : quibus omnibus ceruices absciderunt , nemine suo-  
 rum , præter illum unum , desiderato . ea res magnum illi nomē  
 apud omnem exercitum hostesq; ipsos attulit . Alфонsus interea  
 coactis cum militibus , tum nauiculis , atque in eis tormentis le-  
 uioribus impositis , Venetos , qui minorum in Rhodigianis fini-  
 bus fluminum ripas custodiebant , depulit . pauloq; post , cū Gra-  
 donicus nihil non ab hostibus ueritus Rhodigio relicto se in tuta-  
 retulisset ; oppidum uacuum recepit . tantusq; fuit eius rei ter-  
 ror ; cum Galli magna cum manu aduentare dicerentur : ut neq;  
 auxilia submissa ullo in loco consistere , neque Grittus legatus  
 confidere , in quibus erat , castris auderet ; omnesq; omnibus à  
 partibus se se Patauium Vicetiamq; uersus nullis hostiū insequen-  
 tibus tamen reciperent . deliberatum est etiam domi ; ut Patauiū  
 muniretur ; tormentaq; ac farinas & uinum Creticum magistra-  
 tus eò mitterent , ciuesq; in primis Venetos decem , qui urbem  
 custodirent . tum , ut reliqui commeatus pabuliq; copia in oppi-  
 dum importaretur , cura adhibita . datæ quoque à Senatu literæ in  
 Epirum ad suos magistratus ; ut Thraces equites , quos possent ,  
 reip. stipendio conscriberent , Iaderamq; mitterent ad urbē trāsue-  
 hendos : id enim regionum ministrorum uoluntate fieri poterat .



latum etiam; ut lex de mercede magistratuum reip. condonanda in sex menses prorogaretur. iussus etiam Ioannes Franciscus Polanus; qui longis nauibus in Istris non segnem operam reipu. nauabat; ut Fossam Clodiam ad præfectum se classis è uestigio reciperet. quibus intellectis rebus Zoilus Detricus, ex Iaderensi ciuitate, amantissimus reip. uir, aurum, quod in suos usus domo attulerat, patribus principiisque dono dedit. Gritus cum exercitu Vicetiam ueniens: ad quem ciuitatis magistratus cum armatorum ex plebe atque agris decem millibus iter faciebat; ut ei opem ferret, ne ab hostibus cladem aliquam acciperet; magni enim de eorumores afferebantur: cum uellet extra murum castra ponere, ne oneri oppidanis esset; à ciuibus omnia perpeti reipub. causa se se uelle pronuntiantibus, atque ab illo, uti copias omnes introduceret, maiorem in modum postulantibus, noctu hilariter in oppidum est receptus. postridieque eius diei abiens medio fere inter Patauium Vicetiamque itinere consedit: ut utrique urbi, si necessitas urgeret, auxilio esse posset. patres; ut Vicetinae ciuitatis plena fidei ac beniuolentiae officia tanti facere, quanti par erat, uideretur; per literas sibi gratum id fuisse ostenderunt; seque memores eius rei fore in posterum confirmauerunt. deinde; cum de Grædonico deque Marcello legatis non commodi sermones iactarentur; eorum loco est ab iis legatus lectus Paulus Capellus: qui se, cum uellent patres, profecturum est pollicitus. paucisque post diebus duo sunt sublegati reliquis legatis lecti, Federicus Contarenius, Ioannes Diedus: quorum alter senatui paruit, profectusque est: Ioannes excusatione uoletudinis adhibita domi remansit. eius est loco paulo post Sigismundus Caballus sublectus. at Galli Triultio & Palitia & Magistro magno ducibus audito nostrorum recessu, missis Montanianum paucis equitibus deditione oppidum capiunt, itemque Ateste, tum Coloniam & Leonicanos: cum uero è Carnis nuntii uenissent, omnes eo ab latere hostium regiones in armis esse, cogique milites plerisque in locis: Foroiulienses ad Senatum miserunt, uelle ciuitatem sua stipe equites ducentos alere: rogare Senatum, ut Epirotas alteros totidem iis adiungat; quibus se suosque fines tueantur: uelle omnes magno animo suam fidem omni cum uitæ periculo patribus & reip. prestare. atque



re. atque ita ut fieret, Senatus censuit. etiam in Illyrico apud Spalathram incursiones & prædæ factæ, abductiq; pueri & mulieres haud paruo numero. Vicetini destituti ab exercitu, qui se ad Medoacum receperat, cum suis rebus uulgo ad urbem confugiebant: à quibus cum publicani uini portorium exigent; lata rogatio est; ut sine portorio rerum alendi se causa importandarum Vicetini reciperentur. pauloq; post domus noua Germanorum mercatorum societati publice exædificata, quam inhabitarent, eistradita. Gallorum duces ad Marcum Marcellum Monsilicensem magistratum miserunt, qui oppidum peterent. ea intellecta re Gritus legatus cum equitibus leuissimis Monsilice contendit: firmatoq; præditiis oppido præter eos, qui ex plebe urbana tum uenerant, sua in castra rediit. Citolumq; Perusinum cum militibus octingentis Senatu approbante Taurisum misit; qui optime merita ciuitati præsidio esset. eo enim etiam ab latere hostes impetum facturos rumor attulerat. Interim missus Lemniacum Baptista Doctus, uir fortis, cum stipe; ne, si oppidum obsideretur, pecunia defensoribus introclusis persoluenda deficeret; ab hostibus in itinere deprehensus uix ægreq; fuga se ab illis eripuit: infectaq; re cum numis ad legatos rediit. Post hæc cum Iulius Pont. Max. Franciscum Gonzagam Mantuanorum principem, captiuum senatui commendauisset: patres in eius gratiam legem sciuerunt: ut, si uxor Ludouicum filium Bononiam misisset; Franciscus & libertati restitueretur; & reip. exercitibus præficeretur, imperatorq; crearetur: modo Iulius puerum ad urbem postea mitteret: quod quidem se receperat facturum. Vicetini; ad quos legatorum & exercitus discessu Galli duces miserant; qui & oppidum & quingentas ab iis auri libras peterent; concilio coacto, curatisq; è uestigio libris auri quinquaginta, alteris totidem pollicitis, se eis dederunt, militibus per pluribus receptis; quos illi Verona euocauerant. eorum exercitus in oppidi agrum se conferens ad Barbaranum in collibus uicum castra posuit. Est in Vicetinis montibus Patauium uersus concameratio, antiquitus effodiendis ad ædificationes lapidibus facta, ingentis magnitudinis; ut uerna milia passuum introrsus pertineat. in eam perfugii causa; quod os angustum habet, atque id unum tantum, ut facile defendi posse



uideatur; hostibus appropinquantibus eorum finium incolæ cū uxoribus & liberis & ætate confectis prope ad sex mille se abdiderunt. eos cum expugnare Galli non possent; tametsi perfractis & deiectis obicibus se intulissent: loco enim perobsuro, & uiarum flexionibus cum ambiguis tum innumerabilibus, aqua etiā, quæ in eo specu stagni instar est, muniebantur: plurima stipula interne succensa magnum eorum numerum fumo cameras implete interfecerunt. At in Carnis Aloisius Delphinus legatus cum intellexisset præmissos hostium antecursores centum e Montis Falconis planitie prædas agere: suis militibus sequi se iussis cum equitibus leuissimis quinquaginta itinere celeriter confecto illos, qui se in insidiis non magna in sylua occultauerant, aggressus partem eorum interfecit, partem cepit. reliqui uulneribus ac ceptis fuga se ad suos retulerunt. legatus Sontio flumine traiecto hostes; qui fuga suorum & cæde audita magna cum manu ad illum interceptum contendebant; e ripa sagittis & pilis ferreis à fluminis transitu prohibuit: indeq; se cum suis omnibus incolu mibus Gradiscas recepit. In Patauinis autem finibus, quod hostium equites aduentare nuntiatum est; præmissi à Gritto legatio equites leuissimi in eos uenientes, qui quidem erant sexcenti, impetu facto non paucos interfecerunt, centum captiuos fecerunt. Duces eorum Ludouicus & Federicus Gonzaga fratres, qui Bozzolum oppidum in Mantuæ finibus obtinebant, se à uictoribus equorum pernecitate uix ægreq; subriperunt. alio ab latere Varenissa Citadella, quod ad oppidum Lemniaco uenerat, non semel egressus Germanorum manum ex alpibus demissam, ut incursiones faceret, binis cladibus disiecit interfectis per plurimos. inter hæc paulum lætitiæ habentia magnam patribus molestiam attulit, Lemniacum captum. nam quod est ipsum in dextra Adsis ripa sic, ut magna ex parte flumine abluatur: Galli altera in ripa castello, quod e regione Lemniaci est, capto ingenti tormentorum ui dies aliquot oppidum uerberauerunt. id cum parum profuisset: ratibus flumen traiecerunt: tribusq; à partibus tormentis positis murum labore continenti deicere institerunt: ut ii, qui erant in oppido atque in arce magistratus præfectiq; timore non magnopere necessario perculsi oppidum primum deinde arcem se seq;



se seq; dederent. oppidani direpti; milites armis spoliati & dimissi: ipsi uni cum magistris tormentorum sunt captiui facti. Eodẽ ferẽ tempore Iulius certior factus Cardinalem Rotomagensẽ in Gallia mortem obiisse, incredibili lætitia est affectus. illo enim uiuo hostem magna auctoritate nunquã sibi defuturum sciebat. quam quidem lætitiã cum legato Veneto de cõmunibus agens rebus haud obscure præ se tulit: gratulatusq; ei est, nihil omnino commodius, nihil amicius de Cardinalis in rempu. animo plane sentiens. is auri libras ter mille signatæ pecuniæ testamento legauerat: quas omnino Iulius ea de causa, quod legari iure non potuerint, sibi dari postulauit: frustratusq; ea postulatione est: nihil enim profecit. ciues autem enobilitate Veneta quatuor, & Ioannes Iacobus Carol dius Senatus scriba; qui captiui in Flaminia superiore anno facti in Romani agri arce custodiebantur; à Iulio dimissi ad urbem redierunt. Ioannesq; Paulus Māfronius ab hostibus est ad Gritum missus, Bonuicini Galli, quem captiuum nostri fecerant, tum ad Gallos item missi loco. cui Senatus paulo post equitum cataphractorum cētum quinquaginta stipendiũ constituit cum librarũ auri sex pensione annua præter illud. eius quoque filio stipedium in equites sagittarios L. X. datum. Iulius ægre ferens Gallos in reip. locis prospere uersari, & cum uicinis ei regibus pollere; legato reipu. proposuit; se cum Heluetiis fœdus initurum; ut sex eorũ millia à Belinzonæ oppidi finibus regi bellum inferant; quo ille suas copias reuocare Mediolanum cogatur: modo Senatus partem mediam stipendiorum persoluat: eaq; confectare suas ei copias attribuat ad Ferrariam capiendam. Senatus ad hæc legato scripsit; Iulio stipendium ad tertiam Heluetiorum partem polliceatur: quo si contētus non erit; etiam ad mediam descendat; ut ei plane satisfiat. de altera uero postulatione, cum Galli abierint, facturum Senatum, quæ iusserit. postea uero nolentibus Heluetiis tam parua manu domo exire; petentibusq; ut X. eorum millia saltem Iulius conduceret: inter ipsos ut octona millia scriberentur, lex est inita. ex uniuerso stipendio Donatus legatus pactus cum Iulio est; ut à Senatu triginta auri libræ mensibus singulis penderentur: numiq; Romam per chyrographa missi. Vanissa Thracēsq; cum præfectis turmisq; leuio



rum equitum plerisque cōtra Germanos Vicetia egressos agrūq;  
populantes à Gritto iussi contendere, ceteris, cum nullis occur-  
rissent, reuertentibus, longius progressi eosq; consequuti com-  
misso praelio C C. ex iis interfecerunt, & prædam, quam abige-  
bant, earum rerum dominis restituerunt. duobusq; post diebus  
idem prope facinus & ausi sunt, & perfecerunt, C L. ex hostibus  
interfectis, captis non paucis. tametsi eodem tempore aliis etiam  
in Venetorum finium locis cædes hostium à nostris equitibus fa-  
ctæ nuntiabantur. Nuntiatum est etiam in Pharo Illyrici insula  
ob primorum quorundam iuuenum in agrestes mulieres audacē  
incontinentiam plebem ad arma incitatum nonnullos ex nobili-  
tate interfecisse: alios oppido expulisse: parem se se nobilibus in  
regenda ciuitate fieri esseq; uoluisse: eos tamen animorum plebis  
motus Hieronymi Contareni classis præfecti; qui eò peropportu-  
ne se contulit; edictis seuerioribus interpositis ad pristinam con-  
cordiam redactos fuisse: magnumq; eo in oppido exortum bellū  
eius hominis aduentum sedauisse. Nuntiatum, quoque, in Cre-  
ta insula triremes septem instructas Corcyram breui uenturas: ea-  
rum uni Hieronymum Georgium è colonia Cretensi præfectum  
sua pecunia remiges & milites imposuisse: cuius pater plurima  
in remp. officia bellis superioribus contulerit. ei non multo post  
ob hæc ipsa in rempub. studia Senatusconsulto permissum est, ut  
quotiescunque uoluerit triremi præesse, liceat priori semper lo-  
co; immunem præterea tributorum illum posterosq; eius esse fru-  
ctuum suarum possessionum causa. tū ut militiæ insignia ei den-  
tur, cum ad urbem uenerit, eadem lege patres statuerunt: lites-  
q; iis de rebus ad magistratus Cretenses dederunt testes perpe-  
tuas Senatus in illum uoluntatis. Miserant paulo ante Ferrariam  
decemuirum magistri Petrum Vampum è plebe hominem: qui  
se obtulerat classem ex Venetis nauibus in flumine oppidi mœ-  
nia præterlabente custoditam succensurum. sed illum socii faci-  
noris indicio proditum Ferrarienses interfecerunt. ea re ad decem-  
uiros delata tribus Vampi filiabus paruulis uictus est annuus è  
publica collegii pecunia cum domo, quam inhabitarent, dono  
datus, & dos, cum adoleuerint, singulis auri sesquilibra constitu-  
ta. mulieri etiam uiduæ Corcyrensi; cuius uir in Fluminis oppi-  
di Istrici



di Istrici oppugnatione interfectus fuerat; pecunia in uictum annuum dari ab eius insulæ quæstoribus imperata. Sub hæc Laurētius è gente Vrsinorum; qui Cere oppidum obtinebat; mutatis iumentis Roma ad urbem uenit: patribusq; salutatis se se obtulit eorum militiam facturum: dixitq; id sibi Iulium uti faceret permisisse: suum comitatum equitum centum breui affuturum: qua uellent conditione se uterentur: nihil ipsum sibi præcipuum petere, nihil recusare. qua quidē oratione libentissime audita, omnibus illum laudibus cumulatū patres exceperunt: atque, uti ad exercitum se conferret, ab eo petiuerunt; quod existimarent suo illum consilio legatis usui magnopere futurum interea, dum sui equites adueniunt. & quoniam sine armis uenerat: ex comitii armentario legendi sibi arma potestatem ei fecerunt: quod externo ante id tempus contigerat nulli. His ita constitutis rebus; quod suspicio patres tenuit; propterea quod in Patauiō muniendo nihil non curæ diligentiaq; adhibuissent; fossas purgauissent; muros propugnaculaq; firmauissent; omnis generis commeatū, magnam tormentorum uim importari mandauissent; molas frumentarias per plures, quæ sine aqua usui essent, ædificari curauissent; ciues è nobilitate, uti superiore anno fecerant, portis & mœnibus & foro præposuissent; fore, uti Patauiō relicto hostes ad Taurisum obsidendum accederent, quod minus in ea oppugnatione se laboris confiderent habituros: Senatus censuit, ut milites quatuor mille confestim undecunque scriberentur: atque iis patrum collegium legeret qui præessent, Chirixumq; Burgium in primis: quem sibi unum à Manfronio commendatum, atque omnibus ornatum uirtutis industriaq; laudibus illis dieb. cohorti esse præponendum statuissent. Federicus Contarenus sublegatus, Citadellæ qui erat, cū Epirotis C C. egressus hostium Gallorum turmam, quæ prædatum ad Medoaci ripas uenerat, dissecit: atque ex illis quinquaginta cum eorum præfecto captiuos fecit. Germani etiam; cum ad Clusæ fines in primis alpibus uenissent; Hieronymi Saorniani aduentu perterriti confestim recesserunt. hostium autem uniuerso exercitu Citadellam uersus accedente; Vanissaq; & Thracibus, qui se illi obuiam longius prouexerant, ab eo cum cæde repulsis; Contarenus sublegatus & Alexander



Bigolinus oppidi retinendi spe deposita, praesidiis abductis Patauium sunt profecti. pauloq; post; cum Galli propius Venetos ad Limen se castellum contulissent; pontesq; duos in Medoaco facere coepissent, ut exercitum reip. aggredi commodius possent: legati concilio praefectorum coacto non esse Gallos expectandos statuerunt: seq; bene mane Quarto Calendas Iulias omni cum exercitu Patauium intulerunt. quos magna agrestium hominum multitudo cum uxoribus & liberis subsequuta in oppidum recepta est, ciuibsq; dispersita; apud quos esset, proq; cuiusque facultatibus aleretur, uerum enimvero cum paulo post hostium exercitus Bassianum uersus se promouisset: Senatus iterum Taurisoueritus, Ioannem Diedum ex Veneta nobilitate uirum fortem militaribusq; rebus assuetum, qui Patauii erat, eo legatum miserunt: ut una cum Mocenico belli rebus praeset. qui quidem Ioannes eo reiecto stipendio, quod ei patres muneri obeundo decreuerant, sua impensa reip. laboranti operam se daturum proficiscens est pollicitus. militesq; item quingenti, equites leuissimi CC. a legatis Patauio Taurisouem missi. erant autem in hostium exercitu Galli equites grauioris armaturae mille CC. leuioris alii quanto plures: Germani fere alteri totidem, ex aequo tamen inter se numero: milites in utrisque circiter undecim millia: sed ex iis Germanorum duplo fere maior, quam Gallorum numerus erat: praeterq; hos Alfonsus Ferrariensium princeps cum equitibus CC. is exercitus depopulatis reip. agris illorum finium, Castellum Nouum, quod est in alpibus, profectus, paucis defendentibus oppidum cepit, diripuit, incendit, ut nihil ex eo neq; domorum, neque templorum, uno fano excepto, non ardens dirutumq; sit relictum. idem post Feltria passa est in maiorem sui partem; ut a priore uastitate superfuerat, aut ciues eam restituerant. Ciuidale quoque Belunianum paruo negotio captum; cum ciuitas oppidum, uti Feltriae acciderat, incendi nollet. itemq; Scala. nam qui eam defendebant, primis tormentorum pilis in eos iactis & centurione interfecto deditionem fecerunt. eodem tempore in Iustinopolitanorum finibus milites reip. circiter quadringenti equitesq; aliquot insidiis ab hostibus dispositis capti ad septuaginta, interfecti ad X. poenas imprudentiae dederunt. Inter



ter has bellicorum euentuum auditiones Caterina Cornelia; quæ Cyprii regis uxor fuerat; de qua in horum cōmentariorum prior libro scripsimus; Sexto Nonas Iulias stomachi uitio in urbe mortem obiit annum agens quartum & quinquagesimum: elataq; est à patribus magna frequentia ciuitatis è Cassiani ad Apostolorum fanum ponte nauibus imposito; quo ad minuendum uiæ spatium aqua, quam Canalē magnum appellant, transmittenda duceretur: atque ab Andrea Naugerio laudata, eoq; postea in fano Georgius Cornelius frater templi Marci procurator sepulcrum marmoreum cum ædícula sorori optime de se merita faciendum curauit. Interim quoniā Iulii postulatione, ut classis reip. ad Genuam à Gallis auertendam in mare superum uela facere iuberetur, ab Decemuiris, qui eā dies aliquot suo in collegio continuerant, superiore desinente mense ad Senatum prolata Senatusconsultum factum fuerat, triremes duodecim, & biremem unam, quæ Corcyræ essent, Centum cellas celeriter mitti oportere; quæ Iulio præsto essent: alterum Senatusconsultum factum est; dandas esse Iulio literas; quibus certior fieret, naues triremes maiores duas ex iis, quas nothas appellant, & minorem unam; quæ ad urbem sint; Senatum armari confestim iussisse; ut Centum cellas classi priori submitterentur, hæc ea re à patribus fiebant; ut Iulii animus, quem experti fuerant & superbum & perferocem esse, his officiis delinitum procliuiorem haberet ad bellum Gallis & Alfonso inferendum. quæ quidem ei gratissima acciderunt. sed cum uideret classis aduentum tardiorem expectatione sua esse: moræ impatiens legato reipub. accersito dixit, statuisse se tribus cum longis nauibus Genuam aggredi: misisse Viā regiam Marcum Antonium Columnam: misurum cras Octavianum Fregosium, Francisci Mariæ Metaurensium Ducis fratris sui filii consobrinum, magna adolescentem uirtute, magna inter ciues suos auctoritate propter factiones, quas maiores sui uetusto more ciuitatis exercuerant: qui quoniam quartana esset implicitus; petere à Senatu; ut & ipse Ianem Fregosium confestim eodem mittat; ut una cum illo rem iuuat. quibus de rebus patres acceptis à legato literis Iani Patauio euocato Iulii petitionem ostenderunt. atque is patribus hortantib. libenti animo sta-



tim conscendens Rauennam est profectus : ut inde pedibus mu-  
tatis iumentis Viam regiam contenderet. Sub hæc equites Hispa-  
ni grauioris armaturæ quatercenti Vicetiæ appropinquauerant ;  
ut cum hostibus reip. se coniungerent . tamen Iulius Donato le-  
gato pollicitus fuisset , id illos non facturos : ita sibi cum Ferdi-  
nandi regis legato conuenisse : à quo publice illis ipsis diebus tri-  
buti nomine pro regni Neapolitani permissione equum album  
acceperat : quem quidem ea conditione sublata non fuisset acce-  
pturus . idem Iulius Troilo Sabello petenti , ut eius uoluntate ad  
reip. stipendia facienda conferre se se posset , libenti animo per-  
misit . Lecabuas interea Epirota triginta equitum præfectus , Pa-  
tauii qui erat , ab agrestibus admonitus , citra Medoacum , quem  
magna hostium exercitus pars traiecerat , certo in pago equites  
Germanos fere centum diuertisse ; indiligenterq; ibi & incusto-  
dite uersari : eò profectus , atque illos improviso aggressus ; cum  
unum ex eius turma temere progressum hostes interfecissent ; ip-  
se reliquiq; tam acriter in illos impetum fecerunt ; ut , quadragin-  
ta ex eis interfectis , quindecim captis , equis abductis , se Pataviū  
cum præda uictor receperit . Patres ; quibus Iulius non semel au-  
ctor fuisset , ut Franciscum Mantuanorum principem missum  
facerent ; demum etiam ut ad se se mitterent : se illum recturum ,  
& in officio contenturum : atque ita Mantuam in Gallorum par-  
tibus non futuram : Donato legato scripserunt ; se se Iulio obtem-  
peraturos ; atque illum in trireme Ariminum missuros . tamen ,  
propterea quod imperatoris magnopere indigebat reipu. exerci-  
tus , cogitauerat Senatus illum suis copiis præficere . itaque Fran-  
ciscus postridie custodia eductus , atque inter patres per forū ad  
aquam perductus , una cum Bartholomeo Contareno , Daniele  
Vendramino ; quos ei principis collegium comites & curatores  
dederat Ariminum usque ; conscendens est profectus . Equites ;  
quibus Ianes Fregosius præerat ; qui quidem erant ii , quos stipen-  
diarios habuerat Nicolaus imperator ; Senatusconsulto attributi  
sunt Laurentio , qui Cere obtinebat , usque ad Ianis ad urbem re-  
ditum : suusq; ipsi equitum centum quinquaginta grauis arma-  
turæ constitutus numerus cum auri libra in uictum mensibus sin-  
gulis . Pauloq; Manfronio eiusdem generis equitum auctus nu-  
merus



merus ad centum . quodq; hostium exercitus una cum equitibus Hispanis, de quibus supra diximus, Patauium appropinquauerat; ut omnes crederent eum ad oppidi mœnia uenturum: neque de erat suspitio ab amicis reip. ad legatos delata; ex iis, qui Patauium custodiebant, nonnullos cum hostibus consensisse; oppidiq; portam eis tradituros: eodem Senatusconsulto iussum; ut præter Citolum Perusinum cum sua cohorte, equites peditesq; uniuersi, qui Taurisi essent, & tormentorum magistri sine mora Patauium proficiscerentur. utq; legatis pecunia suppeteret; præter eas, quas superioribus diebus sæpe miserant, centum auri libræ à ciuibus mutuo acceptæ sunt ad illos missæ. eo in tumultu quod Angelus Triuisanus; qui ob classem in Pado amissam in exilium missus fuerat; reipu. est pollicitus, se Patauium cum militibus centum quinquaginta iturum; eiq; urbi præsidio mensem totum sua impensa futurum, si restituiatur: lex est in comitio perlata, ea illum conditione ab exilio reuocari reip. placere. atque is intra biduum eo cum militum numero se in oppidum intulit. Philippum quoque Maurocenum; quem quidem ob uulneratum ab eo Robertum Maurocenum consobrinum suum XL. uiri in carcerem coniecerant; auri libris X. in ærarium illatis Decem uiri libertati & ciuitati restituerunt. hostes cum dies aliquot de aduentu suo Patauium suspensum tenuissent; Monsilice sunt profecti: tormentisq; positis oppidum uerberare occæperunt: murosq; duabus à partibus deiecerunt. interim Epirotæ XX. Patauium emissi omnemq; agrum percurrentes, Sonzinum Benzonium, qui se ad hostium exercitum Verona conferebat, quorum erat rei frumentariæ procurator, in itinere ceperunt non longe à Montaniano cū equitibus paucis & iumentis sarcinariis plerisque, & captum Patauium adduxerunt. quem quidem hominem, propterea quod, cum ciuitate & iure comitorū maioribus suis tradito frueretur, & præterea stipendia reip. faceret plane senatui carissimus, anno superiore in clade exercitus Cremam à legato missus id oppidum Gallis hostibus tradiderat; posteaq; semper bellum reip. fecerat; legati laqueo gula fracta uetusto in proditores exemplo pedibus suspendi mandauerunt. Stanio Clementi Epirotæ & tribus eius equitibus, qui Sonzinum ceperant, pensiones sunt annuæ om-



nibus suffragiis à Senatu dono datæ: ipsi uni & militiæ insignia, & uestis aurea superaddita. Constantinus Arenites Epirota Maximiliano Iulioq; charus ab Iulio ad Maximilianum missus, ut illum reip. placaret, pacemq; ac fœdus inter eos conficeret; Roma Venetias uenit ea in triremi, quæ Franciscum Mantuanorum principem Ariminum adduxerat: Lauredanoq; & patribus salutatis, atque ab iis liberaliter acceptus, auriq; libris quatuor & equo per egregio donatus; Taurisum atque inde in alpes contendit. Dionysius Naldius Fauentinus militum reip. præfectus uir fortis cōplures dies febribus non remittentibus uexatus, atque ad urbem delatus, morbo cedens periit. cadauer in æde Gemellorum apud imperatoris Nicolai cadauer positum. domus fundiq; à repu. illi, quoad uiueret, dono dati, ut ad eius filiam, quam unam puellam reliquerat, transfirent, Senatus censuit. Dionysii milites Vincenrio Naldio eius consobrino sunt traditi: ut, quod erant plerique Fauentini, facilius ab illo regerentur. Inter hæc Monsilice ab hostibus capitur. ea in re Palitiæ Galli opera egregia fuit. is enim pedes in primis cum suis per eam muri partem, quam tormenta deiecerant, irrumpens occasionem reliquis dedit, ut omnes unâ propugnatoribus deiectis in oppidum se inferrent. Hispani ab alia muri diruti parte idem & ipsi fecerunt. neque se à Gallis uirtute superari permiserunt. tormenta eiusmodi rotis erant imposita; ut ab extrema parte ad terram prona fieri, à priore in fastigium erigi nullo negotio possent ad pilas in sublime eiciendas. ea sic aptata usui magnopere fuerunt. cædes est ab hostibus ingens atque indiscrete facta. tametsi etiam ex ipsis ceciderunt non sanè pauci. arx usque ad noctem defensa est. Sebastianum Naugerium oppidi præfectum, ab Hispano captum milite ignaro quis nam esset; cum ei pollicitus fuisset auri libram, uti se redimeret, datum; Vascones eam rem improbantes interfecerunt. arcis item præfectus cum centurionibus & militibus permultis interiit. hostium exercitus timore agrestes eorum finium ad millia duodecim Fossam Clodiam profugerunt: quibus ea ciuitas, uti poterat, è publica pecunia in uictum est elargita. Ioannes Sfortia, qui Pisaurum obtinebat, illis diebus suo in oppido mortuus filium reliquit: quem Iunipera Mathei Teupoli ciuis Veneti filia uxor  
sex



sex menses ante patris mortem pepererat. Galeatius frater nothus ex eius testamento regnum administrandum iniit: literasq; ad Senatum ea de re dedit. hostes comeatus inopia prope coacti Monsilice abierunt Montanianum & Lemniacum uersus: abeuntesq; arcem incenderunt. id incendium ab iis, qui Patauii erant, facile conspectum eorum abitus indicatiu fuit. Monsilice capto; quod Iulius missis in Ferrariensium fines suis copiis aliquot castella iam ceperat; Alfonsus cum Gallis equitibus CCC. praeter suos, & Hispanis militibus non plurimis, & suis cum tormentis domum rediit ad bellum Iulianum propulsandum. & Chiriacus Burgius cum sexcentis militibus ex Apennini iugis uallibusq; ad reipub. stipendia se se conferens Fossam Clodiam uenerat. patres saepe consulti quis nam esset ad copiarum reip. imperium praefectis reliquis anteferendus; sententiaq; legatorum ea de re per literas non semel cognita; Lucium Bononiensem declarauerunt, exercituiq; praefecerunt: cui libras auri duas in uictum singulis mensibus praeter eam stipem, quam antea Senatus ei constituerat, addiderunt. lecti postea sunt a principis collegio, qui ei uexillum & sceptrum, eius imperii insignia, Patauium afferret, Laurétius Orius, Petrus Maurocenus, ambo ex quinque uiris adolescentioribus, qui rebus bellicis maritimis in Senatu tractandis praeficiuntur. literas etiam patres Romam ad legatum dederunt; quibus a Iulio petebant; ut Ioanni Paulo Balioni Perusino permitteret; ut eius uoluntate reip. stipendia facere posset. idq; sunt facillime consecuti. paucisq; post diebus Martini Burgii & Philippi Graeci ceturionum, qui Monsilice interfecti fuerant, liberis & ii sunt fundi dono dati, quos Senatus eorum antea patribus dederat; & militum numerus cum stipendio attributus. atque in comitio Michael Naugerius Sebastiani Naugerii item interfecti pater in filii mortis solatium omnibus suffragiis triumuir prouentibus reip. procurandis est declaratus. lex etiam perlata; quam quidem menses aliquot antea Senatus censuerat: ut sexuiri sale procurando ad quatuor redigerentur. isq; postea numerus magistratuum in eo collegio fuit. Iamq; ad nihilum conatus Iuliani reciderant in Genuensium ciuitate a Gallorum dominatione uendicanda: cum se illi, antequam & reip. classis & terrestres Iulii non magnae co-



piæ ad eos fines accederet, & classe & militibus peropportune mu-  
niissent. ea in re tentanda Ioannes Franciscus Polanus triremis  
reipu. præfectus pila ferrea percussus interit. neque non tamen  
Hieronymi Côtareni præfecti classis industria omnibus in rebus  
diligens, quantum esse potuit, fuit. itaque infecta re Marcum  
Antonium Columnam & Fregosios & maiorem militum partem  
suis in nauibus recipiens Centum cellas rediit. indeq; ad urbem  
pedibus Iulii uocatu se se contulit. atque ab eo liberaliter acce-  
ptus, epulisq; adhibitus, & stipe ad panem remigum donatus au-  
ri libris duabus, iussus est classem, & militum manum longe nu-  
merosiorē ad rem iterum tentandam propediē conficere: suaq;  
illi Iulius consilia patefecit. atque ad naues longas maiores reip.  
de quibus supradictum est, celeriter accersendas tabellarium cu-  
literis Corcyram misit. Eo fere tēpore Vladislaus Pannoniæ rex  
Ludouici Gallorum regis & Maximiliani assiduis hortationibus  
petitionibusq; permotus in suorum principum concilium Petro  
Pascalico legato reip. adhibito proposuit; statuisse se bellū reip.  
inferre; nisi Dalmatas suos quondam populos sibi restituat: nol-  
le se ulterius ea ditione, quæ maiorum suorum fuerit, carere: si  
resp. sua uoluntate eam tradat, se illi amicum futurum: sin bel-  
lum malit, cito eam cognituram, quam præstet pacate restituere,  
quod retineri bello non possit. legatus, cum uellet pro Sena-  
tu uerba facere, rei q; p. causam tueri: ab illis est prohibitus. ita-  
que, quod unum in sua esset potestate; se de eo patres certiores  
facturum dixit: tempus petere, ut, quid ad ea respondeant, sciri  
possit. eo concilio dimisso, fuere nonnulli ex iis ipsis, qui in con-  
cilio fuerant, qui secreto ad legatum detulerunt; bono animo es-  
set: bellum regem facere non posse; quod numi non suppete-  
rent: satisfactum ea denuntiatione cum regibus petentibus, tum  
principibus aliquot Pannonicis; quos suæ ipsorum cupiditates  
impellebant, ut bellum suaderent: sed re, nullum fore bellum.  
quod ita esse postea euentu ipso patuit. Hostium autē; qui Mon-  
silice abierant, pars Vicetiam profecti tormenta, quæ priore ad-  
uentu in oppidum intulerant, ibiq; reliquerant, abstulerunt. Ger-  
mani Vasconesq; , quos adibant pagos uillasq; , incendiorum  
uastitate plerunque fœdatas relinquebāt. Galli cum uellent à re-  
liquo



liquo exercitu recedere Mediolanum uersus, ab rege literas acceperunt: quibus in literis iubebantur, duos etiā menses cum Germanis belli fortunam experiri. Ciues Veneti; qui missu patrum Patauī portis & mœnibus præfuerant; à legatis sunt dimissi. ex iis Angelus Quirinus legatorum ad patres literis laudatus; quòd magna diligentia cum eo comitatu, quem adduxerat, in sua tuenda porta esset usus, sine ulla præterea stipe reip. quam reliqui omnes accepissent, sed impensa unius sua; ad Lauredanum Principem & ad patrum collegium domum rediēs cum se, ut mos erat, contulisset; suæ in reip. liberalitatis & uirtutis fructum tulit, ipsum & totius ciuitatis in se se beniuolentiam. Citadella, Bassianum, Asulum, post hostium abitum non magno sunt negotio recepta; Marostica etiam, sed difficilius aliquanto, arce tormētis expugnata. captiq; in ea Germani milites cum eorum centurione non pauci, & inermes omnes dimissi. capti & Taurisani rebelles aliquot, atque à Mocenico legato, qui aderat, supplicio affecti. Interim Troilus Sabellus ex Romanis principibus reip. militiam facturus ad urbem uenit; cum in itinere equites septuaginta reliquisset. cum patres liberaliter exceperunt. iidem patres Ioanni Beltramio Hispano mercatori sanè industrio; qui ob Iulianas interminationes Ferrariam ab urbe se contulerat; petenti, ut tutum se liberosq; suos facerent ab iis tributis, quæ sunt ab ipsis ante eum diem in ærarium inferri iussā, ita se in urbem reuersurum, neque postea discessurum: libenter annuerunt: literasq; ad illum eius rei obsides dederunt. Iulius autem magnopere in Alfonsum incensus, expugnatis oppidis nonnullis ab eius copiarum imperatore adolescente, Francisco Maria Metaurensium duce, & Ioanne Paulo Balione equitum præfecto in primis ab Rauenna Fauentiaq; finibus, à Senatu petiit; ut suos equites leuissimos & ipse ab alio finium latere in eius regnum prædabundo edictum in Alfonsum promulgauit: in quo rebellem illum in se se Romanamq; reip. sæpe appellabat. deinde id edictum & in ualuis templorum Romæ affigi, & Bononiæ in foro recitari, perq; orbem terrarum uulgatis impressione tabulis omnibus in urbibus atque locis proponi atque appendi mandauit. præter



hæc augendo eo, quem in illius fines induxerat, exercitu duo alia  
Heluetiorum millia stipendio ad eos misso per suos internuntios  
accerfuit. minis etiam & maledictis Aloisium Gallorum regem  
omnibus in sermonibus quotidie insectabatur, onerabatq; perfidi-  
diæ in Christi uicarios nota; quorum ipse tutelam & propugna-  
tionem clarissimo uocabulo præ se ferret; perterrere illum uo-  
lens; ne ulterius Alfonso tueretur: missaq; ad illum auxilia sua  
reuocaret. quibus de rebus Aloisius certior factus animum pro-  
pè induxerat, ut se ab Alfonso defendendo abstineret: præser-  
tim quòd eius uxor Anna regina, optima, sanctissimaq; fœmi-  
na; quæ prægnans tunc erat; magnopere uirum quotidianis pre-  
cibus obtestabatur; ne arma in Romanum Pont. exerceret: exi-  
stimare se se, uentrem, quem ferebat, aliter prospere se non gesta-  
turam. uehementissime autem rex cupiebat, prolem, quam ad-  
huc nullam habebat, ex ea suscipere. alienandæ uero ab Aloisio  
Genuensium ciuitatis cogitationem Iulius non modo non abie-  
cerat non prospero euentu rerum deterritus, sed etiam auxerat  
ardentior repulsa irritatioq; factus. itaque ad naues duas onera-  
rias maximas conducendas atque armandas & ad classem reli-  
quam addendas Neapolim misit. Heluetiosq; priore à se stipen-  
dio in regis fines impulsos ad Genuam expugnandam esse ad-  
ducendos cogitauit. quas ad res id ei etiam animos addiderat:  
quòd plerosq; ex iis, qui Romæ erant sacerdotes magnis thesau-  
ris præditi, ea æstate mors abstulerat. quibus thesauris iure ad  
se redeuntibus ditior factus fortunam ipsam fauere suis rebus co-  
gitationibusq; dictitabat, planeq; gloriabatur. Senatus autem;  
uti Iulio satisfaceret; naues triremes duas & biremes aliaq; nauis  
per plura armari, Marcoq; Antonio Contareno, qui ad Fols-  
fam Clodiam cum trireme una erat, mitti oportere legem sciuit:  
quam ille classem Pado flumine in Alfonso fines induceret. edi-  
ctumq; in foro proponi iussit: qui prædam uellent in Alfonso fi-  
nibus facere; per remp. licere: dum ab incendiis prorsus absti-  
neant. quamobrem ducentæ fere priuatorum hominum nauicu-  
læ paulo post se ad præfectos reip. in Pado contulerunt. Vincen-  
tium etiam Guidotium scribam suum Bononiam misit; ut apud  
Cardinalem Papiensem; qui amplissima cum potestate ei urbi  
& toti



& toti Flaminia rebusq; in bellum administrandis præerat; reip. nomine esset. ita enim Iulius petierat. eodē tēpore ab legatis Patavio Senatus iussu equites leuiiores CC. cum militibus CCCC. Leonardo Apulo & Meleagro Foroliuiensi ducibus in Rodigianos fines missi: & triremes nothæ duæ atque una leuioris generis; cui Franciscus Cornelius Georgii filius præerat; Hostiam appulerunt: deindeq; cum reliqua se classe Centum cellis coniunxerunt. & Hieronymus Contarenus, uexillo cum clauibus & corona triplici ab Iulio cupide ad se missō; ut ea sui etiam iuris esse classis uideretur; una cum uexillo reip. patribus permittentibus deinceps est usus cum fœderis præfecti nomine. Francumq; Ghibertum unum ex iis, qui ærarii Romani causas administrant; quem Iulius præfecti socium esse uoluit, ut ita maxime ei classi suam auctoritatem impartiret; apud se sua in triremi habuit. cum Ghibertum cum Iulius in collegio Cardinalium ad id munus publicelegeret: ad Gallos Italia expellendos, remq; Venetam iuuandam, se se legere palam dixit. post hæc ad Contarenum misit; ut classem Hostiam adduceret. quam cum diligenter inspexisset, ampliterq; probauisset: uini Corsi carros sexdecim, boues sexdecim: tot enim erant naues: hircos genitalibus defectis bis totidem: panis cum semel cocti tum bis cocti magnum numerum ei dono in classem misit: cumq; ea classe postridie sua in triremi Centum cellas est profectus. eo deinde Viterbium petente Contarenus suos remiges sociosq; cum tentari ualitudine uideret: per Senensium portus; qui eo in tractu maris sunt, quosq; ultro ciuitas ob uerem in remp. beniuolentiam ei obtulerat; classem circumduxit. iamq; ab Iulii exercitu arce Lugiana ui expugnata, Vasconibusq; ducentis, qui in ea erant, interfectis, Mutina oppidum; ne postea grauiora perpeti cogeretur; eius seministris, qui illō copias conuerterant, certis conditionibus interpositis tradidit. & Marcus Antonius Contarenus, ut erat ei à Senatu imperatum, Pado subuectus Rodigianos ad deditionem cōpulit. Mocenicus quoque legatus; qui se cum Citolo Perusino & equitibus leuioribus per plurimis in alpes intulerat, ut Ciuidale Belunianum expugneret: quæ ciuitas in Maximiliani partibus obstinate Ioanne Diedo altero legato antea cū copiis eō missō se continuerat: muro tor-



mentis perforato, cum se milites uellent intromittere, nulla spe oppidanis reliqua se tuendi; ne urbs honesta diriperetur, Citolo adiuuante illos continuit; & pacate oppido est potitus. post hæc & qui in Alfonsi fines se intulerant reip. præfecti, omnia fere earum regionum oppida castellaq; in suam potestatem redegerant. & Iulianæ item copiarum captis municipiis, eo ab latere quæ erant, magna ex parte, Ferrariam, cui urbi appropinquauerant, iam iamq; irrumpere se posse confidebant. Grittus uero & Capellus legati Senatus permissu Patauio cum exercitu egressi non Vicetiâ modo reliquaq; finium eorum municipia nullo negotio receperunt: sed hostes etiam; qui se in Veronæ finibus nostros ueriti aquarum deriuatione atque aggeribus communierant; ad uicina eis loca motis castris in oppidum compulerunt. quo in itinere præmissi equites leuissimi, ut illos lacefferet, non semel & prædam & caedem fecerunt; & captiuos abduxerunt. Patres interim Laurentium Ceretanum omnibus suis militibus præfecerunt, & Naldio Fauentino pensionem annuam librarum auri quinque, quoad ueretur, persolui mandauerunt. dum hæc administrarentur: Cum Ioanne Francisco Gambara homine inter ciuitatis Brixianæ principes claro, qui anno superiore turmæ equitum reip. præfectus ob simultatem, quâ cum uno ex Lauredanis ciuibus Venetis grauius ab eo offensus exercebat, in clade exercitus ad Gallos hostes sua cum turma transierat; atque ab rege stipendio accepto in eius exercitu postea contra remp. semper fuerat; Cardinalis Papiensis per suos internuntios clam ad eum missos egit; ut dare operam uellet efficereq; sua ut ciuitas ad rempu. rediret. ille autem; cui quidem Gallorum imperii ualde iam perresum esset; ita se rem facturum est pollicitus; si respu. cum sibi apud se gratiæ locum, quem habebat ante cladem, restituat. ea dere Cardinalis Iulium certiore facit. Iulius per Donatum legatum à Senatu postulat; ut suam fidem Ioanni Francisco det; fore uti ipsemet constitueret, si reip. Brixiam tradiderit: addiditq; habere se etiâ, qui sint Parmam sibi oppidum iisdem artibus tradituri: itaque sperare se se breui Gallos Italia eieciaturum. Donati literæ iis de rebus ad Senatum perlata magnâ in spem belli celeriter conficiendi patres crexerunt. itaque Senatusconsultum factum est: de Ioanne Francisco



sco Gambarà ita fore, uti ipse constituisset, si Brixiam reip. resti-  
 tuat: suam ei fidem Iulius interponeret: Senatus illam omnibus  
 numeris seruaturum: magno silentio imperato, ne quid eius sci-  
 ri posset. iidem patres Iulio permittente literas ad Franciscum  
 Mantuanorum principem dederunt: uelle se imperium reip. co-  
 piarum ei tradere: mitteret ad urbem suum hominem, qui cum  
 res transigi possit. Triulcius inter hæc Brixia Mediolanum pro-  
 ficiscens propter Heluetiorum in Gallici regis fines impressione,  
 tormenta, ibi quæ erant, secum ut ferrentur imperauit. Helue-  
 tii autem; cum ad Abduæ fluminis è lacu Lario exitum Galli eis  
 occurrissent; binis eos cladibus affecerant. legati reip. non lon-  
 ge à Verona, qui erant certiores facti hostes in timore esse, neque  
 satis sibi confidere: cum non longius ab eorum castris passuum  
 sex aut septem millibus abessent; singulis centurionibus & equi-  
 tum præfectis appellatis, interrogatisq; uellent ne atque auderēt  
 cum hostibus confligere; atque ab omnibus responso alacriter  
 dato, nihil se malle, quàm pugnare, atque ab ipsis periculum de  
 sua uirtute fieri: communi consensu statuerunt illos aggredi. ita-  
 que præmissis equitibus leuioribus sexcentis, qui hostes mora-  
 rentur: castra enim iam mouerant: subsequi ipsi omni cum exer-  
 citu cœperunt. equites suam operam legatis præstiterunt. quod  
 si illi etiam in eo, quod constituerant, perstitissent: bellum con-  
 fici eo die profecto poterat. fuis enim fugatisq; iis: quod erat  
 sane perfacile (nam propter Gallorum abitum; qui partim Ferra-  
 riam, partim Mediolanum recesserant; ad non magnum redacti  
 erant numerum) neque Verona, neque Brixia, neque reliquo-  
 rum oppidum ullum in hostium manere partibus perseuerauif-  
 set. uerum enim uero fortuna; quæ reipub. inuidere non desie-  
 rat; Lucii, qui exercitum regebat, animum secordia infecit: ut  
 ille sæpe suos in itinere aliam atque aliam ob causam inanem qui-  
 dem atque futilem remorando tempus truerit; dum hostes se in  
 oppidum reciperent. quos tamen iidem equites consecrati tan-  
 tum eis formidinis iniecerunt; ut, qui intrauerant, portæ pontem  
 erigentes uiginti quatuor ex suis oppido excluderint: quos nostri  
 captiuos fecerunt: Epirotamq; unum, qui se cum hostibus inie-  
 cerat, amiserunt. Domi autem Enrico Britannia regi per literas



petenti, ut arcuum millia quadraginta ex urbe asportare suis ho-  
minibus liceret; & si id contra leges erat; Senatus tamen ob uete-  
rem cum rege beniuolentiam de media eius numeri parte permi-  
sit. atque ut cum pacatæ rei memoria huic X. meorum commen-  
tariorum libro finis imponatur: Decemuii cum uiderent  
in magistratibus, qui remp. in Senatu procurant, nul-  
lum discrimen collegarum fieri: legem sciue-  
runt: nemini esse in eis magistratibus li-  
cere; cui esse in illis magistratibus,  
quos comitia declarant, pro-  
pter propinquitates af-  
finitatesq; non  
liceat.



PETRI BEMBI RERVM VEN<sup>142</sup>  
TARVM HISTORIAE  
LIBER XI.



VLIVS à Centumcellis per Aureliam profiscens, Genuensium ciuitatis à Gallorum imperio auertendæ cupiditate in dies magis magisq; ardens, Corytum profectus est, ibiq; in litore cum præfecto classis Venetæ Contareno, quâ quidem classẽ illò adduci iusserat, hilariter pransus, classariis fere uniuersis se aduentibus mira facilitate ad pedis osculum admissis, & militibus quatercentum in triremes impositis, iterum ei, ut celeriter in Liguriã contenderet, imperauit: qui confestim Populoniã se contulit. quoniam autem triremes Venetæ in Aegeo mari nauem magnam Genuensium mercibus onustam ceperant: per Donatum legatum, perq; suas literas à Senatu petiit; ut eam nauem Genuensibus restitueret; eo illos munere lenire cupiens. patres seruata apud Corynthes nauem omnibus cum mercibus Genuensium internuntio tradi mãdauerunt. iidem patres, quòd Lucii timore atque ignauia hostibus elapsis pulcherrimam Veronæ capiendæ occasione turpiter amiserant, indignabundi de Iulii consilio, qui Romam redierat, Franciscum Mantuanorum principem suarum copiarum omnium imperatorem faciunt, eodem fere Senatusconsulto, quo antea quam honorificentissimo fecerant. is, cum imperium non modo libentissime, sed etiam hilariter, ut uidebatur, accepisset, deq; eo immortales gratias senatui egisset, seq; ad exercitum atque ad legatos breui iturum recepisset; dum equites cogere, dum comparare se per literas perq; suos interpretes ad urbem sæpe missos certiores patres, facit dum etiam contra priorem animi sui alacritatem Senatusconsulto non contentus duriores reip. conditiones interponit, pedem Mantua nusquam protulit. interim Troilo Sabello, de quo supra dictum est, equites grauioris armaturæ centum, leuioris qui sagittis uterentur alteri totidem à Senatu traditi: Thracisq; hominis, qui equites leuissimos ducentos in Epiro pa-



ratos habebat, oblatio accepta ut reipu. militiam facerent, auri se-  
muncia ipsis singulis in menses singulos, eorum praefectis uncia  
cum sextante in stipendium constituta: iussiq; quamprimū con-  
scendere. In Foroiuliensibus autem cum hostes cogi, ut in eos im-  
petum facerent, unde quaq; dicerentur: Ioannes Viturius, uir ma-  
gni animi, qui in Saciliensibus magistratum gerebat, ad illos lega-  
tus est à Senatu missus. Iulius iterum Roma per Flaminiam pro-  
fectus à Spoletio in dexteram flectens ad templum Lauretanum  
se contulit; ibiq; in uirginis aedicula sacris à semet peractis, Anco-  
nam uenit, ut Bononiam ad bellum, quod cum Alfonso gerebat,  
administrādū procederet. Legati Veneti & Lucius praefectus in  
campis Martinianis recensito exercitu, tormentisq; à Lactantio, qui  
eorum curam gerebat, ad Veronae muros positus, eos deicere op-  
pidi capiendi spe adoriuntur. id cum dies aliquot fecissent, par-  
temq; non paruam diruissent: quod mons difficultatem magnam  
dabat, aggredi omnibus copiis atque irrumpere non sunt ausi; cū  
id facere debuissent. milites enim & audebant quae proponeban-  
tur; & quae imperabantur, obibant magno animo. sed inerat in Lu-  
cio incredibilis omnium rerum, etiam non magnopere timenda-  
rum, suspensio animi, & cordis gelidus quidam pavor; qui eum  
retinebat, ne quid egregium atque altum auderet. quem tamen  
timorem uerbis & prudentiae simulatione tegebat: ut nō facile ap-  
pareret, utrum timidior, an prudentior esset. in ea oppugnatione  
dum tempus terunt, hostes ex oppido prima luce repente egressi  
ad tormenta configenda, quae indiligenter custodiebantur, con-  
uolauerunt. nam Lactantius pridie eius diei pilae iactu in fœmo-  
re percussus curando uulneri Patauium se perferri uoluerat: par-  
uoq; negotio repulsis qui aderant, quod intenderant assequeban-  
tur: cum Citolus, clamore fugientiu audito, è tentorio ita, ut erat,  
sine galea cū suorum paucis accurrens, repellereq; illos aggres-  
sus, in medium eorum agmen imprudens se iniecit; atque ibi uul-  
nere in capite accepto tellure prostratus confossusq; interiit. ita  
Veneti duos longe reliquis praestantiores praefectos militum ui-  
ros, quorum uirtuti legati exercitusq; omnis summo opere confide-  
bant, bidui spatio amiserunt. Lactantius enim suo ex uulnere pau-  
cis post diebus est mortuus. Citolo interfecto eius milites ad uin-  
dictam



dictam incitatiores facti, accurrente reliquorum globo hostes à tormentis repulerunt, interfectis circiter quadraginta & quæstore Germanorum militum, captis ad quinquaginta cum præfectis tribus: quorum ex numero Frāciscus Maldonatus Hispanus fuit: qui quidem Venetias est perductus. rebus ita se habentibus cum nihil proficere muris Veronæ uerberandis legati se cognoscerent; & Galli equites peditesq; qui auxilio inclusis à Mediolani præfecto mittebantur, iam ad Benaci lacus deriuationem Minciumq; peruenissent; atque à Germania appropinquare manus à Maximiliano iussæ dicerentur: tormentis præmissis ad pagum Martinianum exercitum reducant. oppido obsidione liberato, milites Hispani & Germani, in eo qui erant, octingenti in Pantænæ uallis urbi proximæ in colas, propterea quòd amice nostros omnibus rebus iuuerant, eam iniuriam uindicatum egressi se inferebant. qua intellecta re equites trecenti Ioanne Græco duce ad illos sustinendos propere à legatis missi, eos omnes fuderunt fugatos usque ad montis Feliciani cacumen insequuti partem interfece- runt, partem captiuos adduxerunt circiter ducentos. in Ligustico uero mari iisdem fere diebus non longe ab Genua classis Iulii & reip. triremium XV. classisq; Gallica magnarum nauium & triremium XXV. propiores factæ, atque in suas utraq; acies conspectis hostibus distributæ, cum eiiculandis tormentorum pilis duarum horarum spatio se laceßere perseverauissent, coorto ueto abductæ in diuersa abierunt: & quòd oppidum magnæ Gallorum introductæ copię tutissimum reddiderant, Contarenius omni comœatu consumpto infectis rebus Populoniã rediit: triremesq; duæ nothæ ab Senatu à Corcyra ad Contarenum missæ cum eius se classe coniunxerūt. tum quæ nauiculæ urbanæ in Iulii gratiam Pado subuectæ Alfonso ab eius exercitu alio ab latere uapulantis damna atque molestias adaugebāt, earum partem Alfonso ipse, cum equitibus Gallis Italisq; sexcentis, militibus duobus millibus traiecto repente flumine, uacuum hominibus (fugæ enim se se dederant) cepit. reliquas ipsi Veneti, ne hostes illis potirentur, incēderant. Atrianos etiā itemq; Rhodigianos reliquaq; eorum locorum municipia fugatis magistratibus recepit Leonardus Apulus: cæteri q; equites elusis locorum cognitione & celeri-



tate sua hostibus Montanianum se contulerunt. Senatus non ni-  
hil ab Alfonso, quem ipsa hostiū uel fortuna uel indiligentia tue-  
batur, atque ab Gallis metuens, legatis collaudatis, quod Vero-  
na exercitum abduxissent, uti tormenta Patauium mitterent, im-  
perauit. iamq; in Leonice nos se exercitus receperat, cum intellecta  
propter Alfonsi prosperas res Leonardi Apuli & reliquorū equi-  
tum fuga Gritus legatus cum equitatu Montanianum profectus  
& incolas illorum finium omnes, & municipes ipsos, quos inopi-  
natus hostium timor incesserat, opportuno aduentu atque auxi-  
lio confirmauit. Patres ut amissæ in Pado classiculæ damna dede-  
cusq; sarcirent, nauiculas centum biremesq; aliquot celeriter ar-  
mari, & earum nomine latissimo præfectū in Pado flumine: quod  
nunquam antea factum meminerant: id enim nominis ad illum  
usque diem bella tantum in mari exercenda sibi uendicauerant:  
creari statuerunt: lectusq; Ioannes Maurus egregia uirtute nauir-  
ter ad suum munus obeundum se dedit. Audita Venetorum equi-  
tum & magistratuū fuga, Gallici equites & milites, Lemniaci  
qui erant, Atesi traiecto ut cum Alfonsianis se coniungerent, atque  
in perturbatos impetum facerent, Montanianum cum tormentis  
muralibus duobus oppidi capiendi spe se conferebant. ea re per  
agricolas opportune cognita missi confestim ab legatis præfecti  
equitum tres bona cum manu medio fere in itinere hostibus ad-  
uentantibus occurrunt: eodemq; temporis puncto cum longe ma-  
xima suorum parte pugnam ineunt: & reliquis, ut pontem, qui  
non longe aberat, eratq; hostibus in reditu trāseundus, rescindant,  
ad intercludendum eis abitum si superarentur, imperant. ab iis  
ponte rescisso hostes ab reliquis intercepti cum se trium propè ho-  
rarum spatio acriter fortiterq; defendissent, demum superantur;  
atque in fugam uersi transitu pontis impedito omnes ad unū uel  
cæsi uel capti sunt, equites optimi nominis C L. pedites primo-  
rum ordinum CCCC. & capti omnes Venetias perducti custo-  
diæq; traditi centum & decem. eius cladis fama celeriter percre-  
brescente, municipia, quæ Veneti amiserant, propè omnia rece-  
pta sunt: ut amplius triduo in hostium potestate non fuerint. Iis-  
dem diebus Episcopus Moloponitanorum Iulii legatus ad urbē  
uenit: ut apud patres moram traheret, communemq; rem eius  
nomine



nomine auctoritateq; iuuaret. ipse Iulius Bononiam sacris prae-  
euntibus introierat. eo magnopere adnitente, qui Ludouicum  
Francisci Mantuanorum principis filium obsidis loco apud se ha-  
bebat; post plerasque interpositas à patre satis quidem duras at-  
que illiberales & stipèdiorum & reliquarum rerum condiciones;  
quæ eius animum ab uxore deprauatum ostendebant; tandem al-  
terum Senatusconsultum factum est: quo per quinquennium  
idem imperium est ei traditum cum stipèdio librarum auri quin-  
gentarum in annos singulos: dum ipse equites grauioris armatu-  
ræ tercentum quinquaginta, leuioris centum, milites ducentos  
belli tempore paratos habeat: resq; publica omnia eius ditionis  
incommoda omnibus ab hostibus se præstaturam pollicebatur.  
pauloq; post illius familiari Vico Patauino homini; quo is pluries  
iisdem de rebus internuntio apud patres usus fuerat; equites le-  
uis armaturæ centum attributi. ob Citoli Lactantiq; interitum  
milites non pauci ex illorum ordinibus nulla abeundi facultate  
sibi permissa sigillatim ab exercitu discedebant. quod quidem fa-  
ctum nonnulli reliquorum tribunorum & centurionum milites  
imitabantur. quamobrem edictum est ab legatis propositum; ut  
qui non missi abitu parauissent; omnibus in reip. locis caperè-  
tur, & armis exuerentur, ignominiaq; notarentur, ea res ei licen-  
tiæ opportunum remedium fuit. cæterum cum ex alpibus certis  
auctoribus afferretur Germanorum manus comparari, ut reipu-  
municipia in primis iugis inuaderent; quibus captis ac direptis  
in planitiem descenderent: Sigismundus Caballus est ad ea loca  
cum copiis ab legatis contendere iussus præfecti nomine. Franci-  
scus imperator Bononiam ad Iuliū profectus hilariter ab illo ex-  
ceptus est, imperatorq; Ro. etiam reip. dictus. Galli, qui ad Min-  
cium uenerant, uti supradictum est, ad Alfonsum, ut ei auxilio  
contra Iulium essent, se contulerunt. legati, ut Iulio satisficeret,  
equites grauiores ducentos & quinquaginta, leuiores fere totidè,  
milites bis mille in Alfonsi fines intromiserant: Maurusq; classis  
præfectus cum nauigiolis plurimis & biremibus aliquot, cumq;  
triremibus tribus, quæ ab Istris & Dalmatis ad illum uenerant,  
Padum flumen ingredi damnis Alfonso inferendis est à Senatu  
iussus. Inter has belli cogitationes rei etiam pacatæ, quæ malum



in exemplum inuerecundiæ ciuium impudentiæq; uertebatur; patres animum adhibuerunt. nam cum in creandis magistratib. ambitus eo anno magnopere uiguiſſet; ut præſandis ciuib. qui ſuffragia in comitio daturi eſſent, à candidatis & candidatorum propinquis clientib. q; nullus modus fieret, nulla eos modèſtia contineret: lex eſt in Decemuirum collegio perlata: qui deinceps ciuis ciuem rogauerit, ut ſibi aut alicui ſuorum in dādo ſuffragio fautor ſit; iſ ad ullum magistratum, aut omnino reip. in comitio munus X. annos ne admittatur; et ſi in magistratu fuerit, ab eo reii ciatur: cui autem rogari ſe contigerit, iſ rogatoris nomen ad Decemuiros deferat: id ſi non fecerit, quinque annos eandem multam ſubeat. ita magnæ ciuium moleſtiæ à patribus obuiam eſt itum. iuſſi etiam ſunt Dominicus Triuiſanus templi Marci procurator, Leonardus Mocenicus, legati ad Iulium à Senatu pridè lecti, ut ſtatim conſcenderent, Rauennamq; proficiſcerēt, ut Bononiam ſe conferrent. literæ poſt hæc ad legatos Gritum & Capellum datæ, uti alter eorum cum exercitus parte in fines Rhodigianos atque ad Padi ripas accederet, ut quantum poſſet Alfonſo noceret. ita factum à Paulo eſt, cum id illi muneris ſorte ducta obtiguiſſet. Maurus claſſis præfectus cū triremibus tribus Padi oſtium, qui Varenus appellatur, ad triremes ex Venetorū claſſe iam pridem capta duas, quas Alfonſus ſuis hominibus armauerat, ibiq; continebat, atque iis, qui itinerum cauſa mare illud exercebant, multa damna intulerat, capiendas aut omnino repellēdas eſt ingreſſus, fruſtra: illi enim ſiue admoniti, ſeu etiam caſu ad ſuperiora ſe ſe fluminis iam receperant. Senatus interim ad pecuniam belli rebus ſubminiſtrandam, cuius magnopere indigebat, mediam unius cenſi partem ciuib. impoſuit, certis conditionibus, quo facilius ea ipſa pars exigeretur, adhibitis. Paulus autē legatus cum ſe Figariolum in Padi ripa caſtellum, quod ſupra Ferrariā eſt millia paſſuū XII. cum exercitu contuliſſet, tormētis poſitis dirutaq; porta Alfonſi milites, in eo qui erant, paucarum horarum ſpatio ad deditiōem cōpulit: alterumq; item in fluminis ripa è regione caſtellum fugatis hoſtibus cepit: iisq; captis equites leuiſſimos flumen traiecit; qui celeritate uſi & predas abigerunt, & agrum illum omnem fuga terroreq; impleuerūt. Diuerſa quoque



quoque à belli parte Ioannes Delphinus Feltriæ magistratus cum  
 iis, quas habebat, copiis & agricolarum manu complures in alpi-  
 bus hostium pagos repente aggressus in regione, quæ Tescinus ap-  
 pellatur, eos plane omnes, qui quidem erant rebus plurimis & ad  
 commeatum & ad mercaturam exercendam refertissimi, interfe-  
 ctis aut fugatis incolis incendit, omniq; uastitate regionem fœda-  
 uit: ut damna atque incendia, quæ ii Feltrinis intulerant, prope ex  
 equo uindicaret. in Istris quoque non nihil incommodi per illos  
 dies & acceptum & illatum est. Sed ut ad Padum flumen reuer-  
 tamur, Paulus legatus pontem in eo facere cum uellet ad exerci-  
 tum traiciendum, ut se cum Iulii exercitu coniungeret; quod qui-  
 dem ut faceret, Iulius ab eo per literas diligentissime petierat; ab  
 uxore Francisci impeditus, quæ naues retinebat, destitit. quingen-  
 tos tamen equites leuissimos cum præfecto eorum Federico Con-  
 tareno traiecto in nauibus flumine obuiam imperatori misit, ut  
 Mantuam redire tutius posset. Galli enim hostes haud longissi-  
 me aberant: quos etiam una cum Alfonso eò uéturos, impetumq;  
 in se facturos, non unis literis nuntiisq; cognouerat. Maurus sub  
 hac à Paulo admonitus reip. interesse ut ad se se cum minorum  
 nauigiorum classe quācitissime accederet, quatuor nauibus Atria-  
 ni municipii, ubi tunc erat, auxilio relictis, cum nauigiis reipub.  
 L. reliquis priuatorum hominum propè CC. superato flumine,  
 nullo ab hostibus, qui in ripis se ostendebant, ut eum impedirēt,  
 detrimento accepto, ad illum se contulit, animum alacritatēq; exer-  
 citui, qui timere multa & cauere cogeatur, aduētū suo spe om-  
 nium celeriore afferens, paucisq; post horis cum nuntii Paulo ue-  
 nissent, Franciscum imperatorem unā cum Federico Contareno  
 ad uicum Sermenem, qui est in Padi ripa Figariolo proximus,  
 suos se in fines retulisse, ad illum profectus communicatis de bel-  
 lo inter se consiliis sua in castra rediit. ille Mantuam, ut suos equi-  
 tes militesq; cogeret, multa pollicitus, multa spe concipiens, ut in-  
 quiebat, se recepit. attulerat imperator secundas Iulii literas lega-  
 to, quas in itinere acceperat: quibus ab eo Iulius multo impensius  
 petebat, ut copias reip. traiecto celeriter flumine cum suis copiis  
 coniungeret. Gallos enim hostes magna cum manu, quam omni-  
 bus è locis euocauerāt, suum in exercitum uelle impetum facere;



quæq; ipse de Alfonsi oppidis ceperat, expugnare decreuisse, non obscure cognouerat. legatus eas literas ad Senatum misit, petens, ut iuberent patres, quid se uellent facere: nihil enim tantis de reb. Senatu non consulto se ausurum, interea tamen quæ ad traiciendum opus sint comparaturum, & curaturum ut si ipsi iusserint nulla traiectui mora interponatur. patres non his modo à Paulo sed etiam à Hieronymo Donato & Triuifano ac Mocenico, qui iam Bononiam se contulerant acceptis eadem de re literis: Senatu coacto Iulio satisfieri oportere legem sciuerunt: Senatusq; consulto Bononiam ad legatos misso, ut transitum maturaret Paulo mandauerunt. ad Gritum etiam literas dederunt, ut ad Paulum augedis eius copiis equites grauiores ex suis centum, leuiiores CC. confestim mitteret. pecunia etiam à Senatorum nonnullis mutuo, quæ Mantuam in stipendium imperatori mitteretur, patribus est tradita. tum ab iisdem patribus frumenti staria ducenda in sanctiores monachorum societates dispartienda dono data, ut in eo rerum discrimine Deo opt. maximo pro Iulio proq; rep. preces faceret. Paulus dum conficiendo ponti se se dat, eundem Federicum cum equitibus septingentis propere Bononiam premisit Iulii auxilio, seq; cum exercitu confestim subsequuturum & breui affuturum confirmauit. Donatus enim & reliqui legati duo certiore illum fecerant, omni à Gallis arte procurari, ut cum Iulio fœdus in eam auertendi eum à reipu. tuendis rebus causa. Imperatore interea moras omnes interponente, ut, quod primum atque maximum Paulo promiserat se ad eum celeriter uenturum, id non ambigue differret, ac nulli omnino usui Iulio aut reipu. uelle esse uideretur statuisse: patres de eo admoniti consulto Senatu Franciscum Capellum eius familiarem ac necessarium, qui erat in Senatu, illa ipsa hora contendere ad imperatorem iusserunt, monereq; illum ne ulterius expectari se se tam oportuno atque etiam tam necessario reip. tempore patiatur: publicam omnium salutem in eo positam, ipse se ad exercitum statim si conferet, munusq; obierit, ac si dem præstiterit suam. Franciscus nondum dimisso Senatu apertis sibi uni foribus Mantuam est profectus. Dū hæc administrantur, Galli castella quædam in Alfonsi finibus ab Iulianis capta acriter agredi recipiunt: incursionibusq; in Bononiensem agrum atque usque



usque ad oppidum factis magnum timorem Iulio incutiunt, ut iam, quid se præstet facere, plane nō dispiciat. augebat eum timorem, quod Bentiuoli Gallis adiuncti Bononiensium ciuium factionem excitatum iri haud ambigue putabantur; ut & ad portas, & ipso in oppido Iulius hostes uno tempore esse habiturus uideretur. qui quidem quoniam febribus aliquot iam dies tentabatur, nullam prope legatis Venetis se adeundi facultatem dabat. tamen etiam à Francisco Alidosio Cardinali, qui Iulii nomine ciuitatem regebat, & Gallis maximopere fauebat, studium per cubicularios adhibebatur, ne alloqui illum possent. Ponte cōfecto, & parato ad traiciendum exercitu, Maurus classis præfectus, cum eodem Padi alueo, quo uenerat, reditum sibi ab Alfonso tormentis in ripa fluminis non uno in loco collocatis aut omnino interclusum, aut plurimis maximisq; periculis propositū uideret; superato reliquo usque ad Castellum Nouum flumine, traductisq; ripā nauibus, ac per cāpos aquæ plenos ob intersectas Atesis ad Lemniacum à Gallis ripas decem millibus passuum confectis, classem ducentarum nauium in Atesim ad Caudam uicum incolumem perduxit. deinde prono flumine ad fossiones Philistinas se se recepit. aliquot ex ea classe naues, quæ quod maiores erant aliis, ripā traicere non potuerant, Mincium se in flumen, deinde Mantuam contulerunt. expectauerat Paulus legatus per eos dies imperatorem, qui iam iamq; se affuturum pollicitus fuerat, ut una traicecto flumine quò uellet Iulius proficisceretur. ille uero causis moræ post causas non ita caute interpositis, quin falso quæsitæ agnoscerentur, neque se in uiam dabat, neque suos equites militesq; ad illum mittebat, neque uero etiam Franciscus ab Senatu ad eum excitandum missus quicquam proficiebat. quamobrem ne à patribus reprehendi posset mandata reip. tanta de re tam angusto tempore differens, pridie Calend. Nouembrium Paulus Padum exercitum traduxit. uno tempore ea de re Iulius nuntios accepit, & Fabricius Columna, uir egregiæ uirtutis, quem Ferdinandus Hispaniæ Rex cum trecentis equitibus ex Neapolitanis finibus ad Iuliū mittebat ut ei auxilio in Ferrariensi bello esset, cum expeditionibus ad illum uenit, reliquis bidui post se interuallo in itinere relictis. quæ duæ res ita Iulii animum exhilarauerunt, ut febris eum con-



tinuo reliquerit. itaque confirmator factus edictum proposuit: quo edicto Gallorum præfecto, qui magister magnus appellabatur, reliquisq; Gallis igni & aqua sacris conceptis uerbis interdicebatur, si deinceps Alfonsi causam ulla ex parte tuerentur. idq; impressis publice tabulis uulgari iussit. Imperator domi sedens, Paulum legatum traicere admonitus, in seſſo equo cum suorum paucis ad Stellatam uicum, ubi se ille continueraſſet totius exercitus traiectum operiens, ad eum uenit, atque una Mutinam uersus diem unum omnes processerunt. ea uero nocte, quæ est diem illud subsequuta, ab uxore per literas ut aiebat certior factus, Gallos, qui Veronæ erant, in eius agrum populationem & cædes fecisse, ædificia combussisse, prædas abegisse, Paulo conueto ad sua tuenda redire se domum uelle ei denũtiauit. atque ita, cum legati preces, & Iulii atque reip. maximorum erga se promeritorum commemoratio, & sui nota nominis, quã quidem notam atque calumniam accepto ab utroque stipendio, eorum causam tali tempore deserens, erat magnam indelebilemq; subiturus, nihil apud ipsum ualuisse; Mantuam rediit. Erat Brixia in Ioannis Francisci Gamba-  
ræ equitatu honesta cõditione Petrus Longena, eius oppidi ciuis, qui indignans se arma ferre contra eam ditionem, sub qua natus altusq; annos triginta uixerat, coacto equitum idem sentientium numero, ex oppido profectus Mõtanianum ad Gritum uenit, ut militiam reip. faceret, orans obtestansq; se recipi. de eo Griti literis certiores patres facti, Petrum Longenam recipiendum, & præfecturam LX. leuiorum equitum ei dandam censuerunt. In comitio uero postridie eius diei Marco Venerio, qui pridem uulneribus in expugnatione Monsilicensi acceptis usum propè manuum amiserat, scribæ munus in prætura Foroiuliensi per quatuor magistratuum tempora dono datum, ut se alere familiamq; suam posset. filiis autem Ludouici Michaelis, quem Carauagianæ arcis custodem Galli captiuum fecerant, atque in Galliam miserant, in tributis reip. balistarum loca Decem, nobilibus adolescentibus dari solita, ad eorum matrem seq; ipsos sustinendos item dono attributa. Inter hæc Senatus certior factus Hispanos equites, qui Veronæ erant, à Ferdinando Neapolim reuerti iussos ab oppido tuendo discessisse, literas ad legatum Gritum dedit, ut cum iis quas habebat



174

bebat copiis Veronam contenderet: confidere se, si id celeriter faciat, posse ab eo urbem propè uacuum recipi, præsertim si edictum proposuerit, nullius ciuis in remp. iniurias Senatui uindicaturum, ciuitatemq; immunem omnium onerum iubere esse, si ad rep. redeat. quibus acceptis mandatis legatus, tametsi parum spei aleret rem eum exitum habituram tam exiguo copiarum numero (cathraëti enim equites amplius quatercentis, milites amplius quatuor millibus non erant) idq; ipsum senatui rescripserit; tamen acitis quamplurimis è uicinis locis operibus, & tormentis Patauium afferri imperatis; se ad iter comparabat. De maritimis autè rebus ut ratio haberetur, impensisq; reip. modus fieret, Senatusconsultum factum est, ut Maurus classis in Pado flumine præfectus priuatorum hominum nauculas, quibus non magnopere indigebat, missas faceret, triremesq; quas habebat leues retineret, Hieronymusq; Contarenus classis in mari supero legatus, qui Genua sæpius tentata, quòd ab Gallis hostibus largiter erat communita, nihil profecerat, ut Iulii missi Corcyram se reciperet, retentisq; apud se quatuor quas uellet triremibus reliquas ad urbem redire permetteret. interim ab Iulii rei; pub. exercitu Saxolum in Mutinensi agro ad Seriam flumen castellum arce atque opere communitum tormentis positum, cum à quatercentis propugnatoribus Gallis defenderetur, ardore militum per muros irrumpentium celeriter est captum. Ioannes etiam Delphinus Feltrinae magistratus in magnam hostium manum eum alpium tractum depopulantem impetu acriter facto maiorem eorum partem cecidit, reliquos omnes fugauit: specusq; illud montanum, de quo antea dictum est, quod Couolum appellant, compulsis timore ad deditionem iis, qui in illo erant, recepit. qua intellecta re, ut ciuitati optime de rep. merita, omnia perpeffa ab hostibus damna, patres grati essent, omnium tributorum immunitas ea pecunia excepta, quæ ab illa in principis salarium quotannis ad urbem mittitur, municipio Feltrinorum est ab Senatu dono data. ab Ioanne quoque Viturio in Carnis hostes quatercenti è Goritia egressi Sontiumq; flumè transgressi omnia uastantes ita cæsi fugatiq; sunt, ut eorum plurimi timore se in flumen præcipitauerint. ea in re Aloisii Porti Vicetini equitum leuiorum turmae præfecti uirtus plurima extitit. Redierat Mantua



per eos dies ad urbem Franciscus Capellus, retuleratq; patribus;  
nullam esse in imperatore rei bene gerendæ uoluntatem, nullam  
fidem: uxoris artibus eius animum delinitum Alfonso illius fra  
tri cupere omnia, neque Iulium neque rempublicâ præ illo quic  
quam facere: fauere etiam Gallis plurimum. Gritto ad Veronam  
iterum obsidendam profecto, eæ sunt tempestates consequitæ, ut  
recedere, seq; ad Suauium municipium recipere, ut equites, &  
milites sub tectis contineret, sit coactus. demum intelligens Vero  
nam communitionem esse factam Montanianum exercitum redu  
xit. quare cognita iussus à Senatu est, equites quingentos, milites  
octingetos ad Rhodigianos reliquaq; circa Padû eius regionis mu  
nicipia tuenda & custodienda mitteret, Iuliani exercitus Franci  
sco Maria imperatore & Fabritio Colûna reliquisq; ducibus, qui  
erant Mutinæ, se non explicantibus, Paulus legatus ad oppidum  
Côcordiam fossis atque aggeribus communitum suis cum copiis  
accedens, tormentisq; eo uesperis collocatis, & uerberatis prima  
luce muris, paucarum id horarum spatio contra spem omnium  
cepit, tanta tamq; præsens militum uirtus fuit, propugnatores, qui  
ab oppugnatione superfuerant, in arcem repulsi sine mora se lega  
to dederunt. atque ante eos dies in urbe puer è plebe natus est  
cum duobus capitibus quatuorq; humeris & manibus, tum fœ  
moribus atque pedibus quatuor: ut duo esse pueri una congluti  
nati uiderentur, si corpus reliquum duplex habuisset. habebat au  
tem unum tantum cum renibus unis tergoreq; reliquo pectus: ui  
xitq; sesqui horam, ut Christianæ aquæ ablutione non caruerit, &  
Nicolao Triuifano tēpli Marcii procuratore mortuo Antonius  
Grimanus, quem ciuitas ab exilio reuocauerat, magno omnium  
ordinum fauore in eius locum suffectus est. atque illa quidem in  
procuratore eo erat tempore Antonius, cum est exul factus. ita  
que bis eam dignitatem est adeptus: quod nemini antea contige  
rat. annusq; cum iis fere comitiis finem habuit. Prima uero in eu  
ntis anni die, quod Galli, qui ad Carpos municipium se receper  
ant, in Sætia fluminis ripa, quod auctum imbris transiri uado  
non poterat, singulis se se horis ostendebant, atque à nostris, qui  
trans flumen eam regionem tenebant, ita uulgo conspiciebantur,  
ut etiam colloquia ex utraque ripa inter se haberent, Paulus lega  
tus



tus noctu ponte celeriter in nauculis confecto, suarum copiarum partē cum Troilo Sabello bene mane flumen traiecit, atque in primum Gallorum agmen, quod ad flumen ueniebat, impetu facto eos fudit fugauitq; interfectis captisq; non paucis. eo timore perculsis reliquis nocte intempesta uniuersi Rhegium Lepidi uersus abierunt. Iulius suos duces nihil omnino amāter, nihil ex re agere cum uideret; omnes autem moras omnia impedimenta ei bello interponere illos non ambigue cognosceret: unum Capellū eiusq; fidem atque animum summis laudis prosequens, statuit se ad exercitum conferre, ut Mirandulam oppidum munitissimum præsens oppugnaret: quo capto facilius posse se Ferrariam obsidere, suæq; ditionis eam facere cōfidebat. tamen illud etiam cogitauerat Iulius, cum Ferrariæ appropinquauisset, se Hippolitū Cardinalem Alfonsi fratrem ad colloquium euocaturum, qui fratrem hortaretur, uti bello finē imponeret, ne damna ultima perpeti cogeretur: se ei, si uellet, Ferrariā habere permissurum: Mutina modo sibi Regioq; Lepidi cederet: quorum tamē oppidorum alterum se iam suum fecisse, quam quidem cogationem suam Iulius reip. legatis aperuerat. illi ad Decemuiros literas ea de re dederant. patres consulto Decemuirum collegio eam Iulii moderationem proum; ad pacis studia animum maximopere laudauerant rescriptis ad legatos literis, easq; literas legati Iulio recitauerant. sed Iulius, uti dictum est, quanquā hyems durissima ingrueret, lutosissimæq; essent uix, & nix largiter cecidisset, ad uicina tamen Mirandulæ ædificia & agricolarum casas lectica uectus se contulit. cumq; suis ducibus parum confideret, belli munera per se se perq; Paulum legatum plerunque administrabat. nam omnino Franciscus Maria, siue quod Alfonsi sororis filiam in matrimonium duxerat, ut nouæ affinitatis studiis adolescens uiginti annos natus traheretur; siue quod ita ei suaderet suus animus; neque bellum probabat; neque suas in eo partes suamq; diligentiam patriuo præstabat: ut quæcunque faceret, ea omnino lente, atque inuitus facere uideretur: si quid autem operæ Venetos egregie nauasse intelligebat, id ægre illum molesteq; ferre omnes plane homines cognoscerent. Iulio itaque imperante, ut tormenta cum a suis tum a legato Veneto ad muros oppidi deiiciendos colloca-



rentur: quod quidem magna cum difficultate fieri erat necesse; cū propterea quod oppidani ē propugnaculis, & turri maxime communita, suis item tormentis appropinquare muro neminem permittebant; tum quod nix duos fere pedes in altitudinē creuerat: legatus uirtute militum difficultatibus superatis, celeritate usus uerberare muros senis tormētis cœpit, cū Iuliani neque post triduum unam in eos pilam misissent. muris igitur oppidi ita deiectis, ut, qui in eo erant, equites septuaginta, milites trecēti tueri oppidum se se posse non confiderent, præsertim cum omnis fossæ aqua frigore congelauisset, mulier uidua Ioannis Iacobi Triultii filia, quæ Ludouici Pici, de cuius morte superioribus commētariis diximus, uxor fuerat, quæ oppido præerat reliquiq; præfecti ad diē duodecimum Calend. Februarii conditionibus interpositis se atque oppidum Iulio dederunt. Iulius, quod oppidi porta ruinis clausa deiectusq; pons fuerat, per muralem scalam in oppidū est receptus. is mulctæ nomine oppidanis, uti auri libras sexaginta soluerent, imperauit. præfecti & centuriones qui erant, iis captiuis esse iussis, reliquis missis, mulieri ad patrem abeundi potestatem fecit: paucosq; ibi dies commoratus, dum exercitum lustraret, stipendiaq; persolueret; Mirandulæ imperium Ioanni Francisco Pico, quod oppidum pater testamēto ei reliquerat; Mutinæ, Maximiliani internuntio eam ob rem ad se misso tradidit. eius enim oppidi, & Rhegii Lepidi ius imperatoris esse Romanorū intelligebat. idq; propterea minus grauate fecit, ut eo exemplo Maximilianus etiam Rhegium sibi à Gallis, qui in eo erant, tradidit: ut, quoniam illos Maximiliano morem minime gesturos confidebat, Maximilianus eam ob rem Gallorum amicitiam repudiaret, & cum ipso se coniungeret. iis constitutis rebus Ferrariam uersus tormenta perferri exercitusq; procedere imperauit. quæ cum Senatus futura intellexisset, in Iulii gratiam classe nauicularum ē suburbis, & biremium & aliorum nauigiorum ē naualibus urbanis celeriter instructa, cum ea cumq; iis, quæ ad Fossam Clodiam erant, triremibus Maurum iterum ingredi Padum iubet, qui pontem & naues, quæ eum sustinerent, catenis coniungendas secum adduceret ad copias & equitatum traiciendum. Gritus etiam Senatus iussu una cum Lucio ad Padi ripam eas, quas



quas habebat copias duxit, militibus paucis & equitibus Montani  
 niani relictis. interea cum Senatus decreuisset, ut triremes octo  
 in Creta insula, Zacynthi una, Cephallænæ altera, duæ in Dalma  
 tis Iadera & Ascriuiio, decē & octo in urbe armarentur, omnes nu  
 mero ad triginta, quarum decem essent ex iis, quæ nothæ appellā  
 tur, nothis quidem est præfectus lectus idem Maurus, qui classi  
 in Pado exercendæ imperabat: reliquæ sunt triremes singulatim  
 iis ciuibus, qui se Decemuiris obtulerant, dari iussæ, iamq; Iulii &  
 reipu. copię ad Finale municipium & Creuacorium uicum eaq;  
 loca se continebant: & Gallorum duces Triultius, atque is, qui ma  
 gnus magister appellabatur, euocatis Verona & Lemniaco auxi  
 liis ad Padum processerant conferendi manus causa, ut ipse affe  
 rebat rumor. itaque & Iulius suorum militum numerum celeri  
 ter auxit, & Veneti se cōmunitiores quibus opibus poterant red  
 diderunt. neque tamen ea diligentia opus fuit, hostes enim nul  
 lo facinore aut gesto aut tēto se se Carpos Rhegiūq; retulerunt:  
 Mutinamq; de improviso aggressi, ut eam suam facerent, à Mar  
 co Antonio Columna, quem Iulius cum quingentis militibus eò  
 miserat, ut oppidum Maximiliano tueretur, facile repulsi sunt. ue  
 rum enimvero iis agitis rebus Iulius, id quod existimauerat, ut  
 capto Mirandula municipio aditus sibi ad Ferrariam oppugnan  
 dam eo ab latere patefieret, cum in dies singulos plus rem difficul  
 tatis habere animaduertisset, cogitare cœpit, si ab Rauēnæ finibus  
 in Ferrariēsem agrum suas copias introduceret, castellumq; quod  
 est in Padi ripa, quod Bastia appellatur, expugnaret se facilius  
 bellum posse conficere, præsertim reip. classe duorum exercituum  
 impressiones adiuuante: quam quidem classē audierat Volanæ  
 ostium ingressam Alfonso biremes duas cepisse, cum eas Mau  
 rus præfectus per tresdecim millium passuum iter contra cursum  
 fluminis celeritate suorum remigum assequutus fuisset, nauemq;  
 onerariam aduenarum mercatorum, quam biremes illæ in mari  
 expugnatam in ostium fluminis attraxerāt, recuperauissē. itaque  
 moræ impatiēs (erat autem inexplēbilis etiam animi, & alias sem  
 per ex aliis res atque incœpta temere plerunque aggredientis) co  
 gitata perficiendī spe, cum in reditu paucos dies Bononiæ fuisset,  
 Rauennā proficiscitur, magno suarum copiarum & comitatus la



bore, difficillimo anni tempore, impeditissimis uis. nam reipub. copiae in illis, in quibus erant, locis fere se omnes continuerunt. sed aliter res, atque ipse sibi finxerat, cecidit. ubi enim Iulii copiae (erant autem equites grauiiores sexcenti, leuiiores quingenti, milites quater mille) castello appropinquauerunt; Alfonsus, qui se ad id comparauerat, eas fudit interfectis captisque non paucis. neque profuit, quod Maurus classem reip. plus quam centum diuersi generis nauigiorum proxime castellum adduxisset, nonnullosque ex Alfonsi equitatu tormentorum pilis interfecisset. qui quidem Maurus postea, cum intellexisset ex amicorum reip. literis, non unis in riparum inferiorum locis Alfonsum sua tormenta disponi mandauisse, ut classi noceret, sine ulla ostensione ad fluminis ostium rediit. hac re intellecta Galli, apud Rhegium qui erat, iterum Carpos uenerunt, flumemque Setiam factis pontibus iterum traiecerunt, ut reip. copias aggrederebatur. quod tamen facere neque tum quidem sunt ausi. qua in re cognosci potuit, sane iustas Pauli legati querelas fuisse, cum dolenter saepe diceret Iulianos duces uincere noluisse. si enim secum, ut ipse cupiebat, eisque proponebat, coniuncti ad hostes persequendos se comparauissent: profecto Galli deleri una pugna potuissent. quo facinore confecto, Ferrariam capere Iulio non magnopere difficile fuisset, quacunque is a parte cum utroque exercitu in eius se fines intulisset. nunc se relictum, qui unus neque integris copiis Gallorum impetum exciperet praefectos enim equitum tres una cum Iulii ducibus eo miserat, unde repulsi ab Alfonso cum detrimento ignominiaque fuerunt: pauloque abfuit, quin etiam caperetur. sed Galli nulla molestia Paulo adhibita, cum ad Padum se contulissent, submissis Alfonso secundo flumine auxiliis militum non plurimorum, unde discesserant redierunt: magnusque eorum magister Rhegii febribus confectus mortem obiit, cum ab Iulio ueniam totius suae uitae criminum missis ad eum internuntiis impetrauisset. itaque unus eorum ductor atque imperator Triultius deinceps fuit. atque illis ipsis diebus Marinus Georgius, multae philosophiae uir, quem legatum apud Bergomates agentem in clade exercitus anno superiore Galli captiuium fecerant, atque in Galliam perduxerant, in custodiaque una cum Liuiano habuerat, fide illis data intra sex menses uel per cuniam



cuniam quam petebant, ut eum liberum facerent, se eis misurū; uel in Galliam atque in custodiā reuersurum; Venetias uenit. Vaniſſa Thrax equites septuaginta ſecum ducēs, ab exercitu Pauli legati miſſu proſectus, ut, quid hoſtes molirentur, circunſpiceret; cum eorum militibus quamplurimis, in quos incidit, congreſſus, interfectis plus centum triginta, quos captiuos fecerat, Franciſco Mariæ imperatori dono miſit. ea dum adminiſtrantur: ad diem ſeptimum Calēdarum Aprilium in urbe terra tremuit motu tam uehementi, ut Senatu, qui habebatur, ante ullam latam legē præter morem dimiſſo patres ruina tēctorum intercipi metuētes tumultuoſe ſe foras truderent. cadebant autem è ſummis curiæ templiq; Marci parietibus pinnæ ac ſigna marmorea, quæ in iis antiquitus poſita prominebant: turresq; templorum nutare cacuminibus & commoueri proſpicebātur: & æs Campanum in pleriq; earum, maximeq; in ea turri, quæ in foro eſt, ſponte inſonuit: pleræq; etiam uitium fecerunt. & aqua urbanis in alueis alte excitata contremuit: innumeraq; fumi receptacula; quæ ſupra ædiū culmina tubo atque calatho attolluntur; quaſſu diuulſa in uias ipſaq; in tecta corruerunt: domusq; non una cum incolentium interitu, parietes uero domorum & fanorum frequentes ruinam traxerūt: mulieresq; prægnātes permultæ timore perterrefactæ abortum fecerunt, mortuæq; ſunt. unum iuuit, quod is non longinquus terræ tremor fuit. atque eas ob res, quæ acciderant, poſtridie eius diei Deo optimo maximo ſupplicationes omnibus in urbis regionibus dies tres fieri, & ne quid præter panem & aquam ad ueſcendū omnes puberes ſumerent, ab Antonio Contareno Patriarcha Venetorum conſultis patribus indiſtum. pauloq; poſt eundem propere terre motum cum eiſdem fere prodigiis Patauī, Tauriſi, Forilulii, nonnullisq; aliis in reip. oppidis & finibus fuiſſe, magiſtratus eorum patribus ſignificauerunt. ſed nihil æque eis moleſtum per eos dies fuit; nihil tam ægre uniuerſa ciuitas audiuit, quàm id, quod Pauli legati literæ attulerunt; Leonardum Apulum, cū ad hoſtes Gallos, quos paucos eſſe audierat, repellēdos ad uicum Belaerē cum quadraginta equitibus proceſſiſſet, interfectum ab illis fuiſſe, magno ſcilicet fide, magno animo & uirtute hominē, atque in primis Veneti nominis amātiſſimum. cuius poſtea cada



uer ad urbē delatū marmoreo in sepulcro reip. impensa exādis-  
cato in æde Gemellorū Senatus condi iussit. Franciscus reip. co-  
piarum imperator, cum fictis pro tēpore causis Mantuæ se ad eum  
diē continuisset, calūniā à Senatu atq; omnibus ab hominibus ue-  
ritus ad Iulium uelle se conferre palām fecit; profectusq; Coregiū  
quod municipium abest Mantua passuum millia circiter triginta,  
ibi se aduersa ualitudine correptum simulans domum rediit. inte-  
rim, quoniā Paulus clare ad Senatum scripserat, nihil se cōfidere  
boni à reip. exercitu posse confici, Iulii ducibus in contraria om-  
nia obstinate nitētibus ne Alfonsus domo expellatur: Senatus ad  
eum rescripsit, omnem curā adhiberet ne pugnare cogeretur: pro  
explorato. n. sibi esse, si manus conserat, illos eum media in pugna  
deserturos. itaque Paulus cum per se se, tum à Senatu admonitus  
operam dabat, ut neque timoris indicium sui hostibus proderet,  
neque uniuersum exercitum periculis obiceret. quamobrem in  
minutis & quotidianis expeditionibus cum Gallis, qui ad Padi ri-  
pam uenerant, sæpe congressus non semel eos fudit, fugauit; supe-  
riorq; manu semper, inferior nunquam fuit. tātum Paulum Man-  
fronium Galli hostes cum X. equitibus captiuum fecerunt, ne-  
que à Gritto quidem legato eodem tempore hostes non male ha-  
biti. quas quidem pugnas referre nihil necesse esse duximus. Ve-  
nerat autem antea Bononiam Mattheus Lancus Curcensium Epi-  
scopus ex Germania magno comitatu, homo arrogantia & elatio-  
ne insignis, à Maximiliano missus, ut cum Iulio de fœdere cum  
Venetis ineundo ageret. qui paucos ibi dies moratus, cum nimis  
duras pacis condiciones attulisset, infectis rebus in Germaniam re-  
diit. Senatus quoque censuerat dignitatis & existimationis apud  
Iulium reliquosq; reges retinendæ causa, ut equites grauis ar-  
maturæ, quos habebat, ad duum millium numerum augerentur,  
militum sex millia ueteribus addenda conscriberentur. paucisq;  
post diebus ei Senatusconsulto alterū fuerat Senatusconsultum  
additū, ut ex Epiro equites mille leuissimi accerserentur. uti etiā  
magnum arcuum numerum amphorasq; uini Cretici quingentas  
Petrus Pisaurus, cui cum rege Britannia necessitudo mercaturæ  
exercendæ causa intercedebat, ad illū mitteret, fuerat à Senatu per-  
missum Mauro autem classis præfecto aduersa ualitudine labo-  
ranti



ranti Andreas Bondimerius subleſtus eſt, ſexq; triremes in Creta inſula armari iuſſæ. cumq; Iulius Heluetiorum militum ſex milliū numerū conducere ſtatuſſet, qui in Mediolani fines contra Gallos impetum facerent; uelletq; ut tertiam eorum ſtipēdiorum partem reſp. impenderet: Iulius de eo à Senatu laudatus, & conditio liberè accepta. & lex de media mercedum parte à magiſtratibus reip. remittenda, quæ tempus ſex menſium expleuerat, in alteros ſex menſes prorogata. ad hæc Cōcordiæ municipium, quod à Iulianis indiligenter cuſtodiebatur, facile ab hoſtibus receptum eſt. captum autem à legato Gritto propugnaculū natura & opere cōmunitum in paludibus poſitum Crucula Lēniaco uicinum miſſis noctu militibus in nauiculis cum tormentis, præſidiumq; impoſitum. In urbe uni ex nobilitate ciui Gaspari Valerio, quod hominem Rocchum nomine, tabellariorum reipu. præfectum, Tauriſi interfecerat, Decemuirum iudicio medio in foro ceruices ſunt abſciſſæ. Iis ita adminiſtratis rebus, Galli hoſtes ab exulibus Bentiuiolis adiuti, qui factionis ſuæ montanorum hominum magnū numerum excitauerant, ex inopinato Bononiam contenderunt; cuius portas eiſdem factionis ciues furtim eis aperituros conuenerat. itaque timore perterritus Iuliani dux exercitus Franciſcus Maria reliquiq; duces, præripere ſe ſe hoſtibus ſtatuentes, relictis tormentis impedimentisq; omnibus conſtipati ipſi fugā capiunt, & ad Paulum legatum mittunt, qui hæc ei nuntiet atque illum idem facere ſuadeat: nullum aliud relictum ſubſidium: in eo uno poſitam eſſe ſalutem, ſi hoſtes præceſſerint. Paulus, qui de hoſtium aduentu tam inopinato nihil dum audierat, querēs in fraudem ab Iulianis ſe proiectum, quod ſpatium colligendi recipiendiq; ſe ſe ſibi non dederint, cum ſuis omnibus ſubſequi Iulianos celeriter cœpit, relictis iis, quæ imitari eandem celeritatem non poterant. & quoniam Bentiuiolos oppidani iam introduxerant expulſo Alidoſio Cardinali, qui per aliam ſe oppidi portam eiecerat; Iuliani autem ad Bononiæ muros acceſſerant, ut iis circum actis in fines Forocornelianos ſe reciperent, quod nullam aliam habebant itineris faciendi rationem: idem ipſe quoque ſua cum manu Paulus facit: eiq; accidit quod Iulianis, qui cum anteceſſerant, non acciderat. illac enim contendenti armatorum hominum



montana incolentium plures manus occurrerunt: à quibus disiecti, ut quisque potuit fuga capta se eripere sunt conati. ita tormentis impedimentisq; amissis, militibus magna ex parte uel captis uel diffugientibus, interfectis nonnullis, equitatu non frequentati, se in tutum receperunt. hac intellecta fuga patres ad Gritum legatum, qui Lemniaco capiendū animum adiecerat, eratq; eò cum exercitu profecturus, literas statim dederunt: quoniam ad Bononiam male gesta resp. sit, à Lemniaco aggrediendo abstineat, eq; Padi ripis & regionibus tormenta Patauium abduci curet: & si quid Galli molirètur, ne intercipi ab illis possit, se recipiat. etiam magistratibus Patauinis & Taurisanis mandauerunt, munitiones eorum oppidorum, quas instituissent, perficere maturarent. pauloq; postea re non contenti legatum, qui munitionibus procurandis Patauii præsset, reliquasq; res ad oppidi præsidium curaret, Christophorum Maurum legerunt, qui statim proficisceretur. militesq; quot potuerant in urbe conscriptos eodem miserunt uerentes ne Galli fuga exercitus reip. sublatis Padum traicerent, atque in eius oppidi fines irrumperent; si quid de eo capiendū & sua celeritate, & reip. indiligètia possent efficere, tètaturi. Legato uero Donato Senatusconsultum est missum, quo Iulium patres hortabantur, ne propter recentia exercituum detrimenta animo perturbaretur, remp. ei nunquam defuturam, omnem fortunam libentissime cum illo subituram, urbicas prouincialesq; opes animos denique ciuium omnium promptos paratosq; ei polliceri. quo Senatusconsulto accepto Iulius lātari se plurimum constantia rei pub. respondit, firmioremq; multo & alacriorem aduersis rebus contra Gallos se se factum confirmauit. eo fere tempore res à patribus non semel antea agitari cœpta finem habuit. nam, ut eorū ciuium Patauinorum, qui improbi & contumaces fuissent, bona & possessiones inter illos centuriones, quos amanter fortiterq; in obsidione Patauina reipub. nauasse operam constiterat, uel si ipsi mortui essent in eorum liberos & propinquos partirentur, Senatus censuit. Venerat Rauennam ad Iulium pulsus Bononia, ut dictum est, Alidosius Cardinalis: atque, ut ea, quæ acciderant, nulla sua culpa cecidisse illi ostenderet, multa de imperatore tanquam rerum bellicarum propter adolescentiam imperito questus apud cum



179

eum est; atque, ut erat sermone satis accommodato ad fallendum, omnes eius oppidi amissi causas, quarum ille propè omnium auctor fuerat, in unum illum deriuauit. cōstat enim Alidosium omne studium adhibuisse, ut, quæ ab imperatore procurabantur, ea illi omnia in contrariam partem cederet, neque ullum ad exitum perducerentur. oderat enim adolescentem nō tam eius uitio, quā suo: cupidoq; illum ingens inceserat, sui ut fratres, quos esse fortes uiros prædicabat, magno in honore apud Iulium essent, bellicisq; rebus præficerentur, & auctoritate potentiaq; pollerent quarum rerum illo prospere imperante spem habere nullam poterat. itaque ut in patrum eum inuidiā adduceret, ea præsertim in re, quam nullam se unquam aptiorem, & commodiorem habiturum confidebat, criminationibus subdole confictis est adortus. quod quidem ei apud hominem turbulentum, planeq; iracundum, cui erat ipse antiqua consuetudine & quotidiano uictu perfamiliaris, facile factu fuit. quamobrem cum paulo postea imperator, qui de calumniis sibi ab Alidosio apud patrum cōflata de Iulii familiaribus amicis suis pleraq; intellexerat, se ad Iulium purgandi sui causa contulisset: Iulius furore percitus uerba in eum doloris contumeliæq; plena temere effudit, neque audire illum uoluit submisit ut patruo responderet se comparantem, atque à conspectu suo indignissime repulit. adolescens contumeliā tam insignem Alidosio acceptam referens, magnum facinus facere in animum induxit suum. itaque à patrum cubiculo discedens cum septem aut octo, quos habebat secum, ex suis familiaribus, ad diuersoriū Alidosianum pedibus recta contendit: atque ipsum domo egressum media in uia frequenti comitatu, septumq; militibus plurimis, & equitibus armatis plus sexaginta, una cum sororis suæ uiro Guido Vaina illorum equitum præfecto se ad Iulium conferentem cōspicatus, ubi Alidosii uicinus fuit, quasi eū alloquuturus à uia latere ad illum inter arma omnium declinauit, mulæq; ephippiis, qua is uectus incedebat, leua manu admota, educto dextera gladio hominem transuerberauit. quod factum eius comites intuentes gladiis eductis & ipsi idem fecerunt. ita illum pluribus confossum uulneribus sui à freno milites mulæ detractum in eam domum, cuius ante fores erant, humeris intulerunt. qui quidem



paulo post seipſe ſæpius accuſans egit animam, turpis & flagitioſa  
uitæ uir, cui nulla fides, nulla religio, nihil tutum, nihil pudicum,  
nihil unquam ſanctum fuit. imperator gladio recondito, eo quo  
uenerat paſſu pacate ſuum ad hoſpitem rediens, inſeſſis equis, e-  
greſſusq; oppido ad Metaurenſes ſe ſuos retulit. Paulus legatus  
cum iis, quas ſecum habuit, copiis, cumq; illis, quæ cladis initio  
per diuerſa ab hoſtibus & inuia montium fuga capta ſe ſe illis eri-  
puerant, atque ad eum uenerât, in Ceſenatium uicum ad mare ſe  
contulit; ut in naues militibus & equitibus impositis in fines Pa-  
tauinos ſe atque illos ſiſteret. quod ubi patres cognouerunt, nau-  
gia plus centum ex urbe & ſuburbanis & Foſſa Clodia triremesq;  
ſeptem maiores è naualibus eductas paucis pro re adminiſtranti-  
bus ad uicum Ceſenatium miſerunt ea de cauſa. dum uero hæc  
procurantur, milites propè uniuerſi, qui diſiecti apud Bononiâ  
à Bentiuolorum factione uel capti fuerant, ſingulatim ad Paulum  
inermes uenerunt, centurionesq; illorum militum omnes, quo-  
rum nonnullos interfectos fuiſſe rumor attulerat. eos Paulus, ut  
ad ſe nauigia appellebant, impositos ad Albanum montem mitte-  
bat. is eſt locus in primis Patauinorum à Foſſa Clodia ſinibus. ip-  
ſe autem Paulus, uniuerſo exercitu præmiſſo, triremem inſtructio-  
nem è claſſe Bondimeriana ad ſe præter alias miſſam conſcendit;  
& me, qui caſu tunc ad eundem uicum Urbino ueneram, ut Bê-  
bum patrem meum aduerſa ualitudine Patauî laborantem inui-  
ſerem, lætiſſima unius diei nauigatione Foſſam Clodiam ſecum  
uexit. is fuit dies ad octauum Calend. Iulias: Paulus ad patres  
ſecontulit; atque ab iis miſſionem poſtulans, ea non impetrata ad  
Leonicanos, ubi erat Grittus, eſt profectus. patres exercitu reficiē-  
do conſulentes, Mariano Prato, Leonardi illius, quæ Galli hoſtes  
interfecerant, fratris filio, tribunatum quingétorum militum con-  
ceſſerunt: atque, ut eum numerum quâprimùm cōſiceret, ad Grit-  
tumq; legatum adduceret, mandauerunt. erant Veronæ milites  
Hiſpani mille. ii oppido egreſſi ad Grittum miſerunt: quoniam  
nullius tunc hominum ſtipédia mereant, ſi legatus uelit ſe ad illū  
uenturos, ſtipendiaq; reip. facturos. ea de re patres admoniti, co-  
acto Senatu cum plures ſententiæ dicerentur, ea uicit, quæ non  
eſſe eis conſidendum cenſuit. itaque non ſunt recepti. Iulius  
Romam



Romam rediens in itinere edictum in Bononienses protulit; ni ad se remq; p. Romanam reuertantur, se se eos ab aqua & igni, à sacrorum communione, à conuictu hominum diris imprecationibus arcere. cumq; post eos dies acta è nubibus grando solito maior atque frequentior omnes terræ fructus, qui in agris erant, per X. millia passuum circa oppidum abstulisset: uulgi suspitio tenuit, edicti Iuliani causa eā cōflatā uastitatem cœlo missam cecidisse. eo tempore è Pānonia literæ uenerunt: in conuentu regio, qui postremus Budæ indictus fuerat, statutum fuisse, à reip. fœdere discendi non oportere. in Carnis quidē hostes ad Vtinum incur siones fecisse, uicosq; tres apud oppidum incendiisse, patres certiores facti, Aloisio Mocenico legato Foroiuliensibus à Senatu lecto, uti statim proficisceretur, mādauerunt. Nōdū erat Romæ Iulius: cum nouem numero Cardinales; quorum erat princeps Bernardinus Cardinalis sanctæ Crucis, homo Hispanus; literas ad illum Mediolano dederūt. quibus literis eum certiore faciebāt: quoniam ipse tot annos, ex quo summus Pont. esset, contra maiorum decreta generale concilium ad rēp. Christianam iuuandā cogere distulisset, se cōmunem causam obire agereq; statuisse. itaque illum, ut Pisis se ante diem Calend. Septembris concilio agendo sisteret, monebāt. Ne ue Iulius eas literas inficiari posset se accepisse quod nemo esset tam audax, qui ei se allaturum ullo præmio polliceretur, in foribus templorum Parmæ atque Placentiæ, tum uero etiā Arimini eas præfigi curauerunt. quod quidem Iulio permolestū sanè fuit; præsertim cum illi eis in literis testarentur habere se consiliorum suorum adiutores Galliarum & Hispaniarum reges Ludouicum & Ferdinandum. tametsi spem aleret Iulius, auctoritate potentiæ suæ uel in terminando uel hortando uel pollicendo aliquos ex eo conuentu in suam uoluntatem se abstracturum, eamq; coniunctionem diuulsurum, ipso eorum Principe homine uento sissimo parum prudentiæ tantam ad rem, reliquorum nonnullis parum auctoritatis afferentibus. qua effecta re nihil ab aliis posse conficiorum, quæ sperauerant, confidebat. sed omnino post illud tempus plenior solito curarum & cogitationum Iulius fuit. In Carnis cum hostes sat magno equitum & militum numero ex Goritianis finibus ad Cremonse oppidū accessissent, ut illud, si pos-



sent, caperent; prædas autem abigerent, damnaq; incolis & uastitatem inferrent: Ioannes Viturius legatus obuiam illis factus prælium acriter magnoq; animo iniit, ipse manu promptus ac paratus, ut quiuis alius. itaque eos fudit interfectis captisq; per plurimis. erat cum illo Aloisius Portus, de quo supra dictum est, ualidorum & pulcherrimorum membrorum excellentisq; uirtutis atque inuicti plane animi adolescens. is cum se medios in hostes audacissime intulisset; eosq; iam in fugam coniecisset; ab uno ex illis in collo apud tenentes uulnere tam tenui accepto, ut uix pellem gladius perforarit; omnibus tamen membris captus ab equo statim decidit, sublatusq; à suis per manusq; seruatus prorsus immobilis per plures menses fuit. cæterum exercere se postea in armis nequiuit unquam. qui profecto casus cladem illam hostium Viturio, à quo Portus propter uirtutē amabatur sanè plurimum, odiosam in primis & lacrimabile reddidit. Interim domi patres ob ærarii inopiam in magna curandæ pecuniæ difficultate uersabantur. quamobrem ubi dies comitiorum uenit, sedentibus in curiæ subselliis ciuibus, principis & reip. nomine scribarum magister sic est eos alloquutus: Putare se se neminem in curia esse, quæ ærarii angustia hoc tempore lateant: neminem, qui non uideat, quam ad ea recuperanda, quæ indigne amissa sunt, pecuniæ respiciat: ea ut suppeditari ad impensas belli possit, omnia excogitata à patribus esse, nihil relictum inexploratum, nihil intentatum superesse, præter unum, ut qui fisco debent ciues ii soluant, atque in ærarium quod debent conferant: id si fiat, superfuturam pecuniam magistratibus palam esse: si non fiat, rem ipsam p. in prædam hostibus & direptionem uenturam: non esse ab ullo iam ulterius ambigendum, utrum eligere malint: fortunam ipsam eis hodie proponere; uel eam portionem, qua reip. tenentur, sua ipsos manu ei tribuere; uel hostibus inuitos omnia: nihil enim uictis superesse, quod non in uictorum potestate sit: ex altero parua suarum rerum parte ipsos defecturos: ex altero prædia, fundos, insulas, domos, uxores, liberos; quibus nihil in uita carius, nihil esse dulcius potest; lares, templa, libertatem reip. commutationem imperii; cælum denique hoc, auramq; ipsam, quam uiuunt, ipsos in periculum adducturos: maiores ipforum hanc  
eis



eis patriam suo sanguine peperisse; eos autē paruo suo incom-  
 modo tueri eam nolle; neque deos neque homines probaturos:  
 nihil esse miserius seruitute: itaque dura eis omnia perpetienda  
 potius esse, quā seruiendum: Leonardum Ducem ipsorum  
 magistratusq; uniuersos, qui hanc remp. procurant, rogare obte-  
 stariq; eos per ea, quæ unicuique iocundissima suauissimaq; sunt;  
 ut, qui fisco debent, quamprimum in ærarium inferant: ut ope  
 auxilioq; eorum nixa respu. subleuare se erigereq; tandem possit:  
 ne in timore amittēdi omnia perpetuo uersentur. hoc sermone ha-  
 bito, ad magistratus creandos se ciues conuerterunt. Sigismun-  
 dus Caballus; qui legatus extraordinarius in exercitu reip. q; lo-  
 cis fuerat; facultate à Senatu sibi permissa domum rediens, in ser-  
 mone, quem ad patres habuit, multa de Lucii copiarum reipub.  
 præfecti timore formidineq; animi in consiliis capiendis, plura  
 de tarditate negligentiaq; in maturandis & perficiendis, actione  
 plane libera & seuera dixit: quæ quidem propè omnia patres, ipsi  
 per se se præterita repetentes, maiori cum dolore, quā adhiben-  
 dis ei malo remediis agnouerunt. tamen si haud multo post eos  
 dies; cum ea inter ipsos opinio percrebuisset, perniciosum esse,  
 reip. copiis hominem imperare & semper timidum, & nunquam  
 diligentem; eoq; maxime, quod Lucii præfecturæ tempus exple-  
 batur; cœptum est à magistratibus agi de alio in eius locum eligē-  
 do; cui se tutius ciuitas in belli rebus tradi & permitti possit. ita-  
 que Senatu coacto aliqui ex illis Laurentium Ceretanum, qui mi-  
 litibus reip. præerat: aliqui Marcum Antonium Columnam, qui  
 Iulii stipendia merebat: aliiq; Gasparem Seuerinatem; Mantuæ  
 qui erat, certioresq; patres fecerat, libentissime suam se operam  
 reip. nauaturum: esse præficiendum censebat. Laurentii uirtutē  
 egregiam cleuabat Gallicus, qui appellatur, morbus; à quo in-  
 terdum impediabatur, ne exercere se, quantum opus erat, posset.  
 Seuerinatem cum nō nihil adiuuaret inimicus in Gallos animus:  
 à quibus Veronæ cum esset, custodiæ traditus per inuidiam fue-  
 rat: alia multa premebant. Marco Antonio Columnæ adolescen-  
 tia erat aduersaria. neque tamen defuerunt; qui tunc quoque, uti  
 alias, Gritto legato id imperium esse dandum existimarent: quod  
 ea res neminem ex reip. præfectis ledebat, eæ sententiæ cum nō



semel in Senatu dictæ essent; à Ioanne Medice Cardinali literæ Romæ datæ patribus proposuerunt: si suis copiis præficere Ioan- nem Paulum Balionem uelint Perusina ciuitatis principem, ma- gno in re militari nomine; se curaturum, ut is internuntios ad urbem suos mittat; quibus cum agere, quæ agenda erunt, patres possint. quæ intellecta res magistratuum controuersiam diremit: pluresq; in eam sententiam, quàm in ullam aliam ierunt; ut Ba- lionem præfecturam traderent. ipse uero Lucius hæc uel præuidens futura, uel facta de amicis suis cognoscens, literas ad patres de- dit: senem se factum, minusq; iam ad belli munera & labores obeun- dos idoneum, quàm antea fuerit: itaque cupere artem desinere, si per eos liceat; atque ad quietem se uitamq; reliquam dare: pe- tere, ut liceat. quam quidem eius petitionem patres opportune oblatam libentes acceperunt; honorificoq; responso missum eum fecerunt. milites Epirotæ quingenti; Veronæ qui erant, ab exer- cituq; reip. profugerant; stipendiis apud hostes fraudati, comæa- tum egentes, omnia perpassi mala, impetrata uenia ad Gritum redierunt. Ferdinandus Hispaniæ rex ægre ferens Cardinales eos, de quibus supra dictum est, in illa concilii Pisis agendi mis- sa ad Iulium denuntiatione nomen suum adscripsisse, cum se ab illo adiuuari præ se tulissent: Iulio per legatum suum confirma- uit, nullam se ad id uoluntatis suæ partem adhibuisse; nulla om- nino se in re cum illis consensisse: quod si Iulius eum in primis, qui Hispanus esset, dignitate illa & sacerdotiis, quæ in suo regno habet, spoliauerit, priuatumq; reddiderit; sibi eum rem gratissi- mam esse facturum; & suum illi mendacium eam, quam debeat, mercedem allaturum: uti autem Bononiam recipiat; omnes suas copias; quas fore propediem satis multas, exploratum sibi esse; Iulio se daturum polliceri. quæ legati oratio gratissima Iulio fuit. interim Ioanni Paulo Balioni omnium reip. copiarum præfectu- ra per annos tres cum equitibus grauioribus ducentis, leuioribus quinquaginta, militibusq; centum, atque iis unis belli tantum tē- pore; cumq; eorum omnium stipendio; tum ad ipsius mensam li- bris auri triginta annis singulis à Senatu traditi. Tadeo Vulpio Forocorneliensi; quod ad Bononiam in exercitus fuga unus om- nium præclare se gesserit; Bentiuolorumq; amicos porta oppidi  
exire



exire properantes, uti agmen prætereuntium aggredierentur, magno animo reprimens in oppidum reuerti compulerit; numerus equitum grauioris armaturæ, quem habebat, est à patribus auctus ad CL. eiusq; fratri equites leuiiores L. attributi. Venerat ad urbem in ueste plebeia tenuiq; comitatu Marcus Heluetius Sedunorum Episcopus; quem Iulius in Cardinalium collegium cooptauerat; homo magni animi, Gallis inimicus atque aduersarius maxime. causa ueniendi fuit; ut Iulii pecuniam ibi acciperet libras auri ad ducentas militibus Heluetiis sex mille conscribendis, qui eius stipèdia facerent. moratusq; in diuersorio, quod patres ei parauerant, dum sibi numi curarentur, per Lauredani Principis domum salutatis semel patribus Pisaurum in triremi, quam ei patres dederant, se contulit numis per suos domum missis; inde Romam ad Iulium est profectus. atque is tantum abierat: cum ad urbem item uenit homo reipu. amicus Maximiliani regis familiaris; ut patres certiores faceret: si legatum ad Maximilianum secreto miserint; qui eum roget, uti cum ciuitate fœdus ineat, honestasq; ei condiciones proponat; Maximilianum cum rep. consensurum. ea intellecta re patres Senatu coacto Antonium Iustinianum legerunt; qui statim ad Maximilianum proficisceretur, cum fœderis ferendi potestate, si condiciones non respuerit. inter quas erat, ut, si is Veronam reip. restituat, Antonius polliceatur rempub. ei daturam aliquam pecuniæ uim. eaq; res ut bene reip. uerteret, omnibus in templis dies tres supplicatio decreta est. Antonius tacite profectus Feltriam ubi uenit, literas sibi obuiam missas accepit; quibus ei Maximilianus suis in locis atque oppidis dies octo commorandi potestatem faciebat. eis literis non contentus Antonius; quòd tam breui temporis spatio Maximilianum conuenire, remq; tantam perficere posse se non confidebat; alias longioris moræ literas sibi mitti postulauit; easq; in castello Butistanio, quod est in extremis reip. finibus, se expectaturum confirmauit. Antonio itaque Butistanii eas literas expectante, hostes, qui Veronæ erant, à Maximiliano atque ab rege Galliæ haud parua manu aucti, commeatu & tormentis per Atesim flumen ad eos in ratibus Tridento missis oppido egressi, ut exercitum reipub. aggredierentur, ad Gritum, qui non longe



ab erat, contenderunt; congressiſq; cum Veneti propter pauci-  
tatem premerentur, eos repulerunt; ducentosq; ex equitibus ca-  
ptiuos fecerunt, interfectis per plurimis; & Suauium ac Leoni-  
cænos ceperunt. Grittus cum reliquis, qui quidem fortiffime pu-  
gnauerant, in Ateſtinorum ſe fines recepit. fuerat hoſtium nume-  
rus equitum grauis armaturæ ſeptingentorum, leuis mille quin-  
gentorum, militum circiter ſeptem millium cum Vaſconum, tum  
Germanorum; ad quos gregariorum magna multitudo acceſſe-  
rat: quibus omnibus Palitia Gallus homo non obſcuri inter ſuos  
nominis præerat. Eius prælii nuntio accepto non mediocris ti-  
mor patres inceſſit; ne eo ſucceſſu hoſtes ſublato Patauium impro-  
uiſo ſe conferrent; quod uacuum deſenſoribus ſciebant eſſe; ut  
de eo capiendo, ſi quid poſſent, experirentur. augebant eum timo-  
rem literæ à magiſtratibus alpinis ad eos datæ; Maximilianum  
Tridentum ueniſſe: rumoremq; ſatis conſtanti uagari, illum  
propediem in fines reipu. Tauriſum uerſus impetum facturum.  
quas ob res legatum, qui Tauriſi rebus belli præeſſet, Ioannem  
Paulum Gradonicum patres legerunt: & militum quina millia  
undecunque celeriter conſcribenda eſſe ſanxerunt: atque uti è no-  
bilitate ciues uiginti Patauium, X. Tauriſum mitterentur ad eas  
urbes cuſtodendas cum X. militibus ſinguli, totidemq; è plebe  
urbana cum tribus, qui portis eorum oppidorum adſiſterent; Se-  
natus conſulto addiderunt: Grittumq; exercitum ſine mora Pata-  
uium adducere iuſſerunt: ſcripſiſſe enim Iuſtiniano, ut, ſi quip-  
pam cognosceret, quod impedimento eſſet, quò minus conue-  
niret inter Maximilianum, atque rempublicam quamprimum  
poſſit, ipſe operam daret, ut, quicquid id eſſet, omnibus modis  
è medio prorsus tolleretur. quoniam autem principis, & eius  
collegii iuſſu edictum propoſitum fuerat; ne cui, qui fiſco debe-  
ret, frumenta poſſeſſionum ſuarum in urbem aduehere, niſi ipſis  
permittentibus liceret: ne ea res aduectiones moraretur, altero  
edicto facultas in urbem aduehendi ciuib; omnibus eſt data.  
quodq; ſunt in Sili flumine molæ frumentariæ per plures, quibus  
ciuitas utitur; eas qui cuſtodirent, armatos homines in nauiculis  
XXIII. uti ſuburbia, quæ à Septentrionibus ſunt, mitterent;  
Senatus iuſſit, æque inter ea, quæ quatuor ſunt, diuiſo nauicula-  
rum



rum numero, cum Muriani Torcelliꝑ; magistratibus; qui eis præ  
essent: panisꝑ; classicus omnibus cum uiginti dierum stipendio  
publice datus: quorum dierum spatio quid hostes molirentur, sci  
ri posse patres existimauerant. Exercitu Patauium adducto, mi  
litibusꝑ; mille, in Rhodigianis finibus qui erant, quos patres euo  
cauerant, eodem introductis; magna est hominum fuga ex agris  
cum Patauium tum etiam Taurisum facta: ut omnes uiæ carro  
rum, pueros mulieres & impedimēta domestica conuentum,  
implerentur. quem timorem augebat; quod afferebatur; quoniā  
hostes Leonicanis captis maiorem oppidanorum partem unā cū  
mulieribus & infantibus interfecerant, oppidumꝑ; & uicos ali  
quot incenderant; eos omnibus in reip. locis idem esse facturos.  
itaque Bassiani Asuliꝑ; magistratus relictis municipiis, quibus  
præerant, nullis eos hostibus impellentibus, sed sola earum re  
rum auditione perterriti Taurisum profugerunt. missus autem  
eò Laurentius Ceretanus præfectiꝑ; alii cum militibus & equiti  
bus leuissimis fractos iam ciuium & reliquorum animos confir  
mauerunt, qui unā cum Gradonico legato, ut oppidum redderēt  
communitius, animum intenderunt; magnumꝑ; agricolarum nu  
merum, qui in oppidum confugerant, nacti, celeriter eius, quod  
intenderant, non paruam partem effecerunt. frumenta, quæ in  
agris erant, in oppidum comportari mandauerunt. præterea, ut  
in urbe maior numerus reperiretur eorum, qui è nobilitate, qui  
ue è plebe Patanium, aut Taurisum accederent; utꝑ; ad id facien  
dum eo promptiores essent; præter Bartholomeum Mustium,  
qui iam se se patribus obtulerat cum armatis hominibus XXX.  
duos menses in utro uellent oppido sua impensa reip. operam na  
uaturum, & Sabam hominem è plebe, qui cum decem; ac propte  
rea magnopere laudabantur: proposita fuerunt præmia, tam iis,  
qui è nobilitate, quā iis, qui è plebe, pro sua quibusque conditio  
ne, qui ad tutanda ea oppida ire uellent. hostes interea uacuam  
hominibus Vicetiam; quod propè uniuerſa ciuitas fuga Pata  
uium atque ad urbem se contulerat; facile ceperunt: Pandulfusꝑ;  
Malatesta Citadellā, ab illis eò cum equitibus quadringentis pro  
pinquo eius misso. eas ob res patrum iussu sacerdotum & sacrarū  
uirginum collegiis tercenta staria frumenti dono data; ut preces



Diis immortalibus pro repu. facerent. atque ut pecunia quibus posset modis exigeretur; lex antea perlata, nunquam autem palam proposita, quod asperior duriorque esse patribus uidebatur, in Senatu lecta est. ea erat eiusmodi: qui senatores fisco deberent; decem dierum spatio in ararium conferrent: qui id non fecerit; à Senatu excludatur; aliusque in eius locum sublegatur. & alia item eiusmodi: qui in ararium pecuniam inferret; ea illi accepta una cum decima à quaestoribus referatur: qua is pecunia quæ ipse, quæue quis alius portoria ullis urbanis magistratibus debiturus in posterum sit, soluere, acceptumque ac relatum facere possit. etiam à Decemviris; prædia reip. fundique aliquot in Cypro insula ut uenirent; eaque statim ad urbem pecunia traiceretur; latum. sed eam legem; quæ de iis, qui fisco debent, à Senatu eiiciendis loquebatur; paulo post etiam ad omnes alios magistratus cum urbanos tum prouinciales extensam atque amplificatam maiora comitia probauerunt. itaque per plures magni uiri à rebus publicis tractandis eiectione in priuatorum numero sunt habiti. Lucius moleste ferens se à Senatu missum fuisse: tamen si uelle quiescere ipsemet patribus significauisset: querelisque ea de re legatorum aures quotidie obtundens, id perfecit; ut Senatus; ne in illum ingratus esse ulli hominum uideri posset; pristinum ei locum restituerit: quo in loco tamen parum temporis esset futurus, Ioanne Paulo Balione breui ad exercitum uenturo, cui parere Lucium oporteat. tamen si, etiam si ad exercitum Balio nunquam uenisset, non tamen irrita ea Senatus opinio fuisset, non multum scilicet temporis in sua præfectura futurum Lucium. paucos enim post dies in febriculam incidens, ea in horas grauiore facta mortem obiit. Romæ autem accito ad se se reip. legato Iulius; qui cum erant Hispaniæ Britannique regum legati; ei proposuit; se cum illorum legatorum regibus cumque rep. fœdus inire statuisse: quo ex fœdere Galliæ regi bellum eodem tempore omnes facerent. ei bello Ferdinandum confirmare equitum grauioris armaturæ mille ducentorum, leuioris mille, militum tresdecim millium numerum se præstaturum: totidem item Enricum: quibus copiis bellum à suis finibus in Galliæ fines inferat: ipsum autem suum exercitum bene plenum paratumque in commune allaturum: idem ut Veneti se facturos



facturos polliceantur; non tam hortari, quàm confidere, nulla eos in re desiderari suum munus atque officium permissuros: neque enim ullius sociorum tam referre id bellum fieri, quàm reipublicæ: itaque iubere ipsi, ut ea senatui perscribat, petatq; ab eo syngrapham, qua pro eius parte fœdus confici, & conscribi possit. cum Iulii sermonem uterque regum legatus Donato comprobavit. quibus rebus cognitis, ex Donati literis Senatus omnibus suffragiis syngrapham fieri, atque ad illum mitti iussit. monuerant Grittus Paulusq; legati Senatum: quoniam equites gravis armaturæ uulgo conquerebantur, eo, quo merebant, stipendio non posse se sequeosq; suos alere tam duro tempore, tam frequenti omnis commeatus propter fugam agricolarum inopia, tantisq; laboribus perferendis: optimum factu esse, si stipendia illorum patres auxerint: ut lætioribus animis suam reip. operam uberioriq; cum fructu nauent. quamobrem eis Senatus & stipendiorum summam auxit ad auri libram in annos singulos; quæ prius erat quinta parte minor: & duorum mensium stipendia repræsentari à quæstoribus imperavit. quòd autem pecunia publice defecerat, à ciuibus ditioribus, quòd opus esset, mutuo petere patres constituerunt. utq; cæteri eo exemplo mouerentur; dux ipse L. Aurelianus libras auri decem eo nomine in ararium primus contulit. id reliquorum ciuium per plures imitati & ipsi pro suis facultatibus idem fecerunt: ut esset omnis ea pecunia libras auri ad duascentas, eoq; amplius. Scripserant patres ad Balionem; ut è Perusii Spoletiq; finibus pedites bis mille conscriberet; secumq; adduceret: pecuniamq; ad eam rem suis internuntiis dederant. itaque ad eos reliquosq; illius milites & equites & comitatum aduehendum triremes nothas tres uacuas paucis administrantibus, aliq; nauigia ad eam rem accommodata patres in Flaminiam miserunt ad uicum, qui appellatur Catholica: eisq; nauigiis euntibus & redeuntibus Bondimerium Padanæ classis præfectum esse præsidio iusserunt: ne quideis Alphonfus in itinere noceret. Gradonicus in Taurisanis legatus de Laurentii & Vitellii multæ uirtutis hominum consilio, ut oppidum communiret, magnam curam & diligentiam adhibebat: muros reficiebat: è turribus, quæ in iis erant ueteri consuetudine altiores, quàm præsens rei militaris ra-



tio postulabat; superiorem partem detrahebat: fossas latiores & profundiores faciebat: aggerem construebat: extra oppidū per quingentos passus tecta diruebat: arbores succidebat; ut nihil aut prospectui, aut eiaculandis tormentorum pilis obesset. aqua Silis fluminis; quod flumen oppidum interfuit; ut in oppido sustineri posset; quæ hostibus accedentibus effunderetur ad omnē circa oppidum regionem submergendam; alueos è lateribus solidissimos cum ostiis lapideis plurimis, ad quamuis uim aquæ breui euomendam, concamerationesq; sub mœnibus perq; aggerē firmissimas exedificabat. quod opus magna impensa postea perfectum expletumq; eiusmodi nunc quidē est; ut neque pulchrius & elegantius, neque aptius atque accommodatius quicquā ullū ad oppidum muniendum & tuendum aliis in locis fere conspiciatur. hostes autem; quorum erat numerus prope uiginti millium; ulterius per Vicetinos fines progressi, incendiisq; omnia fœdantes, Camisanumq; maxime, totius agri plenissimum uicum, ut incendia usque Patauio prospiceretur; Bassianum oppidum ceperunt, diripuerunt: uirgines uiolauerunt. è quibus tamē equites Epirotæ reip. extremum agmen aggressi triginta captiuos Patauium, unde uenerāt, intulerunt. in iis Hieronymus Posterla, Mediolanensis ciuis, homo satis diues fuit. Interea Iustinianus; quem ad Maximilianum fœderis ineundi causa missum à Senatu dixeramus; cum regiis procuratoribus colloquutus, cum ii se ad illū non semel contulissent; spretisq; quas afferebat conditionibus cū tandem missum fecissent; demum etiam reuocauissent; neque tamen conuenire inter ipsum atque illos posset; à Senatu reuocatus ad urbem rediit. Ac domi quidem magistratibus comitia habentibus, Bartholomeoq; Mustio; qui amanter Patauium profectus tuendo oppido cum triginta militibus sua impensa, uti supra dictum est, reipu. operam dabat; senatore tanta ciuium uoluntate declarato; ut multo ipse maiore suffragiorum numero, quàm ullus ex suis competitoribus, id muneris adeptus esset: tametsi magna illorum pars in eo magistratu sæpius fuerint; quæ res maxime aduersaria solet esse iis, qui idem petunt: Lauredanus Dux ad ciues conuersus eiusmodi sermonem habuit: Lætari se plurimū; quod ipsi fauore suo atque beneuolentia eos in primis ciues prosequantur



sequantur, suffragiaq; sua iis honestandis conferant; qui communi commodo inseruiunt; seq; pro patria periculis obiciunt; & impendia rei familiaris erecto animo sustinent. itaque, inquit, non omnino Deos immortales iratos nobis esse atque aduersos puto: cum hanc uobis mentem datam atque hunc ab illis sensum uideam; ut, qui amore patriæ in labores, in discrimina se se dant, maxime dignos uestris muneribus existimetis; atque illis, qui minus id faciunt, præferendos uestris sententiis iudicetis. Gratulorq; Mustio; quem hoc honore amplificauistis: quod quidem gauisurum eum puto in illis suis laboribus longe magis; quàm si omnibus commodis affluens plurimis in uoluptatibus uersaretur, summaq; uitæ securitate frueretur. hoc est enim uere uiuere, prodesse patriæ, defendere remp. tueri ciues suos, uitam sine libertate minimi facere, etiam præferre mortem seruituti. hæc qui secum reputat, qui sentit: ille mihi præstans & magnus ciuis uidetur; ille dignus, in quem unum à sua ciuitate omnia studia, omnes honestates conferantur. hæc uos ciues, mea mihi uita chariores, dies atque noctes cogitare oportet: ut Mustio si miles, cum usus erit, patriæ laboranti succurratis. quod si feceritis: & illa beneficiorum & laborum uestrorum memor omnes suas dignitates in uos profundet: & ipsi non ab ea modo; quod tamen ciui egregio & amanti patriæ satis esse plane debet; sed etiã omnibus ab hominibus laudabimini. nam qui acta ciuitatis nostræ conscribunt; uestra nomina suis libris inserent. ita uirtutes & benefacta uestra legentur; aliis narrabuntur; per ora gentium & sæculorum peruagabuntur: nomenq; uestrum æternitati commendabitur. Hac oratione à Lauredano habita per plures ciues ipsi & magistratibus separatos obtulerunt, neque rei familiaris, neque uitæ suæ parcere, ut saluti publicæ pro uirili sua opem atque præsidium afferant. ita comitia dimissa.

Aa



PETRI BEMBI RERV M VENE-  
TARVM HISTORIAE  
LIBER XII.



O tempore in Istris incommodum acceptū est, fugatis equitibus & militibus reipub. cum legato eius regionis Andrea Suriano à Christophoro Friapane; qui se in insidiis occulta- uerat; prædaq; facta. quas ob res paulo post Su- riano à ciuibus male audiente Sebastianus Iu- stinianus à Senatu lectus est: qui legatus Istris regendis eo se statim conferat: cum antea regendis Dalmatis le- ctus fuisset. Ab hostibus uero Gallis Germanisq; Asulum & Ma- rostica facile capta. qui cum in planitie populationes facerent; Epirotis reip. extremum illorum agmen carpentibus plurimos ex suis non semel amiserunt. quod quidem detrimentum sarcu- tum cum fœnore est, Vasconibus mille quingentis aucto eorum exercitu. A Fossæ autem Clodiæ municipibus classicula celeriter coacta, fugatis Alfonsi nauibus, perplura ab eis capta optimis mer- cibus onusta nauigia recepta sunt in Vatrei ostio, atque ad ur- bem & ipsum ad forum magnis acclamationibus & tubarum ac timpanorum strepitu & tibiarum sonis, tanquam in triumphum, ducta. Auctis uero admodum febribus, quibus iterum tentari cœ- perat Iulius, ut se moriturum crederet: Francisco Mariæ fratris sui filio, quod Alidosium Cardinalem interfecerit, ne crimini es- set, decreuit; scriptisq; id literis est testatus. Pisaurumq; oppidū regendum & obtinendum ei tradidit; quod hæredes eius seque- rentur; stipendio leuissimo in annos singulos dari Romanis Pô- tificibus imperato: filiæq; suæ Felici liberas auri centum uiginti, totidemq; Francisco Mariæ, alterosq; totidem Nicolao Ruuero sororis suæ filio dono dedit. Exierant Vicetia hostium equites grauis armaturæ centum, leuioris fere ducenti, milites Vascones quatercentum Verona profecti; ut Marosticam se conferrent. id cum ab agricola Federicus Contarenus cognouisset: qui Patauio egressus cum equitibus leuioribus quingentis; ut hostibus si qua posset,



posset, noceret; eandem regionem uersus se conferebat: cum tertia suorum equitum parte, quò illos iter facturos arbitrabatur, se conuertit. reliquas duas partes diuersis itineribus, si hostes reperire possent, misit cum mandatis; ut, qui priores hostium agmen conspicarètur, id celeriter reliquis significandum curarent. accidit autem; ut ipse in eos prior incideret. itaque una cū Guido Rangonio magni animi adolescente sine mora cōgressus parum abfuit, quin ab eis caperetur. Rangonius quidem ab equo deiectus in manus hostium uenit. quorum impetum Federicus temperanter sustinens eos morabatur; dum reliqui, ad quos accersendos miserat, accederent. id dum per horæ spatium fit: reliqui adueniunt. tum redintegrato simul prælio, cum diu atque acriter utrique pugnauissent; hostes superantur: seq; fugæ mandantes; quòd equitum nostrorum celeritatem effugere non poterant; milites conciduntur: reliqui omnes ad unum capiuntur cum iumentis sarcinariis permultis; quæ supellectilem magni pretii ad Palitiam reliquosq; duces afferebant; cumq; mulierum turba, quæ agmen sequebantur. Rangonius equitem, qui eum ceperat, à se captiuum factum in equi sui postremo dorso Patauium in reditu ingrediens adduxit. erat autem hora noctis fere tertia: ut multis luminibus allatis utrunque agmen uictores simul & uicti non ingratum spectaculum Paulo Legato, qui in porta aderat, & oppidanis dederint. Gritum Legatum ob aduersam ualitudinem senatu permittente Patauio sui ad urbem detulerunt; & Bondimerium & Fossa Clodia eadem de causa item sui. Lucio mortuo dum Balio ad exercitum uenit; Bernardinū Braccium, egregia fide hominem, pro præfecto copiarum reipublice senatus esse iussit: quæ res præfectis reliquis exercituiq; omni gratissima sane fuit. eiq; in præsentia datæ libræ auri decem in stipendium: quinque autem in menses singulos ad uictum institutæ. Meleagro etiam Foroliuensi; quoad Ioannes Græcus, qui longinquo morbo detinebatur, conualesceret; eius equites regendi dati una cum aliis leuioribus quinquaginta qui Lucii fuerant. ex centum autem grauis armaturæ, qui fuerant eiusdem Lucii, Guido Rangonio septuaginta quinque; reliqui Tatheo Vulpio distributi. atque inter hæc Theodorus Paleolo-

Aa ii



gus, homo reipu. amantissimus, Zacyntho rediens equos quinquaginta leuissimos ad urbem secum duxit. cuius ab insulae praetura Ioannes Barbadicus, Triumvir ad magistratum provinciae luum furta criminaq; cognoscenda, Hieronymum Bernardum eiecerat pecunijs omnibus, quas nullo iure abstulerat, restituit; ipso ad urbem se sisti iussu; Stephanoq; Capello Propatore in insula instituto: eam enim illi potestatem Decemviri dederant. hostes cum frequentes populationes in alpibus fecissent; Belunium cepissent; castella multa & uicos diripuissent: cum carris quaplu- rimis, qui nauculas ad pontes sustinendos binas singuli, quiq; ipsos pontes disclusos atque in partes plurimas seiunctos ferebant, Plauim flumen uersus se contulerunt. quorum discessu cognito Federicus Contarenus Ianesq; Fregosius, Patauius ad castellum Francum procurrentes, porta succensa municipium capiunt una cum praefecto, quem hostes ibi reliquerant ad comeatum procurandū, & eius equitibus aliquot militibusq; triginta, cumq; iis qui panem exercitui conficiebant: quorum erat non paruus numerus: farinaq; carros aliquot abstulerunt, frumentiq; aliquantum modum: ut Epirotae fere omnes oneratos admodum ea praeda equos suos in reditu habuerint. Taurisi autem Legatus praefectiq;, quod hostes ad se uenturos intellexerant, eam diligentiam perficiendis munitionibus adhibuerunt: ut non ipsi modo reliquiq; ciues Veneti & Taurisani, ex nobilioribus; sed ipsae etiam mulieres singulis diebus plures horas terra suis manibus fodienda & conuehenda laborem forti animo subierint. posito in nauiculis ad Plauim ponte Germani flumen transferunt. Galli traicere noluerunt, uerentes, ne Germani, cum suae terrae finibus appropinquauissent, cupiditate domum redeundi, & quod eis stipendia fere non persoluebatur, se relinquerent. erat autem Gallorum numerus prope uiginti millium; Germanorum duodecim millium, praeter equites utriusque armaturae circiter octingentos: quorum grauiore more ipsorum duos ad summum singuli, saepe etiam unum tantum equum habebant. Germani igitur Sacilium profecti, oppido defensoribus uacuo facile potiti sunt: atque ibi comestu, quo antea caruerant, exercitum refecerunt. eo capto municipio magnus est omnibus illis populis iniectus timor; ne ab iis ferro  
atque



atque igni ob innatam genti feritatem & crudelitatem vastarentur. qua re cognita, fortunæ fauore usi, & sua paulisper remissa uulgo sæuendi consuetudine, non multis diebus eam omnem regionem in suam potestatem redegerunt. Ea tempestate ne pecunia patres deficeret; propterea quod rerum fisco cedentium Triumuii magnum suis in libris publice debentium ciuium numerum habebant; Senatus legem sciuit: ut iidem Triumuii bona ciuium fisco debentium omnia; quæ sui iuris fecissent, facturi ueressent; ipsi in foro licerentur: licentibus partem eorum bonorum tertiam fisci nouissimi pecunia uel sua, uel aliorum, cuius essent creditores, emere liceret; si pro reliquis duabus partibus numerato persoluissent: eaq; bona ita distracta si redimere priores domini uoluerint; intra dies octo eo modo, quo empta erunt, possint: si noluerint, earum emptiones nullum postea præiudicium patiantur; sed firmæ solidæq; sint tota tempora. At in Carnis Germani etiam Couoli arcem: quæ quidem nulla ui expugnari poterat; uti antea dictum est: qui in ea erant, se deditibus, ceperunt. quo accepto nuntio Aloisius Gradonicus Vtini magistratus, magni fane, sed parum muniti oppidi, relictis prædæ hostium magni pretii tormentis ex eo discessit. dein Portus Gruarius, pauloq; post Mota ad Liuentiam flumen municipium, & nō longe ab eo flumine Vdertium captum. quoniam uero earum regionum fere omnium, quæ citra Plauim sunt, agricolæ se in ultimas Taurisanorum collium syluas abdiderant; Galli magna cum manu eò profecti, atque introrsus patefactis uis, non paruum eorum partem conciderunt; magnamq; armentorum pecorumq; uim, quam illi secum adduxerant, abstulerunt: mulieresq; eorum ætate ac forma non spernenda tenuerunt. Alia autem ex parte à Germanis Sacilium Carnicum est captum. ea re audita patres, ut Gradiscas communirent, curam adhibuerunt, missis eò celeriter equitibus, & quos in urbe conscripserant, militibus cum centurionibus & præfectis. quæ tamen cura nihil illis profuit. positis enim ad castelli muros castris cum Germani tormentis, quæ nec multa nec magni ponderis habebant, eos quaterere cœpissent; qui in eo erant, sese hostibus dederunt; cum defendere municipium paruo negotio potuissent. fouebantur



autem Germani à plurimis Foro Iulianis ciuibus , atque ab Antonio Saorniano quidē maxime, uno ex Vtini principibus & nobilitate & opibus & reipu. paulo ante gratia imprimis claro, qui nulla unquam laceffitus iniuria ad Maximiliani duces profugerat ; eosq; rebus omnibus iuuabat ; auctorq; illis fuerat , ut se Gradiſcas conferrent . niſi tamen iniuriam accepiffe illum eſt exiſtimandum : quòd paucos ante menſes coactis agreſtibus hominibus clientibus ſuis magnam in ciuitate cædem fecerat, trucidatis plerisque honeſtiſſimis ciuibus aduerſariis ſuis, eorumq; ædificiis incendio abſumptis : ut neque ius , neque pudor , neque timor reipu. neque magiſtratus, qui aderat, reuerentia continere illum potuerint . quòd tamen eius conſilium apud conſobrinum ſuum Hieronymum Saornianum tanti non fuit ; ut eum ab officio atque ab amore reipu. abduceret . nam cum ille ſuum in caſtellum ; quòd in Oſopio monte eſt loco alto atque edito uiæ , qua Germania plurimū aditur , imminens ; quòdq; pridem has ad res magna ſua impenſa ex ædificauerat ; ſe contuliſſet ; ducesq; Maximiliani ad eum miſiſſent , uti ſe dederet ; eiq; necem & incendium exemplaſq; ultima interminati eſſent ; niſi paruiffet : ſpretis eorum minis ſe ad deſenſionem forti & conſtanti animo comparauit : literasq; ad ſenatum ea de re dedit ; pollicitusq; eſt patribus , nihil ſe indignum ſuis maioribus , nihil à reipu. erga ſe charitate alienum , nihil Antonii rebus ſimile commiſſurum . quibus acceptis litteris patres Ioanni Viturio , Tauriſi qui erat , mandauerunt ; ut Oſopium è uestigio cum quadringentis equitibus contenderet Hieronymo auxilium laturus . cumq; dies comitiſſorum ſenatoribus ſexaginta creandis ueniſſet ; Hieronymus Saornianus pluribus ſuffragiis , quàm ullus alius , eſt ſenator renuntiatus : tantum ciuitati in tam turbidis reip. temporibus optimus in illam Hieronymi animus gratus et iocundus fuit . ſidem patres cum fiſco debentes tot in eos latis legibus non tamen in ærarium conferrent : ad eas leges , de quibus in ſuperiore libro dictum eſt , aliam etiam in ſenatu legem ſciuerunt , quæ paulo poſt maioribus in comitiis eſt perlata : qui magiſtratus uel ſint , uel futuri ſint ; afferant ſinguli reipu. ſcribis fidem quatuor magiſtratuum ſcripto confirmatam , Triumuirum ſcilicet , qui prouen-

tibus



tibus reip. præfunt; quiq; res fisco cedentes administrant; & qui regni Cyprii Triumviri appellantur; & item Quinquvirū sale reipu. procurando; se, quod debeant, persoluisse: qui non attulerit; is magistratum reip. neque obire, neque adire ullum possit: qui autem ex iis magistratibus fidem fecerit, aliquem ciuem soluisse, qui non soluerit: is magistratus mulctæ nomine ciuis illius omne debitum reipu. persoluat: scriba uero; qui tabellam confecerit; à suo munere obeundo expellatur. neque tamen ea lege satis effectum Decemviri existimantes, pleniore coactio collegio sanxerunt; ut fisci debitores detinerentur, custodiaq; traderentur: à qua nequirent liberari, quoad soluerent: tabellamq; cum centum eorum nominibus suis ministris dederūt, iubentes, ut quemlibet eorum caperent. Inter hæc Legati, Patauī qui erant, Paulus & Christophorus certiores facti, Mediolano Brixiaq; hostiū equitatum optimi generis ad Suauium municipium uenisse numero ad quatercetos cum præfectis octo; ut ad Palitiam se conferrent: equites & milites Guido Rangonio duce miserunt; qui eos, si possent, interciperent. ii celeriter Suauium profecti, cum ante lucem ad oppidi se portas tacite contulissent: partem militum collem, in quo est arx, ascendere iusserunt; ut se in arcem inferrent. missi elusis, qui arcem custodiebant, militibus, cum se & ipsi custodire illam dicerent; scalis, quas secum attulerant, positos muros conscenderunt: interfectisq; qui primi se opposuerant, arcem tenuerunt; nomenq; Marcium conclamauerunt. iis exauditis uocibus præfecti hostium armis captis equisq; infessis; cum portas obsideri à Venetis intelligerent; facto ex equitibus grauis armaturæ, quos habebant quinquaginta, priore agmine, cæteris omnibus subsequenter condensi aperta oppidi porta eruptionem facere contenderunt: omnesq; ad unum capti sunt, Patauūq; perducti. ex præfectis fuere Continus Melzius Galeatii Mariæ, qui dux Mediolanensium fuerat, filius nothus; Sebastianusq; Atestinus Alfonsi Ferrariensis ducis patruelis frater; aliiq; claro loco nati quatuor. Melzius aduersa ualitudine conflictatus in itinere interiit. Eodem fere tempore à Gallorum hostium equitibus uado in Lipientia flumine inuento, incursiones sunt usque ad littus, quod maius appellatur, & uicina tribus



portibus littora; qui portus à Septentrionibus prope ad urbis  
æstuarium pertinent; omnia prædantibus armenta; abigentibus,  
factæ. atque ii redire ea cum præda uolentes; quod flumen im-  
bribus creuerat, traicere non potuerunt. ea re à patribus intel-  
lecta, missi cum cymbis bellicis è plebe urbana, qui illos interci-  
perent, celeritate non magnopere usi eos in castra reuertisse intel-  
lexerunt, quatuor equitibus in flumine amissis. Petrus etiam Du-  
reus non multo ante à rege Hispaniæ ad Maximilianum Lega-  
tus pacis cum patribus ineundæ causa missus; cum apud illum  
dies aliquot fuisset; Venetias uenit: hortatus; patres est, ut in-  
dutias cum Maximiliano facerent: quarum indutiarum tempo-  
re pax tractari commodè confici; inter ipsos posset. Senatus li-  
teras Romam ad Legatum dedit: qui de eo Iulium certiorè fa-  
ceret; eum; ad fœdus, de quo pridem agebatur, conficiendum  
omni studio & diligentia hortaretur: quod quidem fœdus im-  
pediri ulla indutiarum tractatione nolebant. iidem patres san-  
xerunt; ut quæ oppida, quæ ue arces captæ ab hostibus fuissent;  
earum magistratus, & præfecti, qui eas tradidissent, qui ue pro-  
fugissent; in urbe se ad carcerem sisterent; ut de eis iudicium fie-  
ri posset. ex iis pridie Non. Octobris uiginti duo numero in pu-  
blicas custodias profecti sunt, adhibito suo præde quilibet, è cu-  
stodia se non abiturum. Romæ autem paucos post dies Legato  
procurante fœdus ab Iulio & Ferdinando & Venetis percussum  
est: quo fœdere Ferdinandus mittere ad Iulium uiginti die-  
rum spatio tenebatur equites grauis armaturæ mille ac ducentos,  
leuioris mille, militum decem millia: & si mari opus erit bellū  
facere, triremes undecim: quam quidem militum & equitum  
manum in regno Neapolitano iam prope paratam habebat: in  
quorum stipendia Iulius quadringentas auri libras in menses sin-  
gulos daret, duorum mensium stipendio in præsentia Neapolim  
misso. eius stipis uniuersæ mediam partem se persoluturos Ve-  
neti receperunt, classem; suam Iulio, cum uellet, daturos. fœ-  
deris socium sese fieri cupere Enricus Britannia rex, Ferdinan-  
di gener per Legatum suum; qui Romæ erat, & tractando fœde-  
ri interfuerat; magnopere ostendebat: eius; tantummodo syn-  
grapha, qua id confieri posset, expectabatur: eaq; postea per-  
lata,



lata fœderi & ipse se addixit. causa fœderis proposita est; ut, quæ Iulius Gallis eius hostes adiuantibus amiserat, recuperarentur. Ferdinandus enim uideri se propter Venetos ulla ex parte id fecisse noluerat; ne Maximilianum offenderet, cui se amicum profitebatur. uerum ipse Iulius per suas literas Venetis se paratim est pollicitus; quicquid oppidorum & ditionis eorum fuisset, si recipiatur; id se ut reipu. restitatur, effecturum. posteroq; die eius belli Legatum Ioannem Medicem Cardinalem creauit. Patres Andream Gritum, qui ex morbo in urbe conuauerat, iterum Legatum legerunt, & Patauium reuerti iusserunt. cum autè Daniel Barbadicus & Laurentius Priolus lecti à patribus Quinquenni rebus maritimis in Senatu procurandis æratem probare non potuissent; pauciq; eis menses legitimi temporis deessent; datis mutuo reipu. senis auri libris ad magistratum obeundum sunt admissi. Atque in Istris, quidem cum earum regionū hostes Christophoro Friapane duce aliquot oppidula reip. cepissent; uiginti quinque equites Mugiam ad mare oppidum cum tubis & timpanis miserunt; qui illud Maximiliani nomine à ciuibus peterent. illi se tueri uelle urbem reip. responderunt. magistratus autem Venetus, ibi qui erat, quæ equitibus in reditu erat transeundum, Bombizam Mugianum fortem hominē cum bireme atque nauicula breuiore itinere misit; qui spatio celeriter confecto, naui profiliens cum reuertentibus congressus maiorem eorum partem cecidit. posteroq; die Friapanes cum militibus quinque millibus, equitibus nongentis ab ea parte, qua salinæ sunt, castris positis, muros tormentis muralibus deicere aggressus, eos, qui solidissimi non erant, facile aperuit sic, ut ingredi se se posse confideret. at ciues uniuersi una cum mulieribus eo in loco aggere intra mœnia celeriter excitato, se munierunt. interrim Andreas Ciuranus, equitum Epirotarum præfectus, Iustino poli adueniens alia ex parte in oppidum se intulit, auxilioq; Mugianis fuit. hostes labore oppugnationis frustra suscepto, interfectis ex eorum exercitu non paucis, uulneratis per plurimis; in quibus Friapanes ipse & magistratus Tergestinus fuerunt; discedere sunt coacti. ea in oppugnatione Bombizæ uirtus magnofui suis ciuibus fuit. Cum hæc in Istris gererentur; Galli & Ger-

Bb



mani ad Taurisum obsidendum profecti, non longe ab oppido modo hac, modo illac castris positos, quod ab hostibus ex muro tormentorum pilis interficiebantur, urbem aggredi non sunt ausi: sed Silum flumen nauiculis, quas secum in carris ferebant, traicientes; quod non satis res illis frumentaria suppetebat; praedas unde quaque abigebant eo facilius; quod agricolae tametsi iussi non semel edicto praefectorum fuissent, ut sua in tutum exportarent; id tamen facere magna ex parte neglexerant, itaque late atque ad loca longinquiora uagabantur; uerum sapius non impune. nostri enim equites Epirotae aliquam eorum manum assequuti caedes faciebant: praedas auferiebant: commeatum, qui eis superioribus e regionibus afferebatur, interciperiebant. quamobrem diebus pluribus in ea cogitatione consumptis, ad extremum desperantes oppidum rebus prope omnibus ad sustinendam obsidionem communitum capi posse, abierunt, ut se Vicetiam reciperent: cum paulo antea ob aduersam ualitudinem Ioannes Franciscus Gambara Brixianus ex principibus ciuitatis, de quo superioribus libris diximus, in Colle Alto mortem obiisset. Gritus cum stipendio exercitui dando Patauium est profectus. quod quidem Balio e Fossa Clodia, aduectis ad continentem per aestuaria suis equitibus & militibus, urbe ac patribus, ne tempus tereret, ad dexteram relictis, breuiore itinere paulo post & ipse se contulit; duobus a magistratibus, qui res bellicas in senatu procurant, Antonio Iustiniano, Andrea Triuiniano; quos patres ad illum honoris causa miserant; eo perductus. quoniam uero litterae Roma uenerant, Hieronymum Donatum Legatum maximis iliis doloribus ita iam confectum esse, ut spes prope nulla eius uitae sit relicta; Franciscum Foscarum, qui Praetor Patauinus fuerat, senatus ei sublegauit; qui celeriter, si Donatus mortem obierit, proficiscatur. cum autem foederis, de quo supra dictum est, in urbe recitandi dies aduenisset: quem quidem diem propter imbres & non serenas tempestates eo usque patres distulerant: a Lauredano duce & principibus ciuitatis, ac omni senatu, diuinis auditis in aede Marcia sermonibus, ea celebritas in foro est facta; is parietum eius ornatus; is sacrorum collegiorum; is omnium ordinum omnis aetatis conuentus & perambulationio



latio fuit; ea uis argenti atque auri fabrefacti & gemmatorum monimentorum per manus hominum atque ipsis in canistris & corbibus circumducta: ut mirum sane fuerit in tam exausta bellis & tributorum collationibus ciuitate tantam honestorum & ornatissimorum hominum frequentiam, tantos thesauros, tantas opes extitisse. in ea celebritate ubi Lauredanus in forum uenit; capita fœderis, è saxo edictorum clara uoce à præcone pronuntiata, magnis populis acclamationibus exceperat. Hostes Tauriso profecti cum ad Plauim flumen iter flexissent; ut commeatui, qui Corneliano erat mittendus, obuiam fierent, ne à Venetis intercipi posset: eo demum à Ioanne Gonzaga Francisci fratre, qui Corneliani eius rei procurandæ causa restiterat, in carris centum adducto, in fines Patauinorum reuerterunt, ædificia, quæ adire poterant, Venetorum ciuium, quorum erat celebris neque paruus numerus, plerunque comburentes: & Medoaco flumine traiecto, Vicetiam prope hominibus uacuum, deinde Veronam non sine crebris detrimentis ob equitum reip. eos insequentium audaciam se receperunt, domum reditione à Germanorum parte plurima ex itinere Veronaq; suscepta. profectis hostibus, Cornelianum, Serauallium, Vdertium, Mota sponte ad remp. redierunt: idemq; factura Sacilium & Ciuidale nuntiabantur. Portus autem Gruarii municipes Nicolao Vendramino, qui Tisanæ eius regionis uico in agris suis erat, accersito, ut prætorem in oppido ageret, magistratum Germanorum captiuum fecerunt, atque ad urbem miserunt, neque tamen non à militibus Germanis duobus millibus, qui repente in Carnis extiterunt, plura reip. loca infestabantur. Inter hæc, ut belli sumptibus pecunia suppeteret, patres legem sciuerunt; ut mediis domorum fructibus, qui ex locationibus proueniunt, æquam partem inquilini omnes in ærarium inferrent; exceptis iis, qui hoc bello ab hostibus reip. domo sua pulsi se ad urbem recepissent; atque iis, quorum fructus decimam uncie partem non excederent. aliam etiã legem iidem patres sanxerunt: ut in proximo senatu ad naualia rectius atque commodius procuranda nouus magistratus legeretur; qui adesse in principis & patrum collegio, legesq; ferre in senatu posset. lectusq; est Antonius Tronus tem-



pli Marcii procurator . itemq; ut Romam litteræ ad Legati scribam mitterentur ; ut , si Legatus mortem obiisset , ipse ab Iulio senatus nomine sacerdotium aliquod uni ex Legati liberis impetraret : quo munere demortui familia sat grauis , neque uictu abundans fulciretur . ipse autem Legatus iam obierat . At in proximis comitiis cum Cyprio insula regenda magistratus crearetur , qui reipu . locum teneret ; Gradonicus Taurisi Legatus , & bellū diligenter administrans , eum magistratum magno fauore ciuitatis obtinuit : quanquam eius competitores , ut illum eundem consequerentur , salutando prehensandoq; ei rei multos dies operam dedissent : id quod Gradonicus absens , & in castris facere nequiuerat . uerum illum tot labores pro repub . perpassi commendatum apud omnes reddebat . Post hæc senatui placuit ; ut Gradonicus præfectiq; equitum prope omnes ad recuperanda ea , quæ respu . in Carnis amiserat , se conferrent . itaque pridie Nonas Nouembris Tauriso cum tormentis profecti sunt . post dieq; eius diei senatus hortatu Hieronymus Saornianus , in urbe qui erat , reliquiq; illorum oppidorum ciues amici reipu . in Carnos ad Legatum iuuandum reuerterunt . Nicolaus autem Bolanus ; qui , Maximiliano magna manu Butistanium , quod est in Istris , obsidente , eius municipii arcem , cui præfectus erat , militibus se deditibus amiserat ; in urbem rediit , ut se ad carcerem sisteret . eorum autem ciuium , qui propter eiusmodi causas carceri se tradiderant , eo tempore per plures à iudicibus absoluti sunt , atque ad rempub . admissi . Ab Epirotis uero equitibus quadraginta prope Veronam homo Sequanus omniū Maximiliani equitum præfectus , quem Rosæ dominum appellabāt , interceptus , cum se magno animo defendisset , uulnere in facie accepto , cum non paucis equitibus captus , Pataviumq; perductus est . quem quidem Legati honorifice exceptum Venetias miserunt : eumq; postea è custodia in patrum collegium à duobus magistratibus adductum , atque ad principis latus sedentem Lauredanus ipse reliquiq; patres bono animo esse iussim , amantissimis sunt uerbis prosequuti : Vicetiaq; ad rempub . rediit . uerum cum annonæ caritas in urbe atque in reliquis reipu . oppidis magnopere creuisset : X . uiri legem sciuerunt ; quicunque se receperit



receperit ex maris Adriani à læua regionibus, atq; ab Epiro, Acarnania, Aetolia frumenti aliquem numerum ad urbem aduecturum, ei in singula frumenti staria uiginti solidos remp. dono daturam, atque, ut is tertiam uniuersi frumenti partem uenundare in omni sua extra urbem ditioe possit, permissuram. à senatu etiam undecim Ciuidalis Beluniani ciuibus, qui se amanter pro rep. gesserant, uigintiquinque agri iugera in Portus Gruarii finibus dono singulis data sunt: quæ iugera hæredes ipsorum sequantur. A' Rhodigianis autem oratores Patauium ad legatos missi uenerunt; qui dicerent; omnes Alfonsi equites & milites Padum traiecisse, eaq; loca reliquisse: itaque redire se ad remp. cupere: rogare, ut, qui præsit, in oppidum mittant. quamobrem Valerius Marcellus; quem patres magistratum Rhodigianis antea creauerant, eratq; tunc Patauii; Legatorum iussu eo se contulit. Romæ uero ante diem nonum Calendarum Nouembris in publico Cardinalium collegio Iulius Hispanis duobus & Gallis totidem, qui concilium Pisanum coegerant, Cardinalatum, quo in ordine erant, abrogauit. In urbe prætor est Vicetinis Franciscus Falerius datus. & qui plerisque municipiis paucorum dierum spatio sponte se reip. reddentibus præessent, lecti: & qui antea lecti erant, ad suos magistratus obeundos ire iussi. Vtinumq; receptum est. Octauianus autem Fregosius magnæ uirtutis adulescens, qui cum Balione uenerat, & Ianes ex eadem familia, de quo sæpe dictum est, Iulii rogatu, Ianuensium statum renouare magnopere cupientis, senatu concedente Romæ ad illum profecti sunt. Troilus uero Sabellus ob auaritiam (suorum enim equitum stipendia fraudabat; eaq; de causa nihil illis negabat: atque illi indigna omnia patrare non uerebantur) cum sui muneris tēpus expleuisset; à senatu est dimissus. atque ob pecuniæ indigentiam omnes pensiones solutionesq; à rep. fieri solitæ ab Idibus Nouembris usque ad Calendas Martias ab eodē senatu suspensæ ac retetæ sunt. Quoniā autē propter res ad usum & mercaturam ciuium non recte ab Aegyptiis administratas, ad Alexandrinorum regem, quem Soldanum appellabant, erat mittendus, qui ciuitatis causam reip. nomine tueretur: patres legem sciuerunt, ut legatus ad id munus crearetur obeundū etiam exiis, qui



in magistratu essent; eiq; è cōmuni mercatorum pecunia auri libræ X. in præsentia darentur; salarii uero nomine in menses singulos ternæ libræ cum nauigiorū, quæ illum adducerent, & reducerēt, mercedibus. atque ita Petrum Balbum, quem quidem antea rei maritimæ imperatorem comitia creauerant, statim legerunt. à Balbo legatione non suscepta; quod quidem facere unis imperatoribus licebat; Dominico Triuisano templi Marcii procuratori eam curam mandauerunt, Redierat in fines reip. Christophorus Friapanes, de quo paulo antea diximus, ad eosdem Mugianos uexandos. quod ubi Andreæ Ciurano renuntiatum est, qui non longissime aberat: cum suis ad illum contendit: cōmissioq; prælio Friapanem medio in agmine conspicatus in illum se intulit. non respuit congressum Friapanes. itaque cum uterque alterum sæpius stricto gladio petiisset: Ciuranus tandem hostis faciem mediam lato uulnere sautiauit; atque illum in fugam conuertit. eo diffugiente maior pars agminis dilapsa: reliqui aut interfecti, aut capti. Ciurani egregia eo die uirtus fuit. Gradonico in Carnis ad Cremonse municipium profecto; missisq; ad oppidanos internuntiis cū mandatis; nisi, antequam exercitus se ad muros conferat, deditionem fecerint, eos se omnes eorumq; omnia in prædam militibus concessurum: illi minas ueriti sine ullis conditionibus se legato tradiderunt. Venerant secreto ad ostium Lauredani principis Germani duo, à Matheo Episcopo Curcensium missi: qui eius nomine petierunt, ut ei liceret per fines reip. iter facere, triremesq; habere, quibus se in Flaminiam traiciat: uelle enim Romam ad Iulium accedere tractandarum rerum inter Maximilianum Venetosq; causa. atque ii quæ postulauerant, à senatu impetrauerunt. Sub hæc Andream Triuisanum, qui Vtini magistratus reip. locum teneret, cum senatorum prærogatiua maiora comitia creauerunt. pauloq; post Albertus Pius Maximiliani legatus Venetias uenit, petens à patribus, ut quatuor ciues, binos ex Decemuirum, binos ex senatorum ordine, in Germaniam mitterent; qui obsidum loco essent; ut Matheus Episcopus Curcensium tuto se reip. posset cōmittere; nauesq; triremes quatuor paratas ei traderent, quæ illum Anconam adducerent sub Maximiliani signis, aut, si id ipsi negaretur, sub Iulii. iis de rebus consulto



fulto senatu dare obsides non placuit: ne reip. dignitas; cuius  
 fides nullo tempore ullis principibus defuisset; minueretur. reli-  
 qua facile concessa. quod cum Pius intellexisset; de eo literas ad  
 Maximilianum dedit: atque in urbe, quid is rescriberet, operiri  
 se se uelle dixit. Etiam Thomæ Strigonienfi Cardinali bene de re  
 pub. merito ex Pannonia Romam proficiscenti triremis, qua in  
 triremi Anconam adueheretur, tradita: missusq; ad illum Vin-  
 centius Guidottus Senatus scriba cum muneribus reip. nomi-  
 ne salutandi eum causa. post hæc Hieronimi Saorniani percele-  
 ri ad urbem aduentu patres certiores facti sunt, reip. exercitum  
 Clusam & Venzonium cepisse. isq; illos multis de rebus admo-  
 nens statim ad exercitum rediit. Alia ex parte à Maximiliani co-  
 piis Cadoræ captæ atque incensæ sunt. in urbe autem à Senatu de  
 cima cum medio censu ciuibus imposita. Atque illis diebus Au-  
 gustinus Maurocenus Heluetiorum interpretes itinere deuio pro-  
 pter Gallorum suspiciones, qui loca omnia custodiebant, ad pa-  
 tres missus, eis proposuit; statuissè Heluetios ab Italia Gallos  
 expellere: itaque uelle eos primum omnium Venetis auxilio  
 esse; ut postea coniunctis opibus illos facilius eiiciant: modo  
 ipsis à repub. commeatus, tormenta, & equites quingenti tri-  
 buantur: eas tantum res satis Heluetiis ad bellum gerendum fu-  
 turas: ipsos ad hoc iam signum illud explicuissè; sub quo Caro-  
 lum Sequanorū ducem uicerant, atque interfecerant ante annos  
 paulo minus quinquaginta. quod signum nunquam postea ex-  
 plicuerant Heluetii. cumq; dies esset maiorem in modum plu-  
 uuius, aperto in æde sacra signo serenitas mira illuxit: quod qui-  
 dem illi optimum in omen acceperunt, omnia ipsis è sententia  
 successura. is etiam, quod in familia eius nominis esset, quod  
 maxime celebre apud Venetos est, amicum esse reip. cupereq; il-  
 li omnia se ostendit. itaque eum patres liberaliter exceperunt. cō-  
 fulto deinde Senatu, omnibus ad unum suffragiis, quod raro fie-  
 ri assolet, oblata Heluetiorum accepta; & quæ petierat, eis pro-  
 missa. Interim Iulio magnopere hortante; ut, quæ petierāt Alber-  
 tus Mathei Episcopi nomine, ea illi concederentur; senatus con-  
 sultum factum est; uti de quatuor obsidibus in Germaniam mit-  
 tendis, totidemq; triremibus Matheo dandis, omni ex parte Al-



berti postulationi satisfaceret. nequetamen obsides sunt missi, Alberto ipso non multos post dies ex Maximiliani literis apud patres pronuntiante; quoniam is Romæ per Iulium perq; suos internuntios agere, quæ agenda erant, cum rep. statuerat; non opus esse ut mitterentur. Gradonico autem legato in Carnis non sat prospere bellum administrante, cum ob durum & intractabile anni tempus, bruma enim appetierat, niuosis præsertim & frigidioribus in locis: tum uero propter stipendia non in tēpore persoluta, & commeatus inopiam; quem direptis oppidis & uastatis agris plerunque ab urbe subuehi & expectari oportebat: à mari autem per continentem eò usque omnia ob bouum & iumentorum infrequentiam tarde & difficulter afferebantur: Grittus legatus cum ea, quam habebat, manu senatus iussu Feltriam uenerat, itaque cum Gradonicus suo exercitu Gradiscas oppidum cinxisset; tormentisq; positis parū proficeret: senatus statuit, ut Grittus eò accederet, suasq; copias cum illius copiis coniungeret, neque tamen ea re Gradiscæ capi ab illis potuerunt, utriusque militibus & equitibus & præfectorum plurimis à tanto se labore subtrahentibus. his rebus senatui palam factis; quòd Heluetii in fines Mediolanensium iam irruerant, castellaq; non nulla ceperant; senatus literas ad Grittum dedit: si se paucorum dierum spatio in Gradiscis capiendis nihil profecturum esse intelligit; Vicetiam suis cum copiis redeat; ut Heluetiis auxilio possit esse, dum ea literæ perferuntur; legati ambo Vipulzanum & Martinianum & Florianum castella in collibus posita, acriter cum Maximiliani militibus, qui ea tuebantur, atque ad prælium exierant, congressi, fuga eorum & cæde facta ceperunt. quodq; ab iis reip. populi magnopere uexabantur: oppidanos diripuerunt; ædificiaq; in agris incenderunt. hostes quoque illi, qui erant Cadoris, duorum exercituum coniunctione perterriti, iis relictis in alpium se interiora receperunt. eius uero loci homines, qui supererant, internuntiis ad patres missis, qui se regerent, ab eis petierunt: uel leq; se se arcem incensam reficere reip. sunt polliciti. Gritto Vicetiam reuertente Ioannes Græcus equitum sagittariorum præfectus rei q; pub. amantissimus, homo iam senex, suo in lectulo ea in urbe mortem obiit. eius equites CL. Meleagro Foroliuensi cum



cum omnium equitum leuiorum præfectura à senatu traditi mis-  
 erat Venetias Ioannes Cardona Neapoli prorex Ferdinandi re-  
 gis iussu Ioannem Baptistam Spinellum, Cariati, ut aiebant, comi-  
 tem, internuntium suum: ut optimum proregis ad remp. iuuandū  
 Gallosq; oppugnandos animum Lauredano principi & patribus  
 ostenderet: eosq; ad pacem cum Maximiliano conficiendam hor-  
 taretur: adderetq; si id fecerint; omnia eis prospere uentura, se  
 se confidere. patres hominem eo libentius exceperunt; quod is  
 alias etiam annis superioribus Ferdinandi legatus ad ipsos fue-  
 rat. is se manere in urbe uelle dixit. patres ei domū paratam publi-  
 ce tribuerūt. Iisdem diebus milites Hispani numero ad nouē mil-  
 lia Iulio ab rege suo traditi, cum ad Bastiam Alfonsi castellum  
 ad Padi ripam, de quo superius diximus, apprime communitum  
 se contulissent; tormentis eam uerberare, quā proxime poterāt,  
 cœperunt. deinde adhibitis ante se cratibus, quæ eos tegerent, ne  
 noceri eis posset; terra effossa per eam demissiores & tutiores facti  
 etiam propius pluribus à partibus accesserant. tertio demum die  
 ad fossas & murum perducti multis uulneribus & illatis & acce-  
 ptis, scalisq; positis eum perforauerunt sic; ut in eo, qui erat la-  
 tissimus, tanquam concameratiunculam efficerent: atque in eam  
 tormentorum puluerem iniecerunt; cameramq; plenam pulue-  
 ris concluderunt, paruo relicto foramine, per quod ignis succen-  
 di posset: seq; à muro parumper retrahentibus, cum uisum est  
 igne immisso camera cum muri parte decemq; hominibus, qui in  
 eo erant, in sublime ita est dissecta; ut homines speciem uolan-  
 tium præberent. neque tamen reliqui propugnationem intermi-  
 serunt; fortissimeq; se defendebant: qui etiam ab Alfonsianis al-  
 tera ex Padi ripa duobusq; terreis propugnaculis tormentis mu-  
 ralibus non parum iuuabantur. uerum Hispani per plurimis ad-  
 ductis scalis, sesqui horæ spatio in arcem se intulerunt. Alfonsi  
 milites, qui erant circiter centum, interfecti omnes sunt cum eo  
 rum centurione Vestitello. Ex Hispanis item centum in ea oppu-  
 gnatione occubuerant. tertioq; ab ea re die anni finis fuit. neque  
 tamen diu ab Hispanis id castellum retentum est. Ianuario enim  
 mense fere medio Alfonsus eò cum tormentis se conferens, ma-  
 gnaq; ui aggressus arcem expugnauit: atque Hispanos, qui in ea



erant, CC. omnes interfecit. Scripserat magistris Decemuirum Aloisius Auogarius Brixianus è principibus ciuitatis, si exercitum patres Brixiam mitterent; se urbis portam noctu ei aperitum; per quam se uniuersus intrömitteret, urbemq; caperet libé-  
tissimis oppidanis prope omnibus; quibus iam magnopere pigaret arrogantia contumaciaq; Gallorum: quos perferre ulterius nequeant. ea res in Decemuirum collegio plures dies agitata; demum ab ipsis ad senatum est delata; ut de ea patres statuerent, accipiendane Aloisii oblatio esset, an reiicienda. pluribus igitur dictis sententiis in utranque partem, atque à Lauredano duce in primis; qui, ne ea tunc reciperetur, censebat; Senatus iussit, eam recipi è rep. esse Aloisiumq; magnopere laudari oportere, qui se tantam ré curaturum reip. obtulerit, dato iureiurando senatorib. singulis, ne quid eius rei quis efferret. itaq; patres Grittum legatū de eo certiorē fecerunt cum mandatis, uti Brixiam se quāprimum cum exercitu conferat, quam ad portam, quam ue ante horā ipsi cum Aloisio conuenerit: certosq; Gritto internuntios, quibus uteretur, dederunt. Gradonico legato saepe id à patribus postulanti domum reditio tandē est permissa. eiusq; loco paucos post dies Ioannes Viturius sublectus. Grittus acceptis à senatu literis, cum equitibus grauioris & leuioris armaturæ tribus millibus ex omni exercitu lectis, cumq; militibus, quot uisum est, in equitum dorso impositis, Brixiam noctu profectus oppidum ingredi non potuit detecta Aloisii oblatione; quam unius ex coniuratis uxor ad arcis præfectum amore eius plecta detulerat. Aloisius, ne à Gallis interciperetur, oppido egressus magnum hominum numerum in illos excitauit, qui non nullos regios ministros ex ipsorum municipiis, quibus præerant, in fugam se se dare coegerunt. patres ea spe deiecti, de pacis cum Maximiliano ineunda conditionibus Romæ apud Iulium constituendis, cum plures sententias in senatu dixissent; ea tandem placuit; ut indutiæ per Foscarum legatum peterentur, quoad pax conferi posset. Vanissa, de quo saepe dictum est, multæ uirtutis homo, cum Polizam Dalmatarum oppidum suam in patriam rediisset; seditione concitata interfectus est à suis ciuib. Gaspar autem Seuerinas, suis rebus suæq; dignitati omnibus à partibus atque adeo à principibus



principibus & regibus parum fidens, se Venetias contulit; ut in ea urbe degeret; cuius ciuitate & iure comitiorum pater eius una cum liberis posterisque donatus fuerat. eū Vicetini ciues aliquot, in urbe qui erant, suis opibus iuuerunt: amice enim atque moderate in ciuitatem, cum pro Maximiliano ibi esset, se gesserat. Auogarius ob detectam coniurationem non deterritus, multa ex proximis municipiis & finibus hominum millia iam excitauerat ad Gallos expellendos. qua re moti Amphiani, arcem natura & artificio communitam, ui atque astu occisis Gallis, qui in ea erant, in suam potestatem redegerunt; eamque se reip. seruaturus Aloisio significauerunt. Benaci lacus populi fere omnes expulsis Gallis se reip. dederunt. his auditionibus concitati reliqui in Callo- rum nomen magno ardore uoluntatum & arma capiebant, & se Aloisio permittebant. ea re senatui nuntiata, patres alteras ad Gritum literas dederunt, uti Aloisii & aliorum plena fidei & beniuolentiae incepta, quibus posset modis, aleret: atque ad urbis muros una cum illis exercitum adduceret: quo ipsius & illorum praesentia freti oppidani pulchrum aliquod facinus facere aggredierentur, portasque aperirent: tam pronos in rempub. Aloisii & eorum populorum animos non esse negligentia & desidia reprimendos. his allatis ad Gritum literis; tametsi interea animorum ille ardor eorum hominum, qui cum Aloisio erant, paulatim refrixisset: Galli enim praefecti ciues aliquot, quos fauere rebus Venetis existimabant, cum custodibus Mediolanum miserant: minusque multi iam essent, qui se paratos ostenderent ad omne subeundum discrimen, ut Brixia capi posset: tentandum tamen sibi & enitendum legatus existimauit, ut senatui satisfaceret; a quo etiam reprehendi se, ac timoris argui non obscure intelligebat. itaque Aloisio ad se uocato, constitutoque; quid quenque facere oporteret, quarto Nonas Februarias exercitum nocte ad oppidum duxit: tribusque a partibus copiis aequae distributis cum tormentis non magni ponderis (neque enim habebat grauiora) portas deiicere aggreditur. id cum plures horas omnes acies magno impetu fecissent: ea disiecta primum porta, ad quam se Aloisius contulerat, ipse quique cum eo erant milites, sub lucem se in oppidum iniecerunt. pauloque post legatus reliquique; altera aperta porta sub-



sequuti, magna lætitia & gratulatione ab oppidanis excepti sunt. Galli se in arcem, quæ summo in monte est, pluribus eorum interfectis, fugientes contulerunt: quibuscum eodem se recepit Alda ea, quæ Ioannis Francisci Gambaræ uxor fuerat, suis cum liberis, & Marcus Martinengius homo infensus reip. Eo tempore Anna Gallorum regis uxor puerum peperit; qui primis diebus est mortuus. Brixia statim capta, Gritus per literas à Senatu petiit; ut sibi tormenta magni ponderis mitti confestim imperaret: sine quibus expugnari arx non poterat: qua in arce erant equites Galli circiter ducenti; qui suos equos ob celeritatem fugæ in oppido prædæ hostium reliquerant; milites trecenti. Senatus ex eisdem Gritti literis duos legatos, alterum, qui Brixiam regeret, Antonium Iustinianum; alterum, qui in exercitu esset, Paulum Capellum creauit: legemq; sciuit, ut quinque militum millia undecunque conscriberentur, ad prioresq; adderentur; ut bellum confici facilius atque celerius posset. Dum hæc administrarentur, Roma literæ uenerunt; uelle Iulium, ut Senatus cum Maximiliano pacem faceret iis conditionibus; quas legato dari iusserat: quæ nisi pax suum finem quamprimum habeat; se cum reliquis contra remp. consensurum, aperte profiteri. eæ autem conditiones multo erant duriores, quam, quæ paulo antea proponebantur. non enim Veronam relinqui sibi Maximilianus tantum petebat, sed Vicetiam etiam tradi suis cum finibus. de Foro iulienfibus uero & Ciuidale & Feltria, ut Iulii iudicium esset, cui ea dari æquum esset, postulabat. tum ut suis populis, qui aliquid eo bello amisissent, ablata restituerentur, statuebat. demum, quas auri libras tercentenas pro Patauio & Tauriso reipub. concedendis ei esse dandas prope conuenerat eius rationis ac ponderis, ut nouem uncia libram conficerent; eæ ut singulæ duodecim uncia rum esse libræ intelligerentur; reliquis conditionibus addiderat. his igitur conditionibus uti pacem patres firment, Iulii & Ferdinandi legatis, atque Alberto Pio Maximiliani legato, qui & ipse literas de ea re acceperat, magnopere petentibus, responderunt patres, se de iis Senatum consulturos. tamen si Brixia recepta tam iniquas eum esse condiciones accepturum non credebant. neque Iulium ipsum, cum id intellexisset,

in



in sententia existimabant permanfurum . atque ii, antequam Senatum cogerent , à Gritto certiores facti sunt ; non omnes modo Brixia fines ad rempublicam rediisse ; sed Bergomates quoque Gallos ex oppido eiecisse , & uexilla reipub. erexisse ; oppidūq; arcem , quam milites CC L. tuebantur , deditone recepisse : missisq; ad eum internuntiis petiisse ; ut ad se mitteret , qui præesset : eum se uti de cælo missum excepturos ; atque ipsum ad illos Federicum Contarenum una cum Petro Longena misisse . Cremam quoque idem fuisse facturam ; nisi Galli milites bis mille Mediolano euocatos magna celeritate in oppidum introduxissent ; perpluresq; eius oppidi ciues obsidum nomine Mediolanū abduxissent . Galli Bergamo eiekti , se in arcem , quæ extra mœnia est summo in monte , receperunt . quibus intellectis rebus patres Senatu coacto Dominicum Contarenum legerunt ; qui statim Bergomum legatus accederet : Gaspariq; Seuerinati ; cui XX. auri libras annuas se in uictum daturos polliciti sunt ; ut se in castra conferret , mandauerunt . & quod pecunia eos defecerat , legem tulerunt , ut mutuo à patribus sumeretur . atque ita Laure dano Principe auri libras X. pollicente , aliisq; plurimis pro suis opibus quolibet , paucarum horarum spatio satis est publicis necessitatibus factum . etiam , propterea quod à Ioanne Medice Cardinali , quem Iulius legatum suis in castris ad Bononiam esse iusserat , admonebantur ; uti aliquem ex suis ciuibz legatū ad Cardonam Proregem Neapolitanorum , in eisdem castris qui erat , mitterent ; ut , quæ opus esset , diligentius inter eos tractarentur : Marinus Georgius est ab illis ad id muneris lectus : qui legatione suscepta paucos post dies uia se dedit . Interim præfectus Mediolanensium Fois , magni & præstantis animi adolescens , Mediolano cum equitibus Gallici generis septingentis , militibus quinis millibus incredibili celeritate niuosis lutosissimisq; itineribus Bononiam profectus ita se tacite in oppidū intulit ; ut Hispanos , qui ad fossas castris & tormentis positis stationes habebant , erātq; singulis prope horis in oppidum , quod muro ea parte nudauerant , irrupturi ; eius aduentus unum diem plane latuerit . quo die , ut requiem exercitui daret , mouere se non potuit . postridie eius diei præfecti Iuliani casu ab agricola , qui Gallos in uia uiderat ,



de eo certiores facti obsidione soluta tormentisq; abductis abierunt, seq; in tutum contulerunt. Iulius permoleste ferens recipiendæ Bononiæ partem iam prope à se uictoriam Gallos interpellauisse, oppidumq; tam illustre sibi ab illis tanquam è manu atque sinu ereptum inconsolabiliter dolens, homo natura sua in iram atque ardorem animi pronus maxime; ubi de recepta ab exercitu Veneto Brixia nuntium accepit; incredibilem uoluptatem cepit: uocatoq; confestim ad se, ut erat intempesta nox, legato reip. gratulatus ei est amantissime, ut præ gaudio lachrimas non contineret: horasq; illum prope duas in lectulo iacens lætus hilarisq; secum tenuit. cuius quidem uoluptatis signa publice postea dedit accensis in Vaticano atque in Adriani arce luminibus cum tormentorum strepitu binis iis noctibus, quæ sunt cū nuntium subsequutæ. Auxilio Bononiensibus allato, Foius ad Brixiam recuperandam se conuertit eo celerius; quod pontem Pado flumine traiciendo, quem ad Stellatam castellum in Alfonso finibus magna diligentia fieri iusserat, esse factum, atque in nauibus impositum cognouit. itaque eadem celeritate, qua uenerat, rediens, eo ponte Pado transmissio, in Veronensium finibus ad Villam Francam reip. copias, quæ cum Balione erant, fudit Guido Rangonio cum pluribus capto: & recta Brixiam contendens, oppidumq; circumuectus, copiis eorum finium, quæ in monte arci uicino uenientibus se opposuerant, reiectis in arcem ab inclusis magna gratulatione est receptus. Gritus; qui sæpe id ipsum ueritus per literas à patribus tormenta grauiora diligentissime petierat; ut, antequam auxilia conuenirent, capere arcem posset: ubi Foium esse in illa cognouit; spe retinendi oppidi suū apud animum plane deposita, plurimum questus, quod, quæ ad rei bellicæ usum petierat, in tempore allata non fuissent, curam tamen, & laborem atque audaciam defendendi non remisit. itaque existimans postero die Foium in oppidum descensurū: ne quis in fuga spem ullam poneret, occludi portas oppidi imperauit, dispositis militibus, qui eas nemini aperiri permitterent. tum milites Fauentinos, quibus plurimum confidebat, circiter quingentos, cæterarumq; nationum alios item quingentos ad priorem arcis portam, qua est in urbem exitus, constituit: ut in uenientes impetum



petum facerent, exitumq; prohiberent. equites uero grauis armaturæ ad hostes excipiendos, si in oppidum irrumperent; leuioris Epirotasq; maxime, ut ubi oporteret præliarentur, disposuit; præfectum eorum Federicum Contarenum, qui eo ipso die cū equitibus tercentis Bergomo redierat, cohortatus; ut in libera maxime omnium ciuitate se esse natum meminisset; libertatemq; patriam, quam Galli sibi esse obterendam proposuerant, quātum posset tueretur, reliquisq; item & præfectis & tribunis ac centurionibus, quid cuique defendendum esset, separatim mandauit. Vix ea Gritus constituerat; cum mane Fois ex equitibus quos habebat probatiores equis detractis acie quingētorum confecta, eos tota armatos corpora, galeisq; obsignatis, semilanceas in manibus longi lati q; ferri habentes aperta porta priores emisit. quibus Fauentini, ut eis erat imperatum, magna se uirtute opposuerunt: maioreq; eorum parte interfecta reliquos repulerunt. in hos milites bis mille Vascones subsequuti impressionem fecerunt, interfectisq; non sine ipsorum cæde quamplurimis in oppidū proruperunt. pugnatum est acriter reliquis à reip. militibus, ab equitibus & præfectis horas aliquot ita; ut de uiarum spatiis paulum hostibus cederent. uerum aperta ui ab Epirotis equitibus oppidi porta, per plurimisq; eorum diffugientibus; ubi id. ab hostium equitibus; qui in arcem propter loci angustiam recepti non fuerant, atque armati non longe aderant; est animaduersum: ipsi in oppidum irruerunt, magnoq; suis auxilio fuerunt. itaque urgente hostium multitudine undique cædes est ingens in omnes facta. Contarenius ipse prælians interficitur cum præfectis Epirotis duobus Frassina & Basta: Gritus & Antonius Iustinianus, qui paucos ante dies Brixiam legatus uenerat, & præfecti Itali plurimi captiui facti. prælium à secunda diei hora usque ad uesperam protractū. urbs magna ex parte direpta. matres familias & puellæ suis in domibus ante parentum & maritorum ora, quos in uinacula hostes coniecerant, passim uiolata. uirgines sacræ è templis atque aris & Deorum imaginibus, quas amplexabantur, abstractæ, ad libidinemq; abductæ. atque ea quidem scelera Germani milites maxime omnium patrabant. Vascones minus impii: Galli tolerabiliores fuerunt. Aloisio Auogario, quem op-



pido exeuntem hostes ceperant, biduo post medio in foro ceruices sunt abscissæ. eius rei nuntio patres accepto magnopere commoti sunt, quod iam nihil prospere ab ipsis tentari, agiue posse uideretur: plurimumque conquerebantur, quod in perducendis tormentis ad legatum Gritum minus diligenter actum esset; eam unam ob causam omnes omnium labores magno cum reipublice detrimento irritos, & opulentum, ac præclarum oppidum hostibus prædæ, ac direptioni traditum. Idem patres ad copias redintegrandas, quibus modis poterant, animum intenderunt: additumque ad reliqua Senatus consulta, uti in Creta insula militum bina millia, qui sagittis uti scirent, conscriberentur, Venetiasque celeriter mitterentur: nauesque longæ maiores ad equites Epirotas quamplurimos ad urbem conuehendos pararentur. etiam libræ auri ducentæ, quas pro regi Neapolitano, & Hispanis ducibus dari conuenerat, Rauennam illis sunt diebus missæ, & quibus oportebat, datæ. milites interea equitesque; qui Brixie non fuerant, uel oppido effugerant; se Vicetiam contulerunt: eodemque, qui ab hostibus se redemerant, spoliati atque inermes se se passim referebant. Gritus & Iustinianus Mediolanum sunt ad ducti. Dominico Busichio equitum Epirotarum præfecto, qui Brixia effugerat, uti domum redire posset, permissum: mediaque stipendiorum, quæ à reipublica merebat, pars tribus eius filiabus post mortem patris condonata: quatuorque Epirotis equitibus; in Gallico exercitu qui erant, curamque adhibuerant ne Busichius à Gallicis captiuus fieret; pensio annua singulis, quoad uiuerent, impetrata. duobusque Frassinæ Epirotarum item equitum præfecti liberis pensio ipsius tradita. idem in tres Bastæ fratres seruatum. paucosque post dies Federici Contareni sorori dotis nomine auri libræ quindecim à reipublica pecunia constitutæ. ciuibus autem Brixianis aliquot; qui amissis suis rebus omnibus ad urbem uenerant, Iacolinoque Tropiano eiusque filio à patribus pecunia in uictum subministrata. is Iacominus suæ uallis homines egregio studio atque animo ad reipublice tuendam euocabat. Ludouico etiam Cocaio, qui ut Benaci lacus oppida se reipublice dederent, studium & laborem contulerat; pensio annua liberaliter instituta; eiusque filio magistratus reipublice, ex iis, qui à præfectis ciuitatum eliguntur, quem is uellet,



let, dono datus. Petro quoque Finio Bergomati; qui ad Aloisium Auogarium saepe uentitauerat, interpretesq; apud illum de Brixia reip. restituenda fidus atque diligens fuerat; octo scribarum tempora apud totidem Castrum Franchi magistratus paulo post à patribus assignata. curatores interea duo ad munitiones perficiendas atque amplificandas Aloisius Barbarus Patauium, Bartholomeus Mustius Taurisum cum stipendio missi. maioribusq; comitiis lex est perlata; uti bini Patauii praefecti, qui creandi erant, annui, & prerogatiuis primum senatorum suffragiis, deinde comitialibus legerentur: estq; Aloisius Emus secundae dignitatis magistratus ea lege lectus. Legatis post hæc Heluetiorum duodecim ad urbem uenientibus, ut cum Iulio & Ferdinando & patribus ad bellum contra Gallos se coniungerent, ciues è nobilitate, qui eos exciperent, obuiam missi. ipsi liberali reipu. hospitio accepti, & uictus datus. Iulius Brixiam à Gallis recuperatam intelligens; uti patres cum Maximiliano fœdus facerent, non modo consulendo & suadendo; sed minis etiam atque obnuntiationibus contendeat. Tabellarius interim reip. qui apud Gallos erat in custodia, liberatū restitutus Mediolano ad patres uenit afferens Iacobum sibi Triultium Gritto adhibito mandauisse, patribus diceret, si uellent, se cum rege curaturum, uti fœdus cum repub. faceret, ea conditione, ut Verona reliquaq; intra Atesim flumen oppida reip. cederent, ea erat conditio conscripta in quadam pagina ex Gallia, ut uidebatur, ab rege ad Triultium missa: ineratq; in ea caput etiam eiusmodi; regem præter ea redditurum patribus Flaminiae atque Apuliae oppida, quæ reip. fuissent: ipsum enim, si unos Venetos coniunctos secum habeat, Iulium & reges reliquos non magni aestimaturum, aut omnino reueriturum. uerum linea super inducta illud ipsum oblitterauerat caput, ita tamen, ut legi facile posset. patres Senatu uocato eam rem per literas legato Foscaro significauerunt, atque, uti uni Iulio notam faceret, mandauerunt: de fœdere autem cum Maximiliano ineundo, quod ad Vicetiam pertineret, uelle patres Iulii iudicio se se permittere: in reliquis capitibus ita fieret, uti Iulius & Maximilianus uoluissent. altero autem Senatusconsulto Vicetiam Maximiliano dari patres censuerunt cum ea pecunia, qua de conuenerat, non ta-

Dd



men antea, quàm Maximilianus bellum Aloisio intulisset. postremo, propterea quòd in fœdere tractando magna rerum difficultas proponebatur; omnibus placuit, uti spatium à bello uacuum intercederet, quo in tempore pax còmodius confici atque ad exitum perduci posset. itaque octauo Id Apr. inter Maximilianum Venetosq; decem mensium concelebratæ indutiæ sunt Romæ ab utrorumque legatis, Iulio eis suam auctoritatem adhibente, qui scribentibus affuit, ea conditione interposita, uti à patribus quadringentæ auri libræ Maximiliano duabus pensionibus soluendæ curarentur. quas quidem postea indutias adiectis ad eam pecuniam centum auri libris, ut essent omnes quingentæ; Maximilianus confirmavit. Posthæc Marcus Cardinalis Sedunus ad urbem Roma rediens à Lauredano Principe & patribus in Bucentauro naui usque ad Clementis fanum, quod in uadis est, obuiam euntibus est exceptus. cum eo & patribus colloquuti Heluetiorum legati duodecim non semel cum fuissent; constituto quantū pecuniæ in stipendium esset Heluetiis à rep. persoluumdum, eadem scilicet portione librarum auri octoginta, ad quam reliqui singuli tenerentur, ternis auri libris ad iter à rep. donati domum reuerterunt. neque multo post Iulii & Ferdinandi regis Hispaniæ & Aloisii Galliæ regis exercitus propinquiore facti, cum se dies aliquot munitis castris tenuissent; Galli ad Rauennam oppugnandam se contulerunt. erat in ea Marcus Antonius Columna Iulii nomine cum militibus mille quingentis, equitibus trecentis; seq; forti ac præstanti animo defendebat, & cladem hostibus ex muro inferebat. Neapolitanus autem prorex oppido ueritus, ut Gallos ex eo auerteret, non longe ab eorum copiis suas copias adduxit. Galli relicta oppugnatione se ad pugnam celeriter comparauerunt. itaque eo ipso die mane, qui fuit dies percelebris ad diem tertium Iduum Aprilium uterque exercitus animo æque magno ac parato ad dimicandum inter se conflixerunt, pugnatum est horis plus sex incredibili uirtute. qua in pugna militum & equitum millia supra decem & octo interfecta sunt, pari fere utrorumque numero, fortuna dispari. Iulii enim & Hispanorum copię fusæ fûgatæq; : Galli locum tenuerunt. captiui ab Gallis facti Fabritius Columna, eiusq; Gener Alfonso Aualus Aterni dominus, Petrus



trus Nauarrus Cantaber, & Ioannes Medices Cardinalis Iulii legatus, aliiq; clari uiri non pauci; & signa complura ablata, & tormenta capta. eo in certamine Alfonsi Ferrariensium ducis, cum tormentis exercendis, tum acie sua è transuerso in hostem ducenda, uirtus egregia, & uictoriæ magna ex parte conficiens fuit. dux Gallorum Foius cum se in militum Hispanorum globum, qui supererat, audacissime intulisset; cæsus ab illis unâ cum pluribus clari nominis ducibus eum suo exercitui diem lugubrē magis, quàm lætum aut ulla gratulatione celebrari dignum reddidit. postero die Galli; conditione adhibita, ut Columnæ suis cum copiis Rauenna exeundi potestas fieret, neque oppidanis noceretur; oppido potiti sunt: quod quidem intromissi conditione non seruata fœde crudeliterq; diripuerunt: arcem autem oppidi capere non potuerunt, iis, qui in ea erant, fidem Iulio uelle se præstare dictitantibus. Patres; qui eo tempore per Vicentium Naldium in Flaminia milites mille sua pecunia confecerant; ut ea cum manu Iulii oppida, quantum posset, tueretur, ei mandauerunt. is Fauentiam propter cladem Hispanorum nutantem se contulit; atque oppidum opportuno præsidio communiuit. Prorex ipse, qui Anconæ post fugam primum constitit, suas ut copias ad signa reuocaret, omnem curam & diligentiam adhibuit. certior enim factus maiorem ex suis, & potiozem multo partem in prælio Gallos amisisse; in spem uenerat, adhibitis Heluetiis posse illos Italia expelli; si uniuerfi celeriter munus obierint, & uirtutem gnauius exercuerint suam. quod ubi patres intellexerunt; eum solari & erigere, omniaq; auxilia ei polliceri non dubitauerunt. Ioannem Antonium Dandulum etiam à Senatu lectum cum auri libris CXX. ex superiore stipendio reliquis, quas tamen ipse in fugam uersus iure belli amiserat, ad illum miserunt iuuandi & excitandi hominis causa. quam quidem rem legatus apud Venetos Ferdinandi imitatus se ad illum cum pecunia contulit. Cimbæ interim duæ in naualibus confectæ atque instructæ, quæ propter uelocitatem irundines appellabantur, in Rauennæ portu nauiculam Alfonsi longam remigum quadraginta captam à se interfectis ex illis plerisque, nauesq; duas mercibus & occisorum in pugna spoliis onustas item unâ

Dd ii



captas ad fori marginem Alfonsi signa per aquam trahentes duxerunt. Iulius ut regem Galliae deliniret, eiusque cogitationes & incepta, si qua contra se agitarer, ea spe sisteret; Senatu Cardinalem uocato proposuit, uelle se foedus cum illo facere: capitaque foederis; in quibus inerat, ut ei rex Bononiam restitueret; quaque in Flaminia ad Padum flumen oppida pertinerent, ipsi cederent: in reliquis se se regi satis liberaliter permittebat: per eos, qui rebus Gallicis Cardinales fauebant, conscripta & obsignata ad illum misit. pauloque post uocatis ad se legatis Ferdinandi & reipublicae dixit; ne propter ea quae fecisset pertubarentur; ne uel se priore contra Gallos uoluntate ulla ex parte mutatum crederent: inuitum enim ad id descendisse fallendi & consopendi regis causa. quibus intellectis rebus patres sciuerunt, Iulio scribi oportere; si cum Aloisio foedus facere statuerit; se non recusare; dum in eo rempublicae includat, sociamque foederis efficiat. Gvidum Rangonium post haec, qui Gallorum custodia se redemerat, ad urbem uenientem patres amanter exceperunt; & praefectum equitum grauis armaturae fecerunt. eiusque fratri Ioanni Francisco, qui cum eo uenerat, equitum leuiorum praefectura item tradita. Romae ad diem tertium Nonarum Maii concilium celebrari coeptum est ab Iulio in templo Lateranensi magna sacerdotum frequentia: precesque Deo opt. Max. ut uota hominum rite nuncuparentur, factae. Marco Cardinali Seduno, Venetiis qui erat, ad suos abeunti argentum in mensam dono a patribus datum. cum Enrico autem rege Britanniae foedus a sociis atque a reipublica initum XV. Calend. Iunias in urbe celebratum est. concupiuit enim rex petiitque se in eo recipi. Illis diebus Iulius Vitellius Tifernatium Episcopus; qui conditionibus acceptis Rauennae arcem Gallis obsidentibus tradiderat; eo cum copiis ad expugnandam illam rediens traditis conditionibus recepit. oppidani cladis suae contra ius contra fas acceptae memores, quatuor Gallorum praefectos, in arce qui fuerant, fide non seruata uiuos sepelierunt ceruicibus supra terram extantibus. Iulii & Ferdinandi legati, itemque duo ciuitatis magistratus, Leonardus Mocenicus, Nicolaus Bernardus Heluetiis se ad bellum contra Gallos comparantibus ex urbe profecti cum auri libris CXX. ad illos se contulerunt cohortandi



hortandi & iuuandi eos causa, ii se Veronam Maximiliani præfectis libentissimis intulerant. Antonius Saornianus; qui Vtini, uti supra dictum est, cæde ciuium secum dissidentium ingenti facta rempub. cuius erat è nobilitate ciuis, deseruerat, atque ad hostes profugerat, omniaq; ingrati & malefici hominis studia contra illam exercuerat; ab inimicis suis in Maximiliani finibus trucidatus, dignam tot sceleribus mortem obiit. Ferdinandus clade suarum copiarum, quæ cum Gallis apud Rauennam depugnauerant, intellecta, literas ad Iulium dedit; ne propter eam rem animo perturbaretur: suum exercitum bene plenum ad Pyreneos in Galliam quamprimum irrupturum unà cum Britannico exercitu; qui modo expectabatur: mittere autem se in Italiam Consuluum Ferdinandum suarum copiarum ducem: eumq; esse quinto Idus Maias profecturum: uenturum etiam se se ipsum, si oporteat, non obscure confirmabat. Iulius ea spe fretus de Cardinalium sententia binas literas scribi iussit: quarum alteris Cardinali Medici eius legato, qui à Gallis in custodia seruabatur, permittebat; uti omnes homines, qui ab eo delictorum suorum ueniam peterent, etiam si hostes Ro. reipub. fuissent; expiare posset; dum ii parere Pontifici Maximo suum in animum induxissent. alteris à Rege Galliarum petebat, ut eundem legatum liberum sui; iuris uel let esse, id ni faceret; eum se igni & aqua interdicturum, regniq; dignitate mulctaturum, minabatur. Antonius Sorianus legatus ad Regem Pannoniarum à Senatu lectus illis diebus uiæ se dedit. Patrum iussu in omnibus sacerdotum & sacrarum uirginum collegiis preces factæ sunt pro repub. nostro & Heluetiorum exercitu contra Gallos in Veronæ finibus se coniungente: qui quidem Heluetii circiter decem & octo millia militum numerum conficiebant. Veneti Valegium & Pischeriam primis aggressibus cum cepissent; Benaci lacus oppida omnia sponte ad rempub. redierunt. Cremonenses exercitibus eò tendentibus sibi ueriti quadringentis auri libris Cardinali Seduno pollicitis conditione adhibita ne oppidum ingrederentur, se ei dediderunt. eius interpretes rei Iulii legatus, itemq; Venetorum scriba, equitum & militum qui Collateralis appellatur, fuerunt: quos oppidani ad colloquium intromiserant. Carauagium subinde atque Soncinium



Cardinali se Seduno tradiderunt . is eis & Cremonæ suos milites præposuit , atque id quidem arroganter & barbare ; cum Venetis tradere debuisset . Iulius enim pollicitus fuerat primis in sermonibus ea de re habitis , idq; suis ad Senatum scriptis literis confirmauerat ; ut , quicquid eo bello caperetur , quod quidem reipub. fuisset , reipub. ministris traderetur . reliqua earum regionum oppida , quæ ad Abduam flumen sunt , se se reipub. dederunt . itemq; Bergomates suis cum finibus . Bentiuoli , Bononiæ qui erant , exercitum Iulii , qui eò properabat , metuentes , oppidanis se se dedere uolentibus , Ferrariam profecti sunt cum suarum partium ciuibus non paucis . atque illi paulo post Iulii se interpretibus tradiderunt . Albertus Pius interea Maximilianus legatus Romam profectus est . Ioannes item Baduarius ad Ferdinandum regem reipub. legatus uix se dedit . appropinquante ad Italiam Matheo Episcopo Curcensi magnæ apud Maximilianum auctoritatis uiro , uti Romam se conferret ; patres Petrum Landum legatum ad illum miserunt honoris illius & societatis ex itinere causa . post hæc Ticinenses repulsis ter hostibus eorumq; tormentis potiti , itemq; Mediolanenses se se Iulio & fœderatis permiserunt ; cum hi libris auri sexcentis , illi quadringentis sui oppidi direptionem redemissent . quod quidem factum Laudis Pompeiæ ciues imitati tercentenas , Parmenses atque Placentini ducentenas polliciti Heluetiorum auaritiam subterfugere non dubitauerunt . Comum etiam post hos interfectis iis , qui suis in finibus erant , Gallis idem fecerunt : itemq; Tortonenfes & Alexandrini . omnibus autem iis in rebus malus in rempublicam Seduni animus fuit : qui ut Venetis legatis & exercitui timorem incuteret , ne petere , quæ eis debebantur , auderent ; omnibus in Cremonæ Cremæq; & Laudis Pompeiæ finibus , aut comburi aut retineri naues uniuersas imperauit : ne esset , unde illi pontes facere , atque in tuta reuerti possent . qua quidem ille re maximam sibi omnibus ab hominibus inuidiam excitauit . Dum hæc agitentur ; Ioannes Medices Cardinalis amici hominis Blasii Criuelli opera , Mediolano fugiens Mantuam se conuulit : interpresq; ab adolescente rege Thracio Sultano Selino literas ad patres attulit : quibus ille literis Senatum certiores faciebat ,



bat, patrem suum sponte sibi regnum tradidisse : itaque uelle se cum repub. eam, in qua deū pater suus fuerat, beniuolentiam & necessitudinem exercere. quæ quidem tamen res aliter se habebat, atque ille scripserat. ui enim atque armis patrem coegerat, ut se regem institueret. Ianes Fregosius Iulii rogatu reiꝑ; pub. permissu in Ligures profectus, atque à Genuensibus eorum oppido præpositus literas ea de re ad Iulium dedit: quibus ille magnopere gauisus, lætitiæ suæ urbanis ignibus & tormentorum strepitu protulit; idemꝑ; uti Veneti facerent; triremesꝑ; ipsorum tres, quæ erant in Apulia, Genuam celeriter mitterent ad arces eius oppidi duas, quæ à Gallis tenebantur, facilius expugnandas, à legato Foscaro petiit: quod quidem ei patres libenter concesserunt: Ianisꝑ; filio Alexandro puero equitum grauis armaturæ quinquaginta turmam per Vicarium regendam dederunt. Idem Iulius triremes item septem Regis Ferdinandi, quæ in portu Neapolitano erant, ad eandem rem conficiendam ab eius legato Hieronymo Vicco petierat. quibus omnibus necdum Genuam appulsis altera ex arcibus tormentis positis deditiōem fecit. Galli petente Maximiliano, ut ei Lemniacum traderent; quod quidem nullo iure possidebant, erat enim in Veronæ finibus, satis ei facere uoluerunt; atque ministris eius tradito Mantuanum se in agrum receperunt. Alfonsus Ferrariensium dux Romam profectus, cum ab Iulio Cardinalibus publice adhibitis petiisset, ut sibi, cui aqua & igni interdictum ab eo fuerat, propterea quod in bello contra illum cum Gallis fuisset, suppliciter postulanti, & commissæ confitenti, ignosceret; ab eo absolutus, atque ad pedis osculum est admissus. is cum intellexisset, Iulium post hæc tacite curam adhibuisse, ut se caperet: Fabritii Columnæ; qui in clade ad Rauennam se captiuum eius fecerat, cumꝑ; ipso Romam uenerat; tum ope tum consilio aufugiens in eius se fines contulit. deinde in Apuliam contendens; quod itinera terrestria intercludi sibi ab Iulio facile posse sciebat; mare Adriaticum ad Illyricum traiecit: ut eo inde iterum traiecto, per Padi fluminis ostia domum reuerteretur. In urbe autem Decemuii scēminam meretricem; quæ in Deos maledicta coniecerat, & se fuga subriperat; exulem ea conditione fecerunt;



ut, si ullo in imperii loco caperetur, ceruices ei abscinderentur; ipsa igni combureretur. Fossâq; Clodiæ ciuis, qui tres suas filias uirgines uitauerat, à prætorè concrematus dignam commissi pœnam persoluit. Iulius Heluetios rebus bene gestis in Cardinalium collegio Romanæ reipub. defensores appellauit: atque uti eo nomine omnibus ab hominibus appellarentur, censuit. Galli eo tempore Brixia emissi equites quatercentum, milites mille; ut è uicinis oppido locis prædas abigerent, atque in oppidum importarent; cum agricolas plerosq; unâ cum mulieribus atque infantibus interfecissent; tumultu hominum à tergo excitato, copiisq; Venetis se in reditu opponentibus, capti & interfecti magna ex parte, ac præda quam fecerant amissa, reliqui se in oppidum fugientes uix ægreq; intulerunt. Laurentio Cereano, qui ad patres se contulerat suarum rerum causa, auctus equitum & stipendiorum numerus. Auctus item Vitellio & eius fratri: pensionesq; annuæ Ioanni Brandolino, & Marco Castellatio, & Saccardo Sonzino pro cuiusq; rebus bene gestis à Senatu traditæ. Lex est etiam perlata; ut ex Lepontis milites bis mille celeriter conscriberentur, reliquisq; adderentur: ut essent omnes numero ad decem millia. iusserant enim patres ut reipubli. legati ad Brixiam recuperandam accederent, certiores à nonnullis eius urbis ciuib. facti, non posse se ulterius Gallorum imperium perpeti: se se reipub. si exercitum eò miserit, oppidum sine mora tradituros. quamobrem ut pleniore cum exercitu proficiscerentur; militum numerum esse augendum statuerunt. Iulius etiam, sua se inexplebili nouarum dominationum cupiditate ad omnia difficilia impellente, propterea quòd Alfonsus ab erat, posse se Ferrariam capere eo puncto temporis confidebat. itaque scriptis ad ducem Metaurensium literis, ut se cum exercitu celeriter eò conferret; à Senatu petiit, quibus posset nauibus in Padum flumen immisis sua consilia iuuaret. id à patribus cum esset diligenter procuratum; Alfonsiq; copiar, quæ in oppido erant, de eo certiores factæ se ad defensionem comparauissent, & Pado traiecto etiâ Rhodigium de improviso cepissent; conatus omnes Iulii ad nihilum redierunt. legati autem reipub. cum se ad Brixiam contulissent, tormentaq; ad muros uerberandos



dos aptauissent ; Gallis , qui noua iam auxilia intromiserant , se acerrime defendentibus nihilo minus irritus eorum apparatus futurus uidebatur . Interim Cardinale Medice libertati restituto Proregi Neapolitano itemq; Iulio cupiditas est iniecta Florentinae reipub. statum ordinesq; commutandi . ut ut enim se tunc ea ciuitas regebat ; omnibus in bellis Gallorum partium studiosissima semper fuerat . id autem nullare alia melius se consequuturos existimabant ; quàm , si Medicum familiam ab exilio restituerent . itaque eam rem tentare omnibus suis copiis , Cardinale accersito , & Bernardo Bibiena Cardinalis familiari Iulii missu singula tractante , statuerunt . tribusq; itineribus susceptis , ut comiectus facilius suppeterent , per Appennini iuga magna rerum omnium difficultate ad Pratum oppidum ; quod est in plano , abestq; Florentia millia passuum decem ; Prorex & Iulii ministri accesserunt . quod quidem plane oppidum tametsi esset & militum numero , & tormentis apprime communitum ; se se tamen defendere non potuit . itaque captum & direptum est diues sane municipium , & rebus omnibus etiam ad commodiorem & delictiore uictum opportunis plenum . Florentia ciuitas ea re perterrita duce suum Petrum Soderinum inimicum Medicibus hominem , à reipub. administratione remouit ex octo , qui urbem unà cum illo regebant , sex cum condemnantibus ; domumq; amici eius cuius Pauli Victorii ægre propter motum plebis deduxit . parum enim abfuit ; quin ab aduersariis eius factionis hominibus interficeretur . missisq; ad Ioannem Cardinalem & Iulianum eius fratrem internuntiis , ut urbem ingrederentur non permisit modo , sed etiam concupiuit . itaque magna totius ciuitatis frequentia & gratulatione Calendis Septembribus urbem ingressi , domus sue recepti sunt . Interim Iulius Cardinalibus adhibitis aqua & igni Regi Gallia interdixit , datis ea dere literis , nisi se à Pisano concilio abdicarit . Tum Benedicto Cribello , eiusdem Regis in Crema oppido Tribuno militum , ab iis , qui reipub. fauebant , delinito , muneribusq; plurimis unà cum ciuitate oblati oppidum Veneti receperunt : Cribellumq; è nobilitate ciuem creauerunt , & domum Patavinam fundumq; peramplum cum uilla egregia ei dono dederunt ; & Tribunum militum fecerunt . Op-

E c



pidi autem præfectum Nicolaum Pisaurum renuntiauerunt, & Cremam miserunt: isq; ibi paucos post menses est mortuus. Iulio autem postulante Senatus censuit; ut & classis, & tormentorum opportunus numerus, & numi militibus duobus millibus in Flaminia conscribendis ad Ferrariense bellum, quò ipse uellet, mitterentur. eaq; paulo post Rauennam, quò se Franciscus Maria Iulii copiarum imperator contulerat, sunt missa. qui quidem Iulius Prospero Columnæ, ut se in Galliam Cisalpinam traiceret, cumq; Hispano exercitu coniungeret, id magnopere cupienti, ad Gallos ex Italia expellendos, potestatem fecit. Et Franciscus Donatus, uti Florentiæ legatum reipub. ageret, à Senatu lectus. Patauinorum & Taurisanorum rebellium uxoribus & filiabus numi, quibus se se alerent, à Decemuirum collegio dono dati. Eodem fere tempore Galliæ Regis exercitus ab Hispaniæ Regis exercitu in Aquitania male habitus magnum suorum numerum desiderauit. Miserat Memphim ante eos dies Senatus Dominicum Triuisanum templi Marcii procuratorem ad Laferaphum Regem Aegyptiorum rebus, quæ ad mercaturam exercendam pertinebant, procurandis legatum: quæ omnino res maiorem in modum Regionum magistratuum & ministrorū iniuria lapsæ ingentem iacturam Venetis ciuibus; qui eò proficiscebantur, ibiq; morabantur; inferebant. Rex cum audisset tantum ad se hominem Senatus Veneti missu uenire: illustri suorū obuiam itione & omni honorum genere illum excepit in hortorum suorum electissimorum porticu amplissima: cuius ad singulas columnas appensæ Luscinia cantus exercebant suos; & aquæ fontium non unis à partibus decurrentes propè auiculis non illepide concinebant. itaque & loci amœnitate ac specie, & Regis oratione perliberali eo hilariter facto legationis suæ initio, plures ibi dies Triuisanus commoratus, renouato ex reipub. dignitate antiquiore foedere, datis & acceptis muneribus, cum Regis ad Senatum honorificentissime scriptis literis eius rei testibus domum rediit. Antonius etiam Iustinianus captus ab hostibus in Brixia prætura, atque in Galliam perductus, datis pecuniis, quas poposcerāt, iisdem fere diebus suos se ad lares recepit; cum prius cum Senatus in Quinquuirum collegium, qui belli res eo in or  
dine



dine procurant, cooptauisset. Annus interim finem suum habuit. insequente autem inito, Neapolis Prorex Medicibus in Florentiæ dominationem restitutis, & Prati oppidi direptione, & plurimis auri libris dono acceptis communior factus; cum intelligeret Venetorum exercitum in Brixia recuperanda magnopere laborare, nec tamen satis proficere, Gallis, qui in ea erant, se se acriter defendentibus; ut ea quoque à parte, si quid posset, lucraretur homo alieni appetentissimus; in agrum Brixianum suas copias adduxit: ibiq; modo pollicendo nihil se reipub. nociturum; modo fallendo, legatisq; Venetis suos interpretes mittendo; qui monerent, ut cum Maximiliano pacem facerent potius, quam, quæ illius essent, ei præripere contenderent; se in urbem intulit: & oppidum antea direptum, & omni exutum dignitate, radicitus depopulatus, si quid erat reliqui, abstulit: atque, ut Galli domum reuenterentur, secumq; prædam, quam ingentem capto oppido fecerant, asportarent; potestatem eis fecit. Veneti capiendi oppidi spe deposita, tormenta, quibus muros urbis uerberabant, abstulerunt. Et iam Ioannes Medices Cardinalis & Iulianus eius frater de successu rerum suarum literas ad Senatum dederant; seq; & fortunas suas omnes reipub. obtulerant. itaque resp. quæ amico semper animo in illos fuerat; in ciuitatem & nobilitatem eos & Laurentium eorum fratris filium more maiorum intulit, missis ad eos Florentiam de ea re literis. pauloq; post & Prosper Columna suæ factionis princeps cum equitatu & peditatu ad Proregem se se contulit: & Senatus ciues quatuor; qui Cremae portas, quoad opus esset, custodirent; deinde municipiis quatuor in uicinis Cremae locis, quæ ad rempublicam redierant, eius nomine præessent; creauit. Tum arcem Bergomatium extra urbem summo in monte positam, quam Capellam appellabant, eius præfectus homo Gallus reipub. internuntiis tradidit. Senatus cum intellexisset numos, qui in bella insumebantur, non omnino recte administrari; ciues duos magnæ auctoritatis uiros, Hieronymum Quirinum, Petrum Capellum, qui eis præessent, creauit. deinde Petrum Pascalicum, qui legatum Genuæ ageret, renuntiavit. erat autem eo in oppido dux & princeps recentior ciuitatis Ianes Fregosius amantissimus reipublicæ

Ec ii



Post hæc Matheus Curcensium Episcopus Maximiliani interpres Romam uenit : atque à Iulio suam in domum in Vaticano est exceptus . pauloq; post Maximiliani Hispaniæq; Regis & reipub. legatis adhibitis eiusmodi se fœdus uelle Iulius facere pronuntiavit : ut Verona Vicetiaq; Maximiliano cedrent . Pro Patauio autem & Tauriso , quæ iam Veneti obtinebant ; ut ea oppida retinere iure possent ; tercentas auri libras tributum nomine Maximiliano quotannis penderent : semel autem pro totius rei ac tabularum confectiōe bis mille & quingentas . De iis uero , quæ in Carnis essent , oppidis Iulii iudicium esset , rei ne publicæ an Maximiliano tradenda iure essent . Reliquo fœdere Maximilianus & Hispaniæ rex abolere Pisanum concilium ; omnemq; suam auctoritatem atque opes Iulio tradere ad Ferrariam capiendam tenebantur . quæ duæ quidem causæ Iulii animum uehementer exagitabant . nam & concilii contra se initi mirum in modum timore commouebatur : & cupiditate , ut Ferrariam in potestatem suam redigeret , nihil culpæ , nihil sceleris , nihil flagitii prætermittebat . itaque Venetos ; qui in illum tot officia contulerant ; tantum pecuniæ , ut ad omnes eius nutus præsto essent , animis libentissimis impenderant ; nulla fide nulla pietate fultus non deseruerat modo eo conficiendo fœdere ; sed plane etiam in prædam hostium , sanguinem & omnem succum reipub. suggere cupientium , proiciebat . quamobrem reipub. legati ad Iulium conuersi ; non esse hoc illud , quod ab eo expectabatur ; conquesti sunt : male , quod iniuste amiserant , eo pacto recuperari : sed se confidere Dei optimi Maximi auxilium reipub. non defuturum . demum ubi Iulius ira percitus fœderis capita scribi iussisset ; ne scribendo adessent , abierunt : quæ tamen postea capita scripta , & confecta sunt . id cum esset Venetias allatum ; literæ à Senatu datæ sunt ad legatos ; ne posthac his tractandis rebus interessent . Ioannes Medices Cardinalis , Iuliano fratre ciuitate regenda Florentiæ relicto , se Bononiam ad legationem suam contulit . arcisq; Brixie custos homo Gallus Regis sui iussu eam Hispanis ducibus inuitus tradidit . Iulius autem , Episcopo Curcensium in Cardinalium collegium adscito , quartum Lateranensi uocato concilio affuit . quo in concilio adesse Curcensis ; nisi prius literæ , quibus



bus aqua & igni Venetis interdiceretur, sibi essent traditæ; noluit. Roma deinde profectus est: cumq; in Galliam citeriorem uenisset; Maximiliani Sfortiæ Ludouici filii, qui se Mediolanum inferebat, socius comesq; itineris fuit. eo ingressu peracto Hispani Tretium, in Abduæ ripa oppidum commeatu, pecunia, rebusq; omnibus munitissimum, quod à Gallis tenebatur, ut & immani tormentorum uerberatione captum diripuerunt. Iulius interim Maximiliani obsequio amicior ei factus; qui suas copias Ferraria statim auocauerat; ut ei satisfaceret, Staphilæum Romani fori litium ministrum Venetias misit patres hortatum, ut fœderis conditiones acciperent. tametsi iam non nihil pœnitentia ducebatur, se in eos tam durum tamq; illiberalem fuisse. quod mehercule cum improbari maximorum hominum sermonibus intellexisset; qui dicerent, eam rem occasionem Venetis daturam, ut se cum Gallis coniungerent; eosq; in Italiam adduceret, quos ab Italia expellere Iulius in primis nitebatur: in dies singulos eius rei mœrore magis magisq; distractus neque cibum, neq; somnum capere poterat. itaq; febris tentari cœptus est. qua in febris cum Pisauri oppidum Metaurensum duci fratris sui filio tradidisset: & Cardinalium collegio urbem remq; publicam Christianam commendauisset; undecimo Calendas Martias mortem obiit. Senatus Cardinalium collegio literas dedit orans obtestansq; eos; ut in eligendo Pontifice totius orbis beneficio consulerent: suasq; opes omnes & exercitus ad eos iuuandos est pollicitus. qui cum se in conclaue more maiorum intulissent; Bernardi Bibienæ amabilissimi hominis magna ex parte studio, consiliis, & prensationibus diligentioribus permoti, Ioannem Medicem, annos natum triginta septem, Pontificem Maximum creauerunt. isq; prius, quam e conclaui exiret, me, & Iacobum Sadoletum, qui Romæ tunc eramus, sibi ab epistolis adsciuit.



REGISTRVM,  
ABCDEFGHIKLMNOPQRSTVXYZ  
abcdefghijklmnopqrstuxyz  
Aa Bb Cc Dd Ee



# E R R A T A.

Pagina 4. uerſi. 19. uictoria, uictoria.  
 9. uerſi. 3. terram. Cypriam. punctum eſt expungendū.  
 10. Verſi. 7. ſuppellectili, ſupellectili. p. ſolo.  
     V. 10. Paleologo, Palæologo, per æ.  
     V. 13. prætoriarum, pretioſarum.  
     V. 17. Meotis, Mæotis.  
     V. 6. a fine, induciæ, induciæ.  
     V. 17. diſtione, ditione.  
 16. V. 18. poſſe, poſſet.  
 16. V. 13. at regni, ad regni.  
 18. V. 5. recuſatum, recuſaturum.  
 18. V. 20. Bartholomeo, Bartholomæo.  
     V. 5. a fine pyratas, piratas.  
 19. V. 23. obiecto, Obiecto.  
 21. V. 20. ſuis ducibus, ſuis cum ducibus.  
 22. V. 11. a fine, Neapolitana. deeſt, arce.  
 A ter. V. 8. militumq̃.  
 30. V. 9. a fine Gaeta, Caieta.  
     V. 5. a fine, Entimelium, Intemelum. i. Albiū  
     Intemelum nunc ulntimilia.  
 33. V. ultimo, Enaria, Aenaria, cum Plinio.  
 37. V. 9. Hydruntum, ymallem Hydruntem.  
 39. ob, ab.  
 Eadem. ad finē. Ludouicus, cū. ſine cōmate legendū.  
 42. producere, perducere.  
 Eadem. V. 4. cohorta, coorta.  
     V. 7. Teani, Theani.  
 46. V. 30. cedere te. dele, te.  
     V. ultimo, uelint ſi Decēuiri. ſi Decēuiri uelint.  
 49. naues, uacat.  
 54. V. 17. collegijs ſententijs, collegij ſententijs.  
 58. V. 7. ociffime, ociffime.  
 59. quorum, quarum.  
 59. V. 15. tum præfectis, cum præf.  
 61. V. 11. explorari, exploratum.  
 62. V. 2. excitum, exitum.  
 63. V. 3. a fine, Nonium, Nouium.  
 66. quo in numero erant etc. deeſſe triremes 70.  
 67. V. 13. a ſi. Bizantium, Byzantium.  
 68. ſequi, ſeq̃. ijs nauibus, ijs cum nauibus.  
 69. cum illi. dele, cum.

69. mitterentur neſcio: quo. mitterentur: neſcio quo.  
 69. V. 4. a fine, committeret, committerent.  
 71. V. 13. Corno, Como.  
 73. V. 21. Pilon. Pylon.  
 75. V. 10. Eginam, Aeginam.  
 75. V. 3. Samo Thraciam, Samothraciam.  
     V. 9. Caristo, Caryſto.  
 78. V. 4. auri totidem, an itidem?  
 84. V. penultimo geſtant, geſtat.  
 84. V. 24. maximaq̃, maximeq̃.  
     V. 4. a fine, cepta ſunt, cœpta ſunt.  
 85. V. 6. ab ahænis, ahænis.  
 80. V. 17. homines imperio, homines in imp.  
     V. 17. Ethiopici, Aethiopici.  
 86. V. 10. Rhodum uerſi. Rhodum uerſus.  
     V. 9. Trax, Thrax.  
 89. V. 11. aditis, adytis.  
 90. V. 8. mediocrium, mediocrium.  
 95. V. 25. Chryſtophorum, Chriſtophorum.  
 96. V. ultimo, Arcangelianum, Archangelianum.  
 109. V. 2. Fanatici ſinus, Phanatici ſinus.  
 110. V. 10. chyrographo, chirographo.  
 111. V. 3. ludem, laudem.  
 115. V. 1. id omni, id omne.  
 119. V. 11. miſſis etiam Pannoniam, uidetur deeſſe  
     præpoſitio, in.  
 119. V. 22. quingentibus, quingentis.  
     V. 23. fortes uires, fortes uiros.  
 124. V. 22. Dyonifio, Dionyſio.  
 130. V. primo, etentos, retentos. V. 8. quod, quod.  
     V. ultimo, reſtitutus, reſtitutus.  
 132. V. 3. a fine, cummunibus, communibus.  
 133. V. 23. poſterisq̃: ius ciuitatem & eius comitiorū,  
     poſterisq̃: eius ciuitatē, & ius comitiorū.  
 138. V. 9. a fine, Luitio, Lucio.  
 140. V. primo, erat, erant. V. 16. Veroniens, Veroneſi.  
 141. V. 4. a ſi. captoq̃; municipiū, captoq̃; municipio  
 141. V. 9. appeteba, eadem, appetebat, eadem.  
     V. 6. a fine, Hippolitus, Hippolytus.  
 143. V. 10. a fine, ad muros Patavios, ad muros Pata-  
     uinos.


VENETIIS, APVD ALDI  
 FILIOS. M. D. LI.






WELLS, J. & SONS, LONDON.  
PRINTED BY J. WELLS, LONDON.





















26